

სერბო ღუმბაძე
ნიკოლოზ ღუმბაძე



დაუპიწყარი პედაგოგი

გათუბი – 2017



დაუვიწყარი კეღაბობი

სკენდერ ბაჯელიძის ცხოვრება და კეღაბობიური მოღვაწეობა

წიგნი ეძღვნება სკენდერ ბაჯელიძის დაბადებიდან 95 წლისთავს

ნაშრომში გაშუქებულია ქობულეთის რაიონის სოფელ ხუცუბნის მკვიდრის, აჭარის დამსახურებული მასწავლებლის, მეორე მსოფლიო ომისა და შრომის ვეტერანის სკენდერ ბაჯელიძის ცხოვრება და პედაგოგიური მოღვაწეობა.

აქვე მოკლედ დახასიათებულია ხუცუბნის ისტორია, მისი დემოგრაფიული სურათი, გამოთქმულია ავტორთა მოსახრება ბაჯელიძის გვარის წარმომავლობის, ეტიმოლოგიისა და გავრცელების გეოგრაფიის შესახებ.

წიგნი განკუთვნილია მკითხველთა ფართო წრისთვის, პირველ რიგში, მშობლებისა და შვილებისთვის, მასწავლებლებისა და მოსწავლეებისთვის.

ნაშრომი მომზადდა აჭარის დეპარტამენტის მუშაკთა პატივმიღებისა და მადლიერების საზოგადოების, იაკობ გოგებაშვილის სახელობის საქართველოს პედაგოგთა საზოგადოების აჭარის რესპუბლიკური ორგანიზაციისა და დავით მამულაძის სახელობის საზოგადოება „მოამბის“ ეგიდით.

რედაქტორი: ნოდარ ბასილაძე
პედაგოგიკის მეცნიერებათა დოქტორი,
პროფესორი

რეცენზენტები: 1. თემურ ბობიაძე
ბიოლოგიის მეცნიერებათა დოქტორი,
პროფესორი
2. აკაკი ზორიძე
პედაგოგიკის დოქტორი, პროფესორი



გამომცემლობა

„ბათუმის შოთა რუსთაველის სახელმწიფო უნივერსიტეტი“
ბათუმი – 2017

ISBN 978-9941-462-43-6

© „ბათუმის შოთა რუსთაველის სახელმწიფო უნივერსიტეტი“ – 2017



გონიერი კაცი იგივე წიგნია.
ილია



სკუნდარ ბაჯალიძე
აჭარის დამსახურებული მასწავლებელი,
ომისა და შრომის ვეტერანი
(1921-2005)

ადამიანის პიროვნებად ჩამოყალიბებაზე, საზოგადოებაში ღირსეული ადგილის დამკვიდრებასა თუ, საერთოდ, მის წარმატებებზე მრავალი ფაქტორი მოქმედებს. მათ შორის განსაკუთრებით გამოყოფდით ორს: პირველი – მშობლები, ოჯახი, მეორე – მასწავლებელი, სკოლა. ეს ორი ფაქტორი, თავად აღზრდის სუბიექტთან ერთად, ყოველთვის მოქმედებს. ფუნქციური დატვირთვის თვალსაზრისით, მათი როლი მეტნაკლებად განსხვავებულია. მასწავლებლის, სკოლის როლი, მათი მიზანი და ამოცანები ვიგრძენით გასული საუკუნის შუა ხანებში, როცა სწავლა დავიწყეთ სკოლაში. ეს იყო დიდი სამამულო ომისა და ომის შემდგომი პერიოდი, 1945-1956 წლები. ქვეყანა მიყენებულ ჭრილობებს იშუშებდა, დანგრეულს აღადგენდა. ფაშიზმზე გამარჯვებული ხალხი მშვიდობიანი მომავლის იმედით ცხოვრობდა და შრომობდა, იტანდა ათას გაჭირვებას, სჯეროდა ხვალინდელი დღისა.

უჭირდა სკოლასაც, მაგრამ მას ფარ-ხმალი არ დაუყრია, გრძნობდა დიდ სახელმწიფოებრივ, საზოგადოებრივ და ზნეობრივ მოვალეობას ერისა და ქვეყნის წინაშე; ენერჯის დაუზოგავად, უშურველად და ერთგულად ემსახურებოდა ქვეყანას, საზოგადოებას; სამშობლოს უზრდიდა ღირსეულ თაობებს, რომელთაც უნდა გაეგრძელებინათ მამა-პაპათა „საქმენი საგმირონი“.

სკოლები ფუნქციონირებდა, მასწავლებლები მუხლ-ჩაუხრელად მუშაობდნენ, მაგრამ, ქვეყნის მძიმე მდგომარეობის გამო, მათ აკლდათ სათანადო მატერიალურ-ტექნიკური ბაზა, ინფორმაციის ტექნიკური საშუალებები, სახელმძღვანელოები, სასწავლო ნივთები. ტექნიკური და საკომუნიკაციო



საშუალებები მწირი იყო, ან თუ იყო, ისიც ცენტრებში. პერიფერიებში, მით უფრო მთიან სოფლებში, იშვიათობა იყო. იგი ფუნქციონირებდა რაიონულ, საუკეთესო შემთხვევაში, სასოფლო საბჭოების ადმინისტრაციულ ცენტრებში. იმ ხანებში ეს დიდ მიღწევად ითვლებოდა. ანალოგიური სურათი იყო რადიომომსახურებაშიც. ზამთრის პირობებში, დიდთოვლობის დროს, მწყობრიდან გამოდიოდა სატელეფონო თუ რადიოხაზები. მათი აღდგენა კი, დიდი თოვლისა და უზორობის გამო, ჭიანურდებოდა. სატრანსპორტო საშუალებების არარსებობის გამო, რაიონული ცენტრიდან სოფლებში ფოსტას ეზიდებოდნენ ზურგით, საუკეთესო შემთხვევაში, ცხენით და ბევრჯერ დიდი დაგვიანებით. ერთი სიტყვით, ინფორმაციის გავრცელების ინტენსიური ისეთი საშუალებები, როგორც დღესაა (ტელევიზორი, კომპიუტერი, მობილური ტელეფონი და ა.შ.) იმხანად არ იყო.

მაშინ ჩვენთვის, ახალგაზრდებისთვის, ყოველგვარი ინფორმაციის საშუალება იყო სკოლა, მასწავლებელი. მასწავლებლის სიტყვა იყო პირველი წყარო, მისი პირველი მაგალითი – ზნეობრივი გაკვეთილი. ამიტომაც გვიყვარდა, გვჯეროდა და ვუსმენდით მას. მასწავლებლის სიტყვა ჩვენთვის იყო კანონი. პოეტი ამას მხატვრულ ფერებში დიდებულად გამოთქვამს:

*„მასწავლებელი – გზა სამერმისო,
მასწავლებელი – იმედის ხიდი,
მასწავლებელი – სინათლის დედა
ქვეყნად მეგ ზური ყველაზე დიდი.“*

ქართველი კლასიკოსი პოეტის, იოსებ ნონეშვილის სიტყვებით რომ ვთქვათ, „ქვეყნად ბელადიც არა ყოფილა, მასწავლებელი რომ არა ჰყოლოდა“. ამიტომაც, მიგვაჩნია, რომ მშობლების შემდეგ, ცხოვრებაში ყველაზე დიდი ფიგურა მასწავლებელი, პედაგოგია, მისგან ბოძებული მარგალიტებით დაშთენილნი არიან თაობები. ცოდნის, სწავლა-გა-

ნათლების ჩირაღდანი მასწავლებელია. იგი ცხოვრების განვითარების ყველა ეტაპზე საზოგადოებაში მონუმენტური ფიგურაა.

ჩვენი თაობის ვალია, კარგად გვახსოვდეს და არასდროს დავივიწყოთ ჩვენი მასწავლებლის, ოსტატის დეაწლი და ამაგი, ჩვენზე ზრუნვაში თეთრად გათენებული ღამეები, დავაფასოთ მათი შრომა, დახარჯული ენერგია. რა თქმა უნდა, ამ შრომასა და ენერგიას ფულით ვერ გადავუხდით, თუ ჩვენ ბოლომდე გავყვებით მათ რჩევა-დარიგებებს, გავყვებით მათ ნათელ კვალს, ცხოვრებაში დავიკავებთ ღირსეულ ადგილს, კეთილსინდისიერად მოვემსახურებით ქვეყანას, სამშობლოს, საზოგადოებას, მაშინ ანაზღაურდება არა მარტო მშობლების, არამედ აღმზრდელ მასწავლებელთა შრომაც და ენერგიაც. მხოლოდ მაშინ ვიქნებით ჩვენ, მოსწავლეები, მშობლებისა და მასწავლებლების წინაშე და ქვეყნის წინაშეც ვალდებულნი. მაგრამ, ჩვენი აზრით, ესეც არ არის საკმარისი. საზოგადოებაში ღირსეული ადგილის დაკავებასთან ერთად, ჩვენ არ უნდა დაგვავიწყდეს მასწავლებელთა კეთილი საქმეები და ნათელი სახელები.

ზეპირი გადაცემებით თუ წერილობითი ფორმით მათი წმინდა სახელები უნდა შემოვუნახოთ და გადავცეთ მომავალ თაობებს, როგორც ორიენტირი მათთვის რთული ცხოვრების ლაბირინთებში გზის გაკვალვისთვის.

ჭკვიან კაცს უთქვამს, ჩვენი ვალია, ახალ თაობებს საწვრთნელად გადავცეთ წინაპართა მემკვიდრეობა, რამეთუ მათ პირუთენელი სიდიადე არა მარტო საამაყო საზომია ჩვენი ეროვნული დონისა, ხოლო ნადვაწი ბაზისია იმისა, რაც თუ ჩვენამდე დღემდე მოსულა, არამედ მაგალითი, თუ როგორ თავდაუზოგავად ემსახურო ქვეყანას, რომ შეძლო განამტკიცო, განაგრძო ბალავარი, რომელზეც უნდა დააშენო მისი მომავალი და საპატიო ადგილი დაიკავო ისტორიაში.



ეს სიტყვები ეხება ყველა ჩვენს დიდ წინაპარს და მათ შორის მასწავლებელს, რომლის თავდადებული შრომის მაგალითის გარეშე არავინ იზრდება, არც ერთი დარგის ჭეშმარიტი სპეციალისტი არ ყალიბდება. მაშასადამე, წინაპართა შორის ერთ-ერთი ყველაზე დეაწლმოსილი პიროვნებაა მასწავლებელი, რომლის დაფასება ჩვენი მომავალი თაობების ვალია. ეს იმის მომასწავებელი იქნება, რომ მასწავლებელთა შრომას უკვალოდ არ ჩაუვლია, გაწეულ ჯაფას შედეგი გამოუღია. კიდევ ერთხელ მტკიცდება ჭეშმარიტება, რომ „რასაც დასთეს, მასვე მოიმკი“, რომ „აწმყო, შობილი წარსულისაგან, არის მშობელი მომავლისა“, ან კიდევ „წარსული საძირკველია ნამყოსი, როგორც აწმყო მომავლისა.“

მიგვაჩნია, რომ ეს ცხოვრების აქსიომური ჭეშმარიტებაა და ჩვენ მისი ერთგული და მონა-მორჩილი გახლავართ. არამცთუ ზეპირად, არამედ შემოქმედებითი საქმიანობის ერთ-ერთი მიზანი და მიმართულება ჩვენთვის არის მასწავლებლების მიერ გაწეული ამაგის არდავიწყება, შეძლებისდაგვარად დაფასება. არაერთი საგაზეთო წერილი, საჟურნალო სტატია თუ ცალკე მონოგრაფია მივუძღვევით საზოგადოების მონუმენტურ ფიგურებს – მასწავლებლებს. აღნიშნავთ მათ დაბადების დღეებს ოფიციალურად, დროდადრო ვიწვევთ სტუმრად, ან ვსტუმრობთ მათთან, ვამხნევებთ, საპასუხოდ გამოვხატავთ იმ სიტბოსა და ყურადღებას, რის შედეგად ჩვენ დაეფრთიანდით და ღირსეული ადგილი დაეიკავეთ ცხოვრებაში. დეაწლის აღნიშვნა ადამიანს სიცოცხლეს თუ ვერ უხანგრძლივებს, უხალისებს კი...

წინამდებარე ნაშრომს ვუძღვნით ჩვენ საყვარელ მასწავლებელთა შორის ერთ-ერთ გამორჩეულს, ხულოს რაიონის ხიხაძირის საშუალო სკოლის სასწავლო ნაწილის გამგეს (1954-1959 წწ.), აჭარის დამსახურებულ მასწავლებელს,

შრომისა და ომის ვეტერანს, ხუცუბნელ სკენდერ ხუსეინის ძე ბაჯელიძეს, ამასთან, ვასრულებთ მის „ანდერძს“.

მართალია, იგი დღეს ჩვენს შორის არ არის, ვაღმოსდილი წავიდა და განისვენებს მშობლიურ ხუცუბანში, ბაჯელიძეთა საგვარულო სასაფლაოზე, მაგრამ ჩვენთან დარჩა მისი საამაყო სახელი და სანაქებო საქმე... ეს წიგნი მოგიტხრობთ მის საინტერესო, ზოგჯერ მძიმე, საბოლოოდ, წარმატებულ ცხოვრებასა და მოღვაწეობაზე.

მადლობას მოვასხენებთ მის ოჯახს, შვილებს, ძმასა და ძმების შვილებს, სანათესაო წრეს, მეზობლებს – ყველას, ვინც მხარში გვედგა ამ ნაშრომის შესაქმნელად.

თავს ბედნიერად ჩავთვლით და მიზანს მიღწეულად, თუ დაინტერესებული მკითხველი წინამდებარე ნაშრომს ისე მიიღებს და შეაფასებს, როგორც ამ ძნელ გზაზე მასწავლებელ-მოსწავლის ურთიერთობაში სიფრთხილით გადაღმულ ერთ პატარა, მაგრამ საჭირო და აუცილებელ ნაბიჯს.

**გეოგრაფიულ-სოციალური ბარემო,
გზარის გენეალოგია და ეტიმოლოგია**

*სადაც ვშობილვარ, გავზრდილვარ და მისროლია ისარი,
სად მამა-პაპა მეგულვის, იმათი კუბოს ფიცარი,
სადაც სიყრმითვე ვჩვეულვარ, ჩემი სამშობლო ის არი.
რაფიელ ერისთავი*

§1. მისი საგანე

აჭარის ავტონომიური რესპუბლიკის შავიზღვისპირეთი ცნობილია, როგორც კოლხეთის დაბლობის სუბტროპიკული ზონა. ჩაისა და ციტრუსის უხვმოსავლიანი პლანტაციებით განთქმული ქობულეთის რაიონი თავისი მრავალფეროვანი ინფრასტრუქტურითა და კლიმატური პირობებით




ქობულეთის რაიონი



აღიარებულია ზღვისპირა კურორტად და ცნობილია მთელს ქვეყანაში, და არა მარტო აქ.

სამწუხაროდ, დღეს ამ უნიკალური დარგების პლანტაციები მწყობრიდან გამოსულია, ტყეებად და ეკალ-ბარდებად გადაქცეულია. ალბათ, ეს დროის ბრალია, გარდამავალ პერიოდს ახლავს ასეთი სიურპრიზები. დარწმუნებული ვართ, მალე დადგება დრო, როცა მეურნეობის ეს დარგები, საკურორტო და ტურისტული სფეროების განვითარების პარალელურად, კვლავ აღორძინდება და მოსახლეობის მატერიალური უზრუნველყოფის წყარო გახდება. ამის ნათელი გამოხატულებაა, რომ უკვე დაიწყო და ხორციელდება აღმშენებლობის გრანდიოზული პროგრამები საქართველოში, მათ შორის, აჭარის ავტონომიურ რესპუბლიკაში და, კერძოდ, ქობულეთის რაიონში.



სუცუბნის თემი

მარადმწვანე ქობულეთის რაიონის სოფლებს შორის ერთ-ერთი გამორჩეულია ხუცუბანი, რომელიც შავი ზღვის სანაპიროდან, კერძოდ, ქ. ქობულეთიდან ორი კმ-თაა დაშორებული. იგი ქობულეთის დაბლობის გაგრძელებაზე, კინტრიშის ხეობაში, მდინარის ორივე მხარეზე გაშენებული და რაიონის ერთ-ერთი დიდი, ულამაზესი და თვალწარმტაცი სოფელია, რომლის ტერიტორია აღწევს სოფელ ქობულეთამდე. მაშასადამე, ხუცუბანი ორ ქობულეთს შორის მდებარეობს: აღმოსავლეთიდან სოფელი ქობულეთი ესაზღვრება, დასავლეთიდან – ქალაქი ქობულეთი, ჩრდილოეთიდან – სოფელი გვარა, სამხრეთიდან – სოფელი კვირიკე. ხუცუბნის ტერიტორია 14000 კვმ, მოსახლეობა შეადგენს 1655 კომლს 6350 მცხოვრებით, მათ შორის 55 ოჯახი ბაჯელიძეთა გვარისაა.

სოფელი ხუცუბანი სახელგანთქმული იყო არა მარტო მოსახლეობის შრომითი წარმატებებით, არამედ თავისი ისტორიული წარსულითაც.

როგორც ზემოთ ითქვა, ხუცუბნის ტერიტორია ისტორიული კოლხეთის შემადგენელი ზღვისპირა ნაწილია. იგი ძველთაღრიცხვის II ათასწლეულის დასასრულს ჩამოყალიბდა. დიდი არქეოლოგიური გათხრების შედეგად მოძიებული ნივთიერი მასალების ანალიზიდან ირკვევა, რომ შავი ზღვისპირეთი, მათ შორის ქობულეთი, ცივილიზაციის მნიშვნელოვანი და საინტერესო არეალია. ისტორიული წყაროებით, მეცნიერთა კვლევა-ძიებით, განსაკუთრებით, არქეოლოგიური გათხრებით დგინდება, რომ ხელსაყრელი გეოგრაფიული და ბუნებრივი პირობების გამო, კოლხეთის სამეფოს პერიოდში ხუცუბანი დასახლებული ყოფილა და ადგილობრივი მოსახლეობა ფლობდა ლითონის დამუშავების ხერხებს. ამასთან დაკავშირებით ცნობებს გვაწვდიან ძველი აღმოსავლეთისა და ანტიკური ხანის ბერძენი მწერლები.

ხუცუბანმა ცნობილ მეცნიერთა და საზოგადო მოღვაწეთა განსაკუთრებული ყურადღება მიიპყრო მე-19 საუკუნის

80-იანი წლებიდან. აქ კვლევა-ძიება ჩატარებულია ექვთიმე თაყაიშვილს, გრიგოლ გურიელს, ფრანგ მეცნიერ-არქეოლოგ უან მურიეს.



ხუცუბნის ერთ-ერთი უბანი

ხუცუბნის ინტენსიური შესწავლა დაიწყო XX საუკუნის 20-იანი, კიდევ უფრო ინტენსიურად კი 40-იანი წლებიდან, კერძოდ, 1944 წელს, როცა ჯერ კიდევ გერმანია-საბჭოთა კავშირის ომი დამთავრებული არ იყო. აქ ისტორიკოს ავთანდილ იოსელიანის ხელმძღვანელობით ჩატარდა არქეოლოგიური გათხრები. ნაპოვნი მასალებით გაკეთდა დასკვნა იმის შესახებ, რომ კინტრიშის ხეობის, კერძოდ, ხუცუბნის მკვიდრნი, იმ დროს ბრინჯაოდან რკინის წარმოებაზე გარდამავალ პერიოდში იმყოფებოდნენ, რომ რკინა თანდათანობით ცვლიდა ბრინჯაოს იარაღს.¹

¹ ავ. იოსელიანი, ნარკვევები კოლხეთის ისტორიიდან, თბ., 1973.



ხუცუბნის შესახებ საინტერესო ცნობებს გვაწვდის მე-18 საუკუნის გამოჩენილი მეცნიერი, გეოგრაფი და ისტორიკოსი ვახუშტი ბატონიშვილი.¹ აქ მდებარეობდა და მოქმედებდა მთელ ხეობაში განთქმული ეკლესია თეთროსანი,² რომელიც ქრისტიანული საეკლესიო კულტურის ცენტრი იყო.

ხუცუბნის ტერიტორიაზე ნაპოვნი მრავალფეროვანი არქეოლოგიური მასალებით დაინტერესდა აკადემიკოსი ნიკო ბერძენიშვილი. მან ხუცუბნის ველი შეადარა „გადაშლილ წიგნს, რომელშიც ჩვენს წინაპრებს თავის თავგადასავალი ცხოვლად ჩაუწერიათ“.³

ცნობილია, რომ მთელი საქართველო, მათ შორის, აჭარა, განიცდიდა უცხო დამპყრობთა გამუდმებულ შემოსევებს. ამ მხრივ არც ხუცუბანი იყო გამონაკლისი. რუსეთ-თურქეთის ომების დროს და მანამდეც, ეს სოფელი, როგორც სტრატეგიულად მნიშვნელოვანი უბანი, გამოყენებული იყო მტრის წინააღმდეგ, თუ მტრების მიერ მისი დაკავების შემდეგ ადგილობრივი მოსახლეობის დასაპყრობად გაშლილი ბრძოლის პლაცდარმად. ამ მხრივ განსაკუთრებით ცნობილია რუსეთ-თურქეთის 1877-1878 წლების მოვლენები.

ხუცუბნის შესახებ მცირე მოცულობის ნაშრომი გამოსცა ისტორიის მეცნიერებათა დოქტორმა, პროფესორმა შოთა ჯაფარიძემ.⁴ მასში საუბარია ხუცუბნის ისტორიულ წარსულზე, მოსახლეობის შრომით მიღწევებზე, გასული საუკუნის 20-60-იანი წლებში. განსაკუთრებით წარმოჩენილია დიდი სამამულო ომისა და მისი შემდგომი პერიოდი, როცა სოფელს თავკაცობდა საბჭოთა კავშირის უმაღლესი საბჭოს ორგზის დეპუტატი, ორდენოსანი ვლადიმერ ბაჯელიძე.

¹ ვახუშტი ბაგრატიონი, აღწერა სამეფოსა საქართველოსი, თბ., 1997.
² რ. სურმანიძე, თეთროსანი, გამომც. „ალიონი“, 2007.
³ ნ. ბერძენიშვილი, საქართველოს ისტორიის საკითხები, VIII, თბ., 1990.
⁴ შ. ჯაფარიძე, ორდენოსანი ხუცუბანი, გამომც. „საბჭოთა აჭარა“, ბათ., 1969.



ხუცუბნის თემის ადმინისტრაციული შენობა

კინტრიშის ხეობის, მათ შორის, ხუცუბნის, მეცნიერული შესწავლა უფრო წარმატებული და ეფექტური გახდა 1958 წლიდან – საქართველოს მეცნიერებათა აკადემიის მრავალპროფილიანი ბათუმის სამეცნიერო-კვლევითი ინსტიტუტის დაარსების შემდეგ. მას სათავეში ჩაუდგა ქობულეთის მკვიდრი, ისტორიის მეცნიერებათა კანდიდატი, დოცენტი ასლან ინაიშვილი, ხოლო მისი გარდაცვალების შემდეგ – საქართველოს მეცნიერებათა აკადემიის წევრ-კორესპონდენტი, ისტორიის მეცნიერებათა დოქტორი, პროფესორი დავით ხახუტაიშვილი – ცნობილი ისტორიკოსი და განთქმული არქეოლოგი. ინსტიტუტის კოლექტივმა ნახევარსაუკუნოვანი ისტორიის მანძილზე დიდი მუშაობა გასწია აჭარისა და მისი მიმდებარე მხარეების ისტორიის, არქეოლოგიის, ეთნოგრაფიის, ფოლკლორის, დიალექტოლოგიის, სოციოლოგიისა

და ეკონომიკის შესასწავლად. ამ ინსტიტუტის კოლექტივის დიდი დამსახურებაა აჭარაში და განსაკუთრებით ფიჭვნარში გრანდიოზული არქეოლოგიური გათხრების ჩატარება (ხელძღვანელები: დ. ხახუტაიშვილი, ა. კახიძე). ბოლო წლებში ფიჭვნარში არქეოლოგიური გათხრებით დაინტერესდნენ უცხოელი მკვლევრებიც – ინგლისელი და გერმანელი არქეოლოგები, რომლებიც, ქართველ მეცნიერებთან ერთად, კვლავაც აგრძელებენ აქ კვლევა-ძიებას. მათ ერთობლივად გამოსცეს არაერთი ნაშრომი.¹ არაფერს ვამბობთ ქართველ მკვლევართა მიერ გამოცემულ სხვა ნაშრომებზე.

ბათუმის ნ. ბერძენიშვილის სახელობის სამეცნიერო-კვლევითი ინსტიტუტის დაარსებით უფრო გაფართოვდა მანამდე აჭარაში მომუშავე მეცნიერ-მკვლევარების (ბათუმის პედაგოგიური ინსტიტუტის პროფესორ-მასწავლებელთა და აჭარის სახელმწიფო მუზეუმის (ყოფილი დირექტორი ხ. ახვლედიანი) მეცნიერ-მუშაკთა მიერ დაწვებული სამხრეთ-დასავლეთ საქართველოს, კერძოდ, აჭარის ისტორიის კვლევა-ძიება. მათი დამსახურებაა ისიც, რომ დაიწერა და გამოიცა სამხრეთ-დასავლეთ საქართველოს ისტორიის ნარკვევები, აჭარა – ოთხტომეული, რომლის პირველი ტომი (უძველესი დროიდან ახ. წ. V საუკუნემდე) გამოქვეყნდა 2007 წელს, მეორე ტომი (V საუკუნე – 1877 წელი) – 2009 წელს, მესამე ტომი (ბათუმის ოლქი – 1877-1920) – 2008 წელს და, ბოლო, მეოთხე ტომი (1921-1990) – 2012 წელს.²

აღნიშნულ ნარკვევებში მდიდარი და საინტერესო მასალებია შეტანილი. აჭარის სხვა რეგიონებთან ერთად, სოფელ ხუცუბნის შესახებ დაინტერესებული მკითხველი ბევრ უნიკალურ მასალას ნახავს მასში.

¹ კახიძე ამირან, ვიკერსი მაიკლ, ფიჭვნარი 1 (კოლხები და ბერძნები აღმოსავლეთ შავი ზღვისპირეთში), ბათუმი-ოქსფორდი, 2004, გვ. 15, (ქართულ და ინგლისურ ენებზე).
² სამხრეთ-დასავლეთ საქართველოს ისტორიის ნარკვევები, აჭარა, ოთხტომეული, 1, 2, 3, 4, ბათუმი, 2007, 2009, 2008, 2012.

საინტერესოა ამ სოფლის სახელწოდების ეტიმოლოგია. იბადება კითხვა: ვინ უწოდა მას ეს სახელი და როდის?



სოფელ ხუცუბნის თემის ცენტრი

ამასთან დაკავშირებით არსებობს სხვადასხვა მოსაზრება, ზოგჯერ ურთიერთგამომრიცხავიც.

ჩვენი აზრით, ამ ტოპონიმის ახსნა, პირველ რიგში, უნდა ვეძებოთ თვით სოფელში, ხუცუბნელთა შორის. მოსახლეობაში შემორჩენილია გადმოცემა ამ ტოპონიმთან დაკავშირებით. ეს გადმოცემა ხუცუბნის საშუალო სკოლის ისტორიის მასწავლებელს ტიტე ფხაკაძესა და სკოლის დირექტორს ეთერ ბაჯელიძეს, სოფლის ისტორიის ჩანაწერებში აქვთ შეტანილი და ინახება აღნიშნული თემის საკრებულოში. ამ ლეგენდის მიხედვით და ხუცუბნის საკრებულოში, ქობულეთის რაიონული საკრებულოს ყოფილი რწმუნებუ-



ლის, ბატონ ზურაბ ბაჯელიძის გადმოცემით, ამ სოფელში (დღევანდელ ბაჯელიძეთა უბანში) უძველეს დროში აუშენებიათ ეკლესია, რომელსაც რქმევია წმინდა ელიას¹ ეკლესია. მღვდელმსახური ყოფილა გურიიდან მოსული პიროვნება, გვარად ნათიძე (სახელი უცნობია). ეს ორი გვარი დღესაც ცხოვრობს ხუცუბანში და ისინი ითვლებიან ძირძველ გვარებად.



ხუცუბნის (წმ. ელიას) ეკლესია

წმინდა ელიას ეკლესიის² მიდამოებში ცხოვრობდა მოსახლეობა. მათ შორის, ბევრი უხუცესი, ხანდაზმული პი-

¹ მ. ქამადაძე, ტოპონიმია, სამხრეთ-დასავლეთ საქართველოს ისტორიის ნარკვევები, აჭარა, 1, ბათ., 2007, გვ. 63.

² წმინდა ელიას ეკლესია დანგრეულ იქნა უცხო ტომთა შემოსევების დროს, განსაკუთრებით რუსეთ-თურქეთის ომის პერიოდში. დარჩენილი იყო მისი ნანგრევები. სოფელმა ბოლო წლებში მოინდომა მისი აღდგენა, მაგრამ ფინანსური შესაძლებლობა არ გააჩნდა.

ქვეყანაში კეთილ აღამიანებს რა გამოლევს (ღმერთმა უფრო გაამრავლოს მათი რიცხვი, უთქვამთ ჩვენს წინაპრებს). სწორედ ასეთი ქველმოქმედი აღმოჩნდა თბილისელი ქალბატონი მერი სადრაძე. ის ხშირად სტუმრობს ხუცუბანში ბაჯელიძეთა ოჯახს. როცა დაინახა ამ ეკლესიის ნაშთები – ნანგრევები, დაინტერესდა ეკლესიის ისტორიით და ითავა მისი აღდგენა. საინტერესოა, რამ უკარნახა მას ეს ქველმოქმედება? რა მოტივაცია ჰქონდა ამ ქალბატონს? რა თქმა უნდა, ჩვე-

როვნება ყოფილა. ამიტომ ამ დასახლებას უხუცესების, მოხუცების, ხუცების უბანი, ანუ „ხუცუბანი“ უწოდეს. ლეგენდა-გადმოცემის მიხედვით ისიც ირკვევა, რომ „ხუცი“ არ ნიშნავს „ხუცესს“, ანუ დღევანდელი გაგებით, მღვდელმსახურს (როგორც, მაგალითად, იყო იაკობ ხუცესი). აქ იგულისხმება ჭკუასაკითხავი პიროვნება, ბერი, მოხუცი (არა რელიგიური დატვირთვით, არამედ საერო შინაარსით). ლეგენდა რომ ტერმინის საერო დატვირთვის სასარგებლოდ მეტყველებს, შემდეგი გადმოცემიდან ჩანს: უხუცესთა შორის ყოფილა ერთი ხუცი, მოხუცი, მას ჰყოლია სამი ვაჟიშვილი. ოთხივენი შესანიშნავი მომღერლები, მგალობლები ყოფილან. მათ გარეშე არც ქორწილი ტარდებოდა და არც გლოვა სრულდებოდა, იცოდნენ სამხიარულო-საქორწილო და სამგლოვიარო-საზარო სიმღერებიც. განსაკუთრებით კარგად ასრულებდნენ „ხასანბეგურას“. ისინი სოფლის ერთ-ერთ ღვინზე მიუწვევიათ. მამა – ხუცი, თავისი ბანით (მუსიკალური ხმით) განთქმული, შეუძლოდ ყოფილა, ვერ წასულა და შვილები გაუგზავნია. მათ იქ ბევრი სიმღერა შეუსრულებიათ. ბოლოს საზოგადოების თხოვნით „ხასანბეგურაც“ შემოუძახიათ, მაგრამ უხუცობა (ხუცის – მამის არყოფნა) დიდად დატყობია სიმღერას, განსაკუთრებით უფერულად

ნი აზრით, მისმა მაღალმა ზნეობამ, სიძველისადმი პატივისცემამ, სარწმუნოებისადმი ერთგულებამ, დიდბუნებოვნებამ, კეთილშობილებამ, ქართველი პატრიოტი მანდილოსნისათვის დამახასიათებელმა სისპეტაკემ, წინა და უფროსი თაობების ნაშრომ-ნაჯაფისადმი სიყვარულმა, ერთგულებამ, პატივისცემამ და მიმტვევებლურმა ხასიათმა. საქმე ისაა, რომ მისი შვილი შემთხვევით შემოაკვდა ვიღაც პიროვნებას. დედამ არ იღავა და შეუნდო მკვლელს ჩადენილი ცოდვა (როგორ ჰგავს ეს „ვეფხისტისა და მოყმის“ ლეგენდას!), ძაძებში გახვეული დედა ეკლესიური, მიმტვევებელი გახდა (აფერუმ, თქვენს ქალობას, რწმენას, დიდსულოვნებას, ქალბატონო მერი). მან ნახა სპონსორი (მაგრამ ვინ, არ ვიცით. ჩვენი აზრით, ესეც მათ დიდსულოვნებაზე, კეთილშობილებაზე, მაღალსულიერებასა და ეროვნულობაზე მიუთითებს) და ასე, ამ გზით ძველ ფესვებზე აშენდა ახალი და რესტავრირებულ იქნა ეკლესია, სიძველის შენარჩუნებით.



მოქვენათ სიმღერის ბანი. სიმღერის მოსმენის შემდეგ ვი-
დაცას გულისტკივილით უთქვამს: „ჰაიკიდი, ხუცის ბანი“,
ე.ი. ინატრეს მამის – ხუცის (მო-ხუც-ის) ბანი.

ცხადია, ლეგენდა შინაარსით საინტერესოა, მაგრამ ის
ვერ ხსნის ეტიმოლოგიას. თუ ჩვენ ლეგენდას დაუფჯერებთ
და სოფლის სახელწოდება-კომპოზიტიში მეორე ნაწილს ბან-
ად მივიჩნევთ, მაშინ ავცდებით ჭეშმარიტებას. კომპოზიტის
(ხუცუბანი) მეორე ნაწილია „უბანი“ და არა „ბანი“. ეს ორი
სიტყვა ბგერათა შედგენილობით (ოთხი ასო) ერთნაირია.
მაგრამ სხვადასხვა დატვირთვა და შინაარსი გააჩნიათ. „ბა-
ნი“ მუსიკალური, ხოლო უბანი – ზოგადი გეოგრაფიული
სახელია. ბანის უბნად აღიარება თუ მიჩნევა, ჩვენი აზრით,
უმართებულოა. გარდა ამისა, სოფლის სახელი გაცილებით
ძველია, „ხასანბეგურას“ სიმღერა კი თურქების შემოსევების
ისტორიას უკავშირდება. მაშასადამე, ქრონოლოგიური ფაქ-
ტორიც „ბანის“ წინააღმდეგ და „უბნის“ სასარგებლოდ ლა-
პარაკობს.

ამრიგად, ამ ლეგენდა-გადმოცემის მიხედვით, „ხუცუბ-
ნის“ ეტიმოლოგიური ახსნა, ანუ მისი „ბანთან“ დაკავშირე-
ბა, გამორიცხებულია.

სოფელში შემონახულია, აგრეთვე, ლეგენდა-გადმოცემის
სხვა ვერსიაც. ხუცუბნის ერთ-ერთი მკვიდრის, ხასან ბაჯე-
ლიძის (89 წლის ასაკში გარდაიცვალა) გადმოცემით, აქ
არაერთი ეკლესია არსებებდა. ერთ-ერთი მათგანი ყოფილა
ბაჯელიძეთა დასახლებაშიც. მასში ხუცები (მღვდელმსახუ-
რები) მოღვაწეობდნენ. ამიტომ სოფლის ამ უბანს და შემდეგ
მთელ სოფელს დაერქვა „ხუცუბანი“ (ხუცების უბანი). ამ
შემთხვევაში სიტყვა „ხუცები“, ხუცი საეკლესიო პირია და
არა საერო ტერმინი. ტოპონიმში „ხუცების უბანი“ პირველი
გამოყენებულია მრავლობით რიცხვში სიტყვა „ხუც-ებ-ი“,
რომლიდანაც ამოვარდა მრავლობითობის (ებ) და სახელობი-
თი ბრუნვის (ი) ნიშნები და დარჩა მისი ძირი. „ხუც“-ი. მას

შეუერთდა ტერმინი „უბანი“ და მიღებულია „ხუცუბანი“.
შეთანხმებული მსახღვრელ-სახღვრული, სადაც „ხუც“ მიღე-
ბულია „ხუცებიდან“, მსახღვრელია „უბნისა“, რომ იგი ხუ-
ცებს ეკუთვნის და არა მომღერლებს, „უბანი“ კი სახღვრუ-
ლია, განსახღვრულია გეოგრაფიული ზოგადი სახელი. მათი
შეერთება მოხდა ქართული გრამატიკის ერთობლივი კანო-
ნების საფუძველზე და მიღებულია სიტყვა „ხუცუბანი“.

ხასან ბაჯელიძის გადმოცემას რამდენადმე ამყარებს
პროფესორ ზურაბ ჭუმბურიძის თვალსაზრისი, რომელიც მან
გამოთქვა თავის ნაშრომში „რა გქვია შენ?“ მეცნიერი ემყა-
რება არა ლეგენდებსა და გადმოცემებს, არამედ მეცნიერ-
მკვლევართა მიერ ქობულეთში ჩატარებული არქეოლოგიური
გათხრებისას ხუცუბანში მოძიებული მასალების ანალიზის
შედეგებს. ის ამბობს: „არქეოლოგიური გათხრებით ირკვევა,
რომ ამ ადგილას მოსახლეობა ყოფილა ჯერ კიდევ ძვ. წელ-
თაღრიცხვის VII-V საუკუნეებში (2500-2600 წლის წინ), როცა
ჩვენი წინაპრები ბრინჯაოდან რკინის წარმოებაზე გადადი-
ოდნენ. თავისთავად ცხადია, რომ სოფლის სახელი ასე ძვე-
ლი არ შეიძლება იყოს, მაგრამ იგი არც მთლად ახალია.
პირველად იქნებოდა ხუცის-უბანი, რაც ხუცისის (მღვდელის,
ან გვარის უფროსის, მოხუცის) უბანს ნიშნავდა. აქედან მი-
ვიდეთ ხუცუბანი.“¹

ფოლკლორული, გრამატიკული და არქეოლოგიური მა-
სალების, მეცნიერული მოსაზრებების შეჯერების საფუძველ-
ზე, მივედით იმ დასკვნამდე, რომ ტოპონიმში „ხუცუბანი“
შედეგება ორი სიტყვისაგან („ხუც“ და „უბანი“ და არა „ბა-
ნი“). მათი შეერთებით მიღებულია „ხუცუბანი“ (ხუცების
უბანი), შინაარსობრივად დაკავშირებულია ეკლესიასთან,
მღვდელმსახურებასთან, ხუცებთან, უმთავრესად მოიაზრება
ბაჯელიძეთა უბანში არსებული წმინდა ელიას ეკლესია.
პროფ. ზ. ჭუმბურიძე ამ მოსაზრების პარალელურად დასაშ-

¹ ზურაბ ჭუმბურიძე, რა გქვია შენ? თბ., 1982, გვ. 174.



ვებად თვლის, რომ „ხუცი“ შეიძლება ხუცუბანსა და წარმართული თუ ქრისტიანობის დროინდელი პერიოდის რწმენა-წარმოდგენების გამომხატველ ტოპონიმთან (ელიაწმინდა, მარიამწმინდა) იყოს დაკავშირებული.

ელის ციხესა და სხვათა შესახებ საუბარია ფუნდამენტურ ნაშრომში „სამხრეთ-დასავლეთ საქართველოს ისტორიის ნარკვევები – აჭარას“ პირველ ტომში შეტანილ პროფესორ მიხეილ ქამადაძის სტატიაში „ტოპონიმია“¹ (და არა მარტო ამ სტატიაში). ნარკვევებში მითითებულია ქართულ მითოლოგიაში ცნობილ ლახარეს ორეულ ელიაზე, რომელიც ღმერთმა ცისა და ღრუბლების წინამძღვრად, სეტყვისა და წვიმის გამგებლად დაადგინა. მისი მრავალი საკულტო ადგილია საქართველოში, მათ შორის აჭარაში. წმინდა ელიას ვინაობა აჭარაში დავიწყებულია, თუმცა შემონახულია ქობულეთის რაიონში, მათ შორის ხუცუბანში. აქვე ახსნილია ტოპონიმი „თეთროსანი“, რომელიც სოფლების გვარა-ხუცუბნის საზღვარზე, მდ. აჭყვის ნაპირასაა. „თეთროსანი“ წარმართული ხანის ტოპონიმად მიჩნეულია. იგი დაკავშირებულია თეთრი გიორგის კულტთან. ამ სახელის ძირეული ნაწილია „თეთრ“. -ოსან- სუფიქსია, რომელიც დაერთვის არსებით სახელს, აწარმოებს ზედსართავ სახელს და აღნიშნავს რაიმეს მქონებლობას: მანდილ-ოსანი, გვირგვინ-ოსანი, ორდენ-ოსანი.² ასეთივე წარმოების ტოპონიმად თვლის თეთროსანს პროფ. მ. ქამადაძე.³ ამასთან დაკავშირებით საინტერესოა რ. სურმანიძის ნაშრომი „თეთროსანი“.⁴

პროფესორი ზ. ჭუმბურიძე ხუცესად, გვარის უფროსადაც ვარაუდობს. ჩვენ მისი მოსაზრების პირველ ვარაუდს მხარს ვუჭერთ, მეორე კი საეჭვოდ გვეჩვენება, რადგანაც

¹ მ. ქამადაძე, ტოპონიმია, იქვე, 63.

² ბ. ჯორბენაძე, გ. კობახიძე, ნ. მესხიძე, ქართული ენის მორფემების და მოდალური ელემენტების ლექსიკონი, 1988, გვ. 353;

³ მ. ქამადაძე, იქვე, გვ. 63.

⁴ რ. სურმანიძე, დასახ. ნაშრომი.

სოფელში შემონახული ლეგენდა-გადმოცემის მეორე ვერსიით ივარაუდება ხუცი-საეკლესიო პირად, რაც ანგარიშგასაწევია. აქედან გამომდინარე საბოლოოდ ხუცუბანი უნდა მივიჩნიოთ საეკლესიო ტერმინად, ანდა, თუ „ხუცს“ გვარის უფროსად დავუშვებთ, საბოლოოდ შეიძლება იმის თქმაც, რომ გვარის უფროსი თუ ეკლესიის მღვდელმსახური ერთი და იგივე პიროვნება უნდა ყოფილიყო.

სოფელ ხუცუბანს მძიმე წარსული ჰქონდა. იგი ბევრჯერ უცხოელ მოძალადეთა შემოსევებისა და ბრძოლების ასპარეზი გამხდარა, ამიტომ მოსახლეობა დუხჭირად ცხოვრობდა. როცა საქართველო და, მათ შორის ხუცუბანი, ახალი ცხოვრების მშენებლობას შეუდგა, სურათი რამდენადმე შეიცვალა. ეს სოფელი დაადგა კოლექტივიზაციის გზას. გლეხობა თანდათანობით გაერთიანდა კოლმეურნეობაში. დაინერგა ტექნიკა, გაიხსნა სკოლები, კულტურის ცენტრები, მომზადდა ადგილობრივი კადრები. სოფელმა მოკლე დროში თავი დააღწია ეკონომიკურ და კულტურულ ჩამორჩენილობას. განვითარდა სოფლის მეურნეობის ისეთი დარგები, როგორცაა: მეჩაიეობა, მეციტრუსეობა, მესაქონლეობა და სხვ. სოფელმა სახე იცვალა, ძველი ოდა-სახლები შეიცვალა ახალი კაპიტალური ორსართულიანი შენობებით. კეთილმოეწყო სოფლის ცენტრი, გაყვანილ იქნა გზები, გაშენდა სკვერები, აშენდა კაპიტალური საშუალო სკოლა, კულტურის სახლი, კლუბ-ბიბლიოთეკა, სპორტული მოედანი, ბავშვთა ბაგა-ბაღი, კინოდარბაზი და სხვა მრავალი.

სოფლის, ისე როგორც მთელი ქვეყნის, წინვლა-განვითარება შეაფერხა გერმანია-საბჭოთა კავშირის 1941-1945 წლების ომმა.

ხუცუბნელებმა თავი გამოიჩინეს ფაშიზმის წინააღმდეგ თავდადებულ ბრძოლებში. ხუცუბნიდან ბევრი ფროტზე წავიდა ფაშისტური გერმანიის წინააღმდეგ საბრძოლველად. მათ შორის შეიძლება დავასახელოთ: ასლან ბაჯელიძე, მი-



ხეილ ბაჟუნაშვილი, რიფათ ართმელაძე, ალექსანდრე (ალი) ბაჯელიძე, ალი ბერიძე, სკენდერ ბაჯელიძე, ოსმან ბაჯელიძე, პირველი აჭარელი ექიმი ქალი ხურიე მუავანაძე, სულეიმან ხაბაზი, ილიას თხილაიშვილი, ხასან ბაჯელიძე, იუსუფ თხილაიშვილი, ხუსეინ ბლადაძე, სულეიმან გოგიტიძე, იუსუფ მოწყობილი, სულეიმან ბაჯელიძე და სხვები. ისინი გამარჯვებულები დაუბრუნდნენ მშობლიურ კუთხეს და შემოქმედებით მშვიდობიან შრომაში ჩაებნენ.

ჰიტლერულ ურდოებს თავს რისხვად დაატყდნენ ძმები მემედ და ახმედ ბაჯელიძეები, რეზო და ნური მოწყობილები, დურსუნ და ზია თხილაიშვილები, იუსუფ ბაჯელიძე, მაგრამ, ვაი, რომ ბრძოლის ველზე დაეცნენ გმირთა სიკვდილით და ოჯახებს ვერ დაუბრუნდნენ. ჩრდილო კავკასიის ფრონტზე დაიღუპა რიფათ ბაჯელიძე, თევრათ ხაბაზმა კი, რომელიც კრასნოდარის მისადგომებთან იცავდა სამშობლოს თავისუფლებას, ძმათა საფლაოზე დაიმკვიდრა ბინა... ბევრია შინმოუსვლელი, ყველას, წიგნის შეზღუდული მოცულობის გამო, ვერ დავასახელებთ. ისინი 55-მდე არიან. მათ სახელებს ოჯახები, ნათესავეები, თანასოფლელები სათუთად ინახავენ და ყოველთვის პატივისცემით იხსენებენ. დღევანდელი ხუცუბნის წარმატებებში მათი დალოცვილი მარჯვენაც ურევია.

ომის შემდეგ, როგორც მთელმა ქვეყანამ, ხუცუბანმაც მოიშუშა ჭრილობები და სოფელში დაიწყო მეურნეობის აღმავლობა. ომისშემდგომ ათწლებში კოლმეურნეობა ჩადგა მილიონერთა რიგებში. ხუცუბნის კოლმეურნეობის საქვეყნოდ აღიარებული წარმატებები დაკავშირებულია სოფლის თავკაცის, სოფლის მეურნეობის საპატიო მუშაკის, საკავშირო უმაღლესი საბჭოს ორგზის დეპუტატის – ბატონ ვლადიმერ ბაჯელიძის სახელთან (მის შესახებ ვრცლად ქვემოთ).

ასე თანდათანობით გაიზარდა, გაფართოვდა და წინ წავიდა ხუცუბანი, როგორც ეკონომიკურად და კულტურულად, ისე დემოგრაფიულად. ასე, მაგალითად, გასული საუკუნის 20-იან წლებში ხუცუბანი (მაშინ გვარასთან იყო გაერთიანებული) წარმოდგენილი იყო 1500 კომლით და 4500 მაცხოვრებლით. სოფელი თავისი ფინანსური შესაძლებლობებით გახდა მილიონერი¹ კოლმეურნეობა. დღეს კი, მრავალი კატაკლიზმების გადატანის მიუხედავად, სოფელი ძალას იკრებს და ცხოვრება ნორმალურ კალაპოტში დგება; მართალია, ბევრია პრობლემა, მაგრამ საქართველოს ხელისუფლების მიერ სოფლის დახმარების პროგრამის ამოქმედებით სერიოზული ნაბიჯები იდგმება სოფლებში და მათ შორის სოფელ ხუცუბანში, სადაც დღეს, როგორც ზემოთ ითქვა, ცხოვრობს 1655 კომლი 6350 მცხოვრებით, რომელთა განკარგულებაშია 14 000 კვმ მიწის ფართობი.²

ამ სოფელს უმდეროდა სახელოვანი პოეტი, სულმნათი ჯემალ ქათამაძე ლექსით „ჩემი ხუცუბანი“. გთავაზობთ ზოგიერთ ადგილს ამ ლექსიდან:

*ხუცუბანი, ხუცუბანი, ჩემი ხუცუბანი,
 ალაგ ლურჯი, ალაგ მწვანე, გზები და უბანი...
 ხინოს მთიდან გადმოდგარი მზე ვით კიბორჩხალა,
 კინტრის პირს გადაშლილი ბაღები და ყანება.
 მოქათქათე ტყემლების და ყვავილების წყება,
 მოკრიალე ცის სარკეზე ვარსკვლავები წყდება...
 მაგრამ ძველად აქ რა იყო – ეკალი და ბარდი,
 იღვა შლამი და ჭაობი, ტკივილი და დარდი.*

¹ გაზ. „ლენინელი“, (ქობულეთის რაიონული გაზეთი), №111, 19 სექტემბერი, 1970, გვ. 1,2.
² ხუცუბნის თემის სარეგისტრაციო წიგნი.



...
*ახლა კი – ბაღებიდან, ყანებიდან მოვარდნილი „რერო“,
 ამ ბედნიერ დღეებს, მზიანს, როგორ არ ვუმღერო,
 ვით არ მივცე შრომის გუგუნს პოეტური ბანი
 და როგორ არ შევიყვარო ჩემი ხუცუბანი.*

§ 2. სოფლის ინტელიგენცია

„ინტელიგენცია“ ლათინური სიტყვაა. ლექსიკონში იგი ასეა განმარტებული: „საზოგადოების სოციალური ფენა, რომელიც შედგება გონებრივი შრომის მუშაკებისაგან, იმ პირთაგან, რომელთაც აქვთ განათლება და სპეციალური ცოდნა მეცნიერების, ტექნიკისა და კულტურის სხვადასხვა დარგში“.¹ ამის მიხედვით, არის სოფლის ინტელიგენცია, ქალაქის ინტელიგენცია, ტექნიკური ინტელიგენცია და სხვა.

სოფლად ოფიციალური ინტელიგენციის შესაფერისი სოციალური ფენის შექმნამდე მის ფუნქციას ასრულებდნენ გვარის, თემის, ტომის ბელადები და მათი გარემოცვა, შემდგომში – სოფლის გამოცდილი უხუცესები, ჭკვიანი, დაბრძენებული ადამიანები. ისინი თავიანთი გონიერებით განსაზღვრავდნენ გასაკეთებელ საქმეს, წყვეტდნენ საკითხებს, პრიმიტიულად, მაგრამ დროის შესაფერისად. მიუხედავად ამისა, ისინი იმ დროისთვის მაინც ინტელექტუალურ ფენას წარმოადგენდნენ. მაგალითად, ასეთები იყვნენ: ხელოსნები, დურგლები, ოსტატები, კალატოზები, მჭედლები, რაიმე დარგის ცოდნით შეიარაღებული პიროვნებები.

ძველად ოსტატს, რომელიც სახლს ააგებდა, არავითარი სპეციალური განათლება არ ჰქონდა, მაგრამ ის კარგად ერკ-

¹ ქართული ენის განმარტებითი ლექსიკონი, ერთტომეული, თბ., 1983, გვ. 250.

ვოდა სამშენებლო საქმეებში და ამისთვის, საჭირო გეომეტრიულ, არითმეტიკულ და ყოფით საკითხებში, სხვებისგან განსხვავებული თავისი გონებითა და არაკვალიფიციური ინტელექტუალური უნარით ინტელიგენციის როლს ასრულებდა. ეს უნდა მივიჩნიოთ ტექნიკური ინტელიგენციის ჩანასახად.

სპეციალური ინტელიგენციის ჩამოყალიბება დაკავშირებულია განათლებისა და კულტურის კერების შექმნასთან, სადაც ადამიანები შესაბამის განათლებას ღებულობენ და გადადიან საზოგადოების იმ სოციალურ ფენაში, რომელსაც ინტელიგენცია (ამ სიტყვის პირდაპირი გაგებით) ჰქვია. ამდენად ინტელიგენციის ჩამოყალიბებას საფუძვლად უდევს შრომის დანაწილება და განათლების კერების შექმნა.

ამ ზოგადი მსჯელობიდან გამომდინარე, ხუცუბანში სოფლის ოფიციალური ინტელიგენციის ჩამოყალიბებამდე, მის ფუნქციას ასრულებდნენ სოფლის ის პიროვნებები, რომლებსაც, სხვებისგან განსხვავებით, შეეძლოთ მოსახლეობის მართვა, ჭკუის დარიგება, საქმის ორგანიზება, გონებრივი შრომის მუშაკების ფუნქციის შესრულება. სოფლის მოსახლეობა მათ აკისრებდა ამ საერთო-სახალხო საქმეს და ემორჩილებოდა კიდევაც.

ხუცუბნის ინტელიგენციის ცენტრი გახდა, უწინარეს ყოვლისა, სკოლა და პედაგოგიური კოლექტივი, რომელმაც დიდი როლი შეასრულა სოფლის ახალგაზრდების სწავლა-აღზრდა-განათლებისა და სოფლის ინტელიგენციის, ადგილობრივი კადრების მომზადებაში.

როდის გაიხსნა პირველი სკოლა ხუცუბანში და ვინ იყო ინიციატორი? ამასთან დაკავშირებით, მოწონების ღირსია ხუცუბნელი სულეიმან ისმაილის ძე კაიკაციშვილის (გულო-აღა კაიკა-ციშვილის ძმისშვილი) ნარკვევი „მნიშვნელოვანი თარიღი“. მასში საუბარია ხუცუბანში პირველი ქართული სკოლის გახსნის შესახებ. ეს ნარკვევი-მოგონება



წინამდებარე წიგნის ავტორებს გადმოგვცა ჩვენმა მასწავლებელმა, აჭარის დამსახურებულმა პედაგოგმა, ხუცუბნის მკვიდრმა, სკენდერ ბაჯელიძემ. ამასთან დაკავშირებით, აღნიშნულ ნარკვევში ვკითხულობთ: „გულო კაიკაციშვილის ძმისშვილი, 10 წლის სულეიმანი (1903-1983), რომელიც საზოგადოების ხარჯით თბილისში სწავლობდა, 1914 წელს გიორგი ყაზბეგმა საცხოვრებლად საკუთარ სახლში წაიყვანა. თავად ხელმოკლე გენერალი მზრუნველობას არ აკლებდა მისთვის ძალზე კარგად ნაცნობი მხარის შვილს და, ალბათ, კიდევ დიდხანს ეყოლებოდა, რომ არა საზოგადოების მდივნის დავით კარიჭაშვილის გადაწყვეტილება. დავითმა კარგად იცოდა, რომ გიორგი ყაზბეგს თავადაც უჭირდა, ამიტომ მოგვიანებით სულეიმან კაიკაციშვილი მან თავის სახლში გადაიყვანა. ასეთი მშობლიური მზრუნველობით სულეიმანი განათლებულ ინტელიგენტად ჩამოყალიბდა და დიდხანს იღვაწა აჭარის სკოლებში. ჩვენს ხელთ არსებულ დოკუმენტებში სულეიმანი მოგვითხრობს: 1914 წელს „ქართველთა შორის წერა-კითხვის გამავრცელებელი საზოგადოების“ მიერ მე და მურად გუნთაიშვილი გაგზავნილი ვიქნით თბილისის ქართულ სათავადაზნაურო გიმნაზიაში, სადაც ჩავწერეს შესაფერის კლასებში. ყველაზე სიამით მინდა მოვიგონო 1915 წლის 23 დეკემბერს თბილისიდან არდადეგებზე სოფელში ჩამოსვლა“.



გულო-ადა
კაიკაციშვილი

ქობულეთში ჩამოსვლისთანავე, მურადი თავისიანებში წასულა, სულეიმანს კი ფეხით გაუწევია სახლისკენ (ხუცუბნისკენ – ავტ.), ამ დროს მას წამოწევია მგზავრებიანი ეტლი, რომელშიც, მეტლესთან ერთად, მსხდარან სამი ცილინ-



სულეიმან
კაიკაციშვილი

დრიანი, სიმპათიური ადამიანი. მათგან ერთ-ერთს გიმნაზიელის ფორმაში გამოწყობილი სულეიმანისთვის ქართულად უკითხავს: – სადაური ხარ, ყმაწვილო? მას უპასუხნია, რომ სოფელ სამებიდან (ხუცუბნის ერთ-ერთი ნაწილია – ავტ.) იყო. ეს ჭაღარა კაცი მისულა სულეიმანთან, აუღია მისი ხელბარგი და მეტლესთვის მიუწოდებია, თავად სულეიმანი კი წინ დაუსვამთ და გამგზავრებულან. როცა გაუგიათ, რომ იგი კაიკაციშვილი იყო, მაღალ

კაცს მისთვის უკითხავს, თუ ვისი შვილი იყო. სულეიმანის პასუხზე მას უთქვამს: „აბა, ჩვენი ისმაილის შვილი ხარ?“ როგორც შემდეგ გაირკვა, ჭაღარა კაცი იერემია გულისაშვილი ყოფილა, მაღალი კაცი – რეჯებ ნიჟარაძე, ხოლო მესამე – არსენ წითლიძე.

სულეიმანი მოგვითხრობს, თუ როგორ შეხვდნენ მისი თანდასწრებით სტუმრები ცენტრში მყოფთ, როგორ გააბეს მათთან ბაასი. მოითათბირეს და აუწყეს სოფელში პირველი ქართული სკოლის გახსნის განზრახვა.

ამას კარგად შეხვდნენ სოფლის მოწინავე ადამიანები: ახმედ და ასლან თამაზაშვილები, ძმები ახმედ, ხასან და ხუსეინ გოგიტიძეები, ისმაილ, ხუსეინ, ომერ, შუქრი, ხასან კაიკაციშვილები, ძმები რეჯებ და ოსმან მოწყობილები, ძმები ხუსეინ და სკენდერ მოწყობილები, დურსუნ და რამიზ თხილაიშვილები, ისინი ჩაებნენ საქმეში და მეზობელი ნინიძე შეითანხმეს სკოლისათვის მიწა მიეცა. შენობა იყიდეს ოზურგეთის მაზრის სოფელ ბახეში, ურმებით გადმოიტანეს და დადგეს. ქვევით პირველი სართული ქვა გააკეთეს, მეორე



სართული ხის შენობა იყო. სკოლა გაიხსნა 1916 წლის მარტში.¹

ამავე დღეს სკოლა გახსნეს ალამბარში, მანამდე მარტის პირველ რიცხვებში სოფელ ყოროლისთავში, ხოლო აჭარის დანარჩენ სოფლებში იმავე წლის მომდენო რიცხვებში.

ამგვარად, **ხუცუბანში პირველი სკოლის გახსნაში დიდი წვლილი მიუძღვის არსენ წითლიძეს, გულო-აღა და ისმაილ კაიკაციშვილებს, ერემია გულისაშვილს, რეჯებ ნიჟარაძეს, რომელთა ინიციატივითა და აქტიური მონაწილეობით სოფელში ჩამოყალიბდა განათლებისა და კულტურის პირველი კერა.** სკოლა მუშაობას შეუდგა ხუსეინ მოწყობილის ბინაში, მოგვიანებით კი, როგორც ზემოთ აღინიშნა, მოსახლეობამ შეიძინა ოთხოთახიანი სახლი ბახვში, გადმოიტანა და დადგა იგი სოფელში.

ხუცუბნის ქართული სკოლის მასწავლებლები იყვნენ: არსენ წითლიძე, მასთან ერთად თამარ დარეჯანაშვილი და ბაბო ბრეგვაძე. ახალგახსნილი სკოლები მუშაობდნენ 1917 წლის თებერვლის ბურჟუაზიულ-დემოკრატიულ რევოლუციამდე.

მართალია, მოსახლეობაში წერა-კითხვის უცოდინარობის ლიკვიდაციითა და ეროვნული ცნობიერების განმტკიცებით სკოლამ ბევრი რამ გააკეთა, მაგრამ ერთი ყვაველით გაზაფხული არ მოდის. დასახული დიდი ამოცანის გადასაწყვეტად ერთი ან ორი სკოლა საკმარისი არ იყო, საჭირო იყო მთელი ქვეყნის, მათ შორის, აჭარის მასშტაბით სკოლების გახსნა.

ეს ამოცანა ინტენსიურად და გლობალურად ხორციელდებოდა გასული საუკუნის 20-იანი წლებიდან, როცა დაიწყო განათლების ახალი სისტემის ჩამოყალიბება აჭარის

¹ აბ. სურგულაძე, პირველი ქართული სკოლა ხუცუბანში, ბათუმი, 1969.

ყველა სოფელში, მათ შორის ქობულეთის რაიონში და კერძოდ, ხუცუბანში, ფართოდ ინერგებოდა სწავლა-განათლება. მოსახლეობამ თავისი შვილები – ჭაბუკები და ქალიშვილები ჩააბა სწავლებაში. მალე პირველ ოთხკლასდამთავრებულებს პირველი რვაკლასდამთავრებულებიც დაემატნენ, ბოლოს – პირველი საშუალოგანათლებული ახალგაზრდებიც გამოჩნდნენ. ადამიანთა შეგნების დონე იქამდე ამაღლდა (ამას ცხოვრებაც კარნახობდა და მოსახლეობაც ნათლად გრძნობდა), რომ საკმარისი არ იყო საშუალო სკოლის დამთავრება, საჭირო იყო უმაღლესი განათლების მიღება, ადგილობრივი მოსახლეობისგან სათანადო სრულყოფილი კვალიფიციური სპეციალისტების მომზადება. ამრიგად, **სოფლის სკოლა იყო ის ბრწყინვალე ჩირადანი, რომელმაც გზა გაუხსნა ახალგაზრდობას საშუალო სპეციალური თუ უმაღლესი განათლების მისაღებად, ინტელიგენციის რიგების გასაფართოებლად.**

ასე თანდათანობით სკოლამ ნიადაგი მოამზადა, ხუცუბნელი ახალგაზრდები შეაიარაღა საშუალო განათლებით, საშუალო-ტექნიკურმა სასწავლებლებმა და ბათუმის შოთა რუსთაველის სახელობის სახელმწიფო პედაგოგიურმა ინსტიტუტმა (ამჟამად უნივერსიტეტი), შემდგომ თბილისის, ქუთაისისა და ბევრმა სხვა უმაღლესმა სასწავლებელმა საშუალო სკოლადამთავრებული ახალგაზრდებისგან მოამზადეს ცალკეული დარგის სპეციალისტთა არმია. ამის შედეგი იყო სწორედ ის, რომ ხუცუბნელთა რიგებიდან აღიზარდნენ: პედაგოგები, ექიმები, აგრონომები, ზოოვეტექნიკები, ტექნოლოგები, ინჟინრები, ეკონომისტები, იურისტები, სამხედრო სპეციალისტები, მეცნიერები, ხელოვნებისა და კულტურის დარგის მოწინავე ადამიანები, რომლებმაც თავი გამოიჩინეს სახალხო მეურნეობის ცალკეულ სფეროში, განათლების, კულტურის, მეცნიერების სხვადასხვა დარგში, როგორც ადგილზე, ხუცუბანში, ქობულეთის რაიონული

მმართველობის აპარატის შემადგენლობაში, ისე ავტონომიური რესპუბლიკის პარტიულ, სახე-ლმწიფო ორგანოებში თუ საზოგადოებრივ ორგანიზაციებში. თავდაუზოგავი შრომით ბევრი მათგანი გასცდა აჭარის ფარგლებს, ცხოვრობდა და მოღვაწეობდა თბილისში, მოსკოვში, ლენინგრადში და სხვა ქალაქში.



რეჯებ ნიშარაძე

აჭარაში პირველი უმაღლესგანათლებულები იყვნენ აღამბრელი რეჯებ ნიშარაძე, ბობოყვათელი იუსუფ ცივაძე, ხუცუბნელი სულეიმან კაიკაციშვილი, ხუსეინ ნაკაიძე, ხუსეინ ბექირიშვილი. ისინი თავიანთი პირადი თვისებებითა და საზოგადოებრივ-ეროვნული მოღვაწეობით მნიშვნელოვანი ადგილი დაიკავეს და თვალსაჩინო როლი შეასრულეს აჭარის მოსახლეობის ეროვნული ცნობიერების აღორძინება-განმტკიცებაში, კუთხის კულტურულ და ეკონომიკურ ცხოვრებაში. მათი მაგალითი გზას უნ-

ათებდა და სწავლა-განათლების წყურვილს უძლიერებდა მთელი კუთხის, ქობულეთის რაიონისა და სოფელ ხუცუბნის ახალგაზრდებსაც.

ხუცუბნელთათვის სტიმულის მიმცემი იყო ასლან იუსუფის ძე ბაჯელიძე (მასზე ქვემოთ).

გამოჩენილი მხედართუფროსი ასლან ბაჯელიძე ეკუთვნის იმ ქართველი საბჭოთა ოფიცრების პლეადას, რომელმაც მუშურ-გლეხურ არმიაში სამსახური საქართველოში საბჭოთა ხელისუფლების დამყარების პირველსავე წლებში დაიწყო.

თბილისის სამხედრო მეთაურთა სკოლაში არაერთი ახალგაზრდა ჩაირიცხა ქობულეთის რაიონიდან. ესენი იყვნენ:




ასლან ბაჯელიძე, ხუსეინ ბეჟანიძე, დურსუნ შავიშვილი, იუსუფ მეგრელიძე, ახმედ ვერულიძე, სულეიმან ინაიშვილი.

ხუცუბანი ამჟამად თავისი ღირსეული და სახელოვანი შვილებით. აი ისინი: ცნობილი პარტიული და სახელმწიფო მოღვაწე ალექსანდრე თხილაიშვილი, სახელოვანი იურისტი ჯემალ ბაჯელიძე, ეკონომიკის მეცნიერებათა დოქტორი, პროფესორი **ალექსანდრე (ალი) ბაჯელიძე**, გეოგრაფიის მეცნიერებათა კანდიდატები **ხუსეინ და ირაკლი ნაკაიძეები**, ბიოლოგიის მეცნიერებათა კანდიდატი, დოცენტი **ჯემალ მესხიძე**, ბიოლოგიის მეცნიერებათა დოქტორი, პროფესორი **თემურ გოგმაჩაძე**, მეცნიერ-მუშაკები: ილია ბაჟუაძე, აკაკი გოგოლიშვილი და სხვები.



ირაკლი ნაკაიძე



ჯემალ მესხიძე



თემურ გოგმაჩაძე

ვინ იყო ასლან ბაჯელიძე?

ასლან ბაჯელიძე იყო ხუცუბნელ ბაჯელიძეთა სახელოვანი წარმომადგენელი. იგი დაიბადა 1912 წელს ღირსებით სავსე პიროვნების იუსუფ ბაჯელიძის ოჯახში.

თერთმეტი წლის ასლან ბაჯელიძეს აუხდა ოცნება – ამერიკაკვასიაში სამხედრო პოლკის სკოლაში ჩარიცხეს. ბეჯითად სწავლით იმთავითვე მიიპყრო აღმზრდელ-მასწავლებელთა ყურადღება. ამ სასწავლებელში მასთან ერთად



სწავლობდა საქართველოს კომპარტიის ც.კ.-ის ყოფილი პირველი მდივანი ვასილ მუჟაანაძე.

1926 წელს ახალი კურსდამთავრებული ასლანი უკვე ოცეულის მეთაურია ქ. ბათუმში, პირველი მსროლელი ქართული დივიზიის მეორე პოლკში. აქ მან თავი გამოიჩინა, როგორც ენერგიულმა და უნარიანმა მეთაურმა. 1932 წელს კარგი მუშაობისთვის ასლანი იმავე პოლკის დაზვერვის ასეულის მეთაურად დააწინაურეს. მალე კაპიტნის ჩინით გადაიყვანეს სასწავლო ასეულის მეთაურად.



**პოლკოვნიკი
ასლან ბაჯელიძე
1912-1983**

1936 წელს, საქართველოს საბჭოთა ხელისუფლების დამყარების 15 წლისთავთან დაკავშირებით, ასლანი მოსკოვში გაგზავნეს საქართველოს მშრომელთა დელეგაციის შემადგენლობაში. დელეგაცია ქვეყნის ხელმძღვანელებმა მიიღეს კრემლში. ოფიცრის პროფესიაზე შეყვარებული ა. ბაჯელიძის სიკოხტავით, აღნაგობით და შემართებით დიდად მოიხიბლნენ ი. სტალინი და კ. ვოროშილოვი. მათ გვერდით მიიხმეს ასლანი, შემდეგ კი სამახსოვრო სურათიც გადაიღეს. საბრძოლო და პოლიტიკურ მომზადებაში მაღალი მაჩვენებლებისთვის ასლან ბაჯელიძე „საპატიო ნიშნის“ ორდენით დააჯილდოვეს.

1937 წელს ასლანი მოსკოვის ოფიცერთა სამხედრო სასწავლებლის კურსანტია, შემდეგ ერთ-ერთი სამხედრო შენაერთის მეთაური, პოლკის მეთაურთა სკოლის უფროსი, ბატალიონის მეთაური, პოლკის მეთაურის მოადგილე.

1939 წელს, როცა იაპონელები ვერაგულად თავს დაესხნენ მონღოლეთის სახალხო რესპუბლიკას, იგი თავისი მა-

მაცი მეომრებით მთელი 14 დღე-ღამის განმავლობაში გამირულად ებრძოდა იაპონელ სამურაებს, რომლებმაც არაერთხელ იგემეს ჩვენი მამაცი მებრძოლების ძლიერი დარტყმა. ომის დაწყების დღიდან, ასლანი მეთაურობდა სხვადასხვა პოლკს, შემდეგ 209-ე მსროლელი დივიზიის ერთ-ერთი პოლკის მეთაურად დანიშნეს და იაპონელთა დაჯგუფების მახლობლად გადაიყვანეს. მას დაავალეს დივიზიის პირადი შემადგენლობის საბრძოლო მომზადება. ფრონტისთვის რეზერვების უნარიანად მომზადებისთვის იგი სამამულო ომის მეორე ხარისხის ორდენით დააჯილდოვეს.

1943 წელს დეკემბერში ასლან ბაჯელიძე მე-17 არმიის 284-ე მსროლელი დივიზიის მეთაურად დააწინაურეს. დივიზიამ იაპონელთა წინააღმდეგ ბრძოლაში ისახელა თავი. 17 დღე-ღამეში ბრძოლებით გაიარა 1200 კმ, შეუძლებელი შეძლო და საბრძოლო დავალება ბრწყინვალედ შეასრულა, რისთვისაც უმაღლესი მთავარსარდლის – ი. სტალინის მაღლობა დაიმსახურა, დივიზიას ხონგანსკის სახელი ეწოდა, ხოლო პოლკოვნიკი ასლან ბაჯელიძე წითელი დროშის ორდენით დააჯილდოვეს.

1946 წლის ივნისში, მძიმედ დაჭრილ ასლანს ოპერაცია გაუკეთეს, შემდეგ კი ამიერკავკასიის სამხედრო ოლქში გადმოიყვანეს. წლების მანძილზე იგი იყო ანაპის სახელობის 414-ე წითელდროშოვანი ქართული მსროლელი დივიზიის პოლკის მეთაური, სადაც დივიზიის მთელი პირადი შემადგენლობის საყოველთაო სიყვარული დაიმსახურა.

ამ დივიზიის ყოფილი მეთაურები, გენერლები – გიორგი ყუფარაძე, გიორგი ყურაშვილი და პეტრე ჩხობაძე, დივიზიის პოლიტგანყოფილების ყოფილი უფროსი, გადამდგარი პოლკოვნიკი ვარლამ ჯანელიძე ყოველთვის ამაცობდნენ ასლან ბაჯელიძით, რომელიც არავის პატიობდა საბრძოლო და პოლიტიკური მომზადების საქმეში დაუდევრობას, ან უპასუხისმგებლობას. ის გონივრულად წარმართავდა არმიაში

პარტიულ-პოლიტიკურ მუშაობას. ყოველთვის წინა პლანზე აყენებდა ადამიანებისადმი, მათი პიროვნებისადმი პატივისცემას. თავად ასლან ბაჯელიძე, და ეს გვარსაც ახასიათებს, ხომ კრისტალური სიწმინდისა და მაღალი ზნეობის განსახიერება იყო. იგი 1923 წლიდან 1954 წლამდე, 30 წელზე მეტი, უმწიკვლოდ ემსახურა სახელმწიფოს შეიარაღებული ძალების განმტკიცებას. მან შეუბღალავად ატარა ოფიცრის ურთულესი პროფესია. ყოველთვის იყო ცხოვრებაში, საქმიანობასა და მეგობრობაში მაგალითის მიმცემი ადამიანი, რომლის სიტყვა საქმით იყო დამშვენებული.

ასლანმა დიდი სამამულო ომის ფრონტზე ნანახი და განცდილი გაჭირვება შეიძლება დაივიწყა, მაგრამ არ დავიწყებია ის, რაც ამ გაჭირვებამ ასწავლა.



პოლკოვნიკი ასლან ბაჯელიძე (მარცხნიდან პირველი) ნათესავ-ახლობლებთან ერთად

სანიმუშო მხედრული მოღვაწეობის, ფაშისტური გერმანიასა და იმპერიალისტურ იაპონიაზე ძლევამოსილ გამარჯვებაში შეტანილი წვლილისათვის, ასლან ბაჯელიძე

დაჯილდოებული იყო 9 ორდენითა და 12 მედლით, რომ არაფერი ვთქვათ სტალინისგან მიღებულ სახელობით მაღლობაზე.

აი, პატიოსანი ადამიანის, სამშობლოსადმი, საზოგადოებისადმი თავდადებული პიროვნების, მაღალმოქალაქეობრივი თვისებები: მოხდენილი ჩაცმულობა, სიფაქიზე, სიღარბაისლე, კეთილსინდისიერებით განვლილი და რწმენით აღსავსე ცხოვრების გზა დიდი მაგალითია, სიცოცხლისა და დროის ფაქტორის უწყვეტობის უტყუარი ფაქტორია, რაც თანაბრად მოქმედებს ყველა დროში, წარსულში, აწმყოში და მიმართულია უკეთესი მომავლის შექმნისათვის. სწორედ ბატონი ასლან ბაჯელიძის 30-წლიანი სამხედრო სამსახური, 70-წლიანი შინაარსიანი საქმით დატვირთული სიცოცხლე არის საუკეთესო ნიმუში ამისთვის.



ასლან ბაჯელიძე კრემლში (უკანა რიგში მარცხნიდან მეოთხე)

ომგამოვლილი, მძიმე წლებგადატანილი, სამშობლოსთვის უანგაროდ გაწეული სამსახურისთვის მოპოვებული ორდენებითა და მედლებით მკერდდამშვენებული ბატონი ას-

ლანი 71 წლის ასაკში, 1983 წელს გარდაიცვალა. განისვენებს ბაჯელიძეთა საგვარეულო სასაფლაოზე.

ასლან ბაჯელიძის მხედრულ ნიჭსა და მაღალ მოქალაქეობრივ თვისებებზე საუბრისას მეტად საინტერესო და უპრიანი იქნება მოვიშველიოთ რამდენიმე ამონარიდი პოლიტოლოგ არჩილ ტაკიძის მიერ საქართველოს კომპარტიის ცენტრალური კომიტეტის ყოფილი პირველი მდივნის ვასილ პავლეს ძე მუჟანაძის შესახებ დაწერილი მოგონებებიდან.

ვასული საუკუნის 50-70-იან წლებში, – წერს ა. ტაკიძე, – მეოთხედ საუკუნეზე მეტხანს პარტიის ქედის რაიონულ და აჭარის საოლქო კომიტეტში ვმუშაობდი, აქედან 19 წელი ვასილ მუჟანაძის საქართველოს კომპარტიის ცენტრალური კომიტეტის პირველი მდივნის მაღალ პოსტზე მოღვაწეობის პერიოდს ემთხვევა. რამდენჯერმე მქონდა ბედნიერება, პარტიულ მუშაკთა ვიწრო ჯგუფთან ერთად, პირადად შევხვედროდი და მესაუბრა მასთან. პარტიულ ღონისძიებებზე მრავალჯერ მომისმენია მისი მოხსენებები და გამოსვლები.

ჩემთვის ყველაზე მნიშვნელოვანი და დაუვიწყარი შეხვედრა ვასილ მუჟანაძის დამსახურებულ პენსიაზე გასვლის შემდეგ, 1984 წელს ქობულეთის რაიონის სოფელ ხუცუბანში სახელოვანი პოლკოვნიკის ასლან ბაჯელიძის ოჯახში შედგა. ვასილ მუჟანაძე და ასლან ბაჯელიძე უახლოესი მეგობრები იყვნენ, რასაც 1923-1925 წლებში თბილისის მსროლელთა სამხედრო სასწავლებელში ერთად სწავლის პერიოდში ჩაეყარა საფუძველი. კურსანტები იმდენად დაუახლოვდნენ ერთმანეთს და დაძმაკაცდნენ, რომ ვ. მუჟანაძე ზაფხულის არდადეგებს ხშირად სოფელ ხუცუბანში, ასლან ბაჯელიძის ოჯახში ატარებდა. სამხედრო ცხოვრებამ შემდგომში მათი ცხოვრება გაჰყარა, მაგრამ ისინი მაინც მტკიცე მეგობრებად დარჩნენ. პარტიის ცენტრალური კომიტეტის პირველ მდივნად მუშაობის პერიოდში ვასილ მუჟანაძე ხშირად ინტერესდებოდა ასლან ბაჯელიძის მდგომარეობით,

მაგრამ ბატონ ასლანს ერთხელაც არ უცდია დიდი მეგობრის პირადი ინტერესებისთვის გამოყენება, პირიქით, მან უარი თქვა ვასილ მუჟანაძის შეთავაზებულ არაერთ მაღალ თანამდებობაზე.

ასლან ბაჯელიძე 1983 წელს გარდაიცვალა. სხვადასხვა მიზეზის გამო მის დაკრძალვას ვასილ მუჟანაძე ვერ დაესწრო. ოჯახმა მისი ამაღელვებელი დეპეშა მიიღო მოსკოვიდან. მეორე წელს ვ. მუჟანაძე ქობულეთში იმყოფებოდა და მოისურვა ასლან ბაჯელიძის საფლავზე მისვლა. პენსიაში მყოფი ვასილ მუჟანაძე მაინც დიდი პიროვნება იყო და ბაჯელიძეთა საგვარეულოსა და ხუცუბნის კოლმეურნეობის სახელოვანმა თავაკაცმა ვლადიმერ ბაჯელიძემ პარტიის ქობულეთის რაიკომის პირველ მდივანს და აღმასკომის თავმჯდომარეს სთხოვა საპატიო სტუმართან შეხვედრა, მაგრამ



ვასილ მუჟანაძე მეგობრის, მეორე მსოფლიო ომის გმირის, პოლკოვნიკ ასლან ბაჯელიძის საფლავთან

მათ უარი უთხრეს: ჩვენ ამის გაკეთება საქართველოს კომპარტიის ცენტრალური კომიტეტის ნებართვის გარეშე არ შეგვიძლიაო – განუცხადეს მას. ეს არაჯანსაღი დამოკიდებულება ადრე აღიარებული, შემდეგ წასული ხელმძღვანელ-



ისადმი, კომუნისტური რეჟიმის შედეგი გვეგონა, მაგრამ, სამწუხაროდ, მას შემდეგაც ასე გაგრძელდა და, ალბათ, მომავალშიც ასე იქნება. ხელმძღვანელი ყოველთვის უნდა დაფასდეს, ხელმძღვანელობაშიც და წასვლის შემდეგაც. საუბარია ჭეშმარიტ ხელმძღვანელზე (ავტ.). შეწუხებული ვლადიმერ ბაჯელიძე აჭარის ავტონომიური რესპუბლიკის მინისტრთა საბჭოში ჩამოვიდა და მითხრა, მირჩიე, როგორ მოვიქცეო. მე მაშინ მინისტრთა საბჭოს თავმჯდომარის მოადგილედ ვმუშაობდი და მას ვკითხე: ჩემი დახვედრა საკმარისი თუ იქნება-მეთქი. მან კმაყოფილება გამოთქვა. მეორედ დღეს ვასილ მჟავანაძის ერთ-ერთ თავგადაკლულ თავჯანსმცემელთან, აჭარის განათლების მინისტრ ვახტანგ წულუკიძესთან ერთად, ძვირფას სტუმარს ასლან ბაჯელიძის საფლავთან დავხვდით. მალე ვასილ მჟავანაძე მოვიდა, დიდი გვირგვინი მოიტანა და კარგა ხანს მღუმარედ დასცქეროდა მეგობრის საფლავს. შემდეგ მოკლედ, შთამბეჭდავად ილაპარაკა ასლან ბაჯელიძის პიროვნებაზე, მის კაცურკაცობაზე, საბრძოლო დამსახურებაზე, განსაკუთრებით ხაზი გაუსვა მის დიდ როლს უძლეველად მიჩნეული იაპონელთა კვანტუნის არმიის განადგურებაში. მრავალ ორდენსა და მედალს შორის გამოყო უმაღლესი მთავარსარდლის ი.ბ. სტალინის სახელობითი მედალი, რომელიც საქართველოში 18-მა, ხოლო აჭარიდან მხოლოდ ორმა მებრძოლმა მიიღო.

შემდეგ მასპინძლებმა ასლან ბაჯელიძის სახლში მიგვიპატიეს. ბატონი ვასილი ყველაფერს დიდი ინტერესით ათვალიერებდა. გაიხსენა, რომ ასლანის მშობლებს 20-იანი წლების დასაწყისში პატარა ფიცრული ოდა-სახლი ჰქონდათ. „მე და ასლანი მეორე სართულზე, სასტუმრო ოთახში, ვცხოვრობდით, დღეს ყველაფერი შეცვლილი და გალამაზებულია. მაშინ ასეთი დიდი სასახლეები ვის ჰქონდა. ბატონმა ვლადიმერმა მოახსენა, რომ სოფელმა თქვენი ხელმძღვანელობის დროს მოითქვა სული. ეს დიდებული სახლები თქვენ

დროს ააშენეს. დიდებულ სკოლას, კულტურის სახლს, ბიბლიოთეკას, კინოდარბაზს და სხვა სიკეთეს გლახები თქვენ გიმაღლიან, ბატონო ვასილ“.

ძვირფასო მკითხველო, პატივცემულო, სკენდერ მასწავლებლის მოგვარებო და თანასოფელო ხუცუბნელებო, ვფიქრობთ, მართალი ვიქნებით, თუ ვიტყვით, რომ ბატონ ასლან ბაჯელიძის დამსახურების უკეთეს შეფასებას ისე ვერავინ შეძლებს, როგორც ვასილ მჟავანაძემ წარმოადგინა,¹ – წერს ბატონი არჩილ ტაკიძე.

შესაძლოა, ვინმემ თქვას, წიგნი ეძღვნება სკენდერ ბაჯელიძეს და ასლან ბაჯელიძეზე ამდენი ლაპარაკი რა საჭირო იყო. ეს მოუზომავი თანაფარდობა მათზე საუბრისას ხომ არ ჩრდილავს წიგნის მთავარ გმირს? ჩვენ კი ვუპასუხებთ ასეთ ოპონენტს (თუ კი იქნება ვინმე), რომ პოლკოვნიკ ასლან ბაჯელიძეზე რამდენიც ვილაპარაკოთ (თუმცა ზომასზე მეტი არაფერი რა ვარგა), სკენდერ ბაჯელიძის პიროვნებას ჩრდილს კი არ აყენებს, პირიქით, მის ავტორიტეტს უფრო ამადლებს. ბატონი ასლანი ხომ სკენდერ მასწავლებლის არა მარტო მოგვარე, არამედ მისი ბიძაცაა, თანასოფელია, ხუცუბნელია და არა უცხო. თუ ჩვენ ხუცუბნის, ამ სახელგანთქმული სოფლის საქვეყნოდ აღიარებას აღვნიშნავთ, მის წარსულს, უფროს თაობას ვიხსენებთ, ვსაუბრობთ მის ინტელიგენციაზე, რომლის ფესვებიდან ერთ-ერთი პირველი და სხვებისათვის ტონის მიმცემი ხომ ბატონი ასლანი ბრძანდებოდა. სკენდერ მასწავლებელი (და არა მარტო ის) ამ ინტელიგენციის რიგებში გაიზარდა და ასლან ბაჯელიძე, ესოდენ სახელგანთქმული, სამშობლოსთვის დახარჯული კაცი მისი მკვიდრი იყო და ამაცობდა მისი სახელითა და ავტორიტეტით. ბატონი ასლანი თავისი პიროვნული ღირსებებით დიდი ფიგურა იყო, არა მარტო მშობლიურ კუთხეში, სა-

¹ ს. დუმბაძე, აჭარის ავტონომიური რესპუბლიკა მეორე მსოფლიო ომის პერიოდში (1939-1945 წწ.), ბათუმი, 2005, გვ. 46-49.



ქართველოში, არამედ მთელი კავშირის მასშტაბით. ის მარტო თავის თავს კი არ ეკუთვნოდა, არამედ სამშობლოს სახელოვანი, საამაყო შვილი იყო. ამდენად, დაგვეთანხმებით, საამაყო და საყოველთაოდ საყვარელი და, მით უმეტეს, ნათესავიც თუა, მასზე ლაპარაკი არასდროს ვინმეს ჩრდილად არ გადაიქცევა. მისი სახელისა და ავტორიტეტის მაღლი ყველა კაიკაცის დარაჯად და მფარველ ანგელოზად მოეფლინება. ასე, რომ კარგი წრის წევრთა ავტორიტეტი მაღლა სწევს თითოეული წევრის ავტორიტეტსაც.



ვლადიმერ ბაჯელიძე

პოლკოვნიკ ასლან ბაჯელიძის შემდეგ გამოყოფილი მის ძმისშვილს, ბატონ **ვლადიმერ ხუსეინის ძე ბაჯელიძეს**, რომლის სახელთანაა დაკავშირებული ხუცუბნის თვალსაჩინო და საკავშიროდ აღიარებული მიღწევები. თავისი მოქალაქეობრივი ღირსებებით, სიღინჯით, თავდაჭერილობით, პროფესიონალიზმით, პრინციპულობით, მშრომელი ადამიანებისადმი მზრუნველობით, სამეურნეო და სახელმწიფოებრივი მმართველობის უნარ-ჩვევებით ხუცუბნელთა და (არა მარტო ხუცუბნელთა) რიგებს ამშვენებდა ვლადიმერ ხუსეინის ძე ბაჯელიძე.

ის ძე ბაჯელიძე. ის ამ წიგნის მთავარი გმირის სკენდერ ბაჯელიძის მომდევნო ძმა გახლდათ. იყო აჭარის სოფლის მეურნეობის მუშაკთა გვარდიის ღირსეული წარმომადგენელი, შესანიშნავი სპეციალისტი, გამორჩეული ორგანიზატორი, საკავშირო სოფლის მეურნეობის დამსახურებული მუშაკი, საკავშირო უმაღლესი საბჭოს ორი მოწვევის დეპუტატი, იმ დროს აღიარებული სახელმწიფოს უმაღლესი ჯილოდების, ლენინის და შრომის წითელი დროშის ორდენების კავალერი.



შრომით მოპოვებული ჯილოდები

ვლადიმერ ბაჯელიძე დაიბადა 1923 წელს, ქობულეთის რაიონის სოფელ ხუცუბანში. შრომითი საქმიანობა სრულიად ახალგაზრდამ 1947 წელს დაიწყო ჩაქვში უბნის აგრონომად და მას შემდეგ ნახევარი საუკუნე ემსახურებოდა აჭარის ავტონომიური რესპუბლიკის სოფლის მეურნეობის აღორძინების საქმეს. ვლადიმერი იყო აჭარის მცენარეთა დაცვის სახელმწიფო ინსპექციის მუშაკი, რაიონის სოფლის მეურნეობის განყოფილების მეციტრუსეობის დარგის აგრონომი, ხუცუბნის კოლმეურნეობის უბნის აგრონომი, გვარას კოლმეურნეობის ჯერ მთავარი აგრონომი, შემდგომ თავმჯდომარე.



1962 წელს ბატონი ვლადიმერი აირჩიეს მშობლიური სოფლის კოლმეურნეობის თავმჯდომარედ. სწორედ მისი ხელმძღვანელობით სრულად იცვალა სოფელმა სახე. შრომის ახალი მეთოდების ფართოდ დანერგვით, მშრომელთა ინიციატივის სტიმულირება-წახალისებით, მისთვის ეკონომიკური ბერკეტების მოქნილად გამოყენებით სოფელი ხუცუბანი გაიყვანა მთელი ქვეყნის მასშტაბით მოწინავეთა რიგებში. ვლადიმერ ბაჯელიძის ხელმძღვანელობით, სოფელი იღებდა ჩაისა და ციტრუსის სარეკორდო მოსავალს, რისთვისაც მთავრობის არაერთი ჯილდო დაიმსახურა. მისი თაოსნობით ჩატარდა რესპუბლიკური ყრილობა სოფლად სანიმუშო წესრიგსა და დისციპლინის განმტკიცებისათვის, რამაც ფართო გამოსმაურება პოვა საქართველოს ყველა რეგიონში.

ვლადიმერ ბაჯელიძეს პენსიაში გასვლის შემდეგაც არ შეწყვეტილა აქტიური საზოგადოებრივი საქმიანობა. მისი გამოცდილებით არაერთი საზოგადოებრივი საკითხი მოგვარებულა ქობულეთის რაიონში.

1998 წელს წავიდა ჩვენგან შესანიშნავი ორგანიზატორი, გულისხმიერი, თავმდაბალი, სამშობლოზე, ოჯახზე, ხალხზე უზომოდ შეყვარებული ადამიანი, დატოვა აღიარებული სახელი და დაუვიწყარი საქმეები. მისი ხსოვნა სამუდამოდ დარჩება არა მარტო მეგობრების, კოლეგების, ახლობლების, ხუცუბნელების, ბაჯელიძეთა გვარის, არამედ ხეობის ისტორიაში, – აღნიშნულია ვლადიმერ ბაჯელიძის შესახებ აჭარის სოფლის მეურნეობის და სურსათის სამინისტროს მიერ მომზადებულ ნეკროლოგში (მასზე საუბარი ქვემოთ).¹

ვლადიმერ ბაჯელიძის მადლიანი გზა და ტრადიციები გააგრძელა გიორგი ბაჯელიძემ.

ხუცუბნელ ბაჯელიძეთა გვარის 50 ოჯახს შორის ერთ-ერთი **ქემალ ხუსეინის ძე ბაჯელიძის** (1893-1963) (მეუღლე

¹ ვლადიმერ ბაჯელიძე (ნეკროლოგი), გაზ. „აჭარა“, 4 ნომერი, 1998, გვ. 4.

თენზილე ხასანის ასული საბაზი, 1895-1979 წწ.) ოჯახი გახლავთ. მათი შვილები არიან: **სევერიანე, ალექსანდრე, გიორგი**.

სევერიანე დაიბადა 1912 წელს. მან ჯერ საფინანსო-ეკონომიკური კურსები, შემდეგ თბილისის სახელმწიფო უნივერსიტეტის საფინანსო-ეკონომიკური ფაკულტეტი დაამთავრა. ცხოვრობდა ბათუმში, მონაწილეობდა ფაშიზმის წინააღმდეგ ბრძოლაში. ომის შემდეგ მუშაობდა ხუცუბნის კოლმეურნეობის ბუხვალტრად, 1950 წლიდან – აჭარის სახალხო კონტროლის კომიტეტში, იყო აჭარის საექსპერტო კომისიის თავმჯდომარე. ბოლოს აჭარის ფინანსთა სამინისტროს სარევიზიო საკონტროლო ჯგუფის უფროსი. ომგამოვლილი ვეტერანი 1982 წელს, 70 წლის ასაკში გარდაიცვალა. დასაფლავებულია ხუცუბანში ბაჯელიძეთა საგვარეულო საფლავზე.



ალექსანდრე ბაჯელიძე

სევერიანის მომდევნო ძმა იყო **ალექსანდრე** (ალი) (1923-1985 წწ.) დაამთავრა ხუცუბნის საშუალო სკოლა. როგორც წარჩინებული კურსდამთავრებული, 1941 წელს უგამოცოდოდ ჩაირიცხა თბილისის სახელმწიფო უნივერსიტეტის

იურიდიულ ფაკულტეტზე. გერმანია-საბჭოთა კავშირის ომის დაწყების გამო, სწავლა ველარ განაგრძო და ოჯახში დაბრუნდა. როგორც ფრიალოსანი, დანიშნეს წყავროკის შვიდწლიანი სკოლის ფიზიკა-მათემატიკის მასწავლებლად. 1942 წლის მაისში გაიწვიეს ფრონტზე. მონაწილეობდა მრავალ საბრძოლო ოპერაციაში, მათ შორის, იბრძოდა ბერლინთან. 1945 წლის ბოლოს, ომგადახდილი მეომარი, ორდენებით და მედლებით მკერდდამშვენებული, დემობილიზებულ იქნა. 1946 წელს სწავლა განაგრძო თბილისის სახელმწიფო უნივერსიტეტში, მაგრამ არა იურიდიულ, არამედ ეკონომიკურ ფა-



კულტურულ უნივერსიტეტის დასრულების შემდეგ იქვე დაამთავრა ასპირანტურა, დაიცვა საკანდიდატო და სადოქტორო დისერტაციები და გახდა ეკონომიკის მეცნიერებათა დოქტორი, პროფესორი. გამოქვეყნებული ჰქონდა 56 სამეცნიერო ნაშრომი, მათ შორის, 4 მონოგრაფია. სპეციალისტთა დიდი ყურადღება დაიმსახურა მისმა არაერთმა ნაშრომმა, განსაკუთრებით კი „აჭარის სოფლის მეურნეობის ეკონომიკის აქტუალურმა საკითხებმა“.

ალექსანდრე ბაჯელიძემ დიდი როლი შეასრულა პოლიტიკური ეკონომიკის სახელმძღვანელოს შექმნაში. განსაკუთრებით აღსანიშნავია მისი წვლილი აჭარის სოციალურ-ეკონომიკურ ისტორიის შესწავლაში. მან ამ თემაზე არაერთი ნაშრომი გამოაქვეყნა. მათგან აღსანიშნავია მონოგრაფიები, რომლებშიც შესწავლილია აჭარის ეკონომიკის ისტორია 1878-1921 წლებში (რუს. ენაზე), სოციალისტური ეკონომიკის წარმოშობა და დამკვიდრება აჭარაში (1921-1940 წწ), აჭარის სოფლის მეურნეობის ეკონომიკის საკითხები¹ და სხვ. სამეცნიერო მოღვაწეობასა და საზოგადოებრივ საქმიანობაში მიღწეული წარმატებებისთვის დაჯილდოებული იყო ივანე ჯავახიშვილის მედლით. მისი ხელმძღვანელობით მომზადდა და დაცულ იქნა არაერთი საკანდიდატო და სადოქტორო დისერტაცია. ომში მამაცობისათვის მიღებული ჰქონდა რამდენიმე ჯილდო, მათ შორის მედალი „მამაცობისათვის“. ალექსანდრე ნაყოფიერი და პერსპექტიული მეცნიერი იყო. მაგრამ ავტოკატასტროფაში მოხვედრამ შეარყია მისი ჯანმრთელობა. გარდაიცვალა



გიორგი ბაჯელიძე

¹ სამხრეთ-დასავლეთ საქართველოს ისტორიის ნარკვევები, აჭარა, ტ. IV, ბათუმი, 2012, გვ. 539.

1985 წელს. დასაფლავებულია მშობლიურ სოფელში, ბაჯელიძეთა საგვარულო სასაფლაოზე.

ალექსანდრე ბაჯელიძემ და მისმა მეუღლემ, თინა მაღალიამ, სამშობლოს გაუზარდეს ორი შვილი – ციური და გურამი, რომლებიც ცხოვრობენ თბილისში და აგრძელებენ ოჯახისა და გვარის ტრადიციებს.

ქემალ ბაჯელიძის მესამე ვაჟიშვილმა გიორგიმ (დაიბადა 1931 წელს) 1956 წელს დაამთავრა ხუცუბნის საშუალო სკოლა, ერთხანს მუშაობდა სოფლის კლუბის გამგედ, შემდეგ გაიწვიეს სამხედრო სამსახურში, დაამთავრა კაუნასის სახელმწიფო საოფიცრო სკოლა და 1954 წელს დაასრულა სამხედრო სამსახური თადარიგის ოფიცრის ჩინით. ჯარიდან დაბრუნების შემდეგ იგი მუშაობდა ხუცუბნის კოლმეურნეობაში სხვადასხვა თანამდებობაზე. 1955 წელს ჩაირიცხა თბილისის სასოფლო-სამეურნეო ინსტიტუტში, ეკონომიკა-ორგანიზაციის ფაკულტეტზე (დაუსწრებლად); 1961 წელს დაამთავრა აღნიშნული უმაღლესი სასწავლებელი აგრონომის სპეციალობით. 1957 წლიდან მუშაობდა უმცროს აგრონომად, მცენარეთა დაცვის აგრონომად, მთავარ აგრონომად. იყო საკოლმეურნეო პარტიული კომიტეტის მდივანი, 1983-1993 წლებში კი ამავე კოლმეურნეობის თავკაცი. არის დამსახურებული ეკონომისტი, არჩეულია ქ. ქობულეთის საპატიო მოქალაქედ. ჰყავს მეუღლე ნაზი გოგმაჩაძე, რომელიც ამჟამად პენსიონერია. მათ გაზარდეს შვილები: ირინა, ლევანი და ილია. სამივე უმაღლესი განათლებითაა. ირინა ნიჟარაძეების რძალია, ცხოვრობს ქ. ქობულეთში, ლევანი ცხოვრობს და მუშაობს თბილისში, ხოლო ილია – ქობულეთის სამხედრო კომისარიატში.

გიორგიმ, როგორც სოფლის თავკაცი, როგორც ზემოთ ითქვა, ღირსეულად გააგრძელა წინამორბედის, ვლადიმერ ბაჯელიძის სახელოვანი ტრადიციები და კარგი სახელი დატოვა სოფლის მოსახლეობასა და რაიონის ხელმძღვანე-

ლობაში. დღეს გიორგი პენსიონერია და ოჯახში საქმიანობს, თავს ირთობს შვილიშვილებზე ფერებით და მათი წარმატებებით ხარობს.



რეზო ბაჯელიძის ოჯახი. მეუღლე რუსუდანი, შვილები: მზია და დავითი

რეზო ბაჯელიძე სკენდერ მასწავლებლის ბიძაშვილია. დაიბადა 1926 წელს ხუცუბანში. დაამთავრა საშუალო სკოლა, მწვანე კონცხის ტექნიკუმი. მუშაობდა საბუღალტრო აღრიცხვის სახით სხვადასხვა დაწესებულებაში.

1968 წელს დაუსწრებლად დაამთავრა სოხუმის სუბტროპიკული ინსტიტუტის აგრონომიული ფაკულტეტი. მუშაობდა ხუცუბნის მილიონერ კოლმეურნეობაში სხვადასხვა თანამდებობაზე. იყო გვარას უბნის უფროსი აგრონომი, საიდანაც გავიდა პენსიაში.

დატოვა კარგი ოჯახი – მეუღლე რუსუდანი, შვილები: ნანა, მზია, დათო. ყველა უმაღლესი განათლებით. რეზო გახდა ბაბუაც. გარდაიცვალა 2010 წლის 15 აგვისტოს. განისვენებს საგვარეულო სასაფლაოზე.

ხუცუბნელთა საამაყოდ უნდა აღინიშნოს, რომ ამ სოფლის მკვიდრნი დაწინაურდნენ არა მარტო ქობულეთის რაიონულ, არამედ აჭარის ავტონომიურ რესპუბლიკაში სახელმწიფო, პარტიულ და საზოგადოებრივ ორგანოებში. უწინარეს ყოვლისა, უნდა აღინიშნოს, რომ აჭარის ავტონომიური რესპუბლიკის ხელმძღვანელად, აჭარულ მკვიდრთაგან პირველად დაწინაურებულ დავით მამულაძის¹ (რომელმაც

¹ ს. დუმბაძე, ვლ. მამულაძე, ხიხანის საარწივოდან, ბათუმი, 1998.

გამართლა ხალხის, ზემდგომი ხელმძღვანელი ორგანოების ნდობა და იმედები, გააღლო აჭარისა და აჭარლებისადმი უნდობლობის ყინული), შემდეგ აირჩიეს ხუცუბნის მკვიდრი, იმ დროს აჭარის მინისტრთა საბჭოს თავმჯდომარე **ალექსანდრე თხილაიშვილი**, იგი თითქმის ორი ათეული წლის მანძილზე უნარიანად მართავდა აჭარას, აგრძელებდა წინამორბედთა სახელოვან ტრადიციებს. შემთხვევითი არ არის ის ფაქტიც, რომ ალექსანდრე თხილაიშვილის ცხოვრებასა და მოღვაწეობას პროფესორმა შოთა ჯაფარიძემ მიუძღვნა სპეციალური ნაშრომი.¹ ამიტომ აქ მოკლედ ხაზს ვუსვამთ მის დიდ სამსახურებს არა მარტო ხუცუბნელების, არამედ აჭარის ავტონომიური რესპუბლიკის მკვიდრთა წინაშე. ამიტომ მათზე საუბარს ამით დავასრულებთ.



ალექსანდრე თხილაიშვილი

ხუცუბნელ ბაჯელიძეთა ერთ-ერთი ღირსეული წარმომადგენელი იყო **ჯემალ ბაჯელიძე** (დ. 1926 წ.). ჯემალმა აქვე დაამთავრა საშუალო სკოლა, შემდეგ კი – თბილისის ივ. ჯავახიშვილის სახელობის სახელმწიფო უნივერსიტეტი და მიიღო იურისტის სპეციალობა. 1949-1952 წლებში მუშაობდა საქართველოს რესპუბლიკის პროკურატურაში, საგამოძიებო განყოფილების პროკურორად, 1952 წელს სრულიად ახალგაზრდა დააწინაურეს აჭარის ავტონომიური რესპუბლიკის პროკურორის მოადგილედ. 1953 წელს მას



ჯემალ ბაჯელიძე

¹ შ. ჯაფარიძე, ხალხის სამსახურში, ბათუმი, 2003.



ირჩევენ აჭარის უმაღლესი სასამართლოს თავმჯდომარედ და იმავე წელს – აჭარის იუსტიციის მინისტრად. იყო აჭარის ადვოკატთა კოლეგიის პრეზიდენტის თავმჯდომარე, აჭარის მინისტრთა საბჭოს საქმეთა მმართველი (1961-1962 წწ.) აჭარის პროკურორი (1963-1974 წწ.), შემდგომ ისევ იუსტიციის მინისტრი (1975-1989 წწ.), საიდანაც გავიდა დამსახურებულ პენსიაზე. ბოლო წლებში ეწეოდა საადვოკატო საქმიანობას. იგი იყო ერთდროულად პიროვნება და მაღალკვალიფიციური სპეციალისტი. იურისტი, უადრესად პატიოსანი, პრინციპული და მართლმსაჯულების ერთგული მსახური. ჯემალ ბაჯელიძე თანაბარი ობიექტურობით წყვეტდა როგორც ადამიანთა უფლებების, ასევე, სახელმწიფო ინტერესების დაცვის საკითხებს. სამართლებრივ ორგანოებში ხელმძღვანელ თანამდებობებზე მუშაობით, მან დიდი წვლილი შეიტანა ახალგაზრდა სპეციალისტების აღზრდასა და დაოსტატებაში. მისი პროფესიონალიზმი, სახელმწიფოსადმი დამსახურება, მოქალაქეობრივი ღირსებები, გაწეული საქმიანობა დაფასდა სახელმწიფო ჯილდოებით, იყო აჭარის უმაღლესი საბჭოს დეპუტატი. იგი 70 წელს გადაცილებული, გარდაიცვალა, განისვენებს მშობლურ სოფელში, ბაჯელიძეთა საგარეულო სასაფლაოზე.¹



ლევან ბაჯელიძე

ხუცუბნის მკვიდრია **ლევან ბაჯელიძე**, რომელიც დაიბადა 1934 წლის 15 აგვისტოს. დაამთავრა: ხუცუბნის საშუალო სკოლა (1953 წ.) საქართველოს სასოფლო-სამეურნეო ინსტიტუტის აგრონომიული ფაკულტეტი სწავლული აგრონომის დიპლომით (1962 წ.), ამავე ინსტიტუტის ასპირანტურა (1972წ.) დაიცვა საკანდიდატო დისერტაცია სოხუ-



ჯემბერ ბაჯელიძე

მის სუბტროპიკულ ინსტიტუტში, მიენიჭა სოფლის მეურნეობის კანდიდატის სამეცნიერო ხარისხი. იმსახურა ჯარში, მუშაობდა სამკურნალო მცენარეთა საკავშირო კვლევითი ინსტიტუტის ამიერკავკასიის ზონალურ საცდელ სადგურში უფროს მეცნიერ-თანამშრომლად (1988-2006 წწ.) ამავე სადგურის დირექტორი იყო. გამოცემული აქვს 41 სამეცნიერო ნაშრომი. მიღებული აქვს ორი საავტორო მოწმობა ისეთი სამკურნალო პრეპარატების შექმნაში, როგორიცაა: ვენ-

ბლასტინი და ლივიტოზონი, რომლებიც გამოიყენება ლეიკემიის სამკურნალოდ.

ჯემბერ ბაჯელიძე, დაბადებული 1932 წლის 19 თებერვალს, ხუცუბანში. 1951 წელს დაამთავრა ხუცუბნის საშუალო სკოლა, 1960 წელს – ბათუმის სუბტროპიკული ტექნიკუმი და მუშაობდა კვირიკეს მეურნეობაში აგრონომად. პარალელურად, დაამთავრა სოხუმის სუბტროპიკული მეურნეობის ინსტიტუტი (1968 წ.). სხვადასხვა დროს იყო ხუცუბნის კოლმეურნეობაში არაერთ საპასუხისმგებლო თანამდებობაზე. 1992 წლიდან პენსიონერი. ჰყავს მეუღლე და ერთი შვილი.

საერთოდ, ყველა ქართველისათვის, განსაკუთრებით, ხუცუბნელთათვის საამაყოა ის ფაქტიც, რომ მათი რიგებიდან ორი ნიჭიერი ახალგაზრდა დაეწაფა ხელოვნებისა და კულტურის ისეთ დარგს, როგორიცაა თეატრი. საქართველოს სახალხო არტისტები – **იუსუფ კობალაძე** და **მერაბ ხინიკაძე**, თბილისში უმაღლესი თეატრალური განათლების მიღების შემდეგ, მოღვაწეობდნენ ბათუმის ილია ჭავჭავაძის სახელობის სახელმწიფო დრამატულ თეატრში. ნაყოფიერი მოღვაწეობით, სამსახიობო არტისტიზმით, შესრულების

¹ ჯემალ ბაჯელიძე (ნეკროლოგი), გაზ. „აჭარა“, 18 ივნისი, 1997.



**ოუსუფ კობლაძე –
საქართველოს
სახალხო არტისტი**



**მერაბ ხინკაძე –
საქართველოს
სახალხო არტისტი**

ორიგინალური მანერებითა და გარდასახვის ვირტუოზული ნიჭით, მაყურებელთა დიდი სიყვარული და პატივისცემა დაიმსახურეს. თეატრალური ხელოვნებისა და საქართველოს ისტორიაში მათი სახელები უკვდავია. დაუვიწყარია ოუსუფ კობლაძის მიერ შექმნილი სახეები – ოდიპოს მეფე, ოტელიო, ბაგრატონი, ბექირ გურჯიძე, არსენა. აგრეთვე, დაუვიწყარია მერაბ ხინკაძის მიერ შესრულებული როლები: კიკვიძე, ნაპოლეონი, ურიელ აკოსტა, ნეზმანოვი, იაგო, ერეკლე მეფე, კარტაშოვი, გიჟუა, სელიმ ხიმშიაშვილი, პაპა ონისე, თევრათი და სხვა მრავალი. ისინი, მიუხედავად იმისა, რომ დიდი შემოქმედებითი მოღვაწეობით დაკავებულნი იყვნენ, არ ივიწყებდნენ მშობლურ სოფელს, ზრუნავდნენ მასზე, მონაწილეობდნენ სოფლის ყველა ღონისძიებაში, ახარებდნენ თანასოფლელებს, შნოსა და ღაზათს მატებდნენ ხეობის ღონისძიებებს.

რაკი ხუცუბნელთა ხელოვნებაზე ვლაპარაკობთ, აქვე შეიძლება დავასახელოთ კიდევ ერთი ხელოვანი ამ სოფლიდან, რომელსაც, მართალია, კლასიკური თუ სპეციალური

განათლება არ ჰქონდა მიღებული, მაგრამ ბუნებრივი ნიჭით დაჯილდოებული ხელოვანი ვირტუოზულად უკრავდა ჩონგურზე, ჭიბონზე და კარგადაც ამღერებდა ძველ და ახალ სიმღერებს. ბევრ სიმღერას თავად ქმნიდა ხოლმე. მას არა მარტო ხუცუბანსა და ქობულეთის რაიონში, არამედ მის ფარგლებს გარეთაც იცნობდნენ, როგორც მეჩონგურე თუ მეჭიბონე ხუსია ბაჯელიძეს (მის შესახებ იხ. ვრცლად ქვემოთ).

ხუცუბნელთა შორის ბევრი სახელოვანი და ქებული ადამიანია. მივესალმებით ყველას თითოეულად, ცალ-ცალკე, ვუსურვებთ ჯანმრთელობას, ხანგრძლივ სიცოცხლეს გაერთიანებულ, გამთლიანებულ, გამდიდრებულ, ყველა ადამიანით დასაქმებულ, ყველა საოჯახო ყულაბაგადიდებულ, ბოლომდე გადემოკრატებულ საქართველოში. ბოდიშს ვიხდით იმ ხუცუბნელთა წინაშე, რომლებზეც წერას ვერ ვახერხებთ, წიგნის მოცულობის, საგამომცემლო საქმიანობის წესებით შეზღუდულობის გამო, და გთხოვთ, მოგვიტყვოთ.

წარმოდგენილი წიგნის წაკითხვას ვანდობთ თითოეულ ხუცუბნელს. მართალია, წიგნი შემოიფარგლება ბაჯელიძეებზე საუბრით, მაგრამ თქვენდამი სიყვარული და პატივისცემა, ძვირფასო ხუცუბნელებო, ამ სტრიქონებსაც გამოვავლოვით.

§3. ბაჯელიძეთა გვარის წარმომავლობისა და ეტიმოლოგიის შესახებ

როგორც ზემოთ ვთქვით, სოფელი ხუცუბანი საინტერესოა არა მარტო თავისი გეოგრაფიულ-რელიეფური მდებარეობით, კლიმატურ-მეტეოროლოგიური პირობებით, მრავალფეროვანი ფლორა-ფაუნით, ისტორიული წარსულით თუ გა-



დატანილი ბრძოლებით, არამედ საყურადღებოა აგრეთვე საკუთარი დემოგრაფიული სურათითაც.

სუცუბანში ცხოვრობენ ძირძველი, მეტად ცნობილი და აღიარებული გვარები: ანთაძეები, ბაბუღაძეები, ბაჟუნაიშვილები, ბაჟუაძეები, ბაჯელიძეები, ბლაღაძეები, გოგიტიძეები, გოგმაჩაძეები, გორგილაძეები, დუმბაძეები, ემირიძეები, თხილაიშვილები, კაიკაციშვილები, კობალაძეები, კონცელიძეები, მეგრელიძეები, მოწყობილები, მუავანაძეები, ნაკაიძეები, ნემსაძეები, ოქროპირიძეები, სტამბოლიშვილები, ქათამაძეები, შუბალიძეები, ცეცხლაძეები, ხინიკაძეები.

სოფელი თანდათანობით იზრდებოდა აჭარის მთიანი რაიონებიდან ჩასახლებული თუ საქართველოს სხვა რეგიონებიდან, ან კიდევ ქობულეთის სხვა სოფლებიდან განსახლებულების ხარჯზე. ამიტომ აქ მცხოვრებ ძირძველ გვარებს შორის გაჩნდა ახალი გვარები: ართმელაძეები, ბათნიძეები, ბერიძეები, ბოლქვაძეები, დავითაძეები, დიასამიძეები, ვაშაყმაძეები, ვასაძეები, კახაძეები, მიქელაძეები, ლომიძეები, მგელაძეები, სოლომონიძეები, სურმანიძეები, კოხალიძეები, შავაძეები, შაინიძეები, ცივაძეები, ხახუტაიშვილები, ხოზრევანიძეები და სხვ.



სკენდერ ბაჯელიძის ბიძაშვილები

როგორც დავინახეთ ჩამოთვლილ გვარების შორის ერთი ძირძველი, ცნობილი ბაჯელიძეთა გვარია.

გვარ-სახელებზე საუბრისას ზოგადად მაინც უნდა ვიცოდეთ ორი მთავარი მომენტი: პირველი, გვარ-სახელების წარმომავლობის თეორია და, მეორე, გვარის ისტორია. ზოგადი მონაცემების საფუძველზე კი უნდა მოხდეს საკვლევად აღებული გვარის წარმომავლობისა და ეტიმოლოგიის გაანალიზება. ამგვარად, გვარ-სახელების პრობლემის გარკვევისთვის საჭიროა თეორიული ბაზა, რაც სხვადასხვა კუთხით შემუშავებულია ქართველ მეციერ-მკვლევართა შრომებში. ყველაზე დიდი როლი შეასრულეს ლექსიკოგრაფებმა და ლექსიკოლოგებმა. ამ საქმეს საქართველოში ფუძე დაუდო სულხან-საბა ორბელიანი. მან შექმნა „სიტყვის კონა“, რომელიც არის ლექსიკონი ს. იორამიშვილის რედაქციითა და წინასიტყვაობით (თბ., 1948). ეს საშვილიშვილო საქმე განაგრძო თედო ჟორდანიამ, რომელმაც შექმნა „ქრონიკების“ სამტომეული. მასში, ბევრ სხვა საკითხთან ერთად, განხილულია არაერთი გვარ-სახელი. ამას მოჰყვა 1924 წელს ს. კაკაბაძის „დასავლეთ საქართველოს საეკლესიო საბუთები“, 1961 წელს - ნიკო ჩუბინაშვილის „ქართული ლექსიკონი“ (აღ. ღლონტის რედაქციითა და გამოკვლევით); 1964 წელს - აღ. ღლონტის „ქართული ლექსიკონი, ქართული გვარსახელები“; ზურაბ ჭუმბურიძის „რა გქვია შენ?“ (1971 წ.), ქართული საბჭოთა ენციკლოპედია (1975 წ.), ტბეთის სულთა მატიანე, რომელიც გამოსაცემად მოამზადა, გამოკვლევა და საძიებლები დაურთო თინა ენუქიძემ (1977 წ.); ილია მაისურაძის „ქართული გვარსახელები“ (სალექსიკონო ბიბლიოგრაფიული მასალები (1981 წ.); კონა გიგინეშვილის მიერ გამოცემული „ბერძნული და რომანული საკუთარი სახელების ორთოგრაფიული ლექსიკონი“ (1985 წ.); აღ. ღლონტის „საკუთარი სახელები: ქართველური სახელები“ (1986 წ.); ქართული ენის განმარტებითი ლექსიკონი, ერთტომეული (1986



წ.) და მრავალტომეული; როლანდ თოფჩიშვილის „XIX საუკუნის მოსახლეობის აღწერა საქართველოში“, ჟურ. „მნათობი“, №12 (1981 წ.); ავთანდილ სილაგაძისა და ანზორ თოთაძის „გვარ-სახელები საქართველოში“ (1997 წ.), იაკობ ახუაშვილის „ქართული გვარ-სახელები საქართველოში“, ხუთტომეული, IV, (2004 წ.) უცხო სიტყვათა ლექსიკონი, შედგენილი მ. ჭაბაშვილის მიერ, მეორე გამოცემა (1989 წ.); არაფერს ვამბობთ საქართველოს ისტორიის დიდ კორიფეებზე (ივ. ჯავახიშვილი, ნ. ბერძენიშვილი, ს. ჯანაშია, პ. ინგოროყვა და სხვა მრავალი), რომელთა ცალკეულ ნაშრომებში განხილულია ჩვენთვის ამჯერად საინტერესო საკითხები.

ერის, ქვეყნის, მისი შემადგენელი ნაწილების, რეგიონების, ოლქების, ხეობების, სოფლებისა თუ ქალაქების ისტორიის სრულყოფილად შესწავლა მოითხოვს გვარების ისტორიის შესწავლასაც. ამა თუ იმ პიროვნების ცხოვრება-საქმიანობა – მოღვაწეობის მონოგრაფული გამოკვლევისთვის საჭიროა მისი წინაპრების ვინაობის გარკვევა. წინაპრების აღსანიშნავად კი უძველესი დროიდან გაჩნდა ადამიანთა სახელები და გვარები. სახელი ერთი პიროვნების საკუთარი სახელია, ამდენად ყველა პიროვნებას თავისი, საკუთარი სახელი აქვს. საკუთარი სახელი კი გაჩნდა ადამიანის აზროვნების დაწყების დროიდან, ერთიმეორისგან ადამიანების გასარჩევად. ამისათვის ადრე სახელი საკმარისი იყო. მაგრამ დროთა განმავლობაში ადამიანების ერთმანეთისაგან – თავისი სეხნიასგან გასარჩევად-საჭირო დარჩა დამატებითი სახელი, ანუ გვარი, რომელიც აერთიანებდა სისხლით ნათესავეებს, გვაროვნულ, ტომობრივ გაერთიანებებს. ამდენად პირველად გაჩნდა სახელი, ხოლო შემდეგ გვარი, რამაც გაადვილა საზოგადოების წევრთა ურთიერთობა.

საინტერესოა ისიც, რომ თითქმის ყველა ხალხში სახელი ანსხვაგვარს კაცსა და ქალს. ბევრ ენაში (რუსული, თურქული), სქესის გარდა სახელითა და გვარით გამოკვე-

თილია ნათესაობაც. ამასთან, არის კაცისა და ქალის საზიარო სახელებიც, მაგალითად, გიული, სულიკო, გუგული, დოდო, ია და სხვა მრავალი. სახელი „გიული“ საქართველოში 3548 ქალს ჰქვია და 606 მამაკაცს, „დოდო“ – 6530 ქალს და 163 მამაკაცს, „სულიკო“ – 3803 ქალს და 4680 მამაკაცს, „ია“ – 13215 ქალს და 148 მამაკაცს და ა.შ.¹

გვარ-სახელი ისეთი ფენომენია, რომლის შესასწავლად არსებობს არაერთი მეცნიერება, რომლებიც სხვადასხვა ასპექტით იკვლევენ გვარ-სახელთა საკითხებს.

გვარ-სახელების ისტორიაზე წარმოდგენა რომ გვექონდეს, საჭიროა ვერკვეოდეთ ისეთ ტერმინებში, როგორიცაა ონომასიოლოგია და ონომასტიკა.

ონომასიოლოგია (ონომატოლოგია), ბერძნული სიტყვაა და ერთი გაგებით ნიშნავს ამა თუ იმ ენაში არსებულ საკუთარ სახელთა ერთობლიობას, მეორე გაგებით – ენათმეცნიერების ნაწილია, რომელიც საკუთარ სახელებს სწავლობს.

ონომასტიკა (ონომასტიკონი) იგივე ონომასიოლოგიაა, მისი პირველი გაგებით. მაშასადამე, ონომასტიკა (ონომასტიკონი) ნიშნავს საკუთარ სახელთა ერთობლიობას, ხოლო ონომასიოლოგია (ონომატოლოგია) გულისხმობს საკუთარ სახელთა შეწავლას, კვლევას.

გარდა აღნიშნულებისა, არსებობს კიდევ სხვა ტერმინები: ანთროპონიმია და ანთროპონიმია. პროფესორი ალექსანდრე ლლონტი თავის ნაშრომში „ქართული საკუთარი სახელები“² განმარტავს, რომ პირველი ტერმინი – ანთროპონიმია (ბერძ.) ონომატოლოგიის ნაწილია, რომელიც ადამიანთა საკუთარი სახელების სისტემას სწავლობს. მეორე ტერმინი – ანთროპონიმია იკვლევს, სწავლობს ადამიანთა საკუთარ სახელებს. ონომასტიკონში ერთიანდება სხვადა-

¹ ა. სილაგაძე, ა. თოთაძე, დასახ. ნაშრომი, გვ. 43.

² ალ. ლლონტი, ქართული გვარ-სახელები, თბ., 1964, გვ.



სხვა ტერმინები: ანთროპონიმები (ადამიანთა საკუთარი სახელები), ეთნონიმები (ტომთა და ხალხთა სახელები), ზოონიმები (ცხოველთა, ფრინველთა, მწერთა სახელები), ტოპონიმები (ადგილის სახელები), ჰიდრონიმები (მდინარეთა, ტბათა, ზღვათა სახელები).

თანამედროვე ანთროპონიმოლოგია თუ ონომასტიკოლოგია საკუთარ სახელებს ორი ასპექტით იკვლევს: 1. დესკრიპტულად (ე.ი. დღევანდელი ვითარების მიხედვით) და 2. დიაქრონულად (ე.ი. განვითარების ისტორიის ჩვენებით). ჩვენ კი უნდა ვიცოდეთ, რომ გვარის ისტორიის შესწავლისათვის საჭიროა ორივე ასპექტის (დესკრიპტული და დიაქრონული) მიხედვით მსჯელობა.

ქართველ მეცნიერთა და ლექსიკოლოგთა ნაშრომების მომარჯვებით შეიძლება ნებისმიერი გვარის წარმომავლობაზე მსჯელობა.

ქართული გვარები მეტად მრავალფეროვანია წინაპრების თვალსაზრისით. რაკი გვარი გრძელდება მამის ხაზით, ამიტომ უმთავრესად გავრცელდა და განივრცო მამაკაცთა სახელები და არა ქალთა.¹

პროფესორ ზურაბ ჭუმბურიძის განმარტებით, მამის სახელი გვარის ფუძედ იქცა, ჩადგა ნათესაობით ბრუნვაში, ე.ი. დაემატა „ის“ ფონემა (ბრუნვის ნიშანი), აგრეთვე „ძე“ (დასავლეთ საქართველოში) და „შვილი“ (აღმოსავლეთ საქართველოში). ამ გზით მივიღეთ შვილისა და მომდევნო მის მემკვიდრეთა შტოს გვარი. დროთა განმავლობაში ნათესაობითი ბრუნვის ნიშნის თანხმოვანი **ს** დაიკარგა, მაგრამ იგი დაცულია ძველ თხზულებებსა და დოკუმენტებში წარმოდგენილ ისეთ გვარებში, როგორცაა: საბანისძე, აბუსერისძე, ჩოლოყასშვილი, ქავთარასშვილი და სხვა.

¹ ზ. ჭუმბურიძე, ლექსიკონი, რა გქვია შენ? თბ., 1982, გვ. 43-44; ი. ახუაშვილი, ქართული გვარ-სახელები, ხუთტომეული, ტ. IV, თბ., გვ. 1052-1059.

გარდა ძე და შვილისა ქართულ გვარებს აწარმოებს აგრეთვე ია, უა(ვა). ამათგან ელ და ურ (ულ) სადაურობის მაწარმოებელი სუფიქსებია. მეგრულ გვარებში გავრცელებულია ვა და ია სუფიქსები, რომლებიც უან/იან დაბოლოებისგან უნდა იყოს მიღებული.

საინტერესოა ქართული გვარების მაწარმოებელ ცალკეულ ფორმატთა რაოდენობა საქართველოში:

- | | |
|-----------------------|-------------------------------|
| 1. ძე – 1 649 222; | 8. ელი – 55 017; |
| 2. შვილი – 1 303 723; | 9. ული – 25 729; |
| 3. ია – 494 224; | 10. ში – 7 263; |
| 4. ავა – 200 642; | 11. სკირი – 2 375; |
| 5. იანი – 129 206; | 12. ჭვირი – 1 831; |
| 6. ური – 76 044; | 13. ყვა – 1 023. ¹ |
| 7. უა – 74 817; | |

ქართული გვარი მყარია თავისი ბუნებით. იგი აერთიანებს სისხლით ნათესაობას და იცავს მისი წევრების ღირსებას. მათში ადამიანის საკუთარი სახელის ტაბუირების ტრადიციაც ყოფილა, ზოგან დღესაც კი შემინევა ეს პროცესი. ცოლს არ შეეძლო ქმრის სახელის ხსენება და, პირიქით, ქმარს - ცოლისა. ეს იყო ურთიერთპატივისცემის, ერთმანეთისადმი მოკრძალების გამოხატულება და ტრადიციად ქცეული ტაბუ. ამასთან დაკავშირებით, საინტერესოა ვაჟა-ფშაველას სიტყვები: „ფშაველი ქმარი და მისი ცოლი ისე დაჰბერდებიან, რომ ერთმანეთს სახელს არ დაუძახებენ – ეს უნამუსობად, სირცხვილად მიაჩნდათ“.² ასეთ შემთხვევაში ცოლი ქმარს მოუძებნიდა, ქმარი - ცოლს ერთმანეთზე მიმართვისათვის დამატებით, არაოფიციალურ, ამასთან მოფერებით, საიდუმლო სახელს.

საქართველოში გვარები ძირითადად VI საუკუნიდან გაჩნდა. დღევანდელი გვარების უმრავლესობა კი XIV-XV

¹ ა. სილაგაძე, ა. თოთაძე, დასახ. ნაშრომი, გვ. 288.

² ვაჟა-ფშაველა, თხზ. ტ. V, თბ., 1961, გვ. 10.



საუკუნეებიდან მომდინარეობს. თანდათანობით ვითარდებოდა გვარი, ხდებოდა მისი განშტოება, განტოტვა. ამ გზით ჩნდებოდა მონათესავე გვარები.

გაჩნდა მოსაზრება, რომ ქართული გვარი ძველი წელთაღრიცხვის სიღრმეში მიდის. ასე, მაგალითად: ფიფია, თურია, თარია, შარია, გახარია, მალია, ფაია, ხარია, ფაცია და მრავალი სხვა.¹

გვარ-სახელების შესახებ ზოგადი თეორიული და ისტორიული ექსკურსის შემდეგ შეიძლება გადავიდეთ უშუალოდ საიკთხზე, რომელიც განსახილველი თემის შემადგენელი ნაწილია. მხედველობაში გვაქვს ხუცუბნის ერთ-ერთი აღიარებული ბაჯელიძეთა გვარი.

ისმის კითხვა: როგორია ამ გვარის წარმომავლობა, ან რა ეტიმოლოგიური ახსნა მოეძებნება მას?

ამ საკითხზე პასუხის გასაცემად მოვიძიეთ გვარ-სახელების შესახებ არსებული არცთუ ისე მწირი ლიტერატურა. ბაჯელიძეთა გვარის შესახებ მსჯელობას წავაწყდი პროფესორ იაკობ ახუაშვილის ნაშრომში „ქართული გვარ-სახელები“.² ავტორის ვარაუდით, გვარი „ბაჯელიძე“ წარმომდგარია „ბაჯი“-დან. რა არის ბაჯი? ქართულ ენციკლოპედიაში „ბაჯი“ განმარტებულია, როგორც სოფელი ამბროლაურის რაიონში (ღადიშის სასოფლო საბჭო), რაჭის ქედის ჩრდილოეთ კალთაზე, მდინარე რიონის მარცხენა ნაპირას, ზღვის დონიდან 620 მ, ამბროლაურის რაიონული ცენტრიდან 22 კმ მანძილზე.³ პროფესორი ი. ახუაშვილი წერს, რომ სიტყვა „ბაჯი“ იხმარება ორი ასპექტით: პირველი, როგორც გეოგრაფიული სახელი და მეორე – როგორც თურქული სიტყვა (მოისმინა თურქულად მოლაპარაკეთა

მეტყველებაში), ნახა თურქულ ლექსიკონში და გაიგო, რომ „ბაჯი“ თურქული სიტყვაა და იხმარება რამდენიმე მნიშვნელობით: 1. თავანი, სხვენი, 2. სალიტერატურო თურქულ ენაში – სარკმელი, სახურავში სინათლისა და ჰაერისათვის გამოჭრილი სარკმელი, 3. და, დეიდა, 4. ბაჯანალი – ქვისლი. ჩვენ დავამატებთ მის მეხუთე მნიშვნელობას – ბაჯი-ბაჯა, რაც ნიშნავს კედელსაც, სახლის სხვენსაც (ქსე), მაღალ ადგილსაც.

პროფ. იაკობ ახუაშვილი იმასაც ამბობს, რომ ძნელია იმის თქმა, რომ გვარ-სახელი „ბაჯელიძე“ ამ ტერმინიდან „ბაჯი“ – მომდინარეობს, მაგრამ საეჭვო არ უნდა იყოს მისი ამ გვარის გურიის სოფელ „ბაჯ“-თან დაკავშირება, რომელიდანაც წარმოქმნილად მიიჩნევა, ანუ ტოპონიმად თვლიან. მკვლევარი იმასაც ამბობს, რომ თუ დავაფიქსირებთ, რომ ბაჯელიძე „ბაჯიდან“ მომდინარეობს, ტოპონიმიკურად არსებობს ამნაირი წარმოშობის გვარები; მაგალითად, ასეა მიღებული ცურტაველი-ციურტავიდან, რუსთაველი-რუსთავიდან, მაჩაბელი-მაჩაბიდან, წერეთელი-წერეთიდან, ჯაყელი-ძე – ჯაყიდან, მუსხელი-შვილი – მუსხიდან, ჯაყელი – ჯაყიდან, ხულელი-ძე, ხულადან (ყაზბეგის რაიონში სოფელია ხულა, ხულელიძეებიც ბევრია), ხიხა-ძე – ხიხა-დან (ხიხანიდან, ხიხაძირიდან) და სხვა მრავალი.

ბატონ იაკობ ახუაშვილს ვეთანხმებით, რომ ბაჯი-დან მომდინარეობს გვარი „ბაჯელიძე“, მაგრამ ჩვენთვის მიუღებელია „ბაჯის“ ახსნა თურქული ენის ბაზაზე, ან მისი დაკავშირება გურიის ბაჯთან (გურიაში ასეთი სოფელი არაა დაფიქსირებული). გურიაში ბაჯელიძეები ცხოვრობენ ოზურგეთის რაიონის სოფლებში ბახვში, მერიაში და ნატანებში. პირველ შემთხვევაში ბაჯი გეოგრაფიული სახელია, ესე იგი ტოპონიმია, მეორე შემთხვევაში მას სულ სხვა გაგება აქვს, ნათესაობას გამოხატავს. გეოგრაფიული „ბაჯის“ ნათესაობის აღმნიშვნელ თურქულ „ბაჯთან“ დაკავში-

¹ ს. გოგიტიძე, ქაშქა-აბეშლა: აფხაზურ (აფსუა)-აიდიღური თუ ქართველური მოდგმა? ბათუმი, 2010, გვ. 513.

² იაკობ ახუაშვილი (აღგეთელი), ქართული გვარ-სახელები, ხუთტომეული, ტ. IV, თბ., 2004, გვ. 1052-1059.

³ ქართული საბჭოთა ენციკლოპედია, თბ., 1977, გვ. 257.



რება არაფრით არ შეიძლება, რადგან ქართული „ბაჯი“ და თურქული „ბაჯი“ ომონიმებია, ფორმით მექანიკურად ჰგავს ერთმანეთს, საქართველოში არსებული ტოპონიმების ახსნა უპირველესად უნდა ვეძიოთ მშობლიურ ენაში და თუ საკმარისი არ აღმოჩნდა ეს, მაშინ მივმართოთ სხვა ენას. ჩვენ გვეჩვენება, რომ ბაჯელიძის ძირიდან აღებული „ბაჯი“-ს ახსნა, უწინარეს ყოვლისა, უნდა ვეძიოთ რაჭაში. რაკი რაჭა, კოლხეთთან შედარებით, მაღალი ადგილია, შესაძლებელია „ბაჯი“ თუ „ბაჯა“ მაღალ ადგილსაც ნიშნავდეს. ჩვენი მოსაზრებით, „ბაჯი“ არის ქართული სიტყვა „ბაჯ-ბაჯი“ (დათვი ბაჯ-ბაჯით დადიოდა) ან კიდევ ზანტად, ნელა მოსიარულე ადამიანზე იტყვიან „ბაჯბაჯით დადისო“. ეს კიდევ ერთხელ მიგვანიშნებს, რომ ბაჯელიძის ძირი „ბაჯი“-ს ახსნა უნდა ვეძიოთ ქართულ ენაში, მის რაჭველურ კილოკავში.

მკვლევარი მიუთითებს იმასაც, რომ აჭარაში ბაჯელიძეთა პირველი ადგილსამყოფელი ქობულეთის რაიონის სოფელი ხუცუბანია. გადმოცემით, აქედან ნაწილი ქედის რაიონში, სოფელ (ალიქოლღებში) – ოქტომბერში (ქედის რ-ნი) გადასულა საცხოვრებლად. შემდეგ მოხდა მათი განტოტვა. ახლა არიან ხელვაჩაურის რაიონის სოფელ მახოში, ანგისაში, ქ. ბათუმში, ქობულეთში, მაჭახლის ხეობის სოფელ ცხემლნარაში კი იყვნენ ბაჯიშვილები. ბაჯელიძეები ცხოვრობენ აგრეთვე სოფელ ახალშენში (ხელვაჩაურის რ-ნი – ავტ.). აქვე ბატონი ი. ახუაშვილი იმოწმებს ოქტომბრულ ზებურ ბაჯელიძის (ბათუმის სატრანსპორტო პოლიციის ყოფილი უფროსის) მონათხრობს: „ჩემი წინაპრებიდან ვიცი, რომ გურიიდან გადმოსულან ხუცუბანში, ხოლო იქიდან ასულან ოქტომბერში. გვაქვს მიმოსვლა ხუცუბნელ და გურულ ბაჯელიძეებთან. ვიცი, რომ ერთი მოდგმისანი ვართ. აქ აჭარაში გვარი არ შეგვიცვლია. ამას ადასტურებს 1912 წლის არჩევნებთან დაკავშირებით შედგენილი სია, რომ-

ლშიც მოხსენიებული არიან იუსუფ ბაჯელიძე და ქობულეთელი ცნობილი ბრმა მეწონგურე ხუსეინ ბაჯელიძე, რომელიც ტკბილი ხმით ასრულებდა ძველ და ახალ სიმღერებს.“¹


თუ სოფელში არსებულ გადმოცემებს, რომელზედაც ზემოთ იყო საუბარი, და ბატონ ი. ახუაშვილის მოსაზრებებს შევაჯერებთ, შეიძლება მივიღეთ იმ დასკვნამდე, რომ ბაჯელიძეთა გვარი (როგორც თავად ბაჯელიძეები ამბობენ), რაჭიდან მოსულან ხუცუბანში, ხოლო (ალიქოლღებელ) ზებურ ბაჯელიძის თქმით, გურიიდან მოსულან ხუცუბანში. ამ ორივე მოსაზრების და იმის გათვალისწინებით, რომ „ბაჯი“ გეოგრაფიული სახელია (რაჭაში), შეიძლება გაგაკეთოთ სავარაუდო დასკვნა ბაჯელიძეთა გვარის წარმომავლობისა და მათი მოძრაობის მარშრუტის, ანუ გავრცელების გეოგრაფიის შესახებ, რომ ეს გვარი ჩამოყალიბდა რაჭაში, ამბროლაურის რაიონში, შემდეგ ჩამოვიდნენ ბარად, კოლხეთის დაბლობზე, გურიაში (ოზურგეთის რ-ნი), თუ აჭარაში, ხუცუბანში (ქობულეთის რ-ნი). ამ შემთხვევაში შეიძლება ვიფიქროთ, რომ ხუცუბნიდან გადავიდნენ ოზურგეთში, ან, პირიქით. ამას გვაგვარაულებინებს ამ გვარის საქართველოში განსახლების გეოგრაფიული სურათი. საქართველოს სამოქალაქო რეესტრის 2011 წლის მონაცემებით, ბაჯელიძეები ცხოვრობენ: თბილისში 89 (კაცი – 47, ქალი – 42); გურიაში, კერძოდ, ოზურგეთში – 247 (კაცი – 118, ქალი – 129); ლანჩხუთისა და ჩოხატაურის რაიონებში თითო სული (და ისიც ქალი); აჭარაში 461 (კაცი – 220, ქალი – 241), აქედან ქობულეთის რაიონში 187 (კაცი – 99, ქალი – 88), ბათუმში 121 (კაცი – 57, ქალი – 64); ხელვაჩაურის რაიონში 115 (კაცი – 48, ქალი – 67); ქედაში 38 (კაცი – 16, ქალი – 28); რუსთავში 4 (კაცი – 2, ქალი – 2). თითო-ოროლა სული (გათხოვილი

¹ ი. ახუაშვილი, დასახ. ნაშრომი, გვ. 1052-1059.



ქალი) ცხოვრობს ბოლნისში, გულრიფში, გურჯაანში, ოჩამჩირეში.¹

ჩვენი ვარაუდის მიხედვით, ამ გვარის მოძრაობის მარშ-რუტიც ასე გვესახება:



პირველ შემთხვევაში გეოგრაფიული ტერმინი „ბაჯი“ ადგილის აღმნიშვნელი ტოპონიმია, მეორე შემთხვევაში ის არც გეოგრაფიული და არც ტოპონიმიკური ტერმინია. იგი აღნიშნავს საცხოვრებელი სახლის გარკვეული ფუნქციის მატარებელ ნაწილს (საკვამლე მილი, ან სარკმელი). ჩვენ ვეთანხმებით პატივცემულ პროფესორს, რომ ეს „ბაჯი“ არის ტოპონიმი და გვარი ბაჯელიძეც წარმოდგენილია ამ სიტყვიდან. მაგრამ როგორ?

ვაჯამებთ რა მსჯელობას ბაჯელიძეთა გვართან დაკავშირებით და მის წარმომავლობისა და ეტიმოლოგიის შესახებ, გამოვთქვამთ ჩვენს ვარაუდს.

ჩვენი აზრით, „ბაჯელიძე“ უკავშირდება ამბოლაურის რაიონის სოფელ „ბაჯ“-ის გეოგრაფიულ ტოპონიმს. ეს კარ-

გად ჩანს ამ სიტყვის შემადგენელ ნაწილებად ფონემატად დაშლით: ბაჯ-ი, ბაჯ-ელ-ი, ბაჯ-ელ-ის-ძე (ბაჯ-ელ-ი-ძე). აქ „ბაჯი“ არის გეოგრაფიული პუნქტი, სადაც ამ გვარის პირველი პირი დასახლდა. -ელ – იქ დასახლებული პირის სადაურობაზე მიმანიშნებელი სუფიქსია, -ის – ნათესაობითი ბრუნვის ნიშანი, -ძე – პირველად დასახლებული პიროვნების, მისი შთამომავალთა შვილია, რაც სპეციფიკურია ქართული გვარებისათვის, უმთავრესად დასავლეთ საქართველოში. დროთა განმავლობაში ბრუნვის ნიშნის თანხმობანი „ს“ დაიკარგა, საბოლოოდ მივიღეთ გვარი „ბაჯელიძე“. თუ კარგად დავუკვირდებით, ამ გვარის ეტიმოლოგიურ განვითარებაში შეინიშნება რამდენიმე ეტაპი: 1) ბაჯი, 2) ბაჯ-ელ-ი, 3) ბაჯ-ელ-ის-ძე და 4) ბაჯელიძე.

ამგვარად, ბაჯელიძეთა გვარმა ეტიმოლოგიურად ასეთი გზა გამოიარა და საბოლოოდ მიიღო დადგენილი ფორმა. საინტერესოა კიდევ ერთი საკითხი ამ გვართან დაკავშირებით. ჯერჯერობით ვერ მოვიპოვეთ რაიმე დოკუმენტი, ან თუნდაც ზეპირსიტყვიერი გადმოცემა იმის შესახებ, თუ როდის მომხდარა რაჭიდან ბაჯელიძეთა მიგრაცია კოლხეთის დაბლობზე, აჭარა-გურიაში თუ გურია-აჭარში. გვარის განვითარების ეტაპების და მიგრაციის ქრონოლოგიის დადგენა მომავალი კვლევის საკითხია. ამათან, საინტერესოა ისიც, რომ რაკი „ბაჯი“ ქართული გეოგრაფიული ტოპონიმია და აქედან ბაჯ-ელ-ი კი სადაურობის აღმნიშვნელი სიტყვაა, იგულისხმება, რომ ბაჯიდან სხვაგან წასული ყველა ადამიანი ბაჯელად იწერება და აქედან განვითარდა საბოლოოდ დღევანდელი, ჩვენთვის საინტერესო გვარი ბაჯელიძე. აქვე შეიძლება ვიფიქროთ იმაზე, რომ ბაჯელიძეებს, ვიდრე ბაჯში ცხოვრობდნენ, შესაძლებელია სხვა გვარი (?) ჰქონდათ და შეიძლება ისიც, რომ ისინი ახლაც ცხოვრობენ რაჭაში ძველი გვარით. ვინც კი წამოვიდა იქიდან, ბაჯელიძეებად (სოფლის სახელი შეინარჩუნეს) დაიწერეს, მოხდა გვარის

¹ საქართველოს სამოქალაქო რეესტრი, www.cra.gov.ge, 2011 წ.



განშტოება, გენეალოგიურად კი ის მათ (ადგილზე დარჩენილთ) და წამოსულ ბაჯელიძეებს ერთი საერთო ნათესაური კოდი აქვთ. როცა ჩვენ სტატისტიკურ მონაცემებზე დაყრდნობით ვამბობთ, რომ ბაჯელიძეები დღეს რაჭაში არ ფიქსირდება, ეს შემთხვევითი არაა, ვინაიდან ეს გეოგრაფიული ტერმინი ბაჯი-დან წამომდგარი სადაურობის აღმნიშვნელი ბაჯელიძე სწორად მიუთითებს იქ მცხოვრებთა ბაჯიდან სხვაგან წასვლაზე. აქ საძიებელია ბაჯელიძეთა გენეალოგიური წარსული გვარი (თუ კი იქნება, გურიაში, დღევანდელ ბახვიში).

ზემოთ მოტანილი სტატისტიკური მონაცემებიდან ჩანს, რომ რაჭაში, ამბროლაურის რაიონში, რომელსაც ბაჯელიძეთა გვარის წარმომავლობის საწყისად ვთვლით, ამჟამად ამ გვარიდის არავინ ცხოვრობს. ან თუ არიან, ძველი, შესაძლოა სხვა გვარისანი არიან. ეს ხომ არ გამორიცხავს ბაჯელიძეთა რაჭიდან წარმომავლობის ფაქტს? თუ ამ აზრს დავეთანხმებით, მაშინ საფიქრებელია, რატომ მიუთითებს ხუცუბნის ბაჯელიძეების (ამ გვარის ყველაზე მრავალრიცხოვან კომპაქტურ დასახლებაში) გადმოცემით მათი რაჭიდან წარმომავლობის შესახებ? ჩვენი აზრით, მიუხედავად იმისა, რომ დღეს ბაჯელიძეების გვარი არ ფიქსირდება რაჭაში, ბაჯელიძეთა გვარის რაჭიდან წარმომავლობის საკითხი საეჭვო არ უნდა იყოს, რადგან „ელ“ სუფიქსიანი გვარი წარსულ მოსახლეობაზე მიუთითებს.

რაჭა, მართალია, საქართველოს ერთ-ერთი ულამაზესი მხარეა, მაგრამ ისტორიის ქარტეხილების დროს მტრის მუდმივი თავდასხმების ობიექტი იყო, ამასთან, უგზოობის გამო, ცხოვრების მძიმე პირობებიც ართულებდა და მოსახლეობა ნაწილ-ნაწილ ჩამოდიოდა ბარში. სწორედ ამ მოტივით უნდა აეხსნათ ბაჯელიძეთა გვარის რაჭიდან ბარად, კოლხეთის დაბლობში ჩამოსახლება. ის კი დაუდგენელია, სად დასახლ-

დნენ და სოფლის სახელი გვარად აქციეს (ბაჯელიძე) პარალელურად აჭარაში (ხუცუბანში) თუ გურიაში (ოზურგეთში).

თუ გავითვალისწინებთ ზემოთ მოყვანილ სტატისტიკას, ჩანს, რომ ბაჯელიძეები ყველაზე მეტი აჭარაში არიან (461 სული), რომ ბაჯელიძეები აჭარიდან გურიაში (247 სული) და ამ ორი რეგიონიდან თბილისში თუ საქართველოს სხვა რეგიონებში (შეიძლება, უცხოეთშიც) გადავიდნენ.

თუ მხედველობაში მივიღებთ იმასაც, რომ გურიაში სოფელი „ბაჯი“ არ ფიქსირდება და ყოველივე ამას არგუმენტად მივიღებთ, შეიძლება ვიფიქროთ იმაზეც, რომ ბაჯელიძეები რაჭიდან ჩამოსახლდნენ აჭარაში (ხუცუბანში), იქედან კი აჭარის სოფლებსა და გურიაში სხვადასხვა მიზეზით, არ გამოვრიცხავთ რელიგიურ აღმსარებლობასაც. თუ რელიგიურ ფაქტორსაც გავითვალისწინებთ, მაშინ გამოდის, რომ რაჭიდან ბაჯელიძეთა მიგრაცია აჭარაში მოხდებოდა ოსმალთა ბატონობის დაწყებამდე. ვინც მაჰმადიანობა მიიღო მშობლიური ენის შენარჩუნების მიზნით, დარჩა აჭარაში, ხოლო ვინც ვერ შეეგუა და არ მიიღო სხვა სარწმუნოება, გადავიდა საქართველოს ქრისტიანულ ტერიტორიაზე – გურიაში და ახლაც ცხოვრობენ, შესაბამისად, გურიაში – ბახვისა და ნატანებში.

სკენდერ ბაჯელიძის ცხოვრება
და მოღვაწეობა

§1. მშობლები

*მშობლის სიყვარული ყველა
სათნოების საფუძველია.
ციცერონი*

*ბევრი დათესეთ, ბევრიც მოიმკეთ,
სიყვარული და პატივისცემა,
თქვენგან ვისწავლეთ და შთავივონეთ
კაცურკაცობა, სინდისი, შრომა.
ვანო გაბაიძე*

შავიზღვისპირეთში, კერძოდ, ქობულეთის რაიონის ერთ-ერთ ულამაზეს სოფელ ხუცუბანში დაიბადა სკენდერ ხუსეინის ძე ბაჯელიძე. ეს იყო 1921 წლის 27 აპრილი. აპრილი ხომ ბუნების მაცოცხლებელი, გაზაფხულის ულამაზესი თვეა. იმ წლებში ხუსეინ ბაჯელიძის ოჯახისთვის აპრილის ყველაზე გამორჩეული დღე 27 რიცხვი იყო. ის პირველი შვილის, პირველი თოფის გავარდნის, ოჯახის სიხარულისა და ბედნიერების მაუწყებელი დასამახსოვრებელი დღე გახდა. გახარებული მშობლები – თავს ევლებოდნენ პირველ პირმშოს. პატარას სკენდერი დაარქვეს.

კარგი მშობლები ჰყავდა სკენდერს. დედის მხრივ იგი წულუკიძეთა გვარს ენათესავებოდა. დედა, ოჯახის წევრებისა და მეზობლების დახასიათებით, გამოირჩეოდა სათნოებით, შრომისმოყვარეობით, თავაზიანობით, სტუმართმოყვარეობით, ტრადიციებისადმი ერთგულებით. კარგი გვარი-



შვილი, კარგ ოჯახში დაბადებული და გაზრდილი მერიემ ხუსეინის ასული წულუკიძე ქართველი მანდილოსნის ღირსებით აღსავსე ქალბატონი ყოფილა. იმ დროს, როცა მერიემს სწავლის ასაკი შეუსრულდა, სოფელში სკოლა არ ყოფილა. სწავლის წყურვილი ვერ მოიკლა, ოცნებად დარჩა, თუმცა წერა-კითხვის უცოდინარობის სალიკვიდაციო სკოლაში („ლიკბეზი“) ისწავლა წერა-კითხვა. სკოლების მასობრივად გახსნამდე ასეთი სკოლები არსებობდა XX ს. 20-30-იან წლებში. დიდი სურვილის მიუხედავად, სკოლაში ბოლომდე ვერ ისწავლა, რადგან გათხოვდა. 1919 წელს თანასოფელელ, დარბასიელი აღნაგობის ახალგაზრდასთან, ხუსეინ ბაჯელიძესთან შექმნა ოჯახი. მათ 60 წელი ერთად ზიდეს მძიმე, მაგრამ ტკბილი ცხოვრების უღელი და ასე გაატარეს თავიანთი შინაარსიანი, პატიოსანი და შრომით დატვირთული ცხოვრება. ქალბატონი მერიემი დიდი რუღუნებით ჩაება საოჯახო საქმიანობაში, რაც მეუღლის სამსახურსა და ექვსი შვილის აღზრდას მოანდომა. ბედნიერი დედა მოესწრო შვილების დაქორწინება-დაოჯახებას. იგი იყო, არა მარტო ბედნიერი დედა, არამედ შვილიშვილების მზურნველი ბებია და შვილთაშვილების – დიდი ბებიაც. მან დიდი სიყვარული დაიმსახურა და ავტორიტეტი მოიხვეჭა, არა მარტო კარგი რძეობითა და დედობით, არამედ აგრეთვე კარგი დიასახლისობითა და სტუმართმოყვარეობით. იგი გაჭირვებულებისა და ქვრივ-ობლებისადმი ყურადღებით გამოირჩეოდა სოფელში – მეზობლებში, ნათესაობაში. ამიტომ უფრო მეტად უნდოდა სიცოცხლე, რათა დამტკბარიყო თავისი ნაშრომ-ნაამაგართ, შვილებისა და შვილიშვილების სიყვარულით, მაგრამ ცხოვრება მუხთაღია, როდის დაგიდებს კვანტს და დაგიცურდება ფეხი, არ იცი. 1992 წელს 92 წლის ასაკში, ქალბატონი მერიემი გარდაიცვალა, განისვენებს ხუცუბანის მადლიან მიწაში ბაჯელიძეთა საგვარეულო სასაფლაოზე.



სკენდერ ბაჯელიძის მშობლები:
დედა – მერიემ წულუკიძე (1900-1992),
მამა – ხუსეინ ბაჯელიძე (1880-1980)

ქალბატონ მერიემის მაღალმოქალაქეობრივი თვისებები არა მარტო სახელოვანი მშობლების (ეს მთავარი ფაქტორია კარგი რძელობისთვის) კარგი აღზრდის შედეგი იყო და გენეტიკური კოდით მომდინარეობდა, არამედ ამას აღრმავებდა, აძლიერებდა და ემატებოდა აგრეთვე ქმრის, ბატონი ხუსეინისადმი ერთგულება, დაფასება, ყურადღება და მეგობრული დამოკიდებულება. სწორედ ამაზე იტყვიან: კაცი ქალით კაცობს, ქალი კაცით ქალობსო.

ნათქვამიდან ჩანს, რომ სკენდერ ბაჯელიძეს ჰყავდა არა მარტო კარგი დედა, არამედ კარგი, ყურადღებიანი მამა. ისინი სითბოს და მზრუნველობას არ აკლებდნენ ერთმანეთს და ოჯახს.

სკენდერ ბაჯელიძის მამა – ხუსეინი, მემედ ბაჯელიძის ოჯახში უფროსი შვილი ყოფილა. იგი დაიბადა 1880 წელს სოფელ ხუცუბანში. ბავშვობა თანატოლ ბიძაშვილებსა და ნათესავ-მეზობლებთან ერთად გაატარა. მძიმე ბავშვობა ჰქონდა, მაგრამ მზრუნველი მშობლების ხელშეწყობით სწავ-



ლას დაეწავა. რაკი მაშინ სოფელში ქართული სკოლა არ ყოფილა, ისწავლა ქობულეთის რუსულ დაწვებით სკოლაში, სადაც ასწავლეს რუსული წერა-კითხვა, ხოლო ქართული წერა-კითხვა თავად ისწავლა, დამოუკიდებლად. „როცა ქართულად დავწერდი, – იხსენებდა შვილებთან და შვილიშვილებთან საუბარში ბატონი ხუსეინი, – მასწავლებელი სახაზავით გაგვწკებლავდა – რატომ წერ ქართულად-ღო.“ ასე იყო საქართველოში მეფის რუსეთის თვითმპყრობელობის დროს, რუსიფიკატორული პოლიტიკის პერიოდში. გასული საუკუნის 20-იან წლებამდე იგი ვაჭრობით იყო გატაცებული. შემდგომ კი საკოლმეურნეო ცხოვრებაში ჩაება. ხუსეინი გამრჯე, წელგამართული მეურნე, შრომისმოყვარე და კეთილი კაცი ყოფილა.

ბატონმა ხუსეინმა ოჯახი, როგორც ზემოთ ითქვა, თანასოფელელ ხუსეინ წულუკიძის აღიარებულ ოჯახში გაზრდილ მერიემ წულუკიძესთან შექმნა და 60 წელი ერთად ჭიმეს ცხოვრების ჭაპანი. ექვსი შვილი აღზარდეს და ცხოვრების გზაზე დააყენეს. მათ ჰქონდათ შეხმატკბილებული ცხოვრება, ნახეს გაჭირვებაც, დაღხინებაც, მაგრამ ურთიერთპატივისცემით იოლად ლახავდნენ ცხოვრების დაბრკოლებებს. ასეთ პირობებში გაზარდეს ბავშვები: **სკენდერი, ვლადიმერი, შუქრი, ზია, ფათუშა და ქესკინი**. ფათუშა და ზია ადრეულ ასაკში გამოეთხოვნენ სააქაოს და ზეციური საქართველოს მკვიდრნი გახდნენ, დანარჩენები გაიზარდნენ, დაგაუკაცდნენ, დაოჯახდნენ და მშობლების გული გაახარეს, თავადაც კარგი ცხოვრება შექმნეს.

მართალია, ხუსეინ ბაჯელიძეს კლასიკური განათლება არ მიუღია, მაგრამ თვითგანათლების გზით იმდენს მიადგია, რომ სოფელში (და არამარტო სოფელში) ერთ-ერთი აღიარებული პიროვნება იყო: დინჯი, სიტყვაძვირი, თავდაჭერილი, ჭკუასაკითხავი, კეთილშობილი, მოყვასის ერთგული, უფროსების მომხმენი და დამჯერი, უმცროსებზე მზრუნველი



და დამრიგებელი, გაჭირვებულებზე, ქვრივ-ობლებზე თუ მეზობლებზე უხმაუროდ და უანგაროდ ხელისგამწოდებელი, შრომისმოყვარე პიროვნება. ასეთ კაცზე არსებობს კარგი შინაარსით დატვირთული ტერმინი „კარგი ბერიაო.“ ქობულეთში კი იტყვიან კარგი ხუცია, მოხუცი, თუ უხუცესიაო. სხვათა შორის, სოფლის სახელსაც ადგილზე შემორჩენილი ძველი ფოლკლორული გადმოცემის მიხედვით, ხუცუბნელთა ერთი ნაწილი უკავშირებს „ხუცებს“ – უხუცესებს და მიღებულია „ხუცუბანი.“ რა თქმა უნდა, აქ, ამ შემთხვევაში არ იგულისხმება ტერმინის სასულიერო აზრი, არამედ ხანდაზმულ და ჭკვიან კაცზე იტყვიან, რომელიც გამოირჩევა სიტყვაძვირობით, ჭკუით, ბრძნული აზრებით, მამაშვილური დარიგებებით, კაცი, რომელსაც ყველა უსმენს და უჯერებს.

დიდი შრომა-ჯაფა გამოვლილი, საუკუნის ასაკს მიღწეული, ხუსეინ ბაბუ გარდაიცვალა ღრმად მოხუცი, 1980 წელს. განისვენებს მშობლიურ სოფელში, საგვარეულო სასაფლაოზე, მეუღლის გვერდით.

ფიქრობთ, არ იქნება ზედმეტი ხუსეინ ბაბუაზე საუბრისას მოვიგონოთ ერთი საინტერესო ეპიზოდი.

აკაკი წერეთლის სახელობის ბათუმის საჯარო ბიბლიოთეკაში პრესის მასალების დამუშავებისას გაზეთ „აჭარის“ ერთ-ერთ ნომერში წავაწყდით წერილს სათაურით: „მეჭიბონე ხუსეინ ბაჯელიძე“.

მართალი ვითხრათ, გაგვეხარდა, სკენდერ მასწავლებლის მამა მეჭიბონე, ხელოვნების კაცი ყოფილაო (მისი მამაც ხომ ხუსეინია). დავინტერესდით, გვეჩქარებოდა მასწავლებელთან შეხვედრა ამ საკითხის დაზუსტებისათვის (სხვათა შორის, სისტემატურად ვხვდებოდით მასწავლებელს, ან ის გვეწვეოდა ოჯახებში). მალე კიდევაც შევხვდით. საუბარი ჩამოვაგდეთ მშობლებზე, მოვიგონეთ პრესაში „დამოჩენილი“ „მეჭიბონე ხუსეინ ბაჯელიძე“, გვავინტერესებდა ეს ხელოვანი კაცი მისი მამა იყო, თუ უბრალოდ, სახელ-გვარის დამთხვე-

ვა მოხდა. მამამისზე ჩვენ მანამდე არაფერი ვიცოდით და არც მას უთქვამს მის საქმიანობაზე თუ ხელოვნებაზე.

ჩვენი საუბარი მასწავლებელს ესიამოვნა, რომ ჩვენ, მისმა მოწაფეებმა, მის მამაზე ყურადღება გავამახვილეთ. „დღევანდელი ზოგიერთი ახალგაზრდა მოსწავლე თუ სტუდენტი, სამწუხაროდ, მასწავლებლის თუ ლექტორის სახელგვარს ერთად ვერ დაგვისახელებს, – გაკვირვებით, უფრო სწორად, გაოგნებული, თითქმის საყვედურშერეული ტონით, ოდნავ მაღალი ხმითა და ღიმილნარევი სახით მოგვმართა სკენდერ მასწავლებელმა, – მასწავლებლის მშობლებზე საუბარი რა ენაზე მოსატანია. თქვენ კი მასწავლებლები ყველა გახსოვთ და მასწავლებლის მშობლებითაც ინტერესდებით. დიდი მადლობა ამისათვის. ეს იმას ნიშნავს, რომ თქვენ, მართლაც, გულწრფელები ხართ მასწავლებელთა მიმართ, რამ „გაგაგიჟათ“, რით „მოიწამლეთ“ ასე მაგრად. რა გაგიკეთეთ ასეთი?!“ სიხარულგამოხატული გაკვირვებით, ოდნავ აწეული ხმით, წარმოთქვა ნასიამოვნებმა მასწავლებელმა ჩვენი ემოციური საუბრის შემდეგ. ერთხანს შეწყდა საუბარი, შეჩერდა, პაუზა გაკეთდა, სახეზე წითელი აღმური მოედო. ცუდად ხომ არ ხართ, სკენდერ მასწავლებელო? – შეწუხებულნი გაცხარებით მივმართეთ მას. პაუზის შემდეგ უხმაუროდ, ზევით აწეული ხელით გვანიშნა, არა, კარგად ვართ. ჩვენ შევამჩნიეთ, რომ ის რაღაცას გვიმაღავდა. ნათქვამია, შუბი ხალთაში არ დაიმალებაო. თვალებში ცრემლები რომ შევამჩნიეთ, მაშინ მივხვდით, რომ დიდად გახარებულს, ომის მძიმე წლებგამოვლილს, გრძნობებმა უღალატაო. ვერ ვიტყვით, არ ვიქნებით მართალი. მან გრძნობის კარნახით გადმოვარდნილი ცრემლებით გამოხატა ჩვენდამი მადლიერება და კმაყოფილება იმ დამოკიდებულებისა და ყურადღებისთვის, სიტბოსა და დაფასებისთვის, რასაც ჩვენში ხედავდა – მასწავლებლის მიმართ რომ ვავლენდით (სხვათა შორის, მშობლის შემდეგ მასწავლებელი ჩვენთვის



იყო ყველაფერი, პირველ ინფორმაციას სკოლაში მისგან ვისმენდით). დამშვიდდა, ამოისუნთქა, კიდევ ერთხელ თბილი სიტყვებით მადლობა გამოხატა, ჩაგვეხუტა, გულზე მიგვიკრა, მოგვეფერა საკუთარი შვილებივით და განაგრძო საუბარი ჩვენს მიერ დასმული თუ დასაზუსტებელი კითხვის პასუხად თავიდან ფეხის ტერფამდე კმაყოფილმა მასწავლებელმა. ეს ისეთი საინტერესო ეპიზოდი იყო და ასეთი დიდაქტიკური სცენა გათამაშდა, ჩვენდა უნებურად, ამას ნამდვილად არ ველოდით. ისეთი შთაბეჭდილება შეგვექმნა, ენა ვერ ამოვიდეთ მასწავლებლის ამ მიმიკაზე. მის თვალებში ჩამდგარმა ცრემლებმა ჩვენც დაგვატყვევა და, ალბათ, უბრალო მკითხველისთვის ძნელად წარმოსადგენია ეს მომენტი. ჩვენც ცრემლები ჩაგვიდგა თვალებში. – „დიდი მადლობა, ახალგაზრდებო!“ – გაიმეორა მასწავლებელმა, მიხარია და იმედი მაქვს, თუ გაიზრდება ასეთი თაობა (და უნდა გაიზარდოს), როგორც თქვენ ხართ, დარწმუნებული ვარ, საქართველო მარად იქნება...

როგორც იქნა, ემოციური გრძნობები მოვთოკეთ მასწავლებელმაც და მისმა მოსწავლეებმაც. ჩვენმა დიდოსტატმა განაგრძო საუბარი: „ბიჭებო, მთავარი სათქმელი, რამაც მე ამაფორიაქა, დაგვრჩა. ახლა დავუბრუნეთ „მეჭიბონე ხუსეინ ბაჯელიძეს“ – თქვენი წაკითხული წერილი მამაჩემს არ ეხება. ის არ იყო ჩემი მამა. მეჭიბონე ხუსეინი ჩემი ბიძა იყო. ეს სახელების უბრალო დამთხვევაა. მამაჩემის ბიძაშვილი მე ბიძად მხვდება. ის იყო ხუშუტის ძე, მამაჩემი მე მედის ძე. ისე კი ის ვირტუოზულად, ორიგინალურად უკრავდა ჭიბონზეც და სხვა ინსტრუმენტებზეც. სიმღერასაც აყოლებდა. ჩვენში აღიარებული მეჭიბონე იყო. უყვარდა ხელოვნება. თქვენი კი არ მიკვირს, ბევრი სხვაც მეკითხებოდა ამის თაობაზე. რა თქმა უნდა, კარგი კაცი იყო, უყვარდა ხალხს, პატივს სცემდა მას. ხელოვნებათმცოდნეები ბევრჯერ წერდნენ მის შესახებაც. აქვე დაგვისახელა გუგული

გაბისონიას წიგნი „საგუნდო ხელოვნების მოამბე“ (ბათუმი, 1974). წიგნის მე-19-20 გვერდები მასზეა დათმობილი. აწი დაიმახსოვრეთ მისი (ე.ი. მამის) ბიძაშვილი ჩემი ბიძაც იყო და აღიარებული, არა მარტო ბიძაშვილებში, ბაჯელიძეებში, არამედ მთელ სოფელში, ქობულეთში. ხელოვნების მუშაკთა შორისაც. რაკი ჩემს შინაურ პიროვნებას ასეთი ყურადღებით მოეკიდეთ, არა აქვს მნიშვნელობა, ჩემი ბიძა იყო თუ მამის ბიძაშვილი, მე მადლობას მოგახსენებთ ხელოვანისა და ხელოვნებისადმი ასეთი გატაცებული სიყვარულისათვის...“

ხუსია (ხუსეინ) ბაჯელიძე პოპულარული პიროვნება ყოფილა არა მარტო ბაჯელიძეებში თუ ხუცუბანში, არამედ ქობულეთში და აჭარის ფარგლებს გარეთაც. ამაზე მეტყველებს მასზე შექმნილი ლექსი „ხალხური მეჩონგურე“.

„ბაჯელიძეს ვინ არ იცნობს, სახელად ჰქვია ხუსია,
ხელში ჩონგური უჭირავს, ყველაზე უკეთესია,
ისე ხუცდება მგოსანი, ცუდი არ დაუთესია.
მელექსეობს მაღალი ხმით, მეჩონგურეთა წესია,
ბაჯელიძე, თქვენ იცოცხლეთ, ჩვენ ვიქნებით მოხარული,
ნამეტანი კარგი რომ ხარ, ამხანაგის მოყვარული“.

ცნობილი პატრიოტის, ხალხური მთქმელის – **ხასან თხილაიშვილის** ლექსში ვკითხულობთ:

„ქობულეთში საამაყო ხუსია ბაჯელიძეა,
გვიცოცხლოს ღმერთმა, ზრდილობით კარგი კაცი,
ორგულების მიმართ კი მეტად სერთი“ (მკაცრი – ავტ.).

ხუსეინ ბაჯელიძე ლექსებს თავადაც იგონებდა და ამღერებდა კიდევაც (სამწუხაროდ, მისი ყველა ლექსი და სიმღერა ჩვენამდე მოღწეული არაა).



მიუხედავად იმისა, რომ იგი ბრმა იყო, ვერ ხედავდა, ხუცუბანში აღიარებული ხალხური მთქმელი და მეჭიბონე – მეჩონგურე კაცი, იმედნად საყვარელი ადამიანი იყო, რომ ხალხში ზედმეტად „ბრმა ხუსია“-ს სახელით არავინ მიმართავდა, ყველა დაგისახელებდა, როგორც „მეჩონგურე“ ან „მეჭიბონე“ ხუსიას.

კიდევ ერთი, მაგრამ, ჩვენი აზრით, დაუჯერებელი ფაქტი ამ ქებული ადამიანის შესახებ. 1938 წელს თბილისში გამოცემულ ა. ხინთიბიძის წიგნში „გურული ფირალები“ ჩამოთვლილია კოწია ცეცხლაძე, პროკოფი ჭყონია, გოგა ლომჯარია, ხუსეინ (ხუსია) ბაჯელიძე და სხვები.

ვის გაუგონია ბრმა კაცი და ფირალი? ამას ხომ კომენტარი არ სჭირდება, ანდა, ხელოვან კაცს რა აფირალებდა?

აი, როგორი დედ-მამა, ნათესაობა ჰყავდა სკენდერ ბაჯელიძეს. გასაგებია ისიც, თუ როგორ გაიზრდებოდა იგი ასეთი მზურნველი და სწავლამოწყურებული, მაგრამ ამ მხრივ ოცნებააუხდენებელი მშობლების ხელში. რა თქმა უნდა, მშობლებმა, დიდი სურვილის მიუხედავად, სკოლის არარსებობა და ცხოვრების მძიმე პირობების გამო, ვერ ისწავლეს, მაგრამ ამით გული არ აუცრუებიათ. სამაგიეროდ, მთელი ენერგია, შრომა და ჯაფა მოანდომეს შვილების ნორმალურად აღზრდა-განათლებას, ღირსეულ მოქალაქეებად ჩამოყალიბებას. ამაში ხედავდნენ ისინი შვილების კარგ მომავალსა და ბედნიერებას. ეს იქნებოდა მათი სიცოცხლის გაგრძელება და თავსითავად მათი (მშობლების) გახარებაც.

სწავლა-განათლებით დაინტერესებული, მეტად მოწადინებული დაუოკებელი სურვილით გაჟღენთილი მშობლების ხელში გაატარა ოჯახის პირველმა სიხარულმა, პატარა სკენდერმა თავისი ბავშვობა. მისი ბავშვობა დაემთხვა ახალი ყოფა-ცხოვრების დამკვიდრების ხანას, როცა ჯერ კიდევ ახლად იმსხვრეოდა ძველი ფეოდალურ-შუასაუკუნეობრივი, მოძველებული, დახავსებული ყოფა და ადათ-წესები,

მკვიდრდებოდა ახალი ურთიერთობები. გარდამავალი პერიოდის ასეთ მძიმე პირობებში უხდებოდა ცხოვრება მოსახლეობას.

მიუხედავად სიძნელებისა, იხსნებოდა სკოლები, ტექნიკუმები, უმაღლესი სასწავლებლები, იქმნებოდა განათლების სისტემა, მაგრამ მატერიალური ხელმოკლეობის, უგზოობის, უტრანსპორტობის გამო, ყველას ხელი არ მიუწვდებოდა სწავლა-განათლების მიღებაზე და ბევრი ნიჭიერი, სწავლამოწყურებული ახალგაზრდის ცხოვრება შემოიფარგლებოდა მხოლოდ დაწყებითი, საუკეთესო შემთხვევაში, შეიღწიანი სკოლის დამთავრებით. ცოტათი შეძლებულები ახერხებდნენ ტექნიკუმებში შესვლას, ან სხვა ქალაქების უმაღლეს სასწავლებლებში სწავლის გაგრძელებას, რადგან, 1935 წლამდე ბათუმში უმაღლესი სასწავლებელი, ინსტიტუტი არ არსებობდა, მანამდე მის ფუნქციას ასრულებდა პედაგოგიური სასწავლებელი, რომელსაც მასზე დაკისრებული ფუნქციის გამო, ეწოდებოდა აჭარისტანის პედაგოგიური სასწავლებელი. 1935 წელს მის ბაზაზე გაიხსნა ბათუმის სამასწავლებლო ინსტიტუტი, უმაღლესი განათლების პირველი კერა აჭარაში.

პატარა სკენდერი ღაღად იზრდებოდა დედის „იავნანათი“ და მამის ალერსითა და მზრუნველობით.

§2. ბავშვობა

დღე-დღეზე იზრდებოდა პატარა, ოჯახის იმედი, ნუგეში და მომავალი – ქვეყნად მოვლენილი სკენდერი. მშობლებს დიდად ახარებდა ჩვილის თავისებური მეტყველება – ბურღლუნი, ხელების ქნევა, ღიმილი, ზოგჯერ მშობლების, განსაკუთრებით დედის გამაფრთხილებელი, ღამაზი ტირილი – მომხდეთ, მომეფერეთო. შინაგანად უხაროდა დედ-მამას.



არაფერს ვამბობთ, და წარმოიდგინეთ, რა დღეში იქნებოდნენ მერიემ ბებია და ხუსეინ ბაბუა, რომელთა სიყვარული შვილებისადმი გაიზარდა, გაძლიერდა შვილიშვილებისადმი სიყვარულითაც. პირველი შვილი, პირველი შვილიშვილი ხომ მართლაც ერთ უთქმელი სიხარულია, წარმოუდგენლად, უზადო სიყვარულია ოჯახში, განა მარტო იმიტომ, რომ ახალი წვერი შეემატა ოჯახს, სოფელს, რაიონს, კუთხეს, ქვეყანას, თუნდაც პლანეტას, არამედ, აგრეთვე, იმითაც, რომ ოჯახში ახალი ნათესაური ურთიერთობის აღმნიშვნელი ახალი ლექსიკაც გაჩნდა: „დედა“, „მამა“, „ბებია“, „ბაბუა“, „მისი შვილი“, „ღის შვილი“, „ბიძა შვილი“, „დეიდა შვილი“ და ვინ ჩამოთვლის კიდევ რამდენი რამ.

აი, რაოდენ სიხარული, სიუხვე, სიმდიდრე და ბედნიერება თან მოაქვს „სააქაოში“ ახალმოსულს თითოეულ ოჯახში (ღმერთმა არავის მოაკლოს ეს სიხარული და ბედნიერება საკუთარ ოჯახში). შვილის, განსაკუთრებით, პირველი შვილის და, თუ ვინიცობაა, გვარის გამგრძელებელია, მით უფრო, დღესასწაულია, არა მარტო ოჯახში, მთელ გვარშიც. ახალშობილი ყველას უხარია, მაგრამ ბევრჯერ გაუცნობიერებელია ამ სიხარულის თუ სიყვარულის არსი და შინაარსი, თუმცა, ყველა შემთხვევაში (ცნობიერია თუ გაუცნობიერებელი) ეს მომენტი მუდამ სიხარულის მომგვრელია. თუ შვილი ნორმალურად გაიზრდება და წინაპართა შთამომავლობაში ღირსეულ ადგილს დაიმკვიდრებს, ასეთი შვილის დაბადება მართლაც აუწერელი ბედნიერებაა თავიდან ბოლომდე, მაგრამ თუ, ცუდი აღზრდის შედეგად, შვილი გზას აცდა, არ გაჰყვა მამა-პაპათა ნათელ კვალს, მაშინ ასეთი შვილის დაბადებით გამოწვეული სიხარული დღენაკლია, მალე უბედურებად შეიცვლება. გზასაცდენილი შვილი მშობლებს მის სიცოცხლეში კლავს თავისი ავი ზრახვებით თუ ბოროტი საქციელით. ასეთზე იტყვიან „შენს ნაცვლად ქვა გაჩენილიყო, ხომ აჯობებდა, ღობეს გავაკეთებ-

დიო.“ ღმერთმა ყველა მშობელი დაიფაროს ასეთი უბედურებისგან. რატომ ხდება ასე? ასეთ უბედურებას მრავალი ფაქტორი განაპირობებს. ეს სხვა სასაუბრო თემაა, მაგრამ რაკი მშობლებზე ჩამოვარდა საუბარი, ერთს ვიტყვი, რომ, ჩვენი აზრით, ამ უბედურების უპირველესი მიზეზი ცუდი, ზომიერებას მოკლებული აღზრდაა.

ამიტომ ასეთ მშობლებს გვინდა ვურჩიოთ, რომ შვილის აღზრდაში და საერთოდ ცხოვრებაში მთავარია ზო მ ი ე რ ე ბ ა. ბერძენი ფილოსოფოსები ცოდნათა შორის ყველაზე დიდ ცოდნად სწორედ ზომიერების გრძნობას მიიჩნევდნენ, რაც სავსებით სწორია და გასათვალისწინებელი ადამიანის ყოველდღიურ ცხოვრებაში, თავისი საქმიანობის ყველა სფეროში, ყოველნაირ მოქმედებაში. აქედან გამომდინარე, შეგახსენებთ, სპარსულ-ტაჯიკურ-არაბული ლიტერატურის კლასიკოსი პოეტის მ. საადის რჩევას ჩვენი პერიფრაზით, რომ **ზედმეტი სიმკაცრე, რისხვა შვილებისადმი შიშს იწვევს, უზომოდ ზემდეტი ფერება კი შვილის თვალში შენდამი პატივისცემას ამცირებს. ნუ იქნები იმდენად მკაცრი, რომ ყველას თავი მოაბეზრო და იმდენად ღმობიერი, რომ გეთავსებდნ.**

ჩვენი აზრით, ვინც შვილს ამ შეგონების გათვალისწინებით **გაზრდის, გვერწმუნეთ, უბედურებას თავიდან აიცილებს და ბოლომდე ბედნიერი იქნება მშობელ-შვილურ ურთიერთობაში.**

კარგი მშობლების – ქალბატონი მერიემის და ბატონი ხუსეინის – ოჯახში პატარა სკენდერი და მომდევნო 5 შვილი სწორედაც ამ ზომიერებით იზრდებოდა. ისინი ქართული ტრადიციების, სამშობლოს ერთგულებისა და მშობლებისადმი პატივისცემის, უფროს-უმცროსობის აღიარებული წესების დაცვის სულისკვეთებით ზრდიდნენ შვილებს, რაზედაც მიუთითებს თითოეული მათგანის გავლილი გზა, მათი ღირსეული ოჯახები. ასეთ თბილ გარემოში პატარა სკენდერი



დღე-დღეზე იზრდებოდა, მალე ენა ამოიღვა, თამაში დაიწყო თანატოლ გოგო-ბიჭებთან. აი, როგორ იგონებს სკენდერის ბავშვობის წლებს მისი ბიძაშვილი ხასან დურსუნის ძე ბაჯელიძე: „მამა ადრე გარდამეცვალა. მე ხშირად ხუსეინ ბიძიას ოჯახში ვიყავი, სკენდერთან ერთად ვთამაშობდი. ბავშვობა ერთად გავატარეთ. ბიძაშვილებიდან ყველაზე ახლოს ვიყავი სკენდერთან. იგი იყო მეტად წესიერი, თავაზიანი, დინჯი, მშობლების მოყვარული და დამჯერი. არასდროს არ წაგეჩხუბებოდა, ყოველთვის მხარში მედგა. სკოლაშიც პირველ კლასში ერთად მივედი და ჯარშიც ერთად გაგვიწვიეს. ჯარიდან დაბრუნების შემდეგაც ერთმანეთთან ახლოს ვიყავით. მართალია, ის მასწავლებელი იყო და მუშაობდა ხულოს რაიონში, მაგრამ როცა ჩამოვიდოდა მშობლებთან ოჯახში, აუცილებლად შევხვდებოდით. ბავშვობის სიყვარული და ურთიერთპატივისცემა ბოლომდე გამოჰყვა,“ – ასე დაახასიათა ბიძაშვილმა თანატოლი სკენდერი, როცა იგონებდა მასთან ერთად გატარებული ბავშვობის წლებს.

§3. სწავლის წლები

მშობლების მზრუნველობით, ბაბუა-ბებუას ალერსითა და ნათესავ-ახლობლების მოფერებით, სკენდერის ბავშვობა მალე გავიდა. დადგა სკოლაში შესვლის დრო.

1928 წლის პირველი სექტემბერია. შვიდი წლის სკენდერს დედამ ჩააცვა, დაახურა, მოამზადა პირველ კლასში წასასვლელად, მამამ კი დიდი სიხარულითა და სიამაყით მიიყვანა სკოლაში. პატარა სკენდერი მშობლიური, დაწყებითი სკოლის პირველი კლასის მოსწავლედ ჩარიცხეს. მალე შეეჩვია იგი სკოლას, ამხანაგებს, მასწავლებლებს. შეიყვარა წიგნი, სკოლა, მასწავლებელი, დავალებებს დროულად ას-

რულებდა, თამაშსაც ასწრებდა. გაიარა წინასწარანტ კერი-ოდი, ეზიარა იაკობ გოგებაშვილის „დედაენის“ სიტბოსა და ხიბლს. მაშინ, რა თქმა უნდა, ვერ აცნობიერებდა, ვინ იყო დიდი იაკობი, მაგრამ უხაროდა, რომ მისი წიგნით ისწავლა ქართულ, მშობლიურ ენაზე წერა-კითხვა. პატარა ბიჭუნას სწავლა არ უჭირდა, კლასიდან კლასში გადადიოდა დაუბრკოლებლად. „ფრიადოსანი არ ვიყავი, მაგრამ სწავლა არ მიჭირდაო“, - იგონებდა იგი ჩვენთან საუბარში.

ხუცუბანი დიდი სოფელი იყო. დაწყებითი სკოლის ბაზაზე გაიხსნა ჯერ შვიდწლიანი, შემდეგ საშუალო სკოლა და სკენდერმაც აქვე ბოლომდე გააგრძელა სწავლა.

1938 წელს სკენდერმა დაამთავრა ხუცუბნის საშუალო სკოლა და იმავე წელს მოეწყო ბათუმის №1 პედაგოგიურ სასწავლებელში, რომლის ბაზაზე 1935 წელს შეიქმნა ბათუმის შოთა რუსთაველის სახელობის ორწლიანი სამასწავლებლო ინსტიტუტი. 1945 წელს იგი გადაკეთდა ოთხწლიან სახელმწიფო პედაგოგიურ ინსტიტუტად, 1990 წელს კი ბათუმის შოთა რუსთაველის სახელობის სახელმწიფო უნივერსიტეტად. მოგვიანებით, სახელწოდებიდან ქალაქის დასახელება ამოიღეს და ეწოდა „შოთა რუსთაველის სახელმწიფო უნივერსიტეტი“ (გაუგებარია, რა გამართლება ჰქონდა სასწავლებლის სახელწოდებიდან ქალაქის სახელის ანუ-ლირებას?) ეს შეცდომა გასწორდა, მაგრამ ბოლომდე არა. ეს სასწავლებელი რუსთაველმა კი არ შექმნა, არამედ მისი სახელობისაა. ამიტომ უნდა იყოს შოთა რუსთაველის **სახელობის** (ავტ.) ბათუმის სახელმწიფო უნივერსიტეტი.

პედაგოგიური სასწავლებლის დირექტორად იმ დროს მუშაობდა ცნობილი პედაგოგი და აღიარებული ორგანიზატორი ნიკოლოზ ლორთქიფანიძე, რომელიც, სამწუხაროდ, 1937 წლის რეპრესიებმა შეიწირა. სკენდერს სასწავლებელში ასწავლიდნენ მცოდნე, კვალიფიციური, სამშობლოსათვის თავდადებული პედაგოგები: ალექსანდრე ჩიმაკაძე, ვუკოლ



იაშვილი, ილია ღლონტი, ნადიმ ნიჟარაძე, ნადია ჯიბუტი, სტრატონ თოთიბაძე, ნატალია ჟორდანი, ირაკლი ნაკაძე, ილია გოგიტიძე, ქეთევან ალასანი, ზინა გოგოლიშვილი, მელიტონ კუხიანიძე, დავით ჭეიშვილი, გივი ნიორაძე და სხვები. მასთან ერთად სასწავლებელში სწავლობდნენ თანატოლები: ოთარ და ჰაიდარ ფაღავები, გუგული ბერიძე, რუსულ გოგიტიძე, ემინე მახარაძე, გრიშა ცხიძე და ბევრი სხვა.

ბატონი სკენდერი დიდი მადლიერებით იგონებდა ამ სასწავლებელში სწავლის წლებს, კმაყოფილებას გამოთქვამდა მასწავლებლების მიმართ. მოხიბლული იყო დირექტორის პიროვნებით და დიდი რიდიც ჰქონდა მის მიმართ.

1941 წლის 18 ივნისს დაამთავრა პედაგოგიური სასწავლებელი და მიიღო დაწყებითი კლასების მასწავლებლის კვალიფიკაცია. ფიქრობდა ერთხანს სკოლაში მუშაობას, შეიძენდა შრომით გამოცდილებას, დააგროვებდა ცოტაოდენ ფულსაც, რაც ოჯახს გამოადგებოდა, მამას დაეხმარებოდა, შემდეგ კი სურდა სწავლის გაგრძელება უმაღლეს სასწავლებელში და კვალიფიკაციის ამაღლება.

სკენდერის ჩანაფიქრი გონივრული იყო, მაგრამ მოულოდნელმა შემთხვევამ მისი ცხოვრების გზაც შეცვალა.

1941 წლის 21 ივნისს სასწავლებლის კურსდამთავრებულებს გამოშვების საღამო ჰქონდათ, რომელსაც ესწრებოდნენ სასწავლებლის დირექტორი, პედაგოგები, მშობლები, კურსდამთავრებულები. ისმებოდა სადღეგრძელოები, მადლობას ეუბნებოდნენ აღმზრდელ-პედაგოგებს, მშობლებს, ადიდეს სამშობლო, რომლის სამსახურს მალე შეუდგებოდნენ. უხაროდათ ახალგაზრდებს სასწავლებლის დამთავრება, დიპლომებით ახალი ცხოვრების დაწყების მოლოდინში რომ იყვნენ. ცოტა დრო გავიდა, დაილია არაერთი სასმისი, ღვინომ თავისი თქვა. ამას მოჰყვა სიმღერები, ცეკვები, საღამომ ზემის ხასიათი მიიღო. შეხვედრა გვიან ღამემდე გაგრძელ-

და. შემდეგ დაემშვიდობეს და გააცილეს. მასწავლებლები, მერე ერთმანეთს დაემშვიდობნენ, დაულოცეს გზები და თვალცრემლიანნი დაბრუნდნენ ოჯახებში. მაგრამ ეს ცრემლები იყო სიხარულის, დაშორებით გამოწვეული სინანულის და არა უბედურების ან რაიმე მწუხარების.

მალე გათენდა 22 ივნისი – მეტად მძიმე და შემზარავი ამბის ინფორმაციით. ამ დღეს ფაშისტური გერმანია მუხანათურად თავს დაესხა საბჭოთა კავშირს. მთელი ქვეყანა ფეხზე დადგა. დაიწყო დიდი სამამულო ომი.

§4. ცხოვრების მძიმე წლები

ფაშისტურ გერმანიას წინ აღუდგა მთელი საბჭოთა ხალხი იოსებ სტალინის მეთაურობით. საბჭოთა მთავრობის გადაწყვეტილებით, ჩატარდა მოსახლეობის საყოველთაო-სავალდებულო მობილიზაცია. ქუდზე კაცი ფეხზე დადგა. საარქივო მასალებიდან, პრესის ფურცლებიდან, სათანადო წიგნებიდან ცნობილია, რომ საყოველთაო მობილიზაციის ოფიციალურად გამოცხადებამდე, ბევრ რაიონში ახალგაზრდობა ცხადდებოდა სამხედრო კომისარიატებში და ეწერებოდა მოხალისეთა რიგებში. ამ მხრივ არც ქობულეთის რაიონი იყო გამონაკლისი. მობილიზაციის ოფიციალურად გამოცხადებისთანავე 100-მდე ახალგაზრდამ გამოთქვა სურვილი მოხალისედ წასვლაზე.¹ როგორც ზემოთ ითქვა, დიდ სამამულო ომის წლებში ფაშიზმის წინააღმდეგ ბრძოლაში მონაწილეობდა ქობულეთის რაიონიდან 5800 კაცი, მათგან დაბრუნდა 1550 მეტროპოლი. ამ რაიონიდან ჩაქვის შემდეგ ყველაზე მეტი ხუცუბნის სასოფლო საბჭოდან 1289 მოქა-

¹ საქართველოს პრეზიდენტის არქივი, ფ. 14, აღწ. 1, საქ. 1676, ფურც. 42.



ლაქე წავიდა ფრონტზე მტერთან საბრძოლველად.¹ მათ შორის იყო სკენდერ ბაჯელიძეც. 1942 წლის 26 იანვარს იგი, სხვა თანატოლებთან ერთად, ბათუმის სამხედრო კომისარი- ატიდან გააცივლეს ჯარში. სკენდერი ქ. მოსკოვში ჩავიდა, მერე გაგზავნეს ქ. პოდოლსკში და ჩარიცხეს შინაგან საქმეთა სახალხო კომისარიატის სპეცდანიშნულების შენაერთ- ში, რომელიც პოდოლსკის სამხედრო საჭურვლის დამამ- ზადებელ ქარხანას იცავდა, იქიდან – ჩრდილო კავკასიაში, შემდეგ სტავროპოლში გადაიყვანეს. მასთან ერთად იბ- რძოდნენ მტრის წინააღმდეგ ბათუმელი ვალიკო უჩანეიშ- ვილი, მიშა ჯანაშვილი, ხაბურზანია, გაბელია, მიშა ხუნდა- ძე; მანგლისიდან: ჯმუხაძე, თექეთაშვილი, თაქთაქიშვილი, წიკლაური და სხვები.

1942 წლის 3 აგვისტოს გერმანელი ფაშისტები სტავრო- პოლში შეიჭრნენ. პირველ ბრძოლებში აქტიური მოქმედები- სა და გამბედაობისთვის სკენდერ ბაჯელიძემ ორდენიც კი დაიმსახურა (ორდენის მიღებამდე ნაწილი, რომელშიც სკენ- დერი ირიცხებოდა, ალყაში მოხვდა და იგი ტყვედ აიყვანეს, მაგრამ ორდენის გადაცემა მოხდა ომის დამთავრების შემ- დეგ). აი, როგორ აღწერს ამ პროცესს ომგადახდილი:

„ერთ-ერთ ბრძოლაში მტერმა ჩვენი პოზიციები დაბომბა და დიდი ძალით შემოგვიტია. ჭირდა გამკლავება. ამასობაში ტყვია-წამალიც შემოგველია, მაშველი ძალაც არ ჩანდა. პოლკის მეთაური დაიღუპა. მისი მაგივრობა ახალგაზრდა უფროსმა ლეიტენანტმა იკისრა. – უკან უნდა დავიხიოთ, სხვა გამოსავალი არ არის, მტერს არავინ დანებდეს! – მოგ- ვმართა მან. მაგრამ ეს შეუძლებელი გახდა, რადგან მტერს უკვე ალყაში მოექცია ის ნაწილი, რომელშიც იბრძოდა სკენდერ ბაჯელიძე.

¹ რ. ართმელაძე, სამშობლოს სახელოვანი შვილები, ბათუმი, 1972, გვ. 213 (რუს. ენაზე).

ასე შეიცვალა სამშობლოს დასაცავად წასული სკენდერ ბაჯელიძისა და სხვათა ცხოვრების მძიმე გზა. იყო ტყვეობა, შიში, შიმშილი, გაჭირვება, სამშობლოზე ფიქრი, ტყვეობი- დან თავის დასაწვებად გაქცევის რამდენიმე ცდა, გაქცევა და ისევ ჩავარდნა. აი, იქიდან დაიწყო მისი ცხოვრების ტრაგიკული პერიოდი, სულიერი და ფიზიკური წამების გაჭიანურებული წლები. ბედუკუდმართობამ მას არგუნა დო- ნის როსტოვის, ბატაისკის, ტაგანროვის, მარიუპოლის, დნე- პროპეტროვსკის ციხეებში და საკონცენტრაციო ბანაკებში ყოფნა. „ყოველივე ამის მიუხედავად, არასდროს მიფიქრია სამშობლოს დაღატი, ყოველთვის იმედი მქონდა, რომ მტერი დამარცხდებოდა. ამ იმედით ვიტანდი ათას გასაჭირს, ტანჯვასა და წვალებას“, – იგონებდა ვეტერანი.

ტყვეობაში სკენდერი შეხვდა ბათუმის პედაგოგიური ინ- სტიტუტის ისტორიის ფაკულტეტის კურსდამთავრებულ მი- ხეილ ჯაშს, მეზობლებს ხუცუბნიდან – ზია მემედის ძე თხილაიშვილსა და სულეიმან ახმედის ძე ოქროპირიძეს. გერმანელები ტყვეებს ამუშავებდნენ რკინიგზის ხაზებისა და დანგრეული ხიდების აღდგენაზე. ისინი რამდენიმე ათას- ნი იყვნენ სხვადასხვა ქვეყნიდან.

1942 წლის ბოლოს საბჭოთა ტყვეები გადაიყვანეს მარი- უპოლში, შემდეგ დნეპროპეტროვსკში. 1943 წლის შემოდ- გომაზე მოხვდნენ პრუსიასა და პოლონეთში. აქ ბანაკში მათ ავსტრიელი, ინგლისელი და ფრანგი ტყვეებიც შეუერთეს. შემდეგ აქედან ისინი დანიისკენ წაიყვანეს. „ერთ-ერთ ნავ- სადგურში გაქცევა ვცადეთ, – იგონებს ტყვედყოფილი, – მაგრამ მეტად მკაცრი კონტროლის პირობებში ვერ მოვახერ- ხეთ.“ ერთ ნავსადგურში გემი გაჩერდა. დაიწყეს გერმანე- ლების კატერებით ტყვეების ნაპირზე გადაყვანა. სკენდერმა როგორღაც მოახერხა კატერზე ასვლა და ამხანაგებთან ერ- თად ნაპირზე გადავიდა. ეს იყო დანიის ახლოს კუნძულ



რედბუზეზე, მაგრამ ამას მოჰყვა ისევ საკონცენტრაციო ბანკი, ისევ ტანჯვა და წამება.

შემდეგ სკენდერი გადაიყვანეს ქ. ოდენზეში, სადაც საბჭოთა ტყვეების შემკრები პუნქტი იყო. რა თქმა უნდა, მას ტყვეობაში აქაც ბევრი წვალება და წამება გადახდა თავს. ამასთან, გამოჩნდნენ კეთილი დანიელი ადამიანები, რომლებიც ტყვეებს დახმარების ხელს უწვდიდნენ, აპურებდნენ, ხანდახან ტანსაცმლითაც მოსავდნენ. ყოველივე ამ მოწყალებას ბატონი სკენდერი შიშით და ეჭვით უყურებდა, მაგრამ ტყვეთა ბედი აიძულებდა ზოგჯერ უარი არ ეთქვა მოწყალებაზე. ასეთ კეთილ ადამიანად მას ბოლომდე ახსოვდა ლუის უგე, რომელიც დიდი ჰუმანურობით ეპყრობოდა ტყვეებს და მატერიალურადაც ეხმარებოდა მათ.

„1945 წლის მაისში, – ჰყვება ვეტერანი, – ჩვენთან მოვიდნენ იატაკქვეშელი დანიელი პატრიოტები და ომის წარმატებით დამთავრება გვახარეს. ამ დროს იქ ქართველთაგან არავინ იყო, არც საქართველოზე ვიცოდი არაფერი. გავიგე, რომ მკაცრ პასუხს სთხოვდნენ ყოფილ ტყვეებს, მაგრამ ჩვენ ხომ სამშობლოსთვის არ გვიღალატია.“

და მაინც, რა ბედი ელოდათ სამშობლოში დაბრუნებულთ, არავინ იცოდა. მათ (ტყვეებს) სთავაზობდნენ უცხოეთში დარჩენას. „ნეტა, რას არ გვპირდებოდნენ? როგორ მოგქცეულიყავი, დავრჩენილიყავი უცხოეთში? – ხშირად ასეთ კითხვას ვუსვამდი თავის თავს, – ამბობს ტყვეობაგამოვილილი ვეტერანი. – არა! იყო მკაცრი პასუხი გულში. საკუთარი ქვეყნის, სამშობლოს სიყვარული არ მასვენებდა, უცხოეთში დარჩენილი სულ ტყვეობაში, უსამშობლოდ უნდა ვყოფილიყავი, დაბრუნებული კი...“ ყველაფრის მიუხედავად, ბატონმა სკენდერმა მაინც თავის მამულში ყოფნა ირჩია. გულში იღუმალად იმეორებდა რაფიელ ერისთავის სტრიქონებს და მტკიცედ სწამდა, რომ:

სამშობლო დედის ძუძუი, არ გაიცვლებს სხვაზედა,

*ორივ ტკბილია, ძმობილო, მირჩვენის, ორსავე თავად ზედა,
როგორც უფალი, სამშობლოც, ერთია ქვეყანა ზედა...“*

პოეტის გულში ჩამწვდომი პატრიოტული სტრიქონები სკენდერ მასწავლებლისთვის ფიცი გახდა.

„მჯეროდა, რომ მართალ კაცს არ გამწირავდნენ“, – ამბობდა იგი და ასეც მოხდა სინამდვილეში.

ომის დამთავრების შემდეგ საბჭოთა საზღვართან სპეციალურ ტყვეთა შემკრებ პუნქტში სკენდერმა გაიარა მკაცრი „საფილტრაციო შემოწმება“. ამის შემდეგ იგი ჩარიცხეს საბჭოთა არმიის რიგებში. სამხედრო სამსახური გააგრძელა ომის შემდეგაც.

მთელს ხუცუბანში იცოდნენ, რომ სკენდერი უგზო-უკვლოდ დაიკარგა ფრონტზე. დაიტირეს კიდეც. მშობლები, ნათესავები, ახლობლები გულს იჯერებდნენ იმით, რომ მათი შვილი თუ ნათესავი სამშობლოს თავისუფლებისათვის ბრძოლას შეეწირა, მაგრამ ეს რა შედაგათი იყო მშობლისთვის...

მადლობა ღმერთს, ეს ინფორმაცია ყალბი აღმოჩნდა. 1946 წელს სკენდერ ბაჯელიძე მოულოდნელად დაბრუნდა ოჯახში. ეს იყო სასწაულებრივი ცის გახსნა მშობლებისათვის, ნათესავ-ახლობლებისათვის. გაიხარეს. მოისიყვარულეს. ყველა პატივს სცემდა. ერთხანს დაისვენა კიდეც, მალე მომჯობინდა, ტყვეობის სტრესი უნელდებოდა, მაგრამ არ ეხსნებოდა...

§5. ცხოვრების კარნახით გზა უმაღლესისკენ

ომი დამთავრდა. ხალხმა ამოისუნთქა. ქვეყანა შეუდგა ომით გამოწვეული კოლოსალური ზარალის აღსადგენად თუ მიყენებული ჭრილობების მოსაშუშებლად მშვიდობიან შრომას.

ფრონტიდან დაბრუნებულმა სკენდერმა მცირე ხანს დაისვენა, შერყეული ჯანმრთელობა გაიუმჯობესა, მაგრამ ომის მძიმე წლების საშინელებათა მოგონება არ ასვენებდა.

ბატონ სკენდერს, სამშობლოს წინაშე ვალდებულად, საკმაო პროფესიულ განათლებამიღებულს ომის შემდეგ შეეძლო დაეწყო მუშაობა დაწყებითი კლასების მასწავლებლად, მშობლიურ სოფელში თუ არა რაიონის ახლომხლო რომელიმე სოფელში მაინც. ამაში, ცხადია, არავინ და არაფერი უშლიდა ხელს. მშობლებს კი უხაროდათ, რომ განათლებით პედაგოგი შვილი ჰყავდათ, მუშაობას დაიწყებს და ოჯახს გარკვეულად დაეხმარებაო. ეს სურვილი აკი მასაც ჰქონდა პედსასწავლებლის დამთავრების შემდეგ და რამდენიმე წლის მუშაობის შემდეგ განაგრძობდა სწავლას უმაღლეს სასწავლებელში.

მაგრამ ამჯერად იფიქრა, ბარემ უმაღლეს განათლებას მივიღებ და მერე დავიწყებ მუშაობასო. მშობლებიც დაეთანხმნენ ომგადახდილ შვილს, ვინ იცის, შემდეგ რა მოხდებაო. ამ გადაწყვეტილებით შეუდგა უმაღლეს სასწავლებელში ჩასაბარებელი გამოცდებისთვის მომზადებას, პარალელურად მამას ეხმარებოდა საოჯახო საქმეებში.

1948 წელს ჩააბარა მისაღები გამოცდები და ბათუმის შოთა რუსთაველის სახელობის სახელმწიფო პედაგოგიური ინსტიტუტის გეოგრაფიის ფაკულტეტის პირველი კურსის სტუდენტი გახდა. ინსტიტუტში ლექციებს უკითხავდნენ ცნობილი ლექტორ-მასწავლებლები: გეოგრაფიის კათედრის გამგე ნადიმ ნიჟარაძე, წევრები: ალექსანდრე ჯავახიშვილი,

კვიროსი კვასხვაძე, ნადია ჯიბუტი, გიორგი ჩხაიძე, პლატონ მგალობლიშვილი, ვლდიმერ ქემხაძე, ვლადიმერ ნორაკიძე, ქეთევან ალასანია, მემედ სტამბოლოშვილი, ვუკოლ იაშვილი, გრიგოლ ბაბილოძე, პარმენ პატარაია, ვლადიმერ ჭანტურია, ზინა გოგოლიშვილი, ჯემალ ნოღაიძე და სხვები. სკენდერი გეოგრაფიის ინტერესით სწავლობდა, რამდენადაც ბევრი ქვეყანა მოვლილი ჰქონდა და მისთვის ბევრი რამ ნაცნობი იყო, რაც ინტერესს სწავლისადმი უფრო აღუძრავდა და უძლიერებდა.



ბათუმის შოთა რუსთაველის სახელობის პედაგოგიური ინსტიტუტის გეოგრაფიის ფაკულტეტის 1952 წ. კურს-დამთავრებულთა საიუბილეო შეხვედრა 30 წლისთავზე (1982 წ. 28 ივნისი)

სურათზე: სკენდერ ბაჯელიძე - უკანა რიგში მარჯვნიდან პირველი, ზის (შუაში) – ლექტორი, გეოგრაფიის მეცნიერებათა კანდიდატი, დოცენტი ნადია ჯიბუტი



სკენდერთან ერთად სწავლობდნენ ზურაბ კომახიძე, ემინე მახარაძე, მიხეილ ჯაში და სხვები.



ღურეი ვერულიძე

1948 წელი სკენდერ ბაჯელიძისათვის ფეხბედნიერი იყო. ჯერ ერთი, ამ წელს სტუდენტი გახდა. მეორე, სტუდენტობის მომდევნო წელს ოჯახი შექმნა – თავისი ბედი დაუკავშირა და მომავალი ცხოვრების უდალატო მეგობრად აირჩია თანასოფლელი, ცნობილი პიროვნების დურსუნ ვერულიძის ქალიშვილი **ღურეიკო**. მალე ქორწილიც გადაიხადეს. ასე შეიქმნა ახალი პატარა ოჯახი ხუსეინ ბაჯელიძის დიდ,

ფუძე ოჯახში. მესამეც ის იყო, რომ სტუდენტობის დროს, 1950 წელს ახალშექმნილ ოჯახში ქალიშვილი გაჩნდა. მას უუუუნა დაარქვეს შემდგომ პირველ შვილს მეორე – ეთერი და მესამე – ლიანა მოჰყვნენ. ასე განედლდა დიდი თუ პატარა ოჯახი.

მართალია, სწავლა და ოჯახი – ორივე ცალ-ცალკე მძიმე ტვირთია, ერთად აღებული კი წარმოუდგენლად უმძიმესი. კარგი მეუღლის თანადგომით, მზრუნველი მშობლების ხელშეწყობით სკენდერს სწავლაში ხელი არ შეშლია. 1952 წელს დაამთავრა უმაღლესი სასწავლებელი, აიმაღლა პროფესიული ოსტატობა და გახდა საშუალო სკოლის გეოგრაფიის დიპლომიანი მასწავლებელი. ჰა, ბურთი და მოედანი, სადაც გინდა იმუშავე, მით უფრო აჭარა, განსაკუთრებით მისი მთიანი რაიონები, მასწავლებელთა კადრების ნაკლებობას განიცდიდნენ.

ამრიგად, 1948-1952 წლები ახალბედა, დამწყები, უკვე დიპლომიანი, მასწავლებლის ცხოვრებაში უაღრესად ღირსშესანიშნავი პერიოდი იყო: სტუდენტობა, ბედნიერების მომტანი ოჯახის შექმნა, შვილები, მათით გამოწვეული ახალი

სიხარული, უმაღლესი განათლების მიღება, დიპლომი და პედაგოგიური საქმიანობის დაწყება – ყველფერი ის, რასაც ნატრობდა ახალგაზრდა, ომგადახდილი სკენდერი, ყველფერი კარგად, წარმატებით აუხდა. მომავალ ცხოვრებაში მწვანე შუქი აენთო.

§6. მუშაობა აჭარის „უცნობ“ მთიანეთში

როგორც ითქვა, ბატონმა სკენდერმა 1952 წელს დაამთავრა ბათუმის სახელმწიფო პედინსტიტუტი და გახდა გეოგრაფიის მასწავლებელი. კურსდამთავრებულთა გამანაწილებელმა კომისიამ, რომელშიც შედიოდნენ ინსტიტუტის რექტორი, ფაკულტეტის დეკანები, საზოგადოებრივი ორგანიზაციების ხელმძღვანელები, აჭარის განათლების მინისტრი, ქ. ბათუმისა და აჭარის რაიონების განათლების განყოფილებათა გამგეები, სკენდერ ბაჯელიძე გაანაწილა აჭარის მთიანეთში, მისთვის ჯერ კიდევ უცნობ ხულოს რაიონის ხიხაძირის საშუალო სკოლაში. გაფორმდა მინისტრის ბრძანება (№ 85,1952, 26 აგვისტო), რომლითაც დაინიშნა აღნიშნული სკოლის გეოგრაფიის მასწავლებლად.

მძიმე პირობები იყო მაშინ, ქვეყანა ომის ჭრილობებს იმუშებდა. ჯერ კიდევ იყო სიძნელებები, უგზოობა, უტრანსპორტობა. ავტობუსი დადიოდა ქ. ბათუმიდან მხოლოდ ხულოს რაიონულ ცენტრამდე, ზამლეთიდან ხიხაძირამდე კი 35 კმ ფეხით უნდა ევლოთ. შემთხვევით თუ შეგხვდებოდა რაიმე სატვირთო მანქანა, დიდი ბედნიერება იყო.

„რესპუბლიკური საავადმყოფოს იქით გზა საით მიდიოდა, არ ვიცოდი. საბჭოთა კავშირისა და ევროპის დიდი ნაწილი მოვიარე, ომი გადავიტანე და აჭარისწყლის ხეობაში არ ვყოფილვარ, არ ვიცოდი, სად მივდიოდი, ვინ დამხვდებოდა, სასტუმრო, ბინა საფიქრალი მქონდა. პრობლემა ხომ



არ შემეკმნება-მეთქი, – სულ ამაზე ვფიქრობდი“, – დიდი განცდით ამბობს გამოცდილი მასწავლებელი თავისი მუშაობის დაწყების პერიოდზე, პირველი მგზავრობის შთაბეჭდილებებზე. მოგვიანებით, ხიხაძირში დიდხანს ნაყოფიერად მუშაობის შემდეგ, ხიხაძირსა და სხალთა-ხიხანის სტუმართმოყვარე მოსახლეობაზე, მათგან განცდილ სიტბოსა და სიყვარულზე ყოველთვის დიდი სიამაყით საუბრობდა ამაგდარი მასწავლებელი, ბატონი სკენდერი (ამის შესახებ ნახავთ ქვემოთ).

ახალგაზრდა, ჯან-ღონით სავსე პედაგოგი პირველი დაემშვიდობა მშობლებს, ოჯახს, ჩავიდა ბათუმში, შეიძინა სამგზავრო ბილეთი და გასწია მისთვის ჯერ კიდევ უცნობი მხარისკენ. კარგ კაცს ღმერთი არ გასწირავსო, – ნათქვამია და ბატონ სკენდერს ავტოსადგურში, ავტობუსის გასვლამდე შეხვდა ერთი ნაცნობი თუ ახლობელი პიროვნება, რომელმაც იცოდა ხულოც და ხიხაძირიც. მან თავისი დამამიძღვებელი საუბრით გაამხიარულა, დაამშვიდა. მგზავრობა ძნელია, ტრანსპორტის ნაკლებობის გამო, მაგრამ, სამაგიეროდ, იქ კარგი ხალხია, გადაგყვებიან, სტუმარი უყვართ. შენ, მით უმეტეს, მიდიხარ სახელმწიფო მივლინებით, უნდა ემსახურო, მათ შვილებს უნდა ასწავლო. შენ თავდაჯერებული, თავმდაბალი იყავი და ისინი მიგიღებენ, როგორც შინაურს. ახვალ თუ არა ხიხაძირში, მაშინვე დარწმუნდები ამაშიო, – გაამხნევა თანამოსაუბრემ. ბოლოს კი დაატანა, იქ ცხოვრობს ერთი მეტად კარგი კაცი, **სერგო ჯაიანი**, ისიც მასწავლებელია, მოიკითხე და ყველაფერში დაგეხმარებაო. ახალბედა სკენდერ მასწავლებელს ცოტათი გულზე მოეშვა, კარგი კაცი ეგულება სოფელში, სადაც თვითონ მიდის, დამეს გაათევიანებს, მეორე დღეს სკოლაში რომ მივა, დირექტორი დაუდგება გვერდში. ამ იმედით მადლობა უთხრა თანამოსაუბრეს, მშვიდობიანი მგზავრობა უსურვა იმანაც, დაულოცა სამსახურიც და დაშორდნენ. ღრმად ჩაფიქრებუ-

ლი სკენდერ მასწავლებელი, სხვა უამრავ მგზავრობან ერთდ, ჩაჯდა ავტობუსში, დაიძრა უსულო „რაში“, ახალბედა მასწავლებელი გაუდგა გზას ხიხაძირისკენ. ის ზამლეთში უნდა ჩამოსულიყო და ხელმარჯვნივ უნდა გააყოლოდა სხალთის ხეობისკენ, სოფელ ხიხაძირის გზას, მაგრამ, რადგან პირველად მგზავრობდა ამ მხარეს, ზამლეთში ჩამოსვლის ნაცვლად, ხულოს რაიონულ ცენტრში აღმოჩნდა. სხვა რა გზა ჰქონდა. მოიკითხა განათლების განყოფილება და განყოფილების გამგეს – ლევან ბერიძეს წარუდგინა თავისი საგზური, მინისტის ბრძანება.

გამგემ ყურადღებით მიიღო ახალი მასწავლებელი, გაეცნო და ბოლოს უთხრა: – დღეს გვიანაა, ხიხაძირში ვერ ააღწევ, აქ სასტუმრო არის, ღამის გათევა არ გაგიჭირდება, ხვალ დილით კი ავტობუსს გაჰყევი ზამლეთამდე და იქიდან წახვალ ხიხაძირშიო, – ურჩია გამგემ.

მეორე დღეს, დილით, ბატონი სკენდერი გაუდგა გზას რაიონული ცენტრიდან ხიხაძირისკენ. ზამლეთიდან იგი, რამდენიმე სხვა მასწავლებელთან ერთად, ფეხით გაუდგა 35 კმ-იან გზას. გაიარეს ფურტო, სხალთა, კვატია, ფუშრუკაული და ბოლოს მივიდნენ „ნანატრ“ ხიხაძირში. უკვე მოსაღამოებულები, ბინდებოდა. სოფლის ცენტრში, „ხიდისთავზე“, რამდენიმე კაცი იყო. გაუხარდა სოფლის ახალ, თუ პირველ სტუმარს. მიესალმა, – რას შერებით, როგორ ხართ, მეგობრებო? – ძველი ნაცნობივით გამოკითხა და დაუწყო ტკბილი საუბარი საკმაოდ გრძელ გზაგამოვლილმა და საკმარისზე მეტად დაღლილმა სტუმარმა. საინტერესო საუბარი გაიმართა სტუმარსა და მასპინძლებს შორის. ეს ხომ საზღვრისპირა სასოფლო საბჭოს ცენტრი იყო. იქვე ახლოს მესაზღვრეთა სამხედრო ნაწილი – კომენდატურა ფუნციონირებდა. მოსახლეობა ძალიან ფხიზლობდა, როგორც უსამხრეებო მესაზღვრენი, მით უმეტეს, მოსული სტუმარი, მართალია, თბილად და ტკბილად ლაპარაკობდა, მა-



გრამ არავისთვის ნაცნობი არ იყო. მასპინძლებიც თბილად შეხვდნენ მათთვის უცნობ კაცს, ტაქტიანად გამოკითხეს ვინაობა, რა საქმეზე და ვისთან იყო მოსული. – ჩვენ ხომ ვერ დაგეხმარებითო, შეაშველეს თბილი სიტყვა. როცა გაიგეს, ხიხაძირის საშუალო სკოლაში მასწავლებლად იყო გამოგზავნილი, – დაინტერესდნენ, შინაურად ჩათვალეს, – ახლა დაღამდა, სკოლაში არავინაა, სკოლის დირექტორი ხვალ იქნებო და ღამის გასათევად ყველა ეპატიუებოდა უკვე გაცნობილ და საპატიო სტუმარს საკუთარ ოჯახში. ყველას მადლობა უთხრა ამ გულთბილად მიღებისთვის და მაინც ირჩია **სერგო ჯაიანის** ნახვა. ცხადია, მასპინძლებმა არ აწყენინეს სტუმარს და მიიყვანეს სერგო ჯაიანის ოჯახში.



სერგო ჯაიანი

სერგო ჯაიანი ხომ ცნობილი იყო არა მარტო სოფელში, არამედ სხალთა-ხიხანის ხეობასა და მთელ რაიონში. **იგი ხევისბერი კაცი იყო ხეობაში**, პედაგოგი-ინტელიგენტი, რაიონული აქტივის წევრი. ის კარგად შეხვდა სტუმარს. მისი ხიხაძირში განაწილების შესახებ მან სკოლის დირექტორის ინფორმაციით უკვე იცოდა. გული გულს შეხვდება და ორივეს გაეხარდებო, ნათქვამია. ამ გამოთქმისა არ იყოს, ორივე პედაგოგი იყო. მათ მალე გამონახეს სასაუბრო თემა. კიდევ მეტი, სერგოს მეუღლემ – ქალბატონმა ნათელამაც სტუმარი ძმასავით მიიღო და ქართველი ქალის კდემამოსილებით, დიასახლისის მარიფათებით გაუმასპინძლდა. რა თქმა უნდა, დალოცეს სტუმარი და მისი პირველი სტუმრობა ხიხანის ხეობაში, სოფელ ხიხაძირში, ამ ოჯახში, ხიხაძირის სკოლის მასწავლებლად დანიშნა და წარმატებები უსურვეს პედაგოგიურ ფრონტზე. სკენდერ მასწავლებელმა გულთბილად მიღებისთვის დიდი მადლობა უთხრა მასპინძლებს, აღუთქვა,

რომ ამ სოფელში და ოჯახში პირველი სტუმრობა სამუდამოდ დაუვიწყარი იქნებოდა მისთვის (და მართლაც, ასე იყო ბოლომდე – ავტ.)

მეორე დღით, საუზმის შემდეგ, სტუმარი და მასპინძელი ერთად წავიდნენ სკოლაში. ასე დასრულდა ახალდანიშნული სკენდერ ბაჯელიძის პირველი მგზავრობა ბათუმიდან ხიხაძირის საშუალო სკოლამდე. პირველი სექტემბრიდან კი დაიწყო მისი პედაგოგიური მოღვაწეობა.

როგორც ბატონი სკენდერი იგონებს, იმხანად მთის სოფელი ცუდ დღეში იყო. ყველაფერს ომის კვალი აჩნდა, ცხოვრება ჭირდა. სკოლაში ადგილობრივი მასწავლებლები მხოლოდ დაწყებით კლასებში იყვნენ საშუალო განათლებით, ან ხულოს პედაგოგიური სასწავლებელდამთავრებულნი. სკოლა დაკომპლექტებული იყო ძირითადად საქართველოს სხვადასხვა კუთხიდან მოვლინებული ახალგაზრდა პედაგოგებით, რომელსაც პირველ ხანებში ახალგაზრდა დირექტორი თავკაცობდა. სკოლაში სახარბიელო მდგომარეობა არ იყო. მასწავლებლებს მძიმე პირობებში უხდებოდათ მუშაობა.

1953 წლის სექტემბრიდან სკოლას დიმიტრი ხოზრევანიძე ჩაუყენეს სათავეში. „გადმოცემით ვიცოდი, – იგონებდა ბატონი სკენდერი, – რომ დიმიტრი ხოზრევანიძე მკაცრი ხელმძღვანელი იყო. შემდგომში გაირკვა, რომ იგი სიმკაცრესთან ერთად, მეტად სამართლიანი და მომთხოვნი ხელმძღვანელი გახლდათ. უწინარეს ყოვლისა, მომთხოვნი იყო საკუთარი თავისადმი და შემდეგ სკოლის კოლექტივისადმი. უყვარდა წესრიგი, დისციპლინა, შრომა. ფუტკარივით მუშა კაცი იყო. ბევრს სმენია და ბევრიც დაწერილა ხიხაძირის საშუალო სკოლის წარსულში აღიარებულ წარმატებებზე, მისი დირექტორის, აჭარის დამსახურებული მასწავლებლის – **დიმიტრი ხოზრევანიძის** დამსახურებაზე, არა მარტო ამ კუთხის ახალგაზრდობის საშუალო და უმა-



დიმიტრი
ხოზრევანიძე
(1916-1964) –
აჭარის დამსახ-
ურებული
მასწავლებელი,
ხიხაძირის საშუ-
ალ სკოლის
დირექტორი
1953-1959 წლებში

დღესი განათლების მიღების უზრუნველყოფაში, არამედ ამ ხეობის კულტურული დაწინაურების საშვილი-შვილო საქმეშიც.

უდავო ჭეშმარიტებაა, მარტო ის რად ღირს, რომ სწორედ აწ განსვენებული დიმიტრი ხოზრევანიძის ხელმძღვანელობით, ხიხაძირის საშუალო სკოლა გადაიქცა საქართველოს რესპუბლიკის სკოლებს შორის ერთ-ერთ მოწინავე სკოლად. ახალგაზრდობა მასობრივად დაეწაფა სწავლას არა მარტო სკოლაში, არამედ უმაღლეს სასწავლებლებში. მისი აქ მუშაობის პერიოდში 12 ახალგაზრდამ სკოლა ოქროსა და ვერცხლის მედლებზე დაამთავრა. ბევრმა უმაღლესი განათლებაც მიიღო. სწავლის „კულტი“ შეიქმნა. ახალგაზრდობას ისე შეუყ-

ვარდა უმაღლესი განათლება, როგორც ნავარდით დაღლილ ირემს – წყარო ანკარა. **ყოველივე მიღწეული დ. ხოზრევანიძემ შეაჯამა და განაზოგადა თავის წიგნში „სკოლა მთაში“ (ბათუმი, 1958). წიგნში, სხვებთან ერთად, განზოგადებულია სკენდერ ბაჯელიძის პედაგოგიური მოღვაწეობა. ამ სკოლაში ყოველივე სასიკეთო საქმიანობაზე, დირექტორთან ერთად, დიდი დამსახურება სწორედ სკენდერ ბაჯელიძეს მიუძღვის.**

შემთხვევითი როდი იყო ის ფაქტი, რომ სასწავლო ნაწილის გამგე ალ. მიქელაძე სამუშაოდ სხვა რაიონში გადაიყვანეს. ამ თანამდებობაზე ბევრმა გამოთქვა მუშაობის სურვილი, მაგრამ სკოლის დირექტორმა არჩევანი ბატონ სკენდერ ბაჯელიძეზე შეაჩერა. იგი სკოლაში მუშაობის ერთი

წლის შემდეგ დააწინაურეს სასწავლო ნაწილის გამგედ და ნ წლის განმავლობაში, დირექტორთან ერთად, მთელი მონდომებით ზრუნავდა, როგორც მოსწავლეთა სწავლა-აღზრდისთვის, ასევე ახალგაზრდა, ენერგიული პედაგოგიური კადრების დაინტერესებისა და დახელოვნებისათვის. ისინი ერთობლივად სამშობლოს უზრდიდნენ ღირსეულ პატრიოტებს. ამდენად, სკენდერი დირექტორის მარჯვენა ხელი იყო. „ზოგიერთ ჩვენებურს ვაჟბატონებს რომ ჰკითხო, – წერდა დიდი პედაგოგი და ჰუმანისტი იაკობ გოგებაშვილი, – ყოველ ადამიანს მუცლითგანვე თან გამოაქვს მამულიშვილობაო, რადგანაც სამშობლო ქვეყნის სიყვარული ყველას ბუნებითვე თანა ჰყვება და ამიტომ ამ გრძნობის აღზრდაზე ზრუნვა რა საჭიროაო...“ – აკრიტიკებს რა ასეთ ვაჟბატონებს, გოგებაშვილი განაგრძობს: „პატრიოტობა საზოგადოებამ და ცალკე პირმა უნდა დანერგონ, აღზარდონ და დააყენონ ჯეროვან სიმაღლეზედ...“

სკენდერ მასწავლებელი ყოველ აღსაზრდელს უნერგავდა მშობლიური ხალხისა და ქვეყნის სიყვარულს, პატივისცემას ყოველივე იმისადმი, რაც, მიუხედავად ისტორიის ბედუკუდმართობისა, ჩვენი კუთხის ქართველობამ სიცოცხლის ფასად შეინარჩუნა: მოყვასის გატანა, სხვისი ჭირის თავისად მიჩნევა, ნამუსის ქუდის ტარება, უფროს-უმცროსობის დაფასება, უანგარო სამსახური სამშობლოსადმი.

მარტო იმის გახსენება რად ღირს, რომ იმ ორმოცდაათიან წლებში, როცა მთის სკოლებში ჭირდა გოგონების სწავლებაში ჩაბმა, ეს პრობლემა ხიხაძირში უკვე აღარ არსებობდა, რადგან აქაურ მოსახლეობას სჯეროდა, რომ იქ, სადაც სკოლის დირექტორი **დიმიტრი ხოზრევანიძეა**, სასწავლო ნაწილის გამგე – **სკენდერ ბაჯელიძე** და სასწავლო-აღზრდელობითი მუშაობას მტკიცედ შეკრული, ერთსულოვანი და **მაღალკვალიფიციური პედაგოგიური კოლექტივი** ახორციე-

ლებს, მათ შვილებს არაფერი მოუვიდოდათ. ყველა მასწავლებელი საკუთარი შვილივით ზრუნავდა მოსწავლეზე.



ხიხაძირის საშუალო სკოლის პედაგოგები.
სხედან, მარცხნიდან მარჯვნივ: მესამე დიმიტრი ხოზრევანიძე (დირექტორი), მეხუთე სკენდერ ბაჯელიძე (სასწ. ნაწილის გამგე)

აქვე, სკოლის ხელმძღვანელობასთან ერთად, ჯეროვანი შეფასება უნდა მიეცეს იმ დიდ შრომისმოყვარე, საერთო საქმისთვის თავდადებული პედაგოგიური კოლექტივის საქმიანობას, რომელშიც ბატონი სკენდერი მოღვაწეობდა. მათ შორის, უწინარეს ყოვლისა, აღსანიშნავი არიან საქართველოსა და აჭარის დამსახურებული მასწავლებლები: სერგო ჯაიანი, როლანდ ბოლქვაძე, ანა ალფაიძე, გიორგი სირაბიძე, არჩილ იშხნელიძე, დავით ღლონტი, მუსტო მიქელაძე, ემინე და დურსუნ გაბაიძეები, მოგვიანებით უფროსი მასწავლებლები: გივი თოდრია, ეგენია კუზმინა, ლამარა მახარაძე, ახალგაზრდა მასწავლებლები: ასლან ხახუტაიშვილი, რევაზ ბერაძე, იოსებ აბაშიძე (სამივე პედაგოგი – ასლანი, რევაზი და იოსები შემდეგ ბათუმის პედინსტიტუტში მიიწვიეს, დისერტაცია დაიცვეს და იქ განაგრძეს მუშაობა),

ოთარ ოჩიგავა, თალიკო რუსეიშვილი, დავით გოგობე, ლიანა ბარამიძე, ფოლად ცეცხლაძე, ბეჟან და ასლან მიქელაძეები, იოსებ მამულაძე, მზევინარ ჯაიანი, ნესპიე გაბაიძე, ზურაბ ბერიძე და სხვები. ეს სკოლა შემდგომშიც აგრძელებდა და ტრადიციებს არ დაღატობდა. სწორედ სკოლის ხელმძღვანელთა და მთლიანად პედაგოგიური კოლექტივის ნაყოფიერი შრომის შედეგია, რომ ხიხაძირის საშუალო სკოლა მაშინ და მომდევნო წლებშიც, როცა მას დიდხანს აჭარის დამსახურებული მასწავლებელი **არჩილ იშხნელიძე**



ხიხაძირის საშუალო სკოლის პედაგოგები.
ხიხაძირი, 1953 წ.

ხელმძღვანელობდა, ასობით ახალგაზრდამ დაამთავრა, მათგან 28-მ ოქროსა და ვერცხლის მედალზე, 600-ზე მეტმა კურსდამთავრებულმა მიიღო უმაღლესი განათლება, რომელთაგან 30-ზე მეტი მეცნიერ-მუშაკია, (მეცნიერებათა დოქტორი, მეცნიერებათა კანდიდატი თუ აკადემიური დოქტორი).

ჩვენ, ამ წიგნის ავტორებს, გვქონდა ბედნიერება და ამ სკოლაში სწორედ მისი აღზევების პერიოდში, 1953-1956 წლებში, ვსწავლობდით. ვცხოვრობდით სასკოლო ინტერნატში, სადაც აღმზრდელ-მასწავლებელთა და სკოლის ხელ-



მძღვანელობის მუდმივი ყურადღების, ზრუნვისა და კონტროლის ქვეშ ვიყავით. ხშირად ღამეები გვითენდებოდა წიგნზე მუშაობასა თუ თემების დამუშავებაში. კარგად სწავლისათვის იმ დროის შესაბამისად სათანადო პირობები იყო შექმნილი. დირექტორი და სასწავლო ნაწილის გამგე ხშირად მოდიოდნენ საღამოობით სასკოლო ინტერნატში, ზოგჯერ მოულოდნელად და გვამოწმებდნენ, გვეხმარებოდნენ, ყველაფერს აკეთებდნენ, რომ რამეში ხელი არ შეგვემლოდა და კარგად გვესწავლა.



მარჯვნიდან მარცხნივ: სკენდერ ბაჯელიძე, შოთა აბაშიძე, არჩილ იშხნელიძე. ბათუმი, 1980

სკენდერ მასწავლებელი გეოგრაფიას გვასწავლიდა. უყვარდა რუკა. ჯერ საჭირო პუნქტებს ზეპირად ჩამოგვათვლევინებდა რუკასთან ზურგშექცევით, ხოლო შემდეგ ჩამოთვლილ ადგილებს რუკაზე შემოგვახაზვინებდა. იყო ძალიან მომთხონი, უწინარეს ყოვლისა, თავისთავისადმი და მოსწავლეებისგანაც მკაცრად ითხოვდა ცოდნას. გამოირჩეოდა ობიექტურობით, პრინციპულობით, სამართლიანობით. ვერ ეგუებოდა მოსწავლეთა ცბიერებას. თუ შეამჩნევდა, არ აპატიებდა. ცდილობდა, ასეთ მოსწავლეებში უარყოფითი თვისებების აღმოფხვრას. ბევრ შემთხვევაში მიზანს აღწევდა

კიდევ. ძალიან ფხიზელი თვალი ჰქონდა, ვერაფერს გამოაპარებდი. ნიშნებს იოლად არ წერდა, ე.ი. არ უყვარდა ზერელობა. ჩვენი კლასი გამორჩეული იყო სკოლაში, როგორც სწავლაში, ისე დისციპლინის მხრივ, მაგრამ არ იქნა და ხუთოსნებმა ერთხანს ვერ მივიღეთ „ხუთები“ გეოგრაფიაში. პირველი „ფრიადი“ დაიმსახურა თანაკლასელმა ეგნატე დუმბაძემ. გაკვეთილის გამართულად მოყოლის შემდეგ, რუკის ცოდანში თავიც გამოიჩინა, გასამეორებელი და არა მარტო ეს, განვლილი მასალების ცოდნით გაახარა პედაგოგი, რის შემდეგ მას დაუწერა ნიშანი „ფრიადი“ და თან დაამატა: „ყოჩაღ, ეგნატე, დიდად მასიამოვნე. ასე უნდა გააგრძელო. შენ სხვა დუმბაძეებს აჯობე. კარგი იქნება, თუ შენი ბიძაშვილები მოგბაძავენ შენ“-ო. ოდნავ ღიმილნარევი სიტყვებით, თითქოსდა მკაცრი ტონით და სპეტაკი გულით დაასრულა საუბარი. ეგნატემდე გამოძახებულთაგან ერთს „ორიანი“, მეორეს „სამიანი“ დაუწერა. რა თქმა უნდა, ქებულის ეგნატეს „ფრიადმა“ (იმ მეოთხედში მთელ კლასში პირველი „ფრიადი“ იყო ამ საგანში) ვიზუალურად ჩანდა და ჩვენც ვგრძნობდით, რომ მასწავლებელი გაახარა, გაახალისა, გაამხიარულა, ალბათ, მანამდე შინაგანად ფიქრობდა – „ჩემი ნაკლი ხომ არაა, მოსწავლეები ფრიადებს რომ ვერ ღებულობენო“ (კარგი მასწავლებელი დაბალი მოსწრების მიზეზებს მოსწავლეებში კი არა, თავისთავში ეძებს) და ამ ტალღაზე მყოფ მასწავლებელს მეტი არავინ გამოუძახებია. დიდი ხალისით ახსნა ახალი მასალა. ეს ისეთი რთული, საოცარი და შთამბეჭდავი სცენა იყო, კლასი გაოგნებული დარჩა. ეს ამბავი სამსწავლებლოშიც ითქვა, დირექტორსაც მოახსენა, შენს „ხუთოსნებს“ ეგნატემ აჯობა, პირველი „ხუთიანი“ მან მიიღო კლასშიო. ეს ეპიზოდი ე.წ. „ჩეკე“ გავრცელდა მთელს სკოლაში. აი, როგორი მკაცრი და მომთხონი იყო სკენდერ მასწავლებელი. მართალია, ის მკაცრი პედაგოგი იყო, მაგრამ ჩვენ გვიყვარდა, რადგან სამართლია-



ნიც იყო. ნიშნებს ყოველთვის ობიექტურად წერდა. მასწავლებელმა ეგნატე შეაქო და ეს ჩვენთვისაც სტიმული იყო, რომ პირველი „ფრიალი“ კლასში დაიმსახურა დუმბაძემ და რა უფლება გვქონდა, არ მიგვებაძა მისთვის, ანდა, ღირეკტორი თუ კლასის ხელმძღვანელი (ოთარ ოჩიგავა) გაპატიებდნენ ზერელობას სწავლაში? რა თქმა უნდა, მალე ჩვენც ავმადლდით ბიძაშვილ ეგნატემდე გეოგრაფიის შესწავლაში.

აი, რას წერს ამასთან დაკავშირებით თავად ეგნატე დუმბაძე: „მე განსაკუთრებით მიყვარდა გეოგრაფია, მთელი გულისყურით ვეკიდებოდი რუკის ცოდნას, ეს სიყვარული მე-5 კლასიდან (თხილვანის მაშინ 8-წლიან, შემდგომში საშუალო და ამჟამად საჯარო სკოლაში გეოგრაფიის მასწავლებლის ლევთერ ბუალავას და შემდგომ ნაზი ხარაზის მიერ დანერგილი მქონდა. ისინი როცა გაკვეთილს გვიხსნიდნენ, რუკაზე საჭირო ადგილს ისე შემოხაზავდნენ საჩვენებელი ჯოხით, რომ რუკისკენ არც შეიხედავდნენ, თითქოს „ზურგზე თვალები ჰქონდათ“ და რუკას ხედავდნენ. მათი ეს მანერა ძალიან მომწონდა და მამაჩემს რუკა (მაშინ არც თუ ისე იოლი სანახავი იყო) ვაყიდვინე და შინ დიდხანს ვვარჯიშობდი რუკაზე მოხაზვის ამ მანერის გამოსამუშავებლად. ისინი მოსწავლეებისგან ყველა გაკვეთილზე დეტალურად ითხოვდნენ შესწავლილი ქვეყნების სწორად ჩვენებას რუკაზე, მათი ფართობის, მოსახლეობის მონაცემების ცოდნასა და დედაქალაქების დამახსოვრებას. ეს, როგორც წესი, უნდა სცოდნოდა ნებისმიერ მოსწავლეს. მე ამ მომენტს განსაკუთრებულ ყურადღებას ვაქცევდი გეოგრაფიაში გაკვეთილის სწავლის დროს. ამ საქმეში ერთმანეთს ვეჯობებოდით სკოლაში მიმავალი თანაკლასელები (სკოლამდე მანძილი 3-4 კმ იყო ყოველდღიურად სავალი). როცა ხიხაძირის საშუალო სკოლაში განვაგრძეთ სწავლა, აქ მოთხოვნები კიდევ უფრო მეტი იყო. ამან ჩემზე უარყოფითად კი არა, პირიქით, დადებითად იმოქმედა, უფრო მეტი სტიმული მომეცა, წამაქეზა.

უფრო მეტს ვმეცადინებოდი, ფრიადოსანი არ ვყოფილვარ, მაგრამ იმას კი მივალწიე, რომ გეოგრაფიაში ყველას ვაჯობე და პირველი „ფრიალი“ მივიღე. სკენდერ მასწავლებლის პედაგოგიურმა ტაქტმა, მისი მანერებისა და საგნისამდი უზადო სიყვარულმა საბოლოოდ განსაზღვრა ჩემი მომავალი პროფესია – პედაგოგობა და სპეციალობა – გეოგრაფიის მასწავლებლობა. დავამთავრე გეოგრაფია-ბიოლოგიის ფაკულტეტი და რამდენიმე წელიწადი პედაგო-გიურ მოღვაწეობასაც ვეწეოდი ჩემს მშობლიურ თხილვანის საშუალო სკოლაში. ღმერთმა ნათელში ამყოფოს მისი სული, ბატონი სკენდერი ჩემი საფიცარი და საყვარელი მასწავლებელი იყო“, – ასე დაასრულა ეგნატემ თავისი მემუარული საუბარი სკენდერ მასწავლებელზე, მის გაკვეთილზე და გახმაურებულ და საინტერესო ეპიზოდებზე.

სკენდერ მასწავლებელი ითხოვდა არა მხოლოდ ახსნილი გაკვეთილის, არამედ განვლილი მასალის ცოდნასაც. ახალ მასალასთან ერთად, გასამეორებლად მოგვცემდა განვლილ მასალას არა პარაგრაფების თანმიმდევრობით, არამედ თემატური ნიშნით. ეს ხერხი ძალიან გვეხმარებოდა სხვადასხვა გაკვეთილზე მიღებული ცოდნის ერთმანეთთან დაკავშირება-დამახსოვრებაში. გამოძახებული მოსწავლე მოყვებოდა წინა გაკვეთილზე ახსნილ მასალას, გასამეორებლად მიცემული მასალის ძირითად საკითხებს და შემდეგ მასწავლებელი განსაკუთრებულად მოითხოვდა განვლილი მასალის მთავარ, ყოველთვის დასამახსოვრებელ მომენტებს (გეოგრაფიული პუნქტების ჩვენება რუკაზე, თუ თეორიული საკითხები, ქვეყნების ფართობები, მოსახლეობა, სახელმწიფოთა დედაქალაქები და ა.შ.). გეოგრაფიის გაკვეთილი ამავე დროს გამოცდაც იყო. ამის შემდეგ მასწავლებელი შეაჯამებდა მოსწავლის შრომას, სათანადო კომენტარებით და დაუწერდა ნიშანს. იმდენად ობიექტურად წერდა ნიშანს, რომ არც ერთ მოსწავლეს არ უჩნდებოდა პრეტენზიის სა-



ფუძველი. ამრიგად, სკენდერ მასწავლებელი განსაკუთრებით ვერ ეგუებოდა მუშაობის ეპიზოდურ ხასიათს, რაც გამოიხატებოდა მოსწავლის ნიშნის მისაღებად და არა ცოდნის შესაძენად სწავლაში. ის კი მკაცრად ითხოვდა მოსწავლისაგან სისტემატურ ცოდნას (სწავლა ცოდნის შესაძენად და არა მხოლოდ ნიშნის მისაღებად), სისტემატურობის მოთხოვნა, როგორც სწავლების ერთ-ერთი ასპექტი, სკენდერ მასწავლებლისათვის განსაკუთრებული აუცილებლობა იყო. პირველად ვერ აეუღეთ ალღო, მაღალ ნიშნებს საერთოდ არ წერსო, ვფიქრობდით, მაგრამ ერთჯერ ჩვენს გასახარად, იყო ასეთი მომენტიც, საუბარში ისიც თქვა, რომ ერთმა ადამიანმა, როგორი დიდი განათლებაც ჰქონდეს, არ შეიძლება ყველაფერი იცოდესო. ამიტომ არსებობს ლექსიკონები, ენციკლოპედიები და ა.შ. ყველაფერი არც მე ვიცი, მაგრამ ის მთავარი, რაც უმაღლესი სასწავლებლის პროგრამით გათვალისწინებულია, აუცილებლად უნდა იცოდეს ნებისმიერმა მასწავლებელმა, რომ შეძლოს ასწავლოს სხვას. თქვენც მასწავლებლის დონეზე კი ვერ ისწავლით გეოგრაფიას, მაგრამ სასკოლო პროგრამის ფარგლებში აუცილებლად უნდა დაეუფლოთ მთავარ საკითხებს, არა ეპიზოდურად, არამედ სისტემატურად და უნდა შეძლოთ საკითხების ერთმანეთთან დაკავშირება, შექმნილი ცოდნის ლოგიკურად, თანმიმდევრულად გადმოცემა მსმენელისათვის გასაგებად. ასეთ შემთხვევაში მე მზად ვარ ნებისმიერ მოსწავლეს დაუწერო არა მარტო დადებითი, არამედ მაღალი ნიშნებიც. მასწავლებლის ამ ღია და გულწრფელმა საუბარმა ჩვენზე დიდი გავლენა მოახდინა. კიდევ უფრო შეგვაყვარა სკენდერ მასწავლებელი. გავიგეთ მისი მანერები და მუდამი. გაკვეთილების მომზადების შემდეგ ინტერნატში მცხოვრები მოსწავლეები ვეჯობრებოდით, შეკითხვებს ვუსვამდით ერთმანეთს განვლილი მასალიდან, არა მარტო გეოგრაფიაში, არამედ ყველა საგანში. ამით ბოლოს და ბოლოს გავუგეთ მასწავლებელს, აყვე-

ვით მას. ჩვენც მოვიგეთ და მასწავლებელიც კმაყოფილი დარჩა ჩვენი სწავლის შედეგებით. უმაღლეს სასწავლებლებში, ვისაც გამოცდის ჩაბარება მოუწია გეოგრაფიაში, ან ამ სპეციალობაზე მოეწყო, სწავლა არ გაჭირვებია. ყოველთვის კმაყოფილებით აღნიშნავდნენ სკენდერ მასწავლებლის დამსახურებას, მის პედაგოგიურ ოსტატობას.

ბატონი სკენდერი ორიგინალური თვისებების მქონე პედაგოგი იყო. თუ მოსწავლეთა შორის სკოლაში მკაცრი სახე ჰქონდა, ხშირად შეგვიმჩნევია, რომ მასწავლებლთა კოლექტივში მას ხუმრობა სცოდნია, იცოდა ანეკდოტების საინტერესოდ მოყოლა (ეს ხომ ხელოვნებაა, ყველას არ გამოსდის). სხვებს გააცინებდა ყურებად, თვითონ კი იშვიათად გაიცინებდა. იყო ღინჯი, სიტყვაძვირი, თავდაჭერილი, განსაკუთრებით გაკვეთილების დროს. სკენდერ მასწავლებლის ამ თვისებას ვგებულობდით სხვა მასწავლებლებისგან. აქვე უნდა აღვნიშნოთ ერთი ნიშანდობლივი მომენტიც. პირველად მასწავლებლები ცხოვრობდნენ დაქირავებულ ბინებში, ცალკე ოჯახებში. დიმიტრი ხოზრევანიძემ შეძლო მასწავლებლებისთვის საერთო საცხოვრებლის აშენება, რის შემდეგ ყველა მასწავლებელი გადავიდა ამ საცხოვრებელში. ამან პედაგოგიური კოლექტივი უფრო შეამჭიდროვა, მონოლითური და მეგობრული გახადა. მართლაც, მასწავლებლთა მეგობრული ცხოვრების პირობების უზრუნველყოფა ერთ-ერთი მთავარი მომენტია სასკოლო ცხოვრებაში. ეს უკანასკნელი კი მთავარი ფაქტორია სასწავლო-აღმზრდელობით თუ სასწავლო-საგანმანათლებლო საქმიანობაში არა მარტო სკოლაში, სასწავლო დაწესებულებაში, არამედ მოსახლეობაში, მშობელთა შორის მუშაობაშიც. აქედან იქმნება პედკოლექტივის თუ სკოლის საერთო ავტორიტეტი. ხიხაძირის საშუალო სკოლა, სკენდერ მასწავლებლის სიტყვებით რომ ვთქვათ, ამის საუკეთესო ნიმუში იყო საქართველოს სოფლის სკოლებს შორის.



სკენდერ მაწავლებელი მაღალი აღნაგობის, მომხიბლავი გარეგნობის კაცი იყო, ჰქონდა თეთრი სახე, შავი თვალწარბი, კოსტა უღვაშები, ლამაზად გადავარცხნილი ქოჩორი. გარეგნულად იყო პირქუში, ძალიან მოწყენილი, თითქოს ვიღაცაზე თუ რაღაცაზე გაბრაზებული, მაგრამ ადამიანებისადმი მეტად გულთბილი და ყურადღებიანი იყო. მოსწავლეები ზოგჯერ ასეთ მდგომარეობაში რომ შევამჩნევდით მის მოწყენილ სახეს, ერთმანეთში ვიტყვოდით: ნეტა, სკენდერ მასწავლებელს რა აწუხებს? ავად ხომ არ არის? სულ არ იცინის, მუდამ ჩაფიქრებულია, – ხშირად გვიფიქრია და კიდევაც გვითქვამს ერთმანეთში მოსწავლე-ინტერნატელებს. ჩვენ გვიჩნდებოდა მასწავლებლის შეცოდების გრძნობა: ნეტა რა უჭირს? ჩვენგან შეველას ხომ არ ითხოვს? ან ჩვენ რა შეგვეძლო, გარდა შენიშნული განცდისა? ისეთი იერი ჰქონდა, თითქოს მართლაც შეველას ითხოვდა გარშემომყოფთაგან. ჩვენ, მოსწავლეები, ხომ ვერ ვკითხავდით მის გასაჭირზე. ამიტომ ვცდილობდით, კარგად გვესწავლა გაკვეთილები და ამით მაინც გაგვეხარებინა ჩვენი საყვარელი მასწავლებელი. სხვათა შორის, მისი მოწყენილობის მიზეზი ჩვენთვის ერთ ხანს საიდუმლოდ რჩებოდა. დიდი ხნის შემდეგ, ბათუმში რომ დავიწყეთ მუშაობა, მხოლოდ მაშინ გავიგეთ ჩვენთვის გაუცნობიერებელი, მაგრამ განცდილი მომენტი. იგი ხშირად ჩამობრძანდებოდა თავისი „რაშით“, მსუბუქი ავტომანანა „მოსკვიჩით“ ბათუმში, აუცილებლად გვინახულებდა, ძალიან დაეუახლოვდით მას. მასწავლებელსა და მოსწავლეს შორის, ოსტატსა და შეგირდს შორის ურთიერთობის ზნეობრივი სუბორდინაციის შენარჩუნებით დამყარდა მეგობრული ურთიერთობა ჩვენს შორის. ხშირად ვიხსენებდით ხიხადირის საშუალო სკოლაში ჩვენი სწავლისა და მისი მუშაობის ეპიზოდებს. სწორედ მაშინ დაეუსვით კითხვა დიდი მობოდიშებით: – სკენდერ მასწავლებელი, ყოველთვის ჩაფიქრებული იყავით, ვიცოდით, გქონდათ ახალი კოსტიუმი, მა-

გრამ იშვიათად იცვამდით, რა გქონდათ მაშინ საფიქრალი? მოსწავლეებს გვალელებდა თქვენი ასეთი განცდები და დაღვრემილობა, ცოტათი გათამამებულებმა გავუბედეთ ასეთი კითხვა.

– ახ, ახალგაზრდებო, რა ბედნიერები ხართ! თქვენ არ იცით, რა არის ომი და ისიც ასეთი გრანდიოზული, დამანგრეველი მეორე მსოფლიო ომი. მისი საშინელება, განსაკუთრებით ტყვეობაში გატარებული ჩემი მძიმე წლები. მართალია, ტყვეობიდან გათავისუფლების შემდეგ გავიარე ე. წ. „პოლიტიკური ფილტრაცია“, ჯარშიც დამაბრუნეს და ერთი წელი ომის შემდეგ კიდევ ვიმსახურე, მგრამ სულ მეშინოდა, ხომ არ დამიჭერენ, როგორც ყოფილ ტყვეს-მეთქი. სკოლაში უშიშროების მუშაკის გამოჩენის შიშით გულში ვამბობდი – ჩემს წასაყვანად ხომ არ მოსულა-მეთქი. ასე ვიყავი წლების განმავლობაში. ჩაცმა-დახურვაზე ვინ ფიქრობდა, ან რა მეკოსტუმბოდა, ან რა გამაცინებდა. ბიჭები ზოგჯერ სადამოლობით ან დასვენების დღეებში სადღესასწაულოდ (თუ ოჯახებში, მშობლებთან ვერ წავიდოდით) ჩამოგვდებოდით, ცოტა ღვინითაც შევიტყვევდით თავს, მაშინ გულზე მომეშვებოდა (რა ძალა აქვს დალოცვილ ღვინოს, ოღონდ ზომიერების დაცვით): გავხალისდებოდით, მეც გავიცინებდი, ანეკდოტებსაც მოვყვებოდით, ომის ეპიზოდებსაც ვიხსენებდით, იშვითად, მაგრამ მაინც ვხუმრობდით კიდევ. აბა, ზამთრის გრძელ ღამეებში რა უნდა გაგვეკეთებინა, სულ წიგნის კითხვა ხომ არ შეიძლება, დასვენება და გართობაც საჭიროა. დახარჯული ენერჯია უნდა აღადგინო. 1956 წელს, როცა რეპრესირებულთა რეაბილიტაცია დაიწყო, შვებით ამოვისუნთქე, – აგვისხნა ჩვენმა მასწავლებელმა მისი მდგომარეობით შეწუხებულ და დიდხანს ამაზე ჩაფიქრებულ მოსწავლეებს. არ ვიცით, რამდენად დაგვიჯერებთ, მაგრამ გეტყვით, რომ ჩვენც მასწავლებლის შეცოდების გრძნობა მაშინ მოგვეხსნა.



სკენდერ მასწავლებელი (პირველ რიგში მარცხნიდან მეხუთე) ხისადირელ მეგობრებთან

სკენდერ მასწავლებელი ყოველთვის მოწესრიგებული იყო. იგი უყვარდა ყველას, პედაგოგიურ კოლექტივსა და მოსწავლე ახალგაზრდობას. კარგი ავტორიტეტი დაიმსახურა სოფლის მოსახლეობაში, მშობლებში, განათლების სისტემის მესვეურთა შორისაც. სკოლის ინსპექტირების დროს (ზოგჯერ ეს მთელ კვირას გრძელდებოდა) სკენდერ მასწავლებელი ყოველთვის გამოირჩეოდა თავისი აკადემიური, განმავითარებელი გაკვეთილებით. ამიტომ იგი ცნობილი იყო როგორც მოწინავე მასწავლებელი და გამოცდილი სასწავლო ნაწილის გამგე. ასე ახასიათებდნენ მას ინსპექტირების შესახებ წარდგენილ მოხსენებებში და გაფორმებულ ბრძანებებში.



სკენდერ ბაჯელიძე (შუაში) ყოფილ მოსწავლეებთან – ეგნატე და სერგო დუმბაძეებთან ერთად

როცა ხისადირში პედაგოგიური მოღვაწეობა დაასრულა და სამუშაოდ მშობლიურ რაიონში, ქობულეთში გადავიდა, ხისადირის სკოლის პედკოლექტივმა, მოსწავლე ახალგაზრდობამ, სოფლის მოსახლეობამ დიდი კმაყოფილებით გააცილეს იმის თხოვნით, რომ კვლავ სტუმრებოდა ხისადირს. მისი წასვლით გამოწვეული სინანულის ცრემლებიც კი გააყოლეს ქობულეთში პედაგოგსა და საყვარელ პიროვნებას. აი, რას ნიშნავს, კაცური კაცობა. სწორედ არის ნათქვამი, კარგი ქენი ქვაზე დადგ, გაირე წინ დაგხედებაო. სიკეთე ადამიანის სიმაღლით კი არ იზომება, არამედ გაკეთებული საქმით, ნაშრომ-ნაჯაფართით, დამსახურებული დვაწლით. ვიცით ისიც, რომ სხვა კი არ გამოგაჩენს, შენი საქმე გამოგავლენს. ჩვენ კი მისი ყოფილი მოსწავლეები, წინამდებარე წიგნის ავტორები, მთელი ხეობის მოსახლეობის სახელით გამოვხ-

§7. პედაგოგიური მოღვაწეობის გავრცელება მშობლიურ რაიონში

ატავთ დიდ მადლიერებას სკენდერ მასწავლებლის პიროვნების მიმართ. მართალია, დღეს ის არ არის ჩვენს შორის, განისვენებს ზეციურ საქართველოში, ნათელში მყოფ მის სულს მივმართავთ – სკენდერ მასწავლებლო, ხალხისგან პატივი შენ თავად დაიმსახურე ღირსეულად, ჩვენ კი გვახსოვხართ, არ დაგივიწყებთ, სანამ სუნთქვა შეგვიძლია!

ხიხაძირში მისი შვიდწლიანი მოღვაწეობის შედეგი განიხილა სკოლის პედაგოგიურმა საბჭომ და სათანადო წერილობითი დახასიათებაც კი მისცა.

„სკენდერ ხუსეინის ძე ბაჯელიძე, დაბადებული 1921 წელს, უმაღლესი განათლებით, 1952-53 სასწავლო წლიდან მუშაობდა ხიხაძირის საშუალო სკოლის გეოგრაფიის მასწავლებლად. 1954 წლის 20 აგვისტოდან დაწინაურებულ იქნა ხიხაძირის საშუალო სკოლის სასწავლო ნაწილის გამგედ.

მოვალეობას ასრულებდა მაღალი პასუხისმგებლობით, იბრძოდა კლასში სასწავლო მუშაობის სათანადო სიმაღლეზე დაყენებისათვის, არის დინჯი და თავდაჭერილი ამხანაგი. კარგად ფლობს სასწავლო პროცესის ორგანიზაციას და მისი მართვის ხერხებს.

სარგებლობს კარგი ავტორიტეტით.

ხიხაძირის საშუალო სკოლის დირექტორი დიმიტრი ხოზრევანიძე.

2. 02. 1959 წ.“

ასეთი მაღალი ღირსებით დატვირთული და შემკობილი პედაგოგი ტოვებს ხიხაძირს და სამუშაოდ უბრუნდება მშობლიურ რაიონს, მაგრამ სიყვარული ხიხაძირის, სხალთის ხეობისა და მისი სტუმართმოყვარე მოსახლეობისადმი თან გაჰყვა მას სიცოცხლის ბოლომდე.

საკმაოდ დიდხანს იმოღვაწა ბატონმა სკენდერმა ხიხაძირის საშუალო სკოლაში. გამოჩნდნენ ხიხაძირელი ახალგაზრდა სპეციალისტები სხვადასხვა საგანში და მათ შორის გეოგრაფიაშიც. ამასთან, სკენდერ მასწავლებელი ოჯახიდან მოწყვეტილი იყო. ომის მძიმე წლებგამოვლილი ვეტერანი საკმაოდ ასაკშიც შევიდა. მან საჭიროდ ჩათვალა მშობლიურ რაიონში გადასვლა. განცხადებით მიმართა ამის თაობაზე აჭარის განათლების მინისტრს, ბატონ დავით თებიძეს. მინისტრმა უყოყმანოდ დააკმაყოფილა დამსახურებული პედაგოგის დროული და სავსებით მისაღები მოთხოვნა და ამას მოჰყვა სათანადო ბრძანება (№644, 1959 წლის 17 ნოემბერი), სადაც ვკითხულობთ:

„ბაჯელიძე სკენდერ ხუსეინის ძე ხულოს რაიონის ხიხაძირის საშუალო სკოლის სასწავლო ნაწილის გამგე და გეოგრაფიის მასწავლებელი 1959 წლის 20 ოქტომბრიდან გადაყვანილ იქნას ქობულეთის რაიონის ჩაისუბნის სკოლა-ინტერნატის აღმზრდელ-მასწავლებლად, მისი განცხადების საფუძველზე.

აჭარის განათლების მინისტრი დ. თებიძე.“



ჩაისუბნის სკოლა-ინტერნატის პედაგოგთა ერთი ნაწილი: მარცხნიდან – შუქრი ონაშვილი (სკოლა-ინტერნატის თანამშრომელი), ასლან ყურშუბაძე, რეზო ფოცხიშვილი, ვაჟა (ნიაზ) ყურშუბაძე (დირექტორი), სკენდერ ბაჯელიძე

ასე დაბეჭდილდა სკენდერ მასწავლებელი მშობლიურ რაიონში, მაგრამ გული თავისი სოფლისაკენ მიუწევდა, სურდა უფრო ახლოს ყოფილიყო საკუთარ ოჯახთან, მშობლებთან. მაგრამ ამჯერად ეს არ მოხერხდა, ცოტა ხნით მაინც. სკენდერ მასწავლებელს აქაც შეხვდა შესანიშნავი პედაგოგიური კოლექტივი, რომელსაც დამსახურებული პედაგოგი, სასკოლო ცხოვრების კარგი ორგანიზატორი ნიაზ ყურშუბაძე ხელმძღვანელობდა. მას გვერდში ამოუდგნენ გამოცდილი პედაგოგები: ივერი მელაძე, თინა ლორია, შოთა ვაშაყმაძე, ამირან ერქომაიშვილი, გივი გოგიჩაიშვილი, ქსენია ყურშუბაძე, გივი ჯაში და სხვები. აქაც ბევრი ნიჭიერი მოსწავლე ეზიარა სკენდერ მასწავლებლის ზრუნვასა და ყურადღებას. მისი აქაური ბეჯითი და საამაყო მოსწავლეები იყვნენ: **როსტომ ჯაფარიძე** – აჭარის ყოფილი პროკურორი, აჭარის არ მინისტრთა საბჭოს თავმჯდომარე, საქართველოს პარლამენტის წევრი, ღირსების ორდენოსანი, **როსტომ გუნ-**



როსტომ ჯაფარიძე



როსტომ გუნთაიშვილი



ეთერ ყურშუბაძე

თაიშვილი – იურისტი, იყო აჭარის უზენაესი საბჭოს პირველი მოწვევის დეპუტატი, იურიდიული კომისიის თავმჯდომარე, აჭარის მთავრობის თავმჯდომარის მრჩეველი თავდაცვისა და უშიშროების საკითხებში, იუსტიციის საბჭოს მდივანი, ბათუმის სამოქალაქო დავათა არბიტრაჟის თავმჯდომარე, ბსუ-ს პროფესორი, პედაგოგი **ეთერ ყურშუბაძე** – ოქროს მედალოსანი. მუშაობდა მათემატიკის მასწავლებლად ჩაისუბნის სკოლაში. შემდეგ – ბათუმის №1 (ამჟამად №2) სკოლის პედაგოგია. იყო სასწავლო ნაწილის გამგე და დირექტორის მოვალეობის შემსრულებელი.

ხიხაძირისა და ჩაისუბნის სკოლებში 15 წლის პედაგოგიური მოღვაწეობის შემდეგ, 1967 წლის 10 მარტს, გაფორმდა აჭარის განათლების მინისტრის კიდევ ერთი ბრძანება №209, რომელშიც ვკითხულობთ: „ბაჯელიძე სკენდერ ხუსეინის ძე, ქობულეთის რაიონის ჩაისუბნის სკოლა-ინტერნატის აღმზრდელი და გეოგრაფიის მასწავლებელი, 1967 წლის 15 მარტიდან გადაყვანილ იქნას ხუცუბნის საშუალო სკოლის კლასგარეშე და სკოლისგარეშე აღმზრდელობით მუშაობის დარგში ორგანიზატორად დირექტორის მოადგილის უფლებით.“

საფუძველი: ქობულეთის რაიონის განათლების განყოფილების გამგის 1967 წლის 10 მარტის №2 10/35 მომართვა.

აჭარის ასსრ განათლების მინისტრი – ვ. წულუკიძე.“



როცა მისი მოსწავლის ერთ-ერთი მშობელი ჩაისუბანში შეხვდა სკენდერ მასწავლებელს, მან აუწყა, რომ სამუშაოდ გადავიდა მშობლიურ სოფელში. შეწუხებულმა მშობელმა გულისწუხილი ასე გამოხატა: „თქვენ კი მოიგეთ, ოჯახს დაუბრუნდით, მაგრამ ჩვენ, მოსწავლეებმა და მშობლებმა დიდად წავაგეთ“. ეს სიტყვები კარგად გამოხატავს სკენდერ მასწავლებლის პიროვნების, როგორც პედაგოგის, როლს, მის ავტორიტეტსა და დამსახურებას სკოლაში.



ხუცუბნის საშუალო სკოლა.
სკოლის დირექტორი, აჭარის დამსახურებული მასწავლებელი ჯემალ მეგრელიძე პედაგოგექტივთან ერთად. 1980 წ.

სკენდერ მასწავლებელმა, ხანდაზმულობის მიუხედავად, ხუცუბნის საშუალო სკოლაში კიდევ უფრო ახალი მონღომებით, დიდი პასუხისმგებლობით განაგრძო პედაგოგიური საქმიანობა. მას აქაც კარგ პედაგოგიურ კოლექტივში მოუწია მუშაობა. სკოლის დირექტორი ჯემალ მეგრელიძე დიდი ავტორიტეტის მქონე მასწავლებელი, კარგი ხელმძღვანელი იყო; ტიტე აფხაზავა, კლარა ცინცაძე, სულეიმან

მეგრელიძე, ასლან ქათამაძე, ავთანდილ ზოიძე, რამიზ მახარაძე, ქსენია ჩხაიძე და სხვები ერთსულოვნებითა და მხარდაჭერით ხელს უწყობდნენ სკენდერ მასწავლებელს კეთილშობილურ საქმიანობაში, თანაც სიამოვნებით იზიარებდნენ მის მდიდარ გამოცდილებას. სიხაძირელებსა და ჩაისუბნელებზე ნაკლები სიყვარულითა და პატივისცემით როდი იზიარებენ სკენდერ ბაჯელიძის ამაგსა და ღვაწლს ხუცუბნელი აღზრდილები – რომან მოწობილი, ვაჟა ბერიძე, ვია თამაზაშვილი, როსტომ გუნთაიშვილი, თამარ ბათინიძე, ეთერ ბაუჟაძე, ვაჟა ხინიკაძე, ოთარ, ლევან, ვაჟა ბაჯელიძეები და სხვები.



ხუცუბნის საჯარო სკოლა,
სადაც მუშაობდა სკენდერ ბაჯელიძე

ბატონი სკენდერი არა მარტო გამორჩეული პედაგოგი, არამედ დიღბუნებოვანი ჰუმანტიისტი ადამიანიც იყო. იგი ყოველთვის გაჭირვებულთა პირველი ქომაგი და ქველმოქმედი გახლდათ. ბევრ თანასოფელს ახსოვს, ალბათ, სიხაძირში ორ ობოლ ახალგაზრდას ბატონი სკენდერის ინიციატივით და მასწავლებელთა ხარჯებით როგორ გადაუხდეს ქორწილი, რომელიც მთელი სოფლის ზეიმად გადაიქცა.



ნოდარ კიკვიძე

სკენდერ მასწავლებლის პედაგოგიური საქმიანობა მარტო სკოლით როდი შემოიფარგლებოდა. იგი ყოველთვის დაინტერესებული იყო კურსდამთავრებულთა შემდგომი ბედით, სწავლითა და ცხოვრებით. 46 წელი გავიდა ხიხაძირიდან მშობლიურ რაიონში გადასვლის შემდეგ, მაგრამ მას არასდროს გაუწყვეტია კავშირი ამ ხეობის მასწავლებლებთან, მშობლებთან, ყოფილ მოსწავლესთან. იგი ხიხაძირელთა ჭირ-ვარამის მონაწილე, ყველას მრჩეველი და ქომაგი იყო. იგი სპეციალურად ჩამოდიოდა ქობულეთიდან ბათუმში, მოისიყვარულებდა თავის ყოფილ მოსწავლეს, სარეცელზე მიჯაჭვულ **ნოდარ კიკვიძეს**, ანუგეშებდა, დააიმედებდა და ამით უმსუბუქებდა მას გამწარებულ სიცოცხლეს. დიდი მადლობა ამისათვის თქვენ, სკენდერ მასწავლებლო! – მაშინ ასე მივმართავდით ნოდარის მეუღლე ქალბატონი სურიე და ჩვენ, ნოდარის თანაკლასელები.

საგანგებოდ უნდა აღინიშნოს კიდევ ერთი ფაქტი. მთელი საქართველო შეძრა 1989 წლის 19 აპრილს ხულოს რაიონის სოფელ წაბლანაში, ჩანჭურისხევის უბანში, დატრიალებულმა ტრაგედიამ, როცა სოფელმანის გორა მოსკდა. გეოლოგების სავარაუდო აზრით, დაახლოებით ერთი მილიონი კუბ. მეტრი მიწის მასამ ჩახერგა მდ. სხალთისწყლის კალაპოტი, ამოავსო მისი მარცხენა შენაკადის, პატარა ყიშლისწყლის ხევი, დაანგრია საცხოვრებელი სახლები, დაფარა, დაასამარა ამ პატარა ხევში მოქმედი ხე-ტყის სახერხი ქარხანა და რამდენიმე საცხოვრებელი სახლი. მეწყერმა შთანთქა 23 ადამიანის სიცოცხლეც (ამ ტრაგედიის სიმბოლოდ აღმართულია მემორიალი).




სტიქის შედეგად დაღუპულთა მემორიალი (ჩანჭურისხევი, 1989 წლის 19 აპრილი)

ამ შემზარავმა მოვლენამ შეძრა მთელი სოფელი, წაბლანა, სხალთა, ხიხანის ხეობა, რაიონი, აჭარა, სრულიად საქართველო, დიდი თუ პატარა, ქალი თუ კაცი, მოხუცი თუ ახალგაზრდა ფეხზე დადგა.

შემთხვევის ადგილი მოინახულეს საქართველოსა და აჭარის ხელმძღვანელებმა. წაბლანას ეწვია და დაღუპულთა ოჯახებს, აჭარისა და სრულიად საქართველოს მოსახლეობას, მომხდარი ტრაგედიის გამო სამძიმარი უთხრა უწმინდესმა და უნეტარესმა, სრულიად საქართველოს კათალიკოს-პატრიარქმა ილია მეორემ. მან დაზარალებულთ მოთმინებისკენ, ხოლო ქართველ ერს, საქართველოს მოსახლეობას, მათთვის დახმარების ხელის გაწოდებისკენ მოუწოდა.

საქართველოს კათალიკოს-პატრიარქის ეს მოწოდება მთელმა საქართველომ (და არა მარტო საქართველომ) გულთან მიიტანა. დაზარალებულ ოჯახებს ბათუმში დროებით თავშესაფარი მიუჩინეს, შემდეგ ბინებში შეასახლეს, გაუწიეს სათანადო საჭირო მატერიალური დახმარება.

ამ შემზარავმა მოვლენამ ააფორიაქა სკენდერ მასწავლებელიც. იგი მეორე დღესვე ავტობუსით ავიდა შემთხვევის ადგილას – ჩანჭურისხევში, გაიგო მომხდარი ამბავი და ისიც, რომ მისი ყოფილი მოსწავლეები – ყიშლის არასრული საშუალო სკოლის დირექტორი **დავით შაინიძე**, მისი ბიძაშვილი **ოთარ შაინიძე**, კიდევ 21 მოქალაქესთან ერთად,



დავით შაინიძე



ოთარ შაინიძე

მეწევერს მიწაში ჩაეტანა და დამწუხრებული მოსახლეობა დაეძებდა დაღუპულებს. სკენდერ მასწავლებელიც მათ შეუერთდა. როცა დაღუპულები იპოვეს, მაშინ გენახათ ბატონი სკენდერის ცრემლები და ტკივილი. ამას მხოლოდ დიდსულოვანი ადამიანი გააკეთებდა, მხოლოდ სკენდერ ბაჯელიძის მოღვაწის კაცი მოიმოქმედებდა. კიდევ მეტი, ის ამ ტრაგედიას სპეციალური სამძიმრის დეპეშითაც გამოეხმაურა, რომელიც გაზეთში მოთავსდა.

„გაზეთ „საბჭოთა აჭარის“ რედაქციას:

დიდად შემადრწუნა და დამამწუხრა იმ ამბავმა, რომ სტიქიის შედეგად ხულოს რაიონის სოფელ წაბლანის ბევრი მცხოვრები დაიღუპა.

ჩემი მწუხარება მით უფრო მწარეა, რომ ამ უბედურებას შეეწირნენ ჩემი ყოფილი მოსწავლეები – დავით და ოთარ შაინიძეები.

მინდა თქვენი გაზეთის მეშვეობით ღრმა სამძიმარი გადავცე დაღუპულთა ოჯახებს, მათს ახლობლებს და აღვუთქვა, რომ მათთან ვარ.

სკენდერ ბაჯელიძე,

აჭარის ასრ დამსახურებული მასწავლებელი, დიდი სამამულო ომის მონაწილე, სოფელი ხუცუბანი“.¹

ვინც სკენდერ ბაჯელიძეს ერთჯერ მაინც შეხვედრია და მისი საუბარი მოუსმენია, არასდროს დაავიწყდება იგი, მისი გულის სითბო, კეთილშობილება, მოკრძალებულობა, მაღალზნეობრიობა. იგი სულით ხორცამდე სიკეთისა და კაცურკაცობის განსახიერება იყო. მაღალი მოქალაქეობრივი თვისებები მისი პიროვნების სამკაული და ჰუმანურობისა და კეთილშობილების გამონატულებას წარმოადგენდა. ამიტომ დიდი სითბო, სიკეთე, სახელი და ავტორიტეტი დატოვა ყველგან, სადაც კი უცხოვრია და უმოღვაწია. მისგან გაცემული ეს სიკეთე მასვე უბრუნდებოდა საზოგადოებისგან ანალოგიური სიკეთით.

§8. დამსახურებულ პენსიაზე

სხვადასხვა რაიონში და არაერთ სკოლაში ხანგრძლივი, მუხლჩაუხრელი პედაგოგიური მოღვაწეობა საერთოდ ომგადახდილი პიროვნებისათვის, განსაკუთრებით ტყვეობაგამოვლილი კაცისთვის, მეტად დამღლევი და დამქანცველია. ასეთი მძიმე წლების შემდეგ ენერჯის დაუზოგავად შრომამ მსცოვანი მასწავლებლის – სკენდერ ბაჯელიძის ჯანმრთელობაზე გავლენა იქონია. ამიტომ მან განცხადებით მიმართა სკოლის დირექტორს, ჯ. მეგრელიძეს, ჯანმრთელობის მდგომარეობის გამო, პენსიაში გასვლასთან დაკავშირებით სამუშაოდან გათავისუფლების შესახებ. სკოლის დირექტორმა ამასთან დაკავშირებით აცნობა ქობულეთის რაიონის განათლების განოფილების გამგეს, ბატონ ლევან მესხიძეს.

¹ გაზ. „საბჭოთა აჭარა“, 3 მაისი, 1989 წ.



განათლების რაიონულმა განყოფილებამ დააკმაყოფილა დამსახურებული, ღვაწლმოსილი პედაგოგის თხოვნა და 1981 წლის 20 ოქტომბერს დაუშვა სათანადო ბრძანება №671, რომელშიც ნათქვამია:

„ხუცუბნის საშუალო სკოლის გეოგრაფიის მასწავლებელი სკენდერ ხუსეინის ძე ბაჯელიძე 1981 წლის 8 ოქტომბრიდან გათავისუფლდეს სამუშაოდან პენსიაში გასვლასთან დაკავშირებით.

საფუძველი: სკოლის მომართვა.

ქობულეთის რაიონის განათლების განყოფილების გამგე ლ. მესხიძე“ (მაშინ ბრძანებებს განათლების განყოფილება აფორმებდა).

სამუშაოდან გათავისუფლების წინ სკოლის დირექტორმა სკენდერ მასწავლებელს ასეთი დახასიათება მისცა: „სკენდერ ბაჯელიძე, დაბადებული 1921 წელს, უპარტიო, შრომის სტაჟი 31 წელი, ამჟამად მუშაობს ხუცუბნის სკოლაში გეოგრაფიის მასწავლებლად. კარგად ფლობს საგანს და მისი სწავლების მეთოდებს. იცნობს საბუნებისმეტყველო დარგის საგნების მეცნიერულ მიღწევებს და საჭიროების მიხედვით უკავშირებს გაკვეთილებს. პასუხისმგებლობით ეკიდება, ემზადება და მეთოდურად გამართულ გაკვეთილებს ატარებს. იყენებს არსებულ თვალსაჩინოებებს და ტექნიკურ საშუალებებს. მტკიცე მოთხოვნებს უყენებს მოსწავლეებს დავალების შესრულებაში, სწავლებაში კარგ შედეგებს აღწევს. მუშაობს თავისთავზე, ეხმარება დამწყებ მასწავლებლებს, თავის გამოცდილებას უზიარებს მათ. აქტიურად მონაწილეობს სკოლის ცხოვრებაში, კეთილსინდისიერად ასრულებს დავალებებს, ვერ ეგუება ნაკლოვანებებს. ხშირად საკითხს აყენებს პედსაბჭოს სხდომებზე და იბრძვის მათ აღმოსაფხვრელად.

ავტორიტეტით სარგებლობს სკოლის პედაგოგიკტივში, მოსწავლე ახალგაზრდობაში და სოფლის მოსახლეობაში.

ხუცუბნის სკოლის დირექტორი ჯ. მეგრელიძე, ცოტას დავისვენებ, მიეხედავ ოჯახს, ჯანმრთელობასაც და შვილიშვილებსაც მოვეფერებო, – ფიქრობდა ვეტერანი პედაგოგი.

პენსია ფსიქოლიგიურად ძნელად შესაგუებელი ფაქტორია. ადამიანი ძირითად საქმიანობას რომ წყდება, ფიქრობს, სიცოცხლე მთავრდება, სიკვდილი დაჩქარდებო და ყოველთვის ამ უბედურების ბურუსში თუ მოლოდინში უღამუთენდება. თუ ჯანმრთელობაც შერყეული აქვს და ყურადღება, ოჯახური სითბო აკლია, ეს პროცესი კიდევ უფრო მტკივნეული და ძნელად ასატანია.

ძალიან მოძრავი კაცი იყო სკენდერ ბაჯელიძე, უსაქმოდ ვერ ჩერდებოდა (ეს მოხუცებულობის, ასაკის დაავადებაა, როგორც ჩანს). გამონახა გასართობი, დროის მოსაკლავი, ამავე დროს ჯანმრთელობისა და ოჯახისთვის სასარგებლო საქმე. ნათქვამია, სიბერეში სიქანლეო, ჯერ კიდევ პენსიაში გასვლამდე 1976 წელს დაამთავრა ავტოსკოლა, აიღო მანქანის მართვის მოწმობა, იყიდა მსუბუქი მარკის ავტომანქანა „მოსკვიჩი“ და ამ „ბედაურით“ ხშირად სტუმრობდა ქალიშვილებს, ძმებს, ძმისშვილებს, ნათესავენებს, მეგობრებს, ყოფილ მოსწავლეებს. ჩამოდიოდა ბათუმშიც, საოჯახო საქმეებსაც აგვარებდა და ახლობლებსა და შინაურებსაც ნახულობდა.

ასე კლავდა დროს. ეს იყო მისი „დასვენება-გართობა“. კიდევ მეტი, სკენდერ მასწავლებელი, როგორც პენსიონერი, ომისა და შრომის ვეტერანი, სარგებლობდა ვეტერანისთვის დაწესებული საგზურებით და პერიოდულად დადიოდა კურორტებზე, ისვენებდა და იკაუებდა ჯანმრთელობას (საგზურით ამარაგებდა მისი ყოფილი მოსწავლე გივი გაბაიძე, რომელიც მუშაობდა სოცუზრუნველყოფის სამინისტროში). არაერთხელ ყოფილა საირმეში, კისლოვოდსკოში, ბორჯომში, წყალტუბოში, სადაც ბევრი მეგობარი გაიჩინა, მათთან გად-



აღებული სამახსოვრო სურათები აღამაზებენ მის საოჯახო ალბომს და ინახავს მათ მეგობრობას. კურორტ „საირმეში“ იგი ისვენებდა თავის მეგობარ-კოლეგასთან, აღიარებულ პედაგოგთან, ცნობილ ფილოლოგთან და სამშობლოს ერთგულ პიროვნებასთან, ბატონ ივერი მელაძესთან ერთად. ისინი იმდენად აფასებდნენ და უყვარდათ ერთმანეთი, რომ სკენდერ მასწავლებელი, ბათუმში ჩამოსული, ბატონ ივერის უნახავი უკან არ ბრუნდებოდა. მათი ეს დამოკიდებულება ივერი მელაძემ გადმოსცა სკენდერ ბაჯელიძის დაბადებიდან 75-ე წლისთავისადმი მიძღვნილ საღამოზე მისასალმებელ წერილში, რომელიც მოთავსებულია ამ წიგნის მომდევნო განყოფილებაში.

ასეთ თბილ ოჯახურ და მეგობრულ გარემოში უხდებოდა ცხოვრება პენსიაში გასვლის შემდეგ სკენდერ ბაჯელიძეს. მეტს რას ინატრებდა ომის მძიმე წლების შემდეგ მშვიდობიანი ცხოვრებით დაღვინებული, ნაყოფიერი პედაგოგიური მოღვაწეობით ხელდამშვენებული, პენსიაში გასვლით თითქოს რამდენადმე შრომაშემსუბუქებული ადამიანი. ხარობდა ოჯახის მამა და დედამამიშვილობაში უფროსი ძმა სკენდერ მასწავლებელი თავისი გავლილი შინაარსიანი ცხოვრების გზით. პენსიაში გასვლის შემდეგ იგი დროს დიდ ნაწილს ოჯახში, მეგობრებთან, და-ძმებთან ატარებდა. ამით ივსებდა იმ „სიცარიელეს“, რაც გამოწვეული იყო



კურორტ „საირმეში“
მარცხნიდან: ივერი მელაძე,
სკენდერ ბაჯელიძე

ფაშიზმის წინააღმდეგ ბრძოლის პერიოდში, შემდეგ სტუდენტობისა თუ შორეულ რაიონში პედაგოგიური მოღვაწეობის წლებში, ოჯახისაგან შორს ყოფნით.

როგორც ზემოთ ითქვა, სკენდერი დედმამიშვილებს შორის უფროსი იყო. მის შემდეგ ხუსეინ და მერიემ ბაჯელიძეების ოჯახში გაჩნდნენ ვლადიმერი, შუქრი, ზია, ფათუშა და ქესკინი. როგორც ზემოთ ითქვა, სამწუხაროდ, ზია და ფათუშა ადრეულ ასაკში გარდაიცვალნენ. მათ ოჯახები არ შეუქმნიათ. დარჩენილი ძმები გაიზარდნენ, შესაფერისად ისწავლეს და ოჯახში თუ ცხოვრებაში დაიკავეს კუთვნილი ადგილები.

როგორც ზემოთ აღინიშნა, ვლადიმერმა მიიღო უმაღლესი აგრონომიული განათლება, წლების განმავლობაში ხელმძღვანელობდა სოფელ ხუცუბანს, რომელიც მილიონერი კოლმეურნეობა გახდა.

ის, როგორც სოფლის გამორჩეული თავკაცი, საკავშირო უმაღლესი საბჭოს რამდენიმე მოწვევის დეპუტატი გახლდათ. უფროს ძმას სკენდერს თუ ორდენები ჰქონდა ფაშიზმის წინააღმდეგ ომში მონაწილეობისა და თავდადებული ბრძოლისათვის, ბატონ ვლადიმერის გულმკერდს შრომის ფრონტზე მიღწეული წარმატებებისათვის მინიჭებული ორდენები და მედლები ამშვენებდა (მის შესახებ ვრცლად ითქვა ზემოთ).

სკენდერის შემდეგი ძმაა შუქრი, ტექნიკის მოყვარული. საშუალო სკოლის დამთავრების შემდეგ დაეუფლა მექანიზატორის სპეციალობას, კოლმეურნეობის დაშლამდე მუშაობდა სოფელში, ჩაის ფაბრიკებში. შუქრის მეუღლეა ანია არშევსკაია. მათ ჰყავთ ორი შვილი: მალხაზი და ტარიელი. ისინი აგრძელებენ მამის საქმეს და ემსახურებიან, თავს ევლებიან დედას.



ძმები შუქრი და სკენდერ ბაჯელიძეები
კიევი, 1951 წლის 4 ივლისი

სკენდერის უმცროსი ძმაა **ქესკინი**. მან სკოლა დაამთავრა, მუშაობდა კოლმეურეობაში, იმსახურა ჯარში, საზენიტო არტილერიაში, აქვე დაეუფლა მძღოლის სპეციალობას. ჯარის შემდეგ კოლმეურეობის დაშლამდე მუშაობდა ჩაის საკრეფ კომბაინზე მექანიზატორად. მისი მეუღლეა ქალბატონი ნინო, სახელგანთქანი მეჩაიე, არჩეული იყო საკავშირო უმაღლესი საბჭოს ბოლო მოწვევის დეპუტატად. მათ სამშობლოს მისცეს სამი შვილი: **კახა, ქეთინო, მირზა**. სამწუხაროდ, კახამ ნაადრევად გამოიცვალა სამყარო – სააქაო სააქაოდ, ქეთინო სოფელ კონდიდში გათხოვდა, მეუღლე – ვია შაქარიშვილი. ჰყავთ ორი შვილი: **ლევანი და ნინი**. მირზა კი ემსახურება მშობლებს და აგრძელებს ბაჯელიძეთა ტრადიციებს.



ქესკინ ბაჯელიძე მეუღლე ნინოსთან ერთად

ქესკინი ამჟამად ხუსეინ ბაჯელიძის ფუძე ოჯახში ყველაზე უხუცესია, არის პენსიონერი, აგრძელებს მამის ტრადიციებს, იცავს გვარის ღირსებას, მრჩეველად თუ დამრიგებლად სათავეში უდგას შვილებს, ძმების შვილებს, შვილიშვილებს, ერთობა საოჯახო საქმეებით და პატარებზე ზრუნვით, ხარობს მათზე ცქერით, უყვება წინაპართა ღირსეულ ტრადიციებზე და მოუწოდებს მათ, დაიცვან, გაამრავლონ და სახელოვნად გააგრძელონ საქმენი მათი საგმირონი, კარგი სწავლით, შრომით, სულიერი სიწმინდით და ზნეობრივი სისპეტაკით ბაჯელიძეთა დარად ღირსეული ადგილი დაიმკვიდრონ სოფელში, რაიონში, საზოგადოებაში, ქვეყანაში, ცხოვრებაში.

საქართველოს დამოუკიდებლობის მოპოვების შემდგომ, 2014 წლამდე, სოფელ ხუცუბანს თავაკობდა სკენდერ მასწავლებლის მომდევნო ძმის, ვლადიმერის შვილი – **ზურაბ ბაჯელიძე**. იგი ზრუნავდა და ზრუნავს სოფლის კეთილმოწყობისა და მოსახლეობის კეთილდღეობისთვის.



მამის მსგავსად, იგი კარგი კაცია, ტკბილმოუბარი, ყურადღებიანი, მაღალი კულტურის, ადამიანის დამფასებელი, თანამშრომლებთან ტაქტიანი, თბილი, მათზე მზურნველი, მრჩეველი და დამრიგებელი, სამსახურებრივი მოვალეობისა და მინდობილი საქმისადმი მაღალი პასუხისმგებელი. ზურაბი მოქალაქეობრივი თვისებებით, გარეგნობით, ხმის ტემპრით, მეტყველების მაღალი კულტურით, დიქციით, მოკრძალებით, უბრალოებით, ზომიერებით, სტუმარმასპინძლობის სურვილითა და უნარით მამის ორეულია. ვინც მის მამას იცნობდა და ბატონ ზურაბის საუბარს მოისმენს, პირველივე წუთებიდან თვალწინ



ქესკინი (უკანა რიგში შუაში) და ზურაბი (მარჯვნივ) ოჯახების წევრებთან ერთად



ზურაბ ბაჯელიძე და წიგნის ავტორი სერგო დუმბაძე

შვილის სახით მამის სილუეტი წარმოუდგება ხალხური ნათქვამია, კარგი დედა შვილს მამას დაამსგავსებსო. ღმერთმა აცხონოს დედ-მამა, ღმერთმა დაიცვას შვილი ზურაბი, რომელიც კაცურკაცობით აგრძელებს მშობლების, გვარის, სოფლის ღირსეულ ტრადიციებს, აფერუმ, ასეთ შვილს ყველა ოჯახში.



თოფან (თეიმურაზ) მელაძე აჭარის კულტურის დამსახურებული მოღვაწე

აღსანიშნავია ზურაბ ბაჯელიძის თანადგომა წინამდებარე წიგნის მასალების შეგროვება-მომზადებაში. ბატონი ზურაბი დაწინაურდა. ამჟამად ქობულეთის მუნიციპალიტეტის ახლად შექმნილ განყოფილებაში სოფლის განვითარების სამსახურის უფროსია, ერთგულად და გულმოდგინედ ემსახურება მინდობილ საქმეს. ზურაბი არა მარტო სახელოვანი მამის შვილი, მისი საქმის ღირსეული გამგრძელებელია, არამედ შესანიშნავი ოჯახის პატრონიცაა. მისი მეუღლეა ქალბატონი მაია მელაძე.

ქორეოგრაფის, აჭარის კულტურის დამსახურებული მოღვაწის თოფან (თეიმურაზ) მელაძის შვილია, მუშაობდა ქობულეთის რაიონულ არქივში. ამჟამად აჭარის ცენტრალურ სახელმწიფო არქივში აგრძელებს საქმიანობას. მათ გაზარდეს სამი ვაჟკაცი. ყველამ მიიღო უმაღლესი განათლება: არჩილი ეკონომისტია, მისდევს ბიზნესს, გიორგი ინჟინერია, მუშაობს შპს „გზა“-ში, იმედა მეზღვაურის სპეციალობის დაუფლების შემდეგ ცურავს შორეული ნაოსნობის სისტემაში. ბატონ ვლადიმერ ბაჯელიძის შთამომავლობა ღირსეულად აგრძელებს ოჯახისა და გვარის ტრადიციებს.

ბატონ ზურაბს ჰყავს ძმა, **გენადი**, ინჟინერ-მშენებელი, მუშაობს ქობულეთის ინფრასტრუქტურაში. მისი მეუღლე – ქალბატონი ხათუნა დიასახლისია, ჰყავთ ორი შვილი – გიორგი და ნინო.



გენადი ბაჯელიძე მეუღლესთან – ხათუნასთან და შვილებთან – ნინოსთან და გიორგისთან ერთად

სკენდერ მასწავლებელი ხარობდა, ამაყობდა არა მარტო საკუთარი ოჯახითა და მრავალრიცხოვანი, სისხლით ნათესაური წრით, არამედ დამოყვრებით დანათესავებული გარემოებითაც.

სამი ქალიშვილის მამას, ბატონ სკენდერს სამ ოჯახთან ჰქონდა მოყვრობა. აი, ისინიც: სოფელ ქობულეთიდან დამსახურებული პიროვნება **მემედ ბასილიძე** (მეუღლე **სურიე ინაიშვილი**), ქ. ქობულეთიდან **ახმედ ნაკაიძე** (მეუღლე **სურიე ცეცხლაძე**) და ქ. ბათუმიდან **აკაკი ევგენიძე** (მეუღლე **ქეთო ჭანტურიშვილი**). მათთან ჰქონდა კარგი ურთიერთობა, მისვლა-მოსვლა, სტუმრობა და მასპინძლობა. როცა მოყვრებზე ჩამოვარდებოდა საუბარი, ბატონი სკენდერი ხშირად იმარჯ-



სკენდერ ბაჯელიძის რძლები – მარეხი, ნინო და მაია

ვებდა და იმეორებდა დიდი ქართველი მგოსნის, ხმაწკრიალა პოეტის – აკაკი წერეთლის სიტყვებს:

*„ჭირშიც და ღვინშიც
საჭიროა მოყვარე,
რომ შენს გულში ნაღები
მასაც გაუზიარო“-ო.*



სკენდერის უფროსი ქალიშვილი ვუჟუნა შვილთან უჩასთან და მეუღლესთან – ნოდარ ბასილიძესთან ერთად

სკენდერ ბაჯელიძის შვილებიდან უფროსმა ქალიშვილმა **ჟუჟუნამ** გაახარა მემედ ბასილიძის ოჯახი. მან ხელი მისცა ნოდარ ბასილიძეს. იგი შესახედავად მომხიბლავი, დარბაისელი, სტუმართმოყვარე, მეგობრული, თანამდგომი, გამგებიანი პიროვნებაა. ჟუჟუნამ და ნოდარმა სამი შვილი გაუზარდეს სამშობლოს - **ირმა, ინგა და უჩა**. ინგამ ოჯახი შექმნა პროფესორ რამაზ სურმანიძის ვაჟიშვილთან, ფრიდონთან. გაუჩნდათ შვილი თორნიკე. მათ მიიღეს დედ-მამის ტიტული, ხოლო ბატონი სკენდერი გახდა დიდი ბაბუა. იგი



სკენდერის შვილიშვილი ინგა ბასილიძე-სურმანიძისა მეუღლესთან ფრიდონ სურმანიძესთან და შვილთან თორნიკესთან ერთად

ძალიან ამაყობდა ბატონ რამაზ სურმანიძის მოყვრობითა და ინგას ოჯახით. შემთხვევითი არ იყო ისიც, რომ სკენდერ მასწავლებლისადმი მიძღვნილ ყოველ ღონისძიებას ესწრებოდა ბატონი რამაზი და თბილი სიტყვებითაც მიესალმებოდა მას. გრძელდებოდა ბედნიერი მოყვრობა... სამწუხაროდ, ფრიდონს უკუჩვენებელი სენი შეეყარა. სად არ ჰყავდათ, რით არ უმკურნალებს, როგორც იტყვიან, ქვა წამლად აქციეს, მაგრამ ვერაფერმა უშველა. ოჯახს უბედურება დაატყდა თავს. 45 წლის, წარმატებული და პერსპექტიული

ახალგაზრდა კაცი, 2011 წლის 28 ოქტომბერს, ხანგრძლივი და მძიმე ავადმყოფობის შემდეგ, გარდაიცვალა. დასაფლავებულია ქ. ბათუმში, ფერიის სასაფლაოზე. ფრიდონის გარდაცვალებამ ბევრი დაამწუხრა. ამ ტრაგედიამ ძაძები ჩააცვა დედას, ქალბატონ ნახის, უღლის ცაღად დატოვა მეუღლე ინგა, ობლად – შვილი თორნიკე, დაამწუხრა აგრეთვე მამა, მოყვრები, ნათესაობა, ახლობლები, მეგობრები, კოლეგები. ცხოვრებას თავისი წესები აქვს, უძღური ვართ მის წინაშე. დაგვრჩენია ერთი რამ – მოთმინება და ჯანმრთელობა ვუსურვოთ ქალბატონ ინგას, შვილის – თორნიკეს კარგად აღზრდითა და ცხოვრებაში კარგ გზაზე დაყენებით თავადაც გაეხარებინოს ოჯახი, გვარი და ფრიდონის სულიც, ახლობლები, ნათესავეები. ინგას უფროსი და – ირმა კარგი ვაჟკაცისა და შესანიშნავი ოჯახისშვილის, ჯამბულ სურმანიძის მეუღლეა. ჰყავთ ვაჟი – ამირანი. დაოჯახებულია ჟუჟუნასა და ნოდარის ვაჟიშვილი – უჩაც, ჰყავს მეუღლე – ნატო და შვილი ნიკოლოზი. სწორედ მათთან საუბრით, შვილიშვილების მოსიყვარულებითა და აღერსით იმსუბუქებენ ბებია და ბაბუა (ეს თუ შესაძლებელია) თავიანთ მწუხარებას.

ბატონი სკენდერის მეორე ქალიშვილია **ეთერი**. უფროსი დის, ჟუჟუნას მსგავსად, მან დაამთავრა სამედიცინო ტექნიკუმი და მუშაობდა მედლის სპეციალობით ქობულეთის სა-ნატორიუმში „საქართველო“.

ეთერი ცნობილი გვარის ნაკაიძეების რძალი გახდა. მან შექმნა ოჯახი როსტომ ახმედის ძე ნაკაიძესთან, რომელიც აჭარის განათლების ყოფილი მინისტრის, ბათუმის შოთა რუსთაველის სახელობის სახელმწიფო პედაგოგიური ინსტიტუტის ყოფილი პრორექტორის, ირაკლი ნაკაიძის ნათესავია. გაზარდეს ორი შვილი: სულხანი და ჯიმშერი. ხარობდა ოჯახი და ცხოვრობდა მომავლის რწმენით.



სკენდერის შვილიშვილი ირმა ბასილიძე მეუღლესთან – ჯამბულ სურმანიძესთან და ვაჟიშვილთან – ამირანთან ერთად



სკენდერის ქალიშვილი ეთერ ბაჯელიძე-ნაკაიძისა, შვილებთან – სულხანთან, ჯიმშერთან და შვილიშვილთან ერთად

სამწუხაროდ, ეთერს ბოლომდე არ გაუძარტლა ცხოვრებამ. 1996 წლის 12 დეკემბერს გარდაეცვალა მეუღლე როსტომი და ერთადერთ იმედად შვილები დარჩნენ.

ლიანა სკენდერ ბაჯელიძის ნაბოლარა შვილია. მან, დებისგან განსხვავებით, სხვა გზა აირჩია. 1986 წელს დაამთავრა საქართველოს პოლიტექნიკური ინსტიტუტის (ამჟამად ტექნიკური უნივერსიტეტი) ქიმიის ფაკულტეტი. ერთხანს მუშაობდა აჭარის განათლების სამინისტროსთან არსებულ ბათუმის მასწავლებელთა დახელოვნების ინსტიტუტში ქიმიის მეთოდური კაბინეტის მეთოდისტად.



სკენდერის ქალიშვილი ლიანა ბაჯელიძე და სიძე ნოდარ ევგენიძე, შვილთან, გიორგისთან ერთად

ლიანა ცოლად გაჰყვა ბათუმელ ნოდარ აკაკის ძე ევგენიძეს, შექმნეს კარგი ოჯახი. ჯერჯერობით ჰყავთ ერთი შვილი – გიორგი.

პენსიონერი მასწავლებელი ამ დიდ ოჯახურ გარემოში, ახლო ნათესავებში, მოყვარეებში, კოლეგებთან, მეგობრობის



რანგში აყვანილ ყოფილ მოსწავლეებთან შესხვედრებით „იკლავდა“ დროს. ყოველთვის გრძნობდა მათგან სითბოს, ყურადღებას, მოკრძალებას, ერთგულებას, უზიარებდა მათ თავის გამოცდილებას, მოუთხრობდა განვლილი წლების აკარგზე; იყო ოპტიმისტი, ყოველთვის სწამდა უკეთესი მომავლის. კარგი შვილები არ იზრდებიან კარგი გარემოსა და ღირსეული ტრადიციების გარეშე. ხუსეინ და მერიემ ბაჯელიძეების ერთგულებით, წინაპართა დაფასებით, მოყვრებისადმი ყურადღებიანობით გამორჩეულ ოჯახში შვილებიც ღირსეულნი გაიზარდნენ. ისინი კარგი სახელით სარგებლობდნენ ყველგან, სადაც უმსახურიათ.

ასე გრძელდებოდა ბაჯელიძეთა ტრადიციული ოჯახისა და სკენდერ მასწავლებლის ცხოვრება...

თუმცა იყო უსიამოვნო მოულოდნელობებიც. სკენდერ ბაჯელიძეს ორჯერ ოპერაცია დასჭირდა, მაგრამ მეუღლის, ქალბატონ დურიკოს ყურადღებით, შვილების (ყუჟუნას, ეთერის, ლიანას), სიძეების (ნოდარ ბასილიძის, როსტომ ნაკაიძის, ნოდარ ვეგენიძის), ძმების (ვლადიმერის, ქესკინის), შვილიშვილების (ირმას, ინგას, უჩას, სულხანის, ჯიმშერის), ნათესავ-ახლობლების მზრუნველობით, გამოვიდა მდგომარეობიდან.

რეობიდან. უხაროდა, – აწი რა მინდა, ვიქნები კარგადო. შევხედავ ოჯახს, მოვეფერები შვილებს, შვილიშვილებს, ბაბუას მეტი რა სჭირდება ამქვეყნადო, – იმეორებდა ხოლმე.

ნათქვამია, კაცი ბჭობდა, ღმერთი იცინოდაო... 1986 წელს გარდაეცვალა უპირობო პიროვნება, სილამაზით, სათნოებით და მომხიბვლელობით გამორჩეული ქალბატონი დურიკო – ერთგული მეუღლე და სულიერი მეგობარი.

უღლისცაღად დარჩა სკენდერ მასწავლებელი... ნათქვამია, თავს ზემოთ ძალა არ არისო, უნდა შევეგუოს ადამიანი, თუნდაც ასეთ უმძიმეს მდგომარეობას. სკენდერ მასწავლებელიც „ეგუებოდა“ თავის ბედს, თავს დამტყდარ უბედურებას. მართალია, უყურადღებოდ არასდროს დარჩენილა – შვილები, შვილიშვილები, ძმები, მათი ოჯახები, ნათესავები, მოყვრები, მეზობლები თავს ევლებოდნენ, გვერდიდან არ შორდებოდნენ, მარტოდ არ ტოვებდნენ, მდგომარეობა შევეუმსუბუქოთო, მაგრამ ასეთი მდგომარეობა სკენდერ ბაჯელიძისთანაა მორიდებული კაცისათვის მძიმე გადასატანია, ძნელად შესაგუებელი.. ეს ენაუთქმელი კაცი მაშინაც ძალიან წუხდა, როცა თავისი მდგომარეობით სხვებს აწუხებდა, თუნდაც შვილებს.

§ 9. ღვაწლი დაუფასდა

მიუხედავად დიდი გვარიშვილობისა, მრავალრიცხოვანი ნათესავებისა, მოყვრებისა, ახლობელ-მეზობლებისა და მათ მიერ შექმნილი თბილი გარემოსი, მეუღლის გარდაცვალებით გამოწვეულ სულიერ ტკივილს ვერაფერი ცვლიდა. ამას ამჩნევდნენ არა მარტო შინაურები, არამედ ჩვენც, მისი ყოფილი მოსწავლეები. ამიტომ მისმა აღზრდილებმა, ხიხაძირის საშუალო სკოლადამთავრებულებმა, ამაგდარი მასწავლებლის დაბადებიდან 75-ე წლისთავის საზეიმოდ აღ-

ნიშნა გადავწყვიტეთ. ამით გვსურდა ამაგი დაგვეფასებინა და მომავალი თაობებისათვის გვეჩვენებინა მისი დამსახურება და ისიც, რომ, ვისაც სურს ამქვეყნად სახელი დატოვოს, უნდა აკეთოს სიკეთე, თესოს სიყვარული და სიბოლო, რასაც სამაგალითოდ ასრულებდა ჩვენი სკენდერ მასწავლებელი. გარდა ამისა, ჩვენი მიზანი იყო ამ ფორმით შეგვემსუბუქებინა მისთვის ცხოვრებით მიყენებული ტკივილი, ღვაწლის დაფასებით გაგვეხარებინა, გაგვეხალისებინა მისი სიცოცხლე. ამ მიზნით საინიციატივო ჯგუფმა შეაგროვა სხვადასხვა დროს მის შესახებ გამოქვეყნებული მასალები, მოგონებები, იუბილარის ცხოვრებისა და მოღვაწეობის ამსახველი ფოტოსურათები, ვიდეომასალა და მოეწყო საინტერესო გამოფენა, რომელსაც ამშვენებდა ალექსანდრე ბეგაშვილის ლამაზი სტრიქონები:

*„მასწავლებელი მზეს პირბადრი,
ირგვლივ ბავშვები ვარსკვლავებია,
სულის სიწმინდე, გულის სიმდიდრე
სულ მასწავლებლის ნასწავლებია“.*

1996 წლის 6 დეკემბერს, აჭარის განათლებისა და კულტურის ახლად დაარსებული მუხეუმის დარბაზში შეიკრიბნენ სკენდერ ბაჯელიძის თანაკლასელები, თანაკურსელები, ომისდროინდელი თანამებრძოლები, კოლეგები, მისი აღზრდილები.

დანიშნულ დროზე დარბაზი შეივსო მოწვეული სტუმრებით. ღონისძიების მესვეურებმა, საორგანიზაციო ჯგუფის წევრებმა, დაიკავეს ადგილები პრეზიდიუმში, იუბილარი კი სპეციალურად გამზადებულ და თვალსაჩინოდ დადგმულ სავარძელში დაბრძანდა.

დარბაზს, სადაც ღონისძიება გაიმართა, ამშვენებდა კარგად გაფორმებული ღოზუნგი ასეთი ტექსტით: *„საყვარელო სკენდერ მასწავლებლო, მხურვალედ მოგესალმებით და გულითადად გილოცავთ დაბადებიდან 75-ე წლისთავს!“*



სკენდერ ბაჯელიძის დაბადებიდან 75 წლისთავის საიუბილეო შეხვედრაზე. სურათზე: იუბილარის კოლეგები, ახლობლები და აღზრდილები (ბათუმი, 1996 წლის 6 დეკემბერი)



სკენდერ ბაჯელიძის საიუბილეო საღამოზე. მარცხნიდან: ნიკოლოზ დუმბაძე, ვლადიმერ ბაჯელიძე (სკენდერის ძმა), ამირან მამულაძე, იუბილარი სკენდერ ბაჯელიძე, მისი მოსწავლეები – ლამარა ჯაიანი-დუმბაძისა, მისი მეუღლე სერგო დუმბაძე, შვილიშვილი ნინო და ეგნატე დუმბაძე



მარცხნიდან: ოთარ ბაჯელიძე (ბიძაშვილი), ვლადიმერ ბაჯელიძე (მმა), სკენდერ ბაჯელიძე, რამაზ სურმანიძე (მოყვარე), ნოდარ ბასილიძე (სიძე), ჯამბულ სურმანიძე (სიძე)

ყოფილმა მოსწავლეებმა – ლამარა ჯაიანმა, ეგნატე დუმბაძემ, ალექსანდრე მამულაძემ, ყოფილი კოლეგის, უკვე გარდაცვლილი ასლან ხახუტაიშვილის მეუღლემ, პედაგოგმა ვარდო ხაბაძემ, შვილებმა, შვილიშვილებმა, მეგობრებმა იუბილარს მიაღწევს თაიგულები, მასთან ერთად გადაიღეს სამახსოვრო სურათები.

საიუბილეო საღამო შესავალი სიტყვით გახსნა აჭარის მასწავლებელთა დახელოვნების ინსტიტუტის დირექტორმა არჩილ იშხნელიძემ.

შეკრებილთა წინაშე საინტერესო მოხსენებით წარსდგა ხიხაძირის საშუალო სკოლის კურსდამთავრებული, ოქროს მედალოსანი, იმჟამად აჭარის მრეწველობის დეპარტამენტის განყოფილების უფროსი **ნიკოლოზ დუმბაძე**. მან შეკრებილთა გააცნო იუბილარის ბიოგრაფია, მისი ცხოვრების, ბრძოლისა და შრომის საინტერესო ეპიზოდები.

იუბილარს გულთბილად მიესალმნენ: აჭარის ავტონომიური რესპუბლიკის განათლების სამინისტროს განყოფილების უფროსი **ნოდარ ქათამაძე**, რომელმაც იუბილარს გადასცა სამახსოვრო სიგელი; აჭარის კულტურის მინისტრი თეიმურაზ კომახიძე; აჭარის დამსახურებული მასწავლებელი **ივერი მელაძე**; იუბილარის ყოფილი მოსწავლე, ხიხაძირის საშუალო სკოლადამთავრებული, პირველი ოქროს მედალოსანი, იმჟამად აჭარის სამუზეუმო გაერთიანების დირექტორი,



სკენდერ ბაჯელიძე კოლეგებთან ერთად

ნოდარ ცეცხლაძე; ქობულეთის რაიონის ხუცუბნის საშუალო სკოლის დირექტორი, **მანანა აბაშიძე**; ბათუმის რესპუბლიკური საავადმყოფოს კარდიოლოგიური განყოფილების გამგე, მედიცინის მეცნიერებათა კანდიდატი, ყოფილი მოსწავლე და იუბილარის მკურნალი ექიმი, **ამირან ჯაიანი**; ქ. ბათუმის პროკურორის მოადგილე, იურიდიულ მეცნიერებათა კანდიდატი **ვანო გაბაიძე**, რომელმაც, მისასალმებელი სიტყვის შემდეგ, იუბილარისადმი მიძღვნილი საკუთარი ლექსი წაიკითხა; საქართველოს დამსახურებული მასწავლებელი, აჭარის განათლების ყოფილი მინისტრი, **ვასტანგ წულუკიძე**; ბათუმის კოოპერაციული ვაჭრობის დირექტორი (ყოფილი



მოსწავლე), **ამირან მამულაძე**; აჭარის ავტონომიური რესპუბლიკის სოციალური დაცვის, შრომისა და დასაქმების მინისტრის პირველი მოადგილე, დავით მამულაძის საქველმოქმედო საზოგადოება „მოამაგე“-ს ვიცე-პრეზიდენტი **ვლადიმერ მამულაძე**, რომელმაც იუბილარს გადასცა სამახსოვრო ადრესი; იუბილარის ყოფილი მოსწავლის, ნოდარ კეკელიძის მეუღლე **სურია წულუკიძე**; ხულოს რაიონის სოფელ ვერნების საშუალო სკოლის დირექტორი (ყოფილი მოსწავლე) **რეზო სურმანიძე**; პენსიონერი, იუბილარის ძმა, სსრ კავშირის უმაღლესი საბჭოს ყოფილი დეპუტატი, მრავალი ორდენისა და მედლის კავალერი, ხუცუბნის აღიარებული თავკაცი **ვლადიმერ ბაჯელიძე**; იუბილარის ყოფილი მოსწავლე, იმხანად ბათუმის შოთა რუსთაველის სახელობის სახელმწიფო უნივერსიტეტის კათედრის გამგე, დოცენტი, ამჟამად ისტორიის მეცნიერებათა დოქტორი, პროფესორი **სერგო დუმბაძე**, რომელმაც აღმზრდელ-მასწავლებელს აჩუქა საკუთარი წიგნი „წარუშლელი ფურცელი“ (ბათუმის პედაგოგიური ინსტიტუტი ომის წლებში), სადაც, სხვა თანამემამულეებთან ერთად, გადმოცემულია სკენდერ ბაჯელიძის საბრძოლო ეპიზოდები.

ბოლოს ამაღელვებელი სიტყვა წარმოთქვა იუბილარმა, ბატონმა **სკენდერ ბაჯელიძემ**. მან მაღლობა გადაუხადა შეკრებილთ, იუბილეს მოწყობის ინიციატორ-ორგანიზატორებს. „თვითონაც მწამდა, ახლა კიდევ ერთხელ დავრწუნდი, რომ მასწავლებლობაზე დიდი არაფერი არ არსებობს. ადამიანის სულს აყალიბებს პედაგოგი. რა შესანიშნავად ბრძანა პოეტმა იოსებ ნონეშვილმა: „ქვეყნად ბელადიც არა ყოფილა, მასწავლებელი რომ არა ჰყოლოდა.“ რამდენი შესანიშნავი ადამიანის ჩამოყალიბებაში მიდევს წილი. ამაზე მეტი სიმდიდრე არც არსებობს, ალბათ, ქვეყნად. კიდევ

ერთხელ მაღლობა ყველაფრისთვის“, – ასე დაამთავრა სათქმელი იუბილარმა ვეტერანმა.¹

სახეიმო განწყობას კიდევ უფრო მეტ ელფერს აძლევდა მასწავლებლისადმი მიძღვნილი ლექსები, რომელსაც კითხულობდნენ მოსწავლეები, გზადაგზა სრულდებოდა კარგად მომზადებული და მოხდენილად ჩართული მხატვრული ნომრები.

იუბილარი დალოცეს, მაღლობა უთხრეს, ჯანმრთელობა და ხანგრძლივი სიცოცხლე უსურვეს და კვლავ მოეფერნენ მის **სახელზე გაშლილ სუფრასთან**, რომელსაც უსხდნენ: სკენდერ ბაჯელიძე (იუბილარი), ნიკოლოზ დუმბაძე (თამადა), ნადია ჯიბუტი, (იუბილარის დეკტორი), ვლადიმერ ბაჯელიძე (იუბილარის ძმა), არჩილ ტაკიძე (პოლიტოლოგი), აკაკი სურმანიძე (დახელოვნების ინსტიტუტის დირექტორის მოადგილე), შოთა ბოლქვაძე (თხილვანის საშუალო სკოლის დირექტორი), ვახტანგ წულუკიძე (განათლების ყოფილი მინისტრი), რამაზ სურმანიძე (იუბილარის მოყვარე, პროფესორი), მანანა აბაშიძე (ხუცუბნის საშუალო სკოლის დირექტორი), ცისკარა კაიკაციშვილი (ხუცუბნის საშუალო სკოლის მასწავლებელი), არჩილ იშხნელიძე (დახელოვნების ინსტიტუტის დირექტორი, კოლეგა), ზურაბ კომახიძე (იუბილარის თანაკურსელი), ანზორ ცეცხლაძე (აჭარის სტატისტიკის სამმართველოს უფროსი), ნოდარ ბასილიძე (იუბილარის უფროსი სიძე), ივერი მელაძე (იუბილარის უახლოესი მეგობარი, კოლეგა), გივი ხარაბაძე (მრეწველობის სამინისტროს თანამშრომელი), სერგო ჯაიანი (იუბილარის კოლეგა, მისი პირველი მასპინძელი ხიხაძირში), თემურ გოგმაჩაძე (იუბილარის თანასოფლელი, ბიოლოგიის მეცნიერებათა დოქტორი, პროფესორი), ოთარ ბაჯელიძე (იუბილარის ბიძაშვილი), შაქრო ფალავანდიშვილი (ბსუ გეოგრაფიის კათედრის გამგე, პროფესორი), თამაზ ხოზრევანიძე (სკოლის დირექტო-

¹ გაზ. „აჭარა“, 14 იანვარი, 1997 წ. გვ. 2.



რის – დიმიტრი ხოზრევანიძის შვილი), თემურ ხოზრევანიძე (ყოფილი მოსწავლის – ხუსეინის შვილი), ბესარიონ გაბაიძე (ყოფილი კოლეგის – ლევანის შვილი), ნოდარ ცეცხლაძე, გივი გაბაიძე, ლევან გაბაიძე, ამირან გაბაიძე, ბესო გაბაიძე, ვანო გაბაიძე, აკაკი გაბაიძე, აკაკი სურმანიძე, ეგნატე დუმბაძე, ლევან სურმანიძე (სტომატოლოგი), ამირან მამულაძე, ლამარა ჯაიანი, სერგო დუმბაძე, ვლადიმერ ხალვაში (ყოფილი მოსწავლეები ხიხაძირის საშუალო სკოლიდან).

საიუბილეო მისალოცი სუფრა დიდხანს გაგრძელდა, დაიღია იუბილარის, მის მიერ განვლილი გზის, სამშობლოსაქართველოს სადიდებელი, მშობლების, მასწავლებლების, მეგობრების, სიყვარულის, კაცურკაცობის, მასწავლებელ-მოსწავლეთა ურთიერთობის სადღეგრძელოები. პარალელურად, გზადაგზა ისმოდა ეროვნულ-პატრიოტული სიმღერები, იმართებოდა ცეკვები, ოხუნჯობანი. სუფრა გვიანობამდე გაგრძელდა და დიდი კმაყოფილებით დასრულდა. გამხიარულებული იუბილარი და დაფასებული მასწავლებელი ხევენა-ფერებით ბინამდე გავაცილეთ, შემდეგ ერთმანეთს დავემშვიდობეთ და ყველანი გავეშურეთ სახლებისკენ. საზეიმო ღონისძიება, მისი დამამშვენებელი და დამაგვირგვინებელი საღამო-ვახშამი საინტერესო და დაუვიწყარ დღედ იქცა, რაც მასწავლებელ-მოსწავლეთა ურთიერთობაში შთამბეჭდავ და ისტორიულ ფურცლად დარჩება თითოეული მათგანის ხსოვნაში.

მკითხველს ვთხოვთ, ეს წიგნი დამსახურებულ აღმზრდელ-მასწავლებელზე არ ჩათვალოს მოსწავლეთა მიერ მასწავლებლის უბრალო ქებად. ბატონი სკენდერი ნამდვილად იმსახურებდა ამგვარ დამოკიდებულებას, საიუბილეო საღამოზე გამომსვლელთა კონტინგენტი, დიდი პათოსითა და სიყვარულით საესე მისაღმებები, მისი ამაგის დამფასებლებით გაჭვდილი დარბაზი აშკარად მეტყველებდა იუბილარის მაღალ ღირსებასა და დამსახურებაზე.

აჭარის ასსრ უმაღლესი საბჭოს პრეზიდიუმის 1973 წლის 11 იანვრის ბრძანებულებით, სკენდერ ხუსეინის ძე ბაჯელიძეს ხანგრძლივი და ნაყოფიერი მოღვაწეობისათვის მიენიჭა აჭარის ასსრ სკოლის დამსახურებული მასწავლებლის საპატიო წოდება, ხოლო დაბადებიდან 75-ე წლისთავთან დაკავშირებით, აჭარის ავტონომიური რესპუბლიკის უზენაესმა საბჭომ იგი საპატიო სიგელით დააჯილდოვა. აი ისიც:

„აჭარის ავტონომიური რესპუბლიკის უზენაესი საბჭოს პრეზიდიუმის

ბ რ ძ ა ნ ე ბ უ ლ ე ბ ა

ს. ხ. ბაჯელიძის აჭარის ავტონომიური რესპუბლიკის უზენაესი საბჭოს საპატიო სიგელით დაჯილდოების შესახებ.

აჭარის ავტონომიური რესპუბლიკის უზენაესი საბჭოს პრეზიდიუმი ადგენს:

სახალხო განათლების დარგში ხანგრძლივი და ნაყოფიერი მოღვაწეობისათვის, დაბადებიდან 75-ე წლისთავთან დაკავშირებით, პენსიონერი, აჭარის დამსახურებული

მასწავლებელი

სკენდერ ხუსეინის ძე ბაჯელიძე

დაჯილდოვდეს აჭარის ავტონომიური რესპუბლიკის უზენაესი საბჭოს საპატიო სიგელით.

აჭარის ავტონომიური რესპუბლიკის უზენაესი საბჭოს თავმჯდომარე ა. აბაშიძე.

ქ. ბათუმი, 1997 წლის 27 მაისი“.

ომის ვეტერან სკენდერ ბაჯელიძეს ყურადღება არ მოკლებია ფაშიზმზე გამარჯვების საიუბილეო დღეებში, კერძოდ, 30-ე, 50-ე, მე-60 წლისთავების საზეიმო დღეებში ის დააჯილდოვეს საიუბილეო მედლებით, სამგზის (1971, 1973, 1975 წწ.) არჩეული იყო ქობულეთის რაიონის ხუცუბნის სასოფლო საბჭოს დეპუტატად. ხალხის რჩეული იყო, უყვარდათ და აფასებდნენ მას პატიოსანი, სამართლიანი და საქ-

მიანი თვისებების გამო. თავად ხალხის სიყვარული ყველაზე დიდ ჯილდოდ მიაჩნდა.



სახალხო დეპუტატის მოწმობა

ისტორიაში ცნობილი პიროვნების ნაპოლეონ ბონაპარტის სიტყვებით რომ ვთქვათ, ხელისუფლების, სარდლის თუ უბრალო მეთაურისაგან მიღებული ჯილდო მისი მატერიალური შინაარსით კი არ იზომება, არამედ ის გამოხატავს სხვადასხვა დონეზე ხელისუფალის, ხელმძღვანელის თუ მეთაურის ყურადღებას და შენი დეაქტის დაფასება-აღიარებას ოფიციალურად. ვფიქრობთ, გამგებისათვის კომენტარი ზედმეტი იქნება!

სკენდერ ბაჯელიძის დახასიათება მოცემულია აჭარის ავტონომიური რესპუბლიკის განათლების სამინისტროს კოლეგიის მასალებში, მინისტრის ბრძანებებში, ხულოსა და ქობულეთის რაიონების განათლების განყოფილებების საბჭოების სხდომების მასალებსა და გამგებების ბრძანებებში, მასზე საუბარია არაერთ გამოცემულ წიგნში.¹ არაფერს ვამ-

¹ დ. ხოზრევანიძე, სკოლა მთაში, ბათუმი, 1958; ს. დუმბაძე, აჭარის ავტონომიური რესპუბლიკა მეორე მსოფლიო ომის პერიოდში (1939-1945 წწ), ბათუმი, 2005; ნ. დუმბაძე, ს. დუმბაძე, ხიხანელი ხევისბერი, თბ., 2006; ს. დუმბაძე, სახელოვანი ხიხანელი, თბ., 2008; ი. ხალვაში, სკოლა ხიხანის ძირში, ბათუმი, 2006.

ბობთ საგაზეთო წერილებზე, რომელშიც ასახულია სკენდერ ბაჯელიძის დეაქტი.

ყოველივე ეს, ჩვენი აზრით, არის დეაქტიზაციის პედაგოგის, აჭარის დამსახურებული მასწავლებლის, ომისა და შრომის ვეტერანის სახელისა და საქმის უკვდავყოფა, მისი ხელთუქმნელი ძეგლი.

აჭარის ამაგდარი მასწავლებლის, ბატონი სკენდერ ბაჯელიძის დეაქტი და პედაგოგიური მოღვაწეობის მოკლე ანონსი მოცემულია მასწავლებელთა დახელოვნების ინსტიტუტის და საზოგადოება „მოამაგის“ გამგებების მიერ მომზადებულ ადრესებში, რომელიც წარმოდგენილია წინამდებარე წიგნის მეოთხე განყოფილებაში.

§ 10. უკანასკნელი შეხვედრა ვეტერან მასწავლებელთან



ამირან ჯაიანი
ექიმი, კარდიოლოგი
მედიცინის მეცნიერებათა
კანდიდატი

პენსიაში გასვლის შემდეგ სკენდერ მასწავლებელი ხშირად ჩამოდიოდა ქ. ბათუმში თავისი ქალიშვილის – ჟუჟუნას ოჯახში. დროის დიდ ნაწილს აქ ატარებდა. ამასთან, პერიოდულად დადიოდა კონსულტაციებზე მედიცინის მეცნიერებათა კანდიდატთან, ამირან ჯაიანთან, რესპუბლიკური საავადმყოფოს კარდიოლოგიურ განყოფილებაში. ექიმი მისი მოსწავლე იყო ხიხანის საშუალო სკოლაში. ამი-

რანს უყვარდა თავისი აღმზრდელი მასწავლებელი და დიდ პატივს სცემდა მას. იგი ზრუნავდა მასწავლებლის ჯანმრთელობაზე არა მარტო თავისი კონსულტაციებითა და მედიკამენტებით, არამედ ენთაც, ტკბილი სიტყვითა და ყურადღებით.



ომისა და შრომის
ვეტერანი
სკენდერ ბაჯელიძე

ჩვენ, მისი მოსწავლეები, სისტემატიურად ვურეკავდით სიძის – ნოდარ ბასილიძის ბინაში ტელეფონზე, მოვიკითხავდით მასწავლებლის ჯანმრთელობის მდგომარეობას, ზოგჯერ კი ვაკითხავდით პირადადაც. ჩვენთან საუბარი მხნეობას მატებდა. იმხანად თვალის ოპერაცია გაიკეთა და მხედველობა დროებით დაქვეითებული ჰქონდა, ვერ გვცნობდა, გვარჩევდა ხმით. მადლობას გვეტყოდა და დავემშვიდობებოდით. ბევრჯერ ქალიშვილი და სიძე დაგვიდგამდნენ მაგიდაზე სასმელს, დალოცვით მასწავლებელი, – გვეტყოდნენ. ისე თბილად და ტაქტიანად, რომ უარის თქმა მოგერიდებოდა, მასწავლებელი კი უხერხულობის მოსახსნელად დაგვაგალებდა. რას ვიზამდით, დავემორჩილებოდით, შევექცეოდით წარსულზე, ომზე, ქვეყანაზე, სკოლაზე საუბრით. ბოლოს, კეთილი სურვილებით დავემშვიდობებოდით და წავიდოდით.

სკენდერ მასწავლებელს არც ექიმების, არც შვილების, სიძეების თუ შვილიშვილების, ნათესავების თუ მოყვრების ყურადღება არ აკლდა. თანდათანობით ჯანმრთელობა გაუმჯობესდა, მხედველობა მოემატა, ფეხზეც წამოდგა, მაგრამ ქუჩაში მარტოდ გამოსვლას თავს არიდებდა, მოძრაობა უჭირდა. ეს ის დრო იყო, როცა ქვეყანა ფაშიზმზე გამარჯ-

ვების 60 წლისთავის აღსანიშნავად ემზადებოდა. მისმა მოწაფეებმა გადაწყვიტეს, ომის ვეტერანი მასწავლებლის კიდევ ერთხელ გახსენება დიდი საიუბილეო დღეების წინ. დაეურეკეთ ტელეფონზე, მოვიკითხეთ ჯანმრთელობა, თუ შეძლებდა ქალაქში გამოსვლას, ცოტათი გაგისეირნოთ-თქო. ეს იამოვნა. შევთანხმდით. დანიშნულ დროზე მივაკითხეთ მსუბუქი ავტომანქანით. კოსტად ჩაცმულ-დახურული, თავისი სიბერის ორიგინალური ჯოხით გამოსულიყო ეზოში – არ ვალოდინო, იჯდა და გველოდა (გამორჩეოდა პუნქტუალობითა და აკურატულობით). ეს იყო 2005 წლის 9 მაისი. გავედით ქალაქში, რევოლუციის (ამჟამად ხელოვნების) მუზეუმის სკვერში. ფოტოგრაფიც მოვიყვანეთ და გადავიღეთ სურათი ფაშიზმზე გამარჯვების 60 წლისთავის აღსანიშნავად. გაუხარდა, გახალისდა ვეტერანი, ალაპარაკდა



უკანასკნელი შეხვედრა ვეტერან მასწავლებელთან.
მარცხნიდან: სერგო დუმბაძე, სკენდერ ბაჯელიძე,
ნიკოლოზ დუმბაძე, ეგნატე დუმბაძე



ჩვენი დინჯი და სიტყვაძვირი საყვარელი მასწავლებელი. მორიდებით შევაპარეთ, სკენდერ მასწავლებლო, ამ სამახსოვრო სურათს, გამარჯვების 60 წლისთავის იუბილეს მოუხდება სასმისებით დალოცვა, რომ ძალა ჰქონდეს ჩვენს შეხვედრასო, – გავეხუმრეთ. ამასთან, ვეჭვობდით, უარს გვეტყოდა ჯანმრთელობის მდგომარეობის გამო. ჩვენდა გასახარად, დავითანხმეთ. იქვე ახლოს, სერგო ბოლქვაძის კაფე-ბარში ჩამოვჯექით. დავლოცეთ გამარჯვების 60 წლისთავი, ვეტერანები; ჩვენი მასწავლებლის თამალობით, მოვიგონეთ ომში დაღუპულები, ჯანმრთელობა და ხანგრძლივი სიცოცხლე ვუსურვეთ მას. ასე სახელდახელოდ აღვნიშნეთ ფაშიზმზე გამარჯვების 60 წლისთავი ვეტერან მასწავლებელთან ერთად. ეს აღმოჩნდა ჩვენი ბოლო შეხვედრა საყვარელ პედაგოგთან. ერთი წლის შემდეგ, გამარჯვების 61-ე წელი, მის გარეშე აღვნიშნეთ, სამაგიეროდ, მის მოსაგონებლად გაზეთ „აჭარის“ 2006 წლის 9 მაისის ნომერში მოვათავსეთ წერილი „უკანასკნელი შეხვედრა ვეტერან მასწავლებელთან“ წინაველს მასთან ერთად გადაღებული სურათით.



შეხვედრა 60 წლისთავზე, ბათუმი, 2005 წ. 9 მაისი
ამირან გაბაიძე, სკენდერ ბაჯელიძე, ეგნატე ღუმბაძე

„ზუსტად ერთი წლის წინათ, 2005 წლის 9 მაისს, ფაშიზმზე გამარჯვების მესამოცე წლისთავს ყოფილი თანაკლასელები, მეგობრები: ამირან გაბაიძე, ნიკოლოზ, ეგნატე და სერგო ღუმბაძეები შევხვდით ჩვენს აღმზრდელ პედაგოგს, ომის ვეტერანს, აჭარის ავტონომიური რესპუბლიკის დამსახურებულ მასწავლებელს სკენდერ ბაჯელიძეს. გამარჯვების საიუბილეო წლის აღსანიშნავად, სურათებიც კი გადავიღეთ და ვაჩუქეთ მას. მიუხედავად ხანდაზმულობისა და შეუძლოდ ყოფნისა, ბატონი სკენდერი ჩვენთან ერთად სუფრასთან დაჯდა. ცოტა ღვინოსაც შეეპარა, გახალისდა, მოიგონა თავისი ბავშვობა, სწავლის წლები, ამაგდარი პედაგოგები, ფაშიზმის წინააღმდეგ ბრძოლის დროს გამოვლილი მძიმე დღეები. სკენდერ ბაჯელიძე ომის დაწყების დღიდანვე მამაცურად ებრძოდა მტერს. ორდენები და მედლები დაიმსახურა, მაგრამ, სამწუხაროდ, ბედმა ომის დროს ტყვეობაც არგუნა – პრუსიის, პოლონეთის საკონცენტრაციო ბანაკებში. ტყვეობიდან თავდახსნის შემდეგ, ე. წ. „საფილტრაციო ბანაკში“ დაკითხეს, შეამოწმეს და კვლავ გაამწესეს ჯარში სამსახურისთვის. იგი დემობილიზებულ იქნა 1946 წელს.

მან სიხარულით მოიგონა ომის შემდგომ უმაღლეს სასწავლებელში გატარებული პერიოდი, ნაყოფიერი პედაგოგიური მოღვაწეობა ხულოს რაიონის ხისაძირის საშუალო სკოლაში, სადაც 1952 წლიდან 1959 წლამდე იღვაწა. შემდეგ ქობულეთის რაიონის სკოლებში, ჯერ ჩაისუბანში და ბოლოს მშობლიურ ხუცუბანში მუშაობდა.

სუფრასთან მან სიამაყით ისიც გვითხრა, რომ ყველაზე დიდ ჯილდოდ, ჩემი 75-ე წლისთავის გამო, 1996 წელს, ბათუმში თქვენი, ჩემი მადლიერი აღზრდილების მიერ მოწოდებული შეხვედრა მიმანიაო.

ჩვენ, მის ყოფილ მოსწავლეებს, კარგად გვახსოვს ისიც, რომ მაშინ, მას, სხვებთან ერთად, საკუთარი ლექსით



**§11. ვეტერანი მასწავლებელი ემზადებოდა
85 წლისთავის აღსანიშნავად, მაგრამ...**

მიესალმა ყოფილი მოსწავლე, იურიდიულ მეცნიერებათა კანდიდატი, დოცენტი ვანო გაბაიძე:

„ღმერთმა გაცოცხლოთ, ბატონო სკენდერ, კარგად შეგვარგეთ გამთბარი გრძნობა“.

(ლექსის სრული ტექსტი იხილეთ შემდეგ განყოფილებაში)

ემზადებოდით მასწავლებლის 85-ე წლისთავის აღსანიშნავად, მაგრამ... ფაშიზმზე გამარჯვების 60 წლისთავის აღნიშვნა, მასთან ყოფნა და საუბარი, სამწუხაროდ, უკანასკნელი აღმოჩნდა.

წავიდა ჩვენგან სამშობლოსათვის თავდადებული, შრომითა და საქმით გამორჩეული, საუკეთესო ადამიანური თვისებებით შემკული მამულიშვილი.

რაოდენ გულდასაწყვეტია, რომ დღეს, ფაშიზმზე გამარჯვების სამოცდამეერთე წლისთავს ჩვენ სკენდერ ბაჯელიძესთან ერთად ვერ ვხვდებით, თუმცა მისი სიცოცხლე და საქმე დაუვიწყარი იქნება ჩვენთვის, მისი აღზრდილებისათვის.

თქვენი ომახიანი ხმა, ღინჯი, დამაჯერებელი და თბილი საუბარი, ლოგიკური მსჯელობა, აზრთა წყობა ანთებულ ლამპრად დარჩება აღზრდილთა მეხსიერებაში, ძვირფასო სკენდერ მასწავლებლო!

მოსწავლეთა ჯგუფი“

(ვაზ. „აჭარა“, № 83, სამშაბათი, 9 მაისი, 2006. ვვ. 9).

ადამიანის ცხოვრება იყოფა ორ პერიოდად: აღმავალი (სიცოცხლის პირველი ნახევარი) და დაღმავალი (სიცოცხლის მეორე ნახევარი). პერიოდებს კონკრეტული წლების დასახელებით ვერ განვსაზღვრავთ, ეს ადამიანის სიცოცხლის დასრულებამდე შეუძლებელია. წლებით განსაზღვრა თუ დადგენა ხდება კონკრეტულ პიროვნებებზე მხოლოდ გარდაცვალების შემდეგ.

ასეა ყველა ადამიანის და მათ შორის, სკენდერ ბაჯელიძის მიმართაც.

სკენდერ მასწავლებლის ცხოვრებაც გრძელდებოდა, მის დღეებს ემატებოდა დღეები, კვირებს – კვირები, წლებს – წლები. ეს იყო მისი სიცოცხლის აღმავალი ხანა. შემდეგ დადგა მეორე, დაღმავალი პერიოდი, როცა მის სიცოცხლეს აკლდებოდა წლები, თვეები... ჩვენ, მის ირგვლივ თუ გარშემო მყოფნი, შინაური თუ გარეშენი, ვგრძნობდით ამას, ვამხნევებდით, ხან იუბილის აღნიშვნით, ხან სიგელით, ხიხადირში კურსდამთავრებულთა არაერთ შეხვედრაზე მოწვევით, საგაზეთო წერილებით, მის შესახებ წიგნებში წერით, სხვა ჯილდოებით, მასთან შეხვედრებით, ტკბილი საუბრებით, წარსულის გახსენებით... ვეტერანს განსაკუთრებით აინტერესებდა და ემზადებოდა კიდევაც დაბადებიდან 85 და ფაშიზმზე გამარჯვების 60 წლისთავების აღსანიშნავად. ჩვენც, ყოფილი მოწაფეები, ამჟამად მეგობრები, ოჯახი, შინაურები საიუბილეო თადარიგს ვიჭერდით, მაგრამ, სამწუხაროდ, იგი მოულოდნელად გარდაიცვალა.

ადამიანებმა კარგად უნდა გავაცნობიეროთ, რომ სიცოცხლე სიკვდილით მთავრდება და ფასდება იმის მიხედვით, თუ რა კვალი დატოვა საიქიოსკენ მიმავალმა სააქაოში, ამქვეყანაზე.



დიდი ილია ბრძანებდა, „კაცს ორი სახელი უნდა ჰქონდეს, ერთი აქ დასარჩენი, მეორე კი თან წასაყოლიო“. ილიას ამ ბრძანულ სენტენციას აგრძელებს დიდი ქართველი მწერალი და ჰუმანისტი ნოდარ დუმბაძე, როდესაც ამბობს, რომ „ის მეორე, თანწასაყოლი სახელი ჩვენმა მადლიერმა შვილებმა უნდა დაგვაწერონ საფლავის ქვაზე, ოღონდ ის სახელი ჭეშმარიტი უნდა იყოს, რადგან მოგონილი სახელი კაცს არც იქ და არც აქ არ გამოადგება.“¹ ადამიანი სიკვდილის შემდეგ ფიზიკურად კვდება, გადაინაცვლებს ამქვეყნიდან იმქვეყნად, რომელსაც ქართველმა კაცმა, „მუდმივი სასუფეველი“ უწოდა და თუ წასაყოლი სახელი ჭეშმარიტია, ასეთ კაცზე „მოკვდა“-ს ნაცვლად იტყვიან – „გარდაიცვალა“-ო. ეს სიტყვა იხმარება ადამიანის კეთილშობილებისა და მისდამი საზოგადოების პატივისცემის გამოსახატავად. ადამიანი იმდენად უნდა გაისარჯოს, რომ ამალდეს „გარდაცვალების“ დონეზე. ამ გამოთქმებში განსხვავებული შინაარსია ჩაქსოვილი. ეს იქიდანაც ჩანს, რომ სიკვდილის შემდეგ ავი, ბოროტი ადამიანის აუგად მოხსენებისთვის იტყვიან: „სასიკვდილე იყო, ან „ღმერთმა მიასიკვდილაო“. კეთილშობილ, ღირსეულ პიროვნებაზე კი იტყვიან: „საწყალო, გარდაიცვალა“, „ღმერთმა ნათელში ამყოფოს მისი სული“ და ა. შ.

სკენდერ მასწავლებელი იყო სწორედ კეთილშობილი პიროვნება, ღირსეული მოქალაქე. მთელი თავისი ცხოვრება უანგაროდ ემსახურა სამშობლოს, ახალგაზრდობის სწავლა-აღზრდის საქვეყნო საქმეს, მისი სიტყვებით თუ ვიტყვით, „ადამიანების პიროვნებად ჩამოყალიბებას“. დიდი და ნათელი კვალი დატოვა ამ ქვეყანაში: ლამაზი ოჯახი, კარგად გაზრდილი შვილები და შვილშვილები, ჰყავდა გამორჩეული, კაცთმოყვარე ძმები, დედ-მამისშვილები, მოყვრები,

¹ ნ. დუმბაძე, შთაბეჭდილებები, წერილები, გამოსვლები, თბ., 1984, გვ. 102.

ნათესაობა, ასეულობით პიროვნებად ჩამოყალიბებული მოწაფე. მის აღზრდილთა შორის არიან პედაგოგები, ექიმები, ინჟინრები, იურისტები, ეკონომისტები, ტექნოლოგები, ჟურნალისტები, პოეტები, მწერლები. მეუღლის დაკარგვით გამოწვეულ მწუხარებას იმსუბუქებდა (თუ ეს შეიძლება საერთოდ) ახლობლების თანადგომით, თავისი ნაამაგართ, მიღწეული შედეგებით, დანატოვარი მექვიდრეობით, აღზრდილებით.

სიცოცხლის ბოლო დღეებში მოულოდნელად სთხოვა ქალიშვილს და სიძეს – ჟუჟუნას და ნოდარს – ბათუმიდან ქობულეთში წაეყვანათ, მეორე ქალიშვილთან, ეთერთან (როგორც ჩანს, თავად გრძნობდა თავის აღსასრულს და უნდოდა მშობლიურ სოფელში ყოფნა). ეს სურვილი შეუსრულეს შვილებმა, ნათესაობამ.

ქალბატონი ეთერი თავს ევლებოდა მამას, ექიმი და წამალი არ დაუკლიათ მისთვის შვილებს, შვილიშვილებს და ნათესაობას, მაგრამ უშედეგოდ. ის მთლიანად დაიხარჯა, მისი სიცოცხლის აღსასრულის წუთები დადგა.

§12. ყველამ გულით დაიტირა იგი

*ვერ დაიტირავს სიკვდილსა
გზა ვიწრო, ვერცა კლდოვანი.
შოთა რუსთაველი*

2005 წლის 28 ივლისს გარდაიცვალა შვილების საყვარელი მამა, შვილიშვილების მოსიყვარულე ბაბუა, ნათესაობის საუკეთესო წარმომადგენელი, აჭარის დამსახურებული მასწავლებელი, დიდი სამამულო ომის ვეტერანი, დვაწლმოსილი პედაგოგი სკენდერ ხუსეინის ძე ბაჯელიძე. ორი სახელი ჰქონდა სკენდერ მასწავლებელს. ერთი სახელი თან გაჰყვა საიქიოში – „კეთილშობილი“, „კარგი კაცი“, მეორე,

ნოდარ დუმბაძის თქმით, ჭეშმარიტი სახელი კი აქ, სააქაო-ში, ამქვეყნად დარჩა. სკენდერ ბაჯელიძის კაიკაცობა, მის-დამი უზომო სიყვარული ნათლად გამოჩნდა მასთან გამ-ოთხოვების დღეებში. დიდებულ ადამიანს მისტიროდნენ არა მარტო ოჯახი, ნათესაობა, ხუცუბანი და ქობულეთი, არამედ აჭარის რაიონები, სხვადასხვა ქალაქიდან – თბილისიდან, გორიდან, ქუთაისიდან, ბათუმიდან მოსული მეგობრები, მოსწავლეები, ნაცნობები, სტუმრები. დიდი ხალხმრავლობა იყო, დადგა უკანასკნელ გზაზე გაცილების ჟამი. საცხ-ოვრებელი სახლის წინ, ფართო ეზოში მოეწყო მისი დაკრ-ძალვისადმი მიძღვნილი ხალხმრავალი სამგლოვიარო მიტ-ინგი. უკანასკნელი გზა დაულოცეს მართლაც დალოცვილ კაცს და ნათელში ყოფნა უსურვეს მუდმივ სასუფეველში.

მიტინგის დასრულების შემდეგ, ხალხმრავალი სამგლო-ვიარო პროცესია გაემართა ბაჯელიძეთა საგვარეულო სას-აფლაოსკენ, სადაც საკუთარი ხელით მომზადებული ორიგინალური საფლავი დახვდა მეუღლე დურიკოს გვერდით. იქვე ახლოს განისვენებენ სკენდერ ბაჯელიძის მშობლები – ქალბატონი მერიემი და ბატონი ხუსეინი, საქვეყნოდ სახელ-მოსხვეტილი ძმა, ყველასთვის საყვარელი და სათაყვანებელი პიროვნება ვლადიმერ ბაჯელიძე, სკენდერ მასწავლებლის ბიძა ასლან ბაჯელიძე, ბიძაშვილი ალი (ალექსანდრე) ბა-ჯელიძე და ბაჯელიძეთა გვარის სხვა წარმომადგენლები.

ღმერთმა გაცხონოს, სკენდერ მასწავლებლო, ჩვენო საყვარელო აღმზრდელო!

ჩვენ, სანამ სული გვიდგას, არ დაგივიწყებთ, მოვალთ საფლავთან, მოგეფერებით, ყვავილებს გაჩუქებთ...



ბაჯელიძეთა საგვარეულო სასაფლაო



სკენდერ და დურიე ბაჯელიძეების საფლავი



ეს საფლავი, შენი შთამომავლობა, დატოვებული ჭეშმარიტი სახელი, გაკეთებული რეალური საქმე, და ეს წიგნი – შენი ძეგლი იქნება აწ და მარადის, უკუნითი უკუნისამდე, სკენდერ მასწავლებლო. შენმა აღზრდილებმა, რაც შეგძელით, გავაკეთეთ თქვენდა გასახარად. თუ რაიმე დაგაკელით, გვჯერა, შენი დიდი სული გვაპატიებს. საბოლოოდ გპირდებით: მაღლიერებით მოგიგონებთ ყოველთვის, სანამ სული გვიდგას. თქვენი და სხვა მასწავლებლების ნათელი ხსოვნა წარუშლელი იქნება ჩვენს გულებში.

სკენდერ ბაჯელიძის გარდაცვალების შესახებ ინფორმაცია-განცხადებები და ნეკროლოგები გამოქვეყნდა სხვადასხვა გაზეთში.

* * *

სკენდერ ბაჯელიძე
(ნეკროლოგი)

გარდაიცვალა ომისა და შრომის ვეტერანი, აჭარის ავტონომიური რესპუბლიკის სკოლის დამსახურებული მასწავლებელი სკენდერ ხუსეინის ძე ბაჯელიძე.

დაიბადა 1921 წელს ქობულეთის რაიონის სოფელ ხუცუბანში.

1938 წელს დაამთავრა სოფლის საშუალო სკოლა. ბათუმის №1 პედაგოგიური სასწავლებლის დასრულებისთანავე, ქვეყანა სამამულო ომის ქარცეცხლში გაეხვია და ისიც სამშობლოს დამცველთა რიგებში ჩადგა.

ბედმა ომის წლებში ტყვეობა არგუნა – პრუსიის, პოლონეთის საკონცენტრაციო ბანაკებში, შემდეგ მოხვდა დანიის კუნძულ რედბუხეზე, ქალაქ ოდენზეში. ტყვეობიდან თავ-

დახსნილს მოუწია ე. წ. „საფილტრაციო“ ბანაკში დაკითხვა-შემოწმება და კვლავ დააბრუნეს საბჭოთა არმიის რიგებში, საიდანაც მხოლოდ 1946 წელს დაბრუნდა.

ბათუმის შოთა რუსთაველის სახელობის სახელმწიფო პედაგოგიური ინსტიტუტის გეოგრაფიის ფაკულტეტის დამთავრების შემდეგ, 1952 წელს, სამუშაოდ ხულოს რაიონის საზღვრისპირა სოფელ ხიხაძირის საშუალო სკოლაში გაამწესეს.

ახალგაზრდა პედაგოგმა იმთავითვე მოიპოვა სიყვარული და პატივისცემა პედაგოგიურ კოლექტივში, მოსწავლე ახალგაზრდობაში, მალე დააწინაურეს კიდევ სასწავლო ნაწილის გამგედ.

1959 წელს სამუშაოდ გადავიდა თავისსავე რაიონში. ჯერ მოღვაწეობდა ჩაისუბნის სკოლა-ინტერნატში, შემდეგ, 1976 წლიდან, ხუცუბნის საშუალო სკოლაში გეოგრაფიის მასწავლებლად და ორგანიზატორად.

სკენდერ ბაჯელიძეს დაუფასდა დეაწლი: მას 1973 წელს მიენიჭა აჭარის დამსახურებული მასწავლებლის საპატიო წოდება. დაჯილდოებული იყო საბრძოლო დიდების ორდენით, მედლებითა და ავტონომიური რესპუბლიკის უმაღლესი საბჭოს საპატიო სიგელით.

იგი ჩვეული სიამაყით შეხვდა ფაშიზმზე გამარჯვების 60 წლისთავს და დაღუპულთა შესანდობარი წარმოთქვა.

1996 წლის 6 დეკემბერს, ბათუმის მასწავლებელთა დახელოვნების ინსტიტუტმა, დავით მამულაძის საქველმოქმედო საზოგადოება „მოამაგემ“ და ხიხაძირის საშუალო სკოლის კურსდამთავრებულებმა პატივი მიაგეს სკენდერ მასწავლებელს – აჭარის განათლებისა და კულტურის მუზეუმში საზეიმოდ აღნიშნეს მისი დაბადებიდან 75 წლისთავი.

წავიდა ჩვენგან სამშობლოსათვის თავდადებული, შრომითა და საქმით გამორჩეული, საუკეთესო ადამიანური თვისებებით შემკული მამულიშვილი.



სკენდერ ბაჯელიძის სახე და სახელი დაუვიწყარი იქნება კოლეგების, ნათესავ-მეგობრებისა და აღზრდილთა ხსოვნაში.

აჭარის ავტონომიური რესპუბლიკის განათლების, კულტურისა და სპორტის სამინისტრო; აჭარის ომის, შრომისა და სამხედრო ძალების ვეტერანთა რესპუბლიკური საბჭო; დავით მამულაძის სახელობის საზოგადოება „მოამაგე“.
გაზ. „აჭარა“ 108.2005 წ.

* * *

ნეკროლოგის ტექსტი გამოქვეყნდა გაზეთ „ხულოს“ ფურცლებზეც. ნეკროლოგს ხელს აწერენ: ხულოს რაიონის გამგეობა; დავით მამულაძის სახელობის საზოგადოება „მოამაგე“; ხულოს განათლების, კულტურისა და სპორტის განყოფილება, ხიხაძირის შოთა რუსთაველის სახელობის საშუალო სკოლა.

გაზ. „ხულო“, 26-27, 8.08.2005.

* * *

გაზეთ „ბათუმელებში“ ყოფილი მოსწავლეების სახელით გამოქვეყნდა სამძიმრის განცხადება.

სკენდერ ბაჯელიძე

ღრმა მწუხარება დაგვეუფლა ჩვენი აღმზრდელ-მასწავლებლის, ომის და შრომის ვეტერანის, აჭარის ავტონომიური რესპუბლიკის დამსახურებული მასწავლებლის, ბატონ სკენდერ ბაჯელიძის გარდაცვალების გამო.

დიდია ბატონ სკენდერის ამაგი ხიხაძირელი ახალგაზრდების მიმართ, ამიტომაც მშობელივით გვიყვარდა იგი, ყოველთვის გვიხაროდა მასთან შეხვედრა და მისი ალერსი, ამიტომაც ცხარე ცრემლებით დავტირით მის გარდაცვალებას.

ნიკოლოზ დუმბაძე, სერგო დუმბაძე.
გაზ. „ბათუმელები“, №26, 6-13 ივლისი, 2005 წ. გვ. 8

ბატონი სკენდერ ბაჯელიძის გარდაცვალების გამო გაზეთების მეშვეობით ოჯახს სამძიმარი გამოუცხადეს ახლობლებმა, კოლეგებმა, მეგობრებმა, ქობულეთისა და ხულოს რაიონების ხელმძღვანელობამ.

ასე დასრულდა სკენდერ მასწავლებლის სააქაო ცხოვრება და დაიწყო მუდმივი, საიქიო ცხოვრების პერიოდი. მშვიდად იძინეთ სასუფეველში, ბატონო სკენდერ.

მოსამე განყოფილება

ხიხაძის რა დამაგვიწყებს

*სამშობლოს და ხალხის
სიყვარული უბერებელია*

„თითქმის ნახევარი საუკუნე გავიდა მას შემდეგ, რაც მე 1959 წელს დავემშვიდობე ხიხაძის საშუალო სკოლას, მოსწავლე ახალგაზრდობასა და გულაღალ მოსახლეობას, მაგრამ აქ გატარებული შრომისა და ცხოვრების წლები სამუდამოდ შემორჩა ჩემს მესსიერებას.



ხიხაძის საშუალო სკოლის განახლებული შენობა

საკმაოდ მძიმე და ფათერაკებით აღსავსე იყო ჩემი ცხოვრების გზა. ვერ ვიტყვი, რომ ჩემს ოჯახს უჭირდა მაშინ, როცა მე ვიზრდებოდი. დავამთავრე ხუცუბნის საშუალო სკოლა და ბათუმის პედაგოგიური სასწავლებელი, მაგრამ შემდეგ დიდი ტანჯვა და წამება გადამხდა სამამულო ომში ბრძოლის დროს. ბედმა გატანჯულს ტყვეობაც

მარგუნა და მოვხვდი პრუსიასა და პოლონეთში, საიდანაც გადმომიყვანეს დანიის კუნძულ რედუზუზე, ქალაქ ოდენზეში... ტყვეობიდან დაბრუნების შემდეგ ე. წ. „საფილტრაციო“ ბანაკში გავიარე დაკითხვა-შემოწმება და შემდეგ კვლავ ჩამრიცხეს საბჭოთა არმიის რიგებში, საიდანაც მხოლოდ 1946 წელს ვიქენი დემობილიზებული. ცოტაოდენი დასვენების, სულიერი სიმშვიდის დაუფლების შემდეგ, მისაღები გამოცდები ჩავაბარე და 1948 წელს ჩავირიცხე ბათუმის შოთა რუსთაველის სახელობის სახელმწიფო პედაგოგიური ინსტიტუტის (ამჟამად უნივერსიტეტი) გეოგრაფიის ფაკულტეტზე. 1952 წელს, ინსტიტუტის დამთავრებისთანავე, სამუშაოდ ხულოს რაიონის ხიხაძის საშუალო სკოლაში გამამწესეს. ეს ჩემთვის ძნელი საქმე იყო, საგონებელში ჩავვარდი, როგორ მემუშავა ჩემთვის უცნობ ადგილას, ანდა, განა მქონდა საამისოდ შინაგანი ხალისი თუ განწყობა? მაგრამ კვლავაც იმპლავრა ჩემში პატრიოტულმა გრძობამ, პედაგოგის მოწოდებამ: ემსახურე შენს ხალხს, შენს ქვეყანას. როგორც ჩავედი ამ საზღვრისპირა სოფელში, მაშინათვე ვიგრძენი ცხოვრების სიძნელე – საპასპორტო რეჟიმი, მესაზღვრეთა კონტროლი, რაც მზარავდა ტყვეობაში ნამყოფ კაცს. სოფელსაც ომის მძიმე კვალი აჩნდა, ჭირდა ცხოვრება. სკოლაში ადგილობრივი მასწავლებლები მხოლოდ დაწყებით კლასებში იყვნენ, ძირითადად საქართველოს სხვადასხვა კუთხიდან მოვლინებული ახალბედა მასწავლებლები მუშაობდნენ, რომელთაც მძიმე პირობებში უხდებოდათ მუშაობა.

ხიხაძერში მისვლისთანავე ვიგრძენი მთავარი, რაც ჩემთვის ესოდენ გამამხნეველებელი და საჭირო იყო: მოსახლეობის ყურადღება, სითბო და სიყვარული. საცხოვრებელი ბინაც უკეთილშობილესი ადამიანის, გულიანი კაცის ოსმან გაბაიძის სახლში დავიდე.



ჩემი მუშაობის პერიოდში, დირექტორის ძალისხმევით, შეიქმნა პროფესიონალი სპეციალისტების ერთად შეკრული პედაგოგიური კოლექტივი, რომელშიც შერწყმული იყო ადგილობრივი და მოწვეული სპეციალისტების ინტერესები. მთავარი ყურადღება გადატანილი გვექონდა სასწავლო-სააღმზრდელო პროცესის სწორად წარმართვაზე, პედაგოგთა ცოდნის, გამოცდილების მიზნობრივად გამოყენებაზე, მასწავლებელთა შრომისა და ცხოვრების ნორმალური პირობების შექმნაზე.

ამ სკოლის ისტორიაზე, იმის როლისა და მნიშვნელობის გაშუქებაზე, ვფიქრობ, ფართოდ იქნება სხვათა მოგონებებში, ამიტომ მე მხოლოდ ზოგიერთ შტრიხზე ვაგამახვილებ ყურადღებას.

მაინც რას გამოვყოფდი ხიხაძის საშუალო სკოლაში ჩემი მუშაობის პერიოდიდან?

პირველი. მოსახლეობის, მშობელთა ინტერესი და ყურადღება სწავლისადმი და, ამდენად, თანადგომა და ზრუნვა მოზარდთა სწავლა-აღზრდისადმი, მასწავლებლის ღირსებისა და ავტორიტეტის დაცვისადმი.

მეორე. მოსწავლე-ახალგაზრდობის ხალასი ნიჭიერება, მონდომება და სწრაფვა ცოდნის, განათლების მისაღებად. ამ მდგომარეობას ისიც აძლიერებდა, რომ რაიონში ბევრი არ იყო საშუალო სკოლა. პირველ ხანებში ხიხაძის საშუალო სკოლა ერთადერთი იყო სხალთა-ხიხანის ხეობაში, შუახევის რაიონში კი ახალად იხსნებოდა საშუალო სკოლები. ამიტომ აქ სასწავლებლად მოდიოდნენ შუახევის რაიონის მარეთის, საკუთრივ სხალთა-ხიხანის ხეობების რვაკლასიან-თავრებული მოსწავლეები. 1953 წელს მეცხრე კლასში თითქმის 60-ზე მეტი მოსწავლე ჩაირიცხა და ამიტომ ორი პარალელური მეცხრე კლასი შეიქმნა.



მარცხნიდან: სკენდერ ბაჯელიძე, ოთარ ოჩიგავა, გივი თოდრია

მესამე. სკოლაში შეიქმნა მართლაც სანიმუშო, მაღალკვალიფიციური, დიდი პასუხისმგებლობის მქონე პედაგოგთა ერთიანი ოჯახი, რომლის უპირველესი მიზანი ახალგაზრდობის სწავლა-აღზრდა, ნამდვილ მოქალაქეებად ჩამოყალიბება იყო. თავიანთი აკადემიური დონე, მუშაობის დიდი გამოცდილება გამოიყენეს ჩემმა კოლეგებმა, რომლებმაც შემდგომში რესპუბლიკის სხვადასხვა რაიონსა და ქალაქშიც ნაყოფიერად იღვაწეს. აბა, ვის დაავიწყდება ხიხაძერში გამობრძმედილი სახელოვანი პედაგოგები, როგორებიც იყვნენ: როლანდ ბოლქვაძე, ვეგენია კუზმინა, გიორგი სირაბიძე, ოთარ ოჩიგავა, თალიკო რუსიეშვილი, დავით ღლონტი, ლიანა ბარამიძე, გივი თოდრია, ანა ალფაიძე, დავით გოგოძე, რევაზ ბერაძე, ასლან ხახუტაიშვილი, არჩილ იშხნელიძე, სერგო ჯაიანი, იოსებ აბაშიძე და სხვები. საგულისხმოა, რომ ბევრმა მათგანმა (ასლან ხახუტაიშვილი, რევაზ ბერაძე, იოსებ აბაშიძე) შემდგომში სამეცნიერო ხარისხი მოიპოვეს და მეცნიერულ მოღვაწეობას შეუდგნენ, უმრავლესობას საქართველოს და აჭარის დამსახურებული პედაგოგის საპატიო წოდებები მიენიჭათ (ს. ჯაიანი, ა. იშხნელიძე, ა. ალფაიძე, რ. ბოლქვაძე, დ. ღლონტი, გ. სირაბიძე, გ. თოდრია).

მჯერა, რომ ხიხაძერი არ დაივიწყებს ამ პედაგოგთა და სხვათა უმწიკვლო, პატიოსან შრომას და დიდ ამავს თავის მკვიდრთა წინაშე.



მეოთხე. ჩვენ, ხიხაძირელი პედაგოგები, ვგრძნობდით რესპუბლიკის, რაიონის ხელმძღვანელობის მუდმივ ყურადღებას, ჩვენი მუშაობის სათანადოდ დაფასებასა და აღიარებას, რასაც დიდი მნიშვნელობა ჰქონდა თითოეული ჩვენგანისათვის.

მეხუთე და მთავარი ის იყო, რომ სკოლას ჰყავდა გამოცდილი, თავის საქმეზე შეყვარებული პედაგოგი, დაუღალავი და ენერგიული, დიდი პასუხისმგებლობის მქონე დირექტორი დიმიტრი ხოზრევანიძე. მისი ხელმძღვანელობით ყოველწლიურად უმჯობესდებოდა სასწავლო-სააღმზრდელო პროცესი, სკოლის, სასკოლო ინტერნატის მატერიალურ-ტექნიკური ბაზა. იგი დიდ დახმარებას უწევდა ახალბედა პედაგოგებს დაოსტატებაში, შეუღარებელი უნარი და ტაქტი გააჩნდა მოსწავლეთა მშობლებთან ურთიერთობაში, სოფლის აქტივთან თანამშრომლობაში. ამიტომაც იყო, რომ ბევრჯერ განათლების სამინისტროს, რაიონის განყოფილებას სკოლის მუშაობის შესწავლის შედეგები განუზოგადოებიათ და დადებითი შეფასება მიუციათ ყოველთვის. დავსძენ, რომ ხიხაძირში ჩემი შეიდწლიანი მოღვაწეობის შემდეგ სხვადასხვა სკოლაში მომიხდა მუშაობა, მაგრამ მათი შედეგებაც არ შეიძლება ხიხაძირის საშუალო სკოლასთან.



დავით მამულაძე – აჭარის პირველი ადგილობრივი ხელმძღვანელი (1910-1981)

ჩემი ხიხაძირში მუშაობა მინდა გავისსენო სხვა მხრივაც. ჩვენი სკოლა, აჭარის მაშინდელი თავკაცის, დიდი პიროვნების **დავით მამულაძის** მუდმივი ყურადღების ქვეშ იყო. მას ახარებდა ჩვენი სკოლის წარმატებები, ხშირადც გვსტუმრობდა, ეცნობდა ჩვენს მუშაობას. ერთ-ერთი სტურობის დროს იგი სკოლაში მოვიდა

ხულოს რაიკომის პირველი მდივნის ალექსანდრე ქონიაძისა და რაიადმასკომის თავმჯდომარის სიმონ ბერიძის თანხლებით. ბატონი დავითი შეხვდა პედკოლექტივს, შეგვაქოკარგი მუშაობისთვის, მადლობა გადაუხადა სკოლის დირექტორს, პედგოგებს წარმატებითი მუშაობისთვის და გვესაუბრა სამომავლო ამოცანებზე. წასვლისას ბატონმა დავითმა ჰკითხა სკოლის დირექტორს რაიმე დახმარება ხომ არ გჭირდებოდათ.



სკენდერ ბაჯელიძის საცხოვრებელი სახლი სოფელ ხუცუბანში

ამ დროს მამაჩემი სოფელ ხუცუბანში ჩემთვის საცხოვრებელ სახლს აშენებდა. ჭირდა სამშენებლო მასალების, განსაკუთრებით, ცემენტის შეძენა. დირექტორს გამოვეუტყდი და ვუთხარი: რა იქნება, ბატონ დავითს ვთხოვოთ დახმარება ცემენტის გამოყოფაში-მეთქი, სწორედ დამშვიდობებისას სკოლის დირექტორმა მადლობა გადაუხადა ბატონ დავითს და თანაც უთხრა: – ჩემს მოადგილეს, ომის მონაწილეს სკენდერ ბაჯელიძეს საცხოვრებელი სახლის ასაშენებლად ცემენტი ესაჭიროება და დახმარებასაც მხოლოდ ამ საკითხის მოგვარებაში ვთხოვოთ. მან სიამოვნებით გამომართვა განცხადება, ჩაიდო ჯიბეში და შეგვპირდა დახმარებას.



**ვლადიმერ ბაჯელიძის საცხოვრებელი სახლი
სოფელ ხუცუბანში**



**ქესკინ ბაჯელიძის საცხოვრებელი სახლი
სოფელ ხუცუბანში**

მაღე გამომიძახეს აჭარკოოპკავშირში და გამომიყვეს საჭირო რაოდენობის ცემენტი და საზაფხულო არდადეგების პერიოდში მოვახერხე საცხოვრებელი სახლის აშენება და მსურს აქვე დიდი კმაყოფილებით მადლობა ვუთხრა ჩემთვის გაწეული დახმარებისათვის ამ უაღრესად ჰუმანურ ადამიანებს.

ბევრი რამის გახსენება შემიძლია ხიხაძის საშუალო სკოლის შესახებ. დაე, ბევრი სხვებმაც თქვან, მაგრამ, მაინც მთავარი – მსურს გამოვხატო დიდი მადლობა ჩემი ხიხა-



**ხიხაძის საშუალო სკოლის კურსდამთავრებულთა შეხვედრა
30 წლის შემდეგ**

ძირელების მიმართ. ამას რომ ვამბობ, რა თქმა უნდა, მხედველობაში მაქვს მაშინდელი სასოფლო საბჭოში შემავალი სოფლები: ვერნები, რაჭვთა, ფუშრუკაული, კალოთა, სკვანა, თხილვანა, ბაკო, საკუთრივ ხიხაძირი, მისი მცხოვრებლები და ახალგაზრდები. დღესაც თვალწინ მიდგანან ხიხაძირელი ხვეისბერები: ბათალ იშხნელიძე, ესკერ, თუფან გაბაიძეები, ფილიპე მამულაძე, ავთანდილ ჯაიანი, შუქრი, მიხეილ დუმ-



ბაძეები, ოსმან, ვიქტორ ცეცხლაძეები, იროდიონ, ვალერი, გენადი ხალვაშები, ვეზირ აბაშიძე, რეჯებალი გაბაიძე, არჩილ აბაშიძე, მასმუდ მამულაძე, სიმონ ვარდოსანიძე, ხასან სურმანიძე და სხვები, რომლებიც ჩემთვის სიღარბაისლის, კუთხის პატრიოტიზმის, კაცურკაცობის განსახიერებანი იყვნენ.

როგორ შეიძლება არ გახსოვდეს საქართველოს დამსახურებული პედაგოგი სერგო ჯაიანი, მისი სტუმართმოყვარეობა, თანადგომა და დახმარება (ჩემი – ხიხაძერში პირველად ჩასული სტუმრის პირველი მასპინძელი სწორედ მისი ოჯახი იყო), დამსახურებული პედაგოგის არჩილ იშხნელიძის, მუსტო მიქელაძის, ემინე, ნესპიე და დურსუნ გაბაიძეების, მხევიანარ ჯაიანის, ზურაბ ბერიძის დეაწლი; ხაშიმ ხალვაშის, ფოლად ჯაიანის დიდი შრომა, სკოლის მუშაკების – ოსმან, ხუსეინ გაბაიძეების, ყურშუმ, შადიე ხალვაშების მიერ დათესილი სითბო და სიყვარული.

არ დამავიწყდება ასეთი შემთხვევაც. გასული საუკუნის 70-იანი წლები იყო. ქობულეთიდან ჩამოსულმა საკოლმეურნეო ბაზარში შევიარე. როცა სავაჭრო დახლებთან ჩავიარე, უმაღლვე შევიგრძენ ერთ-ერთ დახლთან მდგომი კაცის ღიმილიანი მზერა და მისკენ შევბრუნდი. მან კი მითხრა: – თქვენ ხომ სკენდერ მასწავლებელი ხართო, კი-მეთქი, ვუთხარი, საიდან მიცნობთ-მეთქი. როგორ არ გიცნობთ, მთელი ხიხაძირი სათუთად ინახავს თქვენს სახელს, სწორედ თქვენისთანების სისპეტაკე, სინდის-ნამუსი იყო, რომ მშობლები სიამოვნებით, დამშვიდებულნი ვაგზავნიდით თქვენთან სასწავლებლად ჩვენს ქალიშვილებსო. სიხარულით გადავეხვიე იმ კაცს და სამაგიერო მადლობა ვუთხარი. იგი სოფელ ვერებიდან აღმოჩნდა.

მეამაყება, რომ ხიხაძერში ჩემი მუშაობა ალაღად შეირგეს ჩემმა მოსწავლეებმა, რომლებმაც მასახელეს შემდგომშიც. თავიანთი სწავლა-მოდვაწეობით, და დღესაც, როცა მე

85 წელს ვუახლოვდები, ჩემი ღირსეული მოსწავლეები ჩემთან არიან ჭირსა და ლხინში, თავს მეველებიან, მაფასებენ და პატივს მომაგებენ, როგორც შეუძლიათ. ამ მხრივ მადლობის მეტი რა მეთქმის. ერთი ათად ავმღობდი საკუთარ თავში, ჩემი ნათესავების, ახლობლების წინაშე, როცა 1996 წლის 6 დეკემბერს ჩემმა ყოფილმა ხიხაძირელმა მოსწავლეებმა 75 წლის იუბილე გადამიხადეს ქ. ბათუმში, განათლებისა და კულტურის მუზეუმში. განა მარტო მოსწავლეები, მთელი ხიხაძირი აქ იყო, ყველა განათებული სახით, დიდი სიყვარულით მეფერებოდა და სიხარულის ცრემლს მაფრქვევინებდნენ. თავი რესპუბლიკის განათლების ორგანოების ამგადარებმაც შეიწუხეს, შემაქეს და ჯანმრთელობა მისურვეს. დიდი საწყენი კი ის იყო, რომ ამ დროს უკვე ცოცხლები აღარ იყვნენ დავით მამულაძე, ალექსანდრე ქონიაძე და დიმიტრი ხოზრევანიძე.

არ შემიძლია არ გავისხენო ის მოსწავლეებიც და მშობლიური მადლობა არ ვუთხრა ჩემს ყოფილ მოსწავლეებს, ჩემი მცირედი ამაგის დიდად დამფასებლებს, როგორებიც არიან: ნოდარ ცეცხლაძე, ეგნატე, ნიკოლოზ, სერგო დუმბაძეები, ონისე, ლევან სურმანიძეები, ამირან მამულაძე, ამირან და ალექსანდრე ჯაიანები, მამია ხალვაში, ალექსანდრე და ჯამბულ მამულაძეები, ამირან, ვანო, გივი, იოსებ, შოთა, ნოდარ, ეგგენი გაბაიძეები, ლამარა ჯაიანი, ჯემალ ბერიძე, გურამ ბარათაშვილი, ბესარიონ შაინიძე, მზია, დარიკო, ვლადიმერ ხალვაშები, ნოდარ კეკელიძე, თამარ ცეცხლაძე, თამაზ მამულაძე, სოლომონ თურაძე, შოთა ქამაშიძე, მრავალი და მრავალი სხვა. რაოდენ საწყენია, რომ ამათგან ზოგი უკვე აღარ არის ჩვენს რიგებში, რომელთადმი სიყვარული ჩემს გულში არ შენელებულა.

მასხენდება ხიხაძერში რამდენჯერმე მოწყობილი შესვენებები კურსდამთავრებულებთან, სადაც გვიწვევდნენ ჩვენც, მასწავლებლებსაც. განსაკუთრებით დამამახსოვრდა



1956 წლის კურსდამთავრებულთა შეხვედრები 1976 და 1986 წლებში, რითაც მოგვეცა დიდი საშუალება დაგვეთვალიერებინა ჩემი დავაუკაცების ადგილები, კიდევ ერთხელ მივსულიყავი ჩემი დირექტორის, კოლეგისა და მეგობრის საფლავთან, კიდევაც დავმტკბარიყავი ჩემი ხიხაძირელი კოლეგების, მეგობრების, საპატივცემულო ადამიანების ხილვით და ერთად პურის გატეხვით. ვინატრებდი, კვლავაც მეხილოს სიამოვნების ასეთი დღეები, თუკი ჯანმრთელობა მომცემს ამის საშუალებას.

კვლავაც ჩირაღდანივით ანათებდეს ხიხაძირის სკოლა, კვლავაც გაეზარდოს ღირსეულები და ქვეყნის სამსახურში ჩაეყენებინოს მათი ნიჭი ამ ისტორიული კუთხის შვილებს.

მეამაყება, რომ ხიხაძირის საშუალო სკოლაში ვმუშაობდი“.

*სკენდერ ბაჯელიძე,
ხიხაძირის საშუალო სკოლის
სასწავლო ნაწილის გამგე (1954-1959 წწ),
ომისა და შრომის ვეტერანი,
აჭარის დამსახურებული პედაგოგი.
სოფელი ხუცუბანი, 2004 წლის სექტემბერი*

**პრისტალური სიწმინდის და მაღალი
ზნეობის განსახიერება იყო...**
სკენდერ ბაჯელიძის 75 წლისთავისადმი მიძღვნილი
საიუბილეო საღამოზე (1996 წლის 16 დეკემბერი)
წარმოთქმული მისაღმებები და მოგონებები

მ ი ს ა ლ მ ე ბ ე ბ ი

მისაღმება – მოფერება, სიტბოს გამოხატვაა.

არჩილ იშხნელიძე
აჭარის მასწავლებელთა დახელოვნების
ინსტიტუტის დირექტორი,
აჭარის სკოლის დამსახურებული მასწავლებელი

ბატონო სკენდერ!
ხუთი ათეული წელია, რაც ცხოვრების შუაგულში ტრიალებთ, მამულის, ქვეყნის, ადამიანების, სიკეთის სამსახურში იღვწით და მოზარდების ცხოვრების გზას ოსტატის ხელით ჩარხავთ.

ძნელია სტრიქონებში ჩაატოო ის დიდი ღვაწლი და ამბავი, რაც თქვენ სახალხო განათლების განვითარებისა და ახალგაზრდობის აღზრდაში მიგიძღვით. თქვენ განვლეთ რთული, მაგრამ ღამაზი შემოქმედებითი ცხოვრების გზა.

უკეთიშობილესი პროფესია – პედაგოგობა აირჩიეთ, მაგრამ სასწავლებლის კურსდამთავრებულს ჟურნალის ნაცვლად შაშხანის ადგბა მოგიხდათ ხელში.

ხუთი წელი ვაჟკაცური შემართებით, რაინდულად იარეთ ომის ცეცხლოვან გზაზე. სამშობლოს წინაშე ვალდებულნი ვართ მოზარდი თაობის აღზრდის სამსახურში ჩადებით და უღალატოდ, მუხლჩაუხრელად კაცური კაცის სინდისით და ნამუსით, თავდადებით ემსახურეთ ქვეყნის ხვალისეული დღის – ახალგაზრდობის სულიერი ფორმირების საქმეს.

განსაკუთრებით აღსანიშნავია თქვენი ნაყოფიერი მოღვაწეობა ხიხაძირის საშუალო სკოლაში. ამ სასწავლო კერამ მთელ აჭარაში გაითქვა სახელი, რაშიც, ცნობილ დირექტორთან – დიმიტრი ხოზრევანიძესთან ერთად, თქვენც დიდი წვლილი მიგიძღვით.

ბატონო სკენდერ, ყველგან, სადაც კი იმოღვაწეთ – ხულოს რაიონის ხიხაძირის საშუალო სკოლაში, ქობულეთის რაიონის ჩაისუბნის სკოლა-ინტერნატში, მშობლიური ხუცუბნის საშუალო სკოლაში თუ სხვაგან, ყველგან თქვენი სიტყვა თქვით და კეთილი კვალი დატოვეთ.

გილოცავთ დაბადების 75-ე წლისთავს. მზეგრძელობა და დღეგრძელობა, სიხარული და ბედნიერება არ მოგკლვებოდეთ. იარეთ დიდხანს ამ ღამაზე ქვეყანაში თქვენ კეთილი ღიმილით, ჭკვიანი სიტყვით, მართალი საქმით.

აჭარის დამსახურებულ პედაგოგს, ომისა და შრომის ვეტერანს, ღრმად პატივცემულ სკენდერ ბაჯელიძეს (მისალმება-ადრესი)

ბატონო სკენდერ!

ბედნიერია ის, ვინც თავისი გავლილი გზით ამაცობს. თქვენ ასეთ ბედნიერ ადამიანთა რიცხვს ეკუთვნით, რადგანაც ისე იცხოვრეთ და იმოღვაწეთ, რომ თქვენს უპირველეს საზრუნავს ყოველთვის ქვეყნისა და ხალხის ინტერესები წარმოადგენდა. კარგად გვესმის, რომ ია-ვარდებით მოფენილ გზებზე არ გივლიათ. დიდი განსაცდელები და ტრაგედიები გამოიარეთ, ბათუმის პელსასწავლებლის დამთავრებისთანავე, თანატოლებთან ერთად, ომის ქარცეცხლში გაეხვიეთ.

თქვენ წარმოადგენთ იმ დიდებულ, ვალდებულ თაობას, რომლის ღირსეულმა წარმომადგენლებმა 50-იანი წლების დასაწყისში აჭარის მთიანეთს მიაშურეთ და ფასდაუდებელი წვლილი შეიტანეთ ამ კუთხის ახალგაზრდობაში განათლების უქრობი ჩირაღდნის ანთებისთვის. თქვენი მოღვაწეობა ხიხაძირის საშუალო სკოლაში დაემთხვა იმ პერიოდს, როცა აჭარაში, ავტონომიური რესპუბლიკის მაშინდელი ხელმძღვანელის დავით მამულაძის თაოსნობით, საფუძველი ეყრებოდა ადგილობრივი ინტელიგენციის აღზრდა-ჩამოყალიბების საშვილიშვილო საქმეს, კუთხის ეკონომიკურ, სულიერ და კულტურულ აღორძინებას. სიამაყით უნდა ითქვას, რომ თქვენმა თაობამ ეს ძნელი და საპატიო მისია ბრწყინვალედ შეასრულა.



თქვენგან გულანთებულმა და დალოცვილმა ბევრმა ჭაბუკმა და ქალიშვილმა უმაღლესი განათლება მიიღო და გზა გაიკვალა მეცნიერებაშიც. ყოველ აღსაზრდელს უნერგავდით მშობლიური ხალხის, ქვეყნის სიყვარულს, პატივისცემას ღირსეული ადამიანებისადმი, თქვენ ჰუმანისტი პედაგოგის კვალი დატოვეთ ყველგან, სადაც კი გიმუშავიათ.

თქვენ მიერ გავლილი გზა არის პატიოსანი, სპეტაკი, თავისი საქმის ერთგული, სამშობლოსათვის თავდადებული, მრავალ ჭირგადატანილი ქედუხრელი კაცის მისაბაძი მაგალითი.

თქვენს ამაგს არასოდეს დაივიწყებს შთამომავლობა.

ბატონო სკენდერ! დავით მამულაძის საქველმოქმედო საზოგადოება „მოამაგის“ გამგეობა გულითადად გილოცავთ დაბადების 75 წლისთავს, გისურვებთ ჯანმრთელობას, დღეგრძელობას და დიდ ადამიანურ ბედნიერებას.

ბატონო სკენდერ!

ნახევარი საუკუნე ბურგალებს ჩვენს ურთიერთობაში. ჭაბუკობიდან ჩვენმა სამსახურებრივმა საქმიანობამ და პირადად ბუნებამ გადაგვჯაჭვა, მკაცრად დაგვაახლოვა, დაგვაშეგობრა და ამის გამოც არასოდეს დღემდე ერთმანეთისათვის ბატონობით არ მიგვიმართავს...

ალბათ, გაგიკვირდათ კიდევ, ასე რომ შეგეხმიანეთ, მაგრამ ეს ხომ დღეს მაინცდამაინც ჩემი თქვენდამი ოფიციალური მომართვაა და ჩავთვალე, ასე უფრო უპრიანი იქნებოდა... და ახლა თქვენი თანადგომით, უპირველესად, უღრმესი მადლიერებით მივმართავ ჩვენი დღევანდელი ამ თავყრილობის ორგანიზატორთ – ამ ჩვენთვის სიცოცხლისა და სიხარულის გამახანგრძლივებელი, მოგონებათა ამაფორიაქებელი შეხვედრისათვის!..

გამარჯვება დაბედებოდეთ მათ ყოველ გზასავალს!

...

ძვირფასო სკენდერ!

გრძელი და მძიმე ცხოვრება განვლეთ: ნახევარი საუკუნის წინ მასწავლებლობა, დღევანდელთან შედარებით, უფრო დიდი საზოგადოებრივად დატვირთული მოღვაწეობის ტოლფასი რამ იყო. ხომ ბევრჯერ გვივლია ფეხით თოვლსა და ყინვაში სხალთიდან, ზოგჯერ ბათუმიდანაც, „შორია ხისაძირამდე“... ამზევებულნი არც ქობულეთის რაიონში ერთად მუშაობისას ვყოფილოვართ.

უტრანსპორტობა, მეზაფრობა ურმით, ცხენით, ფეხით... გზა გრძელი ხშირად, საგზლით ზურგზე.

პარადოქსებიანი საუკუნის შვილები ვართ... რამდენი ტკივილიანი დრო გქონიათ... თქვენ, უპატიოსნესი, უსპეტაკესი, უკეთილშობილესი, პირთამდე მართალი კაცი, მისაყუ-



მისამალადაც კი ვაგხადათ ცხოვრებამ. ჩემო სკენდერ! ომგა-
დახდილსა და ღვაწლმოსილს შიში აგვიდებოდათ ავი ლან-
ღივით...

რამდენჯერ თქვენ, ბრძენსა და ღირსეულ კაცს, გულში
ჩაგიკლავს უღირსთა შემოტევა, როდესაც თქვენგან რაიმე
პრაქტიკულსა და ჭკვიანურს ვერ აიტანდნენ...

მაგრამ გული?!

რამდენ რამ დაეცა ამ საცოდავს გულში?!

მაგონდება ერთ-ერთი საშუალო სკოლის ეზო... თუთის
ხის ჩრდილში ასეთი შემოტევისას თქვენი მაღალზნებრივი
თავშეკავება...

ეს მხოლოდ ჩვენ – ორმა ვიცით... სხვა ამისი მოწმე
დღეს უკვე აღარაა ცოცხალი, ძვირფასო სკენდერ!... მას
შემდეგ სამყაროს დროის მიერ უკიდუგანობაში მარადისო-
ბისათვის მცირე, მაგრამ ჩვენთვის საკმარისი დიდი დროც გავი-
და.

რას იზამ... ცხოვრება ხომ ხშირად უღმობელია?!

თქვენ სამშობლოზე – დაუჯერებელი წინააღმდეგობე-
ბით აღსავსე საქართველოზე – განუზომლად შეეგარებული
პიროვნება ბრძანდებით... ხშირად ცრემლებამდე მისულა ამ
მხრივ მოძალეებული განცდა...

თქვენ სოლიდურ ასაკს მიაღწიეთ... კარგა ხანია დაგე-
თოვლათ თმა... მაგრამ, ერთი სწავლულის თქმისა არ იყოს,
„ეს სისპეტაკე გასხივოსნებულია პატიოსანი და ღირსეული
შრომით... იკითხონ მხოლოდ მათ, ვისაც ეს სითეთრე ავ-
კაცობითა და კაცთმოძულეობით დაუტვირთავთ!..“

თქვენ მძიმე და ძნელი პროფესიის შესაბამის დამაშგრა-
ლი წლები განვლეთ, მაგრამ მაინც არ დაკარგეთ მაღალი
სული...

შემიძლია ვთქვა, რომ ეპოქასთან მიმართებაში, შენი
სამშობლოს გავლილი დღეების განცდით, ტრაგიკული პი-
როვნება ხართ...

და რა უბედურებაა, რომ ჯერჯერობით – დღესაც ვერ
გხედავთ ნანატრის ღირსეულად აღსრულებას...

თქვენი ჰობია სიკეთის თესვა – სხვისთვის ბედნიერების
მინიჭება; ხართ დიდი ინტერანციონალისტი, მტერშიც კი
ღირსეულს ეძებთ და ყოველ ამ ადამიანობის გამოვლენას
უადრესად აფასებთ...

ადამიანში ღირსებას პოულობთ და მისგან ყოველ სიკე-
თეს სიღრმისეულად შეჰხარით, აფასებთ და არ ივიწყებთ;
უსიტყვოდ – პრაქტიკულად უნდა გადაუხადოთ იგი მას.

ერთგულება გახარებთ სხვისი...

ცხოვრების ყველაზე ჭირვეულ დროს დაკარგეთ სამი
კარგი შეილის გამზრდელი, ერთგული, თბილი, მოყვარული
და ნაწვალები პატიოსანი მეუღლე...

იყავით და ხართ კარგი მეგობარი, მამა და... უღლის-
ცალი.

თქვენ საუკეთესო გვარის ჩამომავალი ბრძანდებით. მი-
მანია, რომ თვით ეს გვარი იმსახურებს აპოლოგიას – ქება-
თაქებას.

დიდი კონსტანტინე, თავის „დიონისოს ღიმილში“ ჩვენი
საუკუნის გარიჟრაჟზე შენიშნავდა, რომ დასავლეთში დიდი
ხანია, რაც დაიწყო მამაკაცების გადაგვარებაო... დღეს იქ და
საერთოდ ქვეყნად საყურიანი, თავსაფრიანი, კულულ-კიკი-
ნებიანი გარდაკაცებულნი მომძლავრდნენ. თქვენ კი, ბატონო
სკენდერ, XXI საუკუნის კვირბაღზეც შეინარჩუნეთ მამაკა-
ცური ხიბლი, რიხი, ნიჭი, კაცურკაცობა, რაც ყველა თქვენს
ახლობელს, მეგობარს, ნათესავს კანონიერი სიამაყის გრძნო-
ბას გვანიჭებს და გვახარებს.

ესაა, რომ გავლილი ცხოვრების სიმძიმემა ერთგვარად
ღიმილი გაგიქროთ სახეზე...

დიდ ფრანგ მწერალს – ვიქტორ ჰიუგოს გაუსაძლისმა
ყოველდღიურმა საწუხარმა თურმე ღიმილი წარტაცა სახი-
დან... რამდენი ეცადნენ, რომ იგი აღედრათ და აღებუჭდათ
ფოტოფირზე... ბოლოს ჭკვიანმა ფოტოგრაფმა აპარატის წინ,

სურათის გადაღებისას, პატარა ბაღი აუელვარა – აუთა-
მაშა – აუცქრილა და აი, მაშინ მოსტაცეს მის სახეს ღი-
მილი...

ეს ღიმილი ქვეყნის მომავლისა – ახალი თაობისა
გახლავთ, ჩემო სკენდერ...

თქვენ დღეს დგახართ თავისებურ ფოტოპარატთან,
რომლის გარშემო თქვენთვის ღიმილის მოსაგვრელად შემო-
კრებილან თქვენი კარგი შვილები, ღამაზი შვილიშვილები
და ნამაგარ კაცს თავს გახვევია – გამშვენებენ... აქვეა უამ-
რავი მოსწავლე, ამჯერად თქვენი მეგობრები – თქვენი ამაგ-
ის ღირსეულად შემცნობნი... რომლებიც თვალეში შემოგ-
ციცინებენ. თქვენც ნუ მოგიშალოთ მათი სიყვარული ძმაო,
სკენდერ!

მაინც მინდა დაეძინო: რამდენი სიტბო და დიდი გულია
ჩაღვნილი თქვენს ნაღვლიან მზერაში... თქვენს პიროვნე-
ბას რაინდობისა და წმინდანობის შარავანდელი ადგას, მო-
სავს და აშუქებს...

თქვენ ამაღლებულის სახელი გრჩებათ ამ ქვეყანაზე...

. . .

ბატონო სკენდერ! ამდენი გესაუბრეთ და შეგაწუხეთ ჩე-
მი ნაუბრით, მაგრამ მაინც, უკმაყოფილების გრძნობა მეუფ-
ლება...

რომ შეიძლებოდეს, მე თავიდან დავწერდი თქვენს შესა-
ქებარ სიტყვას, მაგრამ ვეჭვობ, ისეთი გამოძივიდეს, რაც
თქვენ შეგეფერებათ და თქვენთვის მემეტება!

ძველ შემერებს უთქვამთ: „ნამდვილი დამწერი ის არის,
ვისი ხელიც აზრს მისდევს“...

ნეტავ ცოტათი მაინც თუ შევძელი მე ეს – აზრისა და
ხელის მიდევნება?

დიდხანს ეყოლეთ ამ თქვენს პატივისმცემელ საზოგა-
დობას, თქვენს საპატიო წრეს, ჯანმრთელად, საღად, ჩვენო
ამაგდარო პიროვნება!

სკენდერ ბაჯელიძე

მარტო ამ გვარის გაგონება უახლოეს წარსულს გაგახ-
სენებს და მოგაგონებს იმ ღირსეულ მამულიშვილებს, რომ-
ლებმაც თავიანთი სიკეთით, ქველმოქმედებით, სისპეტაკითა
და ღვაწლით ღირსეული კვალი დატოვეს ჩვენი საუკუნის
საზოგადოებრივ ცხოვრებაში. რომელი ერთი ჩამოვთვალო,
სახელოვანი მხედართმთავარი ასლან ბაჯელიძე, თუ შრომის
გმირი ვლადიმერ ბაჯელიძე, იურისტი ჯემალ ბაჯელიძე თუ
პროფესორი – ეკონომისტი ალი ბაჯელიძე.

ყველა მათგანის ბიოგრაფია იმდენად მდიდარია, რომ
ისინი ცალკე მონოგრაფიებს იმსახურებენ. ალბათ, ჩვენი
თაობა ამასაც გააკეთებს და ღირსეულად დააფასებს ხუ-
ცუნბელი დიდკაცების ამავს და სიკეთით გავლილ გზას.

სკენდერის თავზე, როგორც იტყვიან, კევრს არ გადა-
უვლია, დანარჩენი, ყველა სიავე იწვინა, მაგრამ სულით და
სხეულით ძალმოსილებამ თავისი გაიტანა და იგი, შეიძლება
ითქვას, მშვიდი ხანდაზმულობით წავიდა ამ წუთისოფლი-
დან.

ამ გოლიათი კაცისათვის ყველაზე დიდი გამოცდა იყო
მეორე მსოფლიო ომი, რომელმაც მრავალი მისი თანამებრ-
ძოლი და მეგობარი იმსხვერპლა მტრის ალყაში მოქცეული
და სასწაულებრივად გადარჩენილი სკენდერის ცხოვრება
უმძიმეს პირობებში გაგრძელდა, ფაშისტთაგან ოკუპირებულ
ქვეყნებში, საიდანაც გაქცევის თითქმის ყველა მცდელობა
უშედეგოდ დასრულდა.

სამშობლოში დაბრუნებული სკენდერ ბაჯელიძისათვის
ახალი ცხოვრება იწყება. კაცთმოყვარე ადამიანმა ასევე ჰუ-
მანური დარგი – მასწავლებლობა აირჩია და იგი უძველესი

ისტორიითა და ტრადიციებით მდიდარი მაღალმთიანი ხიხანის ხეობის მოზარდთა აღზრდის მსახური გახდა.

პირველად მისი აღზრდილების, მაღლიერი მოსწავლეების წრეში შეეხვდი ამ ღვაწლით დამძიმებულ კაცს და პირველივე საუბრებით დაერწმუნდი, რომ მისი სახით ჩვენს ინტელექტუალურ საზოგადოებას ჰყავს ჭეშმარიტი პატრიოტი, მამულიშვილი და აღმზრდელი, რომელიც მზადაა, უარი თქვას პირად ფუფუნებაზე და საკუთარი გონებრივი და მატერიალური შესაძლებლობები ადამიანების კეთილდღეობას მოახმაროს. მაგრამ მთავარი მართო ეს როდია. მთავარი და არსებითი ისაა, რომ მამულიშვილობას, კაცთმოყვარეობას, პატიოსნებასა და სიმამაცეს იგი უნერგავდა ყველას, თავის მრავალრიცხოვან შეგირდებს, ოჯახის წევრებსა და გვარიშვილთა დიდ წრეს. ამით ღვაწლმოსილმა პედაგოგმა ხიხადირსა და მშობლიურ რაიონში ერთგვარად განაგრძო ადგილობრივ დიდაქტიკოსთა ღირსეული საქმიანობა და ამით ჩვენს თაობებს თავიც მარადიულად დაამახსოვრა.

ვერც დაივიწყებენ, რადგან პედაგოგობიდან ათეული წლების გავლის შემდეგაც სკენდერ ბაჯელიძე მოიკითხავდა ხოლმე თავის აღზრდილებს, გაიგებდა მათ წინსვლას და სიხარულით ივსებოდა, უყურადღებოდ არ ტოვებდა ჭირვარამსაც და შეძლებისდაგვარად მამაშვილურ ხელსაც უწვდიდა.

სკენდერ ბაჯელიძის სიბრძნე, სისპეტაკე და სიკეთე ჩემთვის კიდევ უფრო ცხადი გახდა, როცა ჩვენს ოჯახებს შორის მოყვრული ურთიერთობა დამყარდა, მისი შვილიშვილი ჩემი რძალი გახდა და ამ ქორწინებამ ჩვენს გვარში ახალი სითბო და სიყვარული შემოიტანა.

ვისაც ერთხელ მაინც მოუსმენია სკენდერ ბაჯელიძის ღინჯი, ღრმად შინარსიანი ბაასი, ალბათ, არასოდეს დაავიწყდება გონებანათელი, უბრალო და უპრეტენზიო კაცი, რომელმაც გაიარა წარსულის სიკეთე-სიავით დამძიმებული ცხოვრება და ხალხის წინაშე ვალმოხდილი წავიდა მარადიულ სასუფეველში.

მოკლე სიტყვის შემდეგ მიესალმა ლექსით:

ბატონ სკენდერ ბაჯელიძეს – 75

სამოცდათხუთმეტი გაზაფხული კაცურად განვლეთ,
ომი და ბრძოლა, ოჯახი, სკოლა,
ყველა ეს ტვირთი მედგრად ატარეთ,
გვეამაყება თქვენს გვერდით ღგომბა.
ბევრი დათესეთ, ბევრი მოიმკეთ
სიყვარული და პატივისცემა,
თქვენგან ვისწავლეთ და შთავინერგეთ,
კაცურკაცობა, სინდისი, შრომა.
ორნახევარი ათეული წლით,
კიდევ გეჭირდება თქვენი თანდგომა,
ღმერთმა გაცოცხლოთ, ბატონო სკენდერ,
ბარემ შეგვარგეთ გამთბარი გრძნობა.

მ ო გ ო ნ ე ბ ე ბ ო

მოგონება – ხელახლა განცდაა.

როსტომ გუნთაიშვილი

იურისტი

ჩემი ერთ-ერთი ყველაზე საყვარელი მასწავლებელი

ჩემს ცხოვრებაში, რაც დრო გადის, საკუთარ თავს ვუსვამ შეკითხვას, ვინ არის ის პიროვნება, რომელსაც ჩემს მასწავლებლად მივიჩნევ იმ მასწავლებელთა და პედაგოგთა დიდი ჯგუფიდან, რომლებმაც დიდი წვლილი შეიტანეს ჩემი პიროვნების ფორმირებაში. ასეთი ადამიანები ბევრია, მაგრამ მათგან გამორჩეულად დიდი მადლიერებით ვიგონებ ჩემთვის დაუვიწყარ ბატონ სკენდერ ბაჯელიძეს, რომელიც ქობულეთის რაიონის ულამაზეს სოფელ ხუცუბნის საშუალო სკოლაში მასწავლიდა. ჩემი აზრით, ბედნიერი არიან ის ადამიანები, ვისაც რაიმე შეხება ჰქონია ამ დიდებულ პიროვნებასთან. უწინარე ყოველისა, იგი გამოირჩეოდა თავისი ვაჟკაციური და ახოვანი იერით, უაღრესად დიდი განსწავლულობითა და პიროვნული სითბოთი, რომელსაც იგი ავლენდა ნებისმიერი ჩვენი შეხვედრის დროს. მიუხედავად იმისა, რომ ჩვენ შორის დიდი ასაკობრივი განსხვავება იყო, ჩვენს ურთიერთობაში ასეთი არ იგრძნობოდა. მე ყოველთვის სითბოთი მომმართავდა და მოიკითხავდა ჩემს მშობლებს, ბაბუას და ბებიას. ვიცი, რომ ჩვენ სისხლით ნათესავებიც ვიყავით, დედაჩემის ბებია ბატონი სკენდერის დიდი მამიდა იყო. ბატონი სკენდერი ერთი წელიწადი მასწავლიდა, ეს იყო 1966

წელს, მას შემდეგ დიდი დრო გავიდა, მაგრამ არასდროს მავიწყდება ეს პიროვნება.

გასული საუკუნის ბოლოს ბატონი ნიკოლოზ და სერგო ღუმბაძეებისგან შევიტყვე, რომ ჩვენ ერთი მასწავლებელი გვეკოლია და მათ მიმართ უფრო დიდი სიმპათია და მეგობრული ურთიერთობა გამიჩნდა, რადგან სხვადასხვა დროს და სხვადასხვა ადგილას, ერთი და იგივე პიროვნება იყო ჩვენი მასწავლებელი. ჩვენთვის ეს პიროვნება იყო გამორჩეული და მადლიერებით მოსაგონარი პედაგოგი.

ჩემს ამ მოგონებას სხვადასხვა ადამიანები წაიკითხავენ, მათ შორის ალბათ, ახალგაზრდებიც იქნებიან. მე მათ ვუსურვებ, რომ ისეთი მასწავლებელი ჰყოლოდეთ, ოდნავ მაინც რომ ჰგავდეს ჩემს დიდ მასწავლებელს – ბატონ სკენდერ ბაჯელიძეს.

ამქვეყნიურიდან იმქვეყნიურში გადასვლის შემდეგ, იმედს არ ვკარგავ, რომ ბატონ სკენდერს შეხვედები და კიდევ ერთხელ და მრავალჯერ დიდ მადლობას მოვახსენებ დიდი ქართველობისთვის და კარგი კაცობისთვის.

ამირან მამულაძე
ყოფილი მოსწავლე

უკვდავია მასწავლებელი

*ვინც მოიხადა ამ სოფლად ვალი,
ის მკვდარიც ცოცხლობს, არ არის მკვდარი.*
აკაკი წერეთელი

ჩემმა თანასკოლემა, ხიხაძირის საშუალო სკოლადამ-
თავრებულმა, შოთა რუსთაველის სახელობის ბათუმის სახ-
ელმწიფო უნივერსიტეტის პროფესორმა სერგო დუმბაძემ
საუბარში გამიმხილა, რომ სკენდერ მასწავლებელზე (ორივე
მისი ყოფილი მოსწავლე ვართ) პატარა წიგნს ვამზადებთ
და ხომ არ მოიგონებთ რაიმეს მის შესახებო. მისი აზრი
მომეწონა და შევასრულე ეს თხოვნა.

ხიხაძირის საშუალო სკოლაში სწავლის გაგრძელების
პირველსავე დღეებში ბევრი კარგი აღმზრდელ-მასწავლებე-
ლი გავიცანი, რომლებმაც ღრმა კვალი დატოვეს ჩემში, მათ
შორის იყო ხიხაძირის საშუალო სკოლის სასწავლო ნაწი-
ლის გამგე, გეოგრაფიის მასწავლებელი სკენდერ ბაჯელიძე
– სულიერი სიწმინდის და მორალური სისპეტაკის, ყურ-
ადღებიანობის და გულისხმიერების, სამართლიანობისა და
მომთხოვნელობის, უანგარობისა და კეთილშობილების ეტა-
ლონი. მაღალი, თეთრი სახე, შავი თმა და უღვაშები ქმნიდა
მის მიმზიდველ პაბიტუსს, ოდნავ მხრებში მოხრილი (ომში
მიყენებული ჭრილობებით გამოწვეული), ბრგე ვაჟკაცი,
საოცრად კეთილი, რომელსაც ახასიათებდა იშვიათი, მაგრამ
თავისებური ღიმილი. მისი ერთ-ერთი საუკეთესო თვისება
იყო ადამიანისათვის ბოლომდე მოსმენა, უსმენდა ყველას:
მოსწავლე იყო, სკოლის მასწავლებელი თუ რიგითი მოქა-
ლაქე, უსმენდა იმდენ ხანს, სანამ მოსაუბრე საუბარს გა-

ნაგრძობდა, არასოდეს ჩაგერეოდა საუბარში, გისმენდა ინ-
ტერესით, არა როგორც მოსწავლეს, არამედ როგორც თა-
ნასწორს, აზრის თანამოზიარეს. გრძნობდი, რომ საქმე გქონ-
და უღირსეულეს პიროვნებასთან, გამორჩეულ პედაგოგთან,
აღმზრდელთან. დაუვიწყარია მისი გაკვეთილები. საინტერე-
სოდ საუბრობდა ახალი მასალის ახსნის დროს. ის არასდ-
როს არ ქადაგებდა, საუბრობდა, გიხსნიდა, გასწავლიდა,
აზრს გიზიარებდა. თავისუფალ დროს ხშირად ინტერნატში
მცხოვრებ მოსწავლეებთან ატარებდა, ცხოვრებისათვის
გვამზადებდა, შთაგვაგონებდა მოსწავლეებს, რომ მომავალი
ახალგაზრდობას ეკუთვნის და ქვეყნის მართვასა და მის
აყვავებას შეძლებენ მხოლოდ მცოდნე, განათლებული ადა-
მიანები. ამიტომაც გვინერგავდა სიყვარულს და გვაჩვენებდა
შრომას, სისტემტურ მეცადინეობას. მისი ღვაწლი ჩვენდამი
მასწავლებლობით არ შემოიფარგლებოდა. იგი იყო მზრუნ-
ველი აღმზრდელი, ცხოვრობდა ერთი ფიქრით და ერთი
მიზნით, რაც შეიძლება განათლებული და წესიერი ახალ-
გაზრდები აღეზარდა. ყოველთვის ინტერესდებოდა მოსწავ-
ლეთა სწავლის, ცხოვრების და შრომის პირობებით, ეხმა-
რებოდა მრავალშვილიან ოჯახებს, მარტოხელა მოხუცებს,
ავადმყოფებსა და უმწეოებს. სკენდერ მასწავლებლის ჩვენ-
დამი მზრუნველობის ნათელსაყოფად გავიხსენებთ ერთ
საინტერესო მომენტს.

1959 წელს მთაში დიდი თოვლი მოვიდა. ხიხაძირის
ცენტრში თოვლის საფარი სამ მეტრს აღწევდა, მაღალთმიან
მეზობელ სოფლებში კი უფრო მეტი იყო. რამდენიმე დღე-
დამე შეუჩერებლივ თოვდა, შეწყდა მოძრაობა. სკოლისა და
ინტერნატის ერთსართულიანი შენობები თოვლით ჩაიხერგა.
პურის გამოცხოებასა და სასადილოს მუშაობაზე ლაპარაკიც
ზედმეტი იყო. ინტერნატის მოსწავლეები სახლიდან
მოტანილი პროდუქტების ამარა დავრჩით. თოვლის საფარის
სიმაღლის გამო, ფანჯრებიდან დღის სინათლე ვერ აღწევდა,





სკოლისა და ინტერნატის შენობებს საფრთხე შეექმნა. მოსკოლიდან ავარიის თავიდან ასაცილებლად, ინტერნატები შევუდევით სახურავის გადმოთოვლას. მოსწავლეთა ერთი ნაწილი შენობებს ვაცილებდით თოვლს, ფანჯრებიდან რომ ოთახებში სინათლე შემოსულიყო. გაუსაძლის პირობებში ვიმძლავრეთ თითქმის ორი დღე. ბოლოს და ბოლოს დავიღალეთ, მოგვშივდა და არაქათი გამოგვეცალა. ჩვენდა საბედნიეროდ, მესამე დღეს, შუადღის შემდეგ გამოიღარა, შეწყდა თოვა, საღამოს ინტერნატის ფანჯრიდან შევნიშნეთ სუსტი, მბჟუტავი წერტილი გზაში, რომელიც წინ მოიწვედა. მგზავრს უჭირდა გზის გაკვლევა, შეგვეცოდა. ბიჭებმა გადავწყვიტეთ დახმარების გაწევა, სკოლიდან მასწავლებელთა საცხოვრებლამდე დაახლოებით სამასი მეტრი გზა გავკვალეთ, რომ მგზავრი მოგვეყვანა ჩვენთან, ინტერნატში.

უკვე ბინდებოდა. არ ვიცოდით, ვინ იყო მომავალი მგზავრი. როცა კვალი გავიტანეთ და მომავალ მგზავრს მივუახლოვდით, ვნახეთ, რომ ერთი კი არა, ორი პიროვნება იყო. მომავალნი სკოლის დირექტორი დიმიტრი ხოზრევანიძე და სასწავლო ნაწილის გამგე სკენდერ ბაჯელიძე აღმოჩნდნენ. მათ სკენდერ მასწავლებლის ოჯახში კერძები მოემზადებინათ და მოჰქონდათ მოსწავლეებისათვის. ის დამე და მომდევნო სამი დღე სკენდერ მასწავლებლის ოჯახში მომზადებული კერძებით გავიტანეთ ინტერნატელმა მოსწავლეებმა. გაგვიმართლა იმით, რომ იმ წელიწადს სკენდერ მასწავლებლის მეუღლე, ქალბატონი დურიკო ხიხაძირში დარჩა. ვიდრე სოფლის პურის საცხობი ამუშავდებოდა, მესაზღვრეები გვამარაგებდნენ პურით.

ხიხაძირში მძიმე ვითარება შეიქმნა, დიდთოვლობას დაემატა ისიც, რომ სოფელში მშობიარე ქალის სამშობიარო სახლში სასწრაფოდ გადაყვანა დარჩა საჭირო, სიკვდილსიცოცხლის საკითხი წყდებოდა. სიკეთემ გაიმარჯვა ბორო-

ტებაზე. სკოლის დირექტორი, სულმნათი დიმიტრი ხოზრევანიძე მესაზღვრეთა ხაზით დაუკავშირდა პარტიის აჭარის საოლქო კომიტეტის პირველ მდივანს, ბატონ დავით მამულაძეს. მოახსენა არსებული მძიმე მდგომარეობის შესახებ და დახმარება სთხოვა. ორი საათის შემდეგ ხიხაძირში დაეშვა ვერტმფრენი კვების პროდუქტებით, უკან კი მძიმე ავადმყოფი ქალი გადაიყვანა ბათუმში. ასე გადაფურჩით ინტერნატის მოსწავლეები შიმშილს, ხოლო მშობიარე დედა-შვილი – დაღუპვას. ასე ზრუნავდნენ სკოლის დირექტორი და სასწავლო ნაწილის გამგე არა მარტო სკოლის მოსწავლეებსა და პედაგოგიურ კოლექტივზე, არამედ მთლიანად რეგიონზე, მის მოსახლეობაზეც. ისინი კავშირს არ წყვეტდნენ სკოლის კურსდამთავრებულებთან, ხშირად აკითხავდნენ იმ სასწავლებელში, სადაც ისინი სწავლას ატარებდნენ. ასეთი ურთიერთობა შემდგომ მეგობრობაში გადაიზარდა, რომელთა შორის მეც ვიყავი. ჩემი ბათუმში მუშაობისა და სკენდერ მასწავლებლის ქობულეთში გადასვლის შემდეგ ხშირად ვხვდებოდით ერთმანეთს. ვერაგინ მოასწრებდა მას „ფინჯან ყავაზე“ დაპატიუებას. როცა საპასუხისმგებლო თანამდებობაზე მომიწია მუშაობა, სკენდერ მასწავლებელი გამოივლიდა დახმარების სათხოვნელად გაჭირვებული მეზობლების, ქვრივობლებისათვის. გულიანი და გულისხმიერი ადამიანი იყო, მასწავლებლის თხოვნა კი ჩვენთვის ბრძანების ტოლფასი იყო, შესაძლებლობის ფარგლებში უკმაყოფილოდ არ გამიშვია არასოდეს. ის პირად გასაჭირზე, ან ოჯახის საჭიროებაზე არავის შეაწუხებდა. ძალიან სიამოვნებდა, თუ სხვა ადამიანს ხელს გაუმართავდა.

ზემთო ჩამოთვლილ მოქალაქეობრივ თვისებებთან ერთად, სკენდერ მასწავლებელი იყო უბრალო და მორიდებული. ამიტომ იგი დამსახურებული სიყვარულით და პატივისცემით სარგებლობდა სკოლაში, როგორც მოსწავლე ახალ-

გაზრდობასა და პედაგოგიურ კოლექტივში, ასევე მოსახლეობაში.

ბედნიერი ვარ, რომ სკენდერ ბაჯელიძის მოსწავლე და შემდგომ მისი მეგობარი ვიყავი. არასდროს დამავიწყდება ჩემდამი მისი მზრუნველობა, ყურადღება, გულითადი დამოკიდებლობა. მასთან გატარებული წლები ჩემს მესსიერებაში დაუვიწყარ და განუმეორებელ პერიოდად დარჩება. გულწრფელად ვაღიარებ, რომ ბატონი სკენდერი მშობელივით თბილი და მზრუნველი პედაგოგი იყო. დიდი მადლობა ყოველივე ამისათვის. ღმერთმა ნათელში ამყოფოს თქვენი სული, პატივცემულო სკენდერ მასწავლებელო.



სიტყვა ღირსეულ მასწავლებელზე

მშობლიური სოფლის – რაქვთის რვაწლიანი სკოლის დამთავრების შემდეგ, 1955 წელს სწავლა განვაგრძე ხიხაძირის საშუალო სკოლაში, რომელსაც აღიარებული პედაგოგი და აღმზრდელი, კარგი სკოლათმცოდნე, დიმიტრი ხოზრევანიძე ხელმძღვანელობდა. იმხანად მთელ სხალთა-ხიხანის ხეობაში ორი საშუალო სკოლა ფუნქციონირებდა, ხიხაძირისა და ყინჩაურის სკოლები. ჩვენს სოფელთან გეოგრაფიულად უფრო ახლო ხიხაძირის საშუალო სკოლა მდებარეობდა და, როგორც მიმდებარე სოფლების რვაწლიანი სკოლების კურსდამთავრებულები, მეც ამ სკოლაში განვაგრძე სწავლა.

სწავლის დაწყების პირველსავე დღეს, სასწავლო წლის სახეიმო გახსნისათვის მზადების პერიოდში პედაგოგთა შორის დავლანდე ახოვანი, დინჯი, ვაჟკაცური შესახედაობის პიროვნება, რომელიც ჩვენი გეოგრაფიის მასწავლებელი და დირექტორის მოადგილე სკენდერ ბაჯელიძე აღმოჩნდა. სკოლაში და სკოლის დამთავრების შემდეგაც მასთან მეგობრული ურთიერთობა არასდროს გამიწყვეტია, ხშირად ვხდებდით ერთმანეთს. იგი ინტერესდებოდა ჩემი ცხოვრების გზით, ყოველთვის კეთილ რჩევას მაძლევდა და ცხოვრების სიბრძნით მმოძღვრავდა.

სკენდერ ბაჯელიძე მარტო მასწავლებელი როდი იყო. იგი ბრწყინვალე მოქალაქე და განსწავლული პიროვნება გახლდათ, პატრიოტი და საზოგადოებრივად აქტიური, ცხოვრების გზაგამოვლილი (იგი დიდი სამამულო ომის მონაწილე იყო). ამ გზას მისთვის დაღიცი დაესვა. ყოველთვის ნადვლიანი ჩანდა, თუმცა ამას არ იმჩნევდა. დღენიაგად ჩვენზე



ზრუნავდა, ძერწავდა ჩვენს სულსა და გონებას, გვინერგავდა ადამიანის, მშობლიური ხალხისა და კუთხის სიყვარულს, პატივისცემას ყოველივე იმისა, რაც ისტორიის ბედუკუდმართობის მიუხედავად, ჩვენი კუთხის ქართველობამ სიცოცხლის ფასად შეინარჩუნა: მოყვასის გატანა, უფროს-უმცროსობის დაფასება, მამულის და ადამიანების უანგარო სიყვარული. ხიხაძირის საშუალო სკოლის პედაგოგიურმა კოლექტივმა ბევრი რამ გვასწავლა და გვარიანად დაგვაკვლიანა. სასკოლო ინტერნატში ვცხოვრობდი, გვაკლდა მშობლების ზრუნვა და ყურადღება. ამას ავსებდა ბატონი სკენდერი, როგორც სკოლის ხელმძღვანელი. იგი ხშირად სტუმრობდა სასკოლო ინტერნატს, გვესაუბრებოდა, გვარიგებდა და ზრუნავდა, დრო არ დაგვეკარგა უქმად, კარგად გვესწავლა. ყოველთვის იყო ჩვენი ქომაგი და გამკითხავი, ზოგჯერ ჩადენილი დანაშაულის გამო „მკაცრად დასჯილები“ (ჩვენც ხომ ჩვენი ბავშვობიდან მოვდიოდით), მისგან ველოდით და ვღებულობდით კიდევ შემწეობას და მფარველობას.

შეყვარებული იყო ხიხაძირსა და ხიხაძირელებზე. კეთილად და სიყვარულით იგონებდა იქ გატარებულ წლებს.

ცხოვრებამ თავისი გააკეთა. ყველა ჩვენგანმა საკუთარი ცხოვრების გზა ავირჩიეთ. მეც დავამთავრე პედაგოგიური ინსტიტუტი, ერთხანს პედაგოგად ვიმუშავე, შემდგომ პარტიულ სამუშაოზე, ბოლოს კი ქალაქ ბათუმის საკრებულოს აპარატის უფროსი ვიყავი.

საკრებულო, სადაც ვმუშაობდი, ზურაბ გორგილაძის ქუჩაზეა განთავსებული. ბატონ სკენდერს იქვე, ჩეროში, წყალთან ძელსკამზე უყვარდა ჯდომა. ხშირად შევეუერთდებოდით და იწყებოდა მთისა და ბარის ამბების მოკითხვა, ყველას მოიკითხავდა, ინტერესდებოდა, როგორ ცხოვრობდნენ და რას საქმიანობდნენ მისი აღზრდილები. ამის თაობაზე შესაძლებლობის ფარგლებში ჩემგან იღებდა ინფორმაციას. ჩემ ღრმა პატივისცემას მისდამი მოკრძალებულად ფინჯან ყავაზე მიპატიუებით გამოვხატავდი. მერიის სასადი-

ლოს გამგემ ნოდარ ტარიელაძემ (ახლახან წავიდა იგი ამ ქვეყნიდან, ჯერ კიდევ ახალგაზრდა, ღმერთმა ნათელში ამყოფოს მისი სული), იცოდა რა ჩვენი დამოკიდებულება, ჩემდა დაუკითხავად პატარა „პურმარილს“ გაგვიწყობდა ხოლმე. როგორ გაიხარებდა სკენდერ მასწავლებელი ყოველივე ამით და უდიდეს კმაყოფილებას გამოხატავდა მისი გაბრწყინებული სახე. ეს დღესაც მახსოვს და არსდროს დამავიწყდება.

მთელი ცხოვრება მართალი კაცის სახელით, შუბლნათელმა, ვალმოხდილმა იარა. ყოველთვის სწამდა საქართველოს ხვალისდელი დღის, ერის სიწმინდისა და სიმტკიცის, მამულის აღორძინების.

მეამაყება, რომ ვიყავი სკენდერ მასწავლებლის მოსწავლე და უმცროსი მეგობარი.

გაგვიჭირდა მისგან განშორება. დაგვრჩა მისი სახელის მარადიული ხსოვნა და სურვილი იმისა, რომ სკენდერ მასწავლებელი დიდხანს დარჩება სამშობლოს სიყვარულით გულანთებული ახალგაზრდობის გონიერი გზამკვლევის უბადლო მაგალითად.



ამირან ჯაიანი

მედიცინის მეცნიერებათა დოქტორი,
ექიმი-კარდიოლოგი, ყოფილი მოსწავლე

**მოსწავლე-მასწავლებლის
ურთიერთობის ეტალონი იყო**

ბატონ სკენდერ მასწავლებელს ვიცნობდი ხისადირის საშუალო სკოლაში მისი მუშაობის დაწყებიდან. მაშინ მეექვსე კლასში ვიყავი. იგი მეგობრობდა ჩვენს ოჯახთან. ჩემს აღზრდაში, დავაუკაცებაში, ინტელექტუალურ პიროვნებად ჩამოყალიბებაში, მშობლების შემდეგ, განსაკუთრებული როლი მიუძღვის სკოლას, მასწავლებელს, მათ შორის გამოყოფილი დიმიტრი ხოზრევანიძესა და სკენდერ ბაჯელიძეს.

როცა მითხრეს, რომ სკენდერ მასწავლებელზე წიგნი იწერება და თუ შეგიძლია მისი ცხოვრებიდან რაიმე გაიხსენო, დიდად მესიამოვნა და ამ თხოვნას სიამოვნებით ვასრულებ.

1. სკენდერ მასწავლებელი პირველი შეხვედრიდან წარმომიდგა, როგორც დარბაისელი გარეგნობის, დინჯი პიროვნება, მაღალზნეობრივი თვისებებით შემკული ადამიანი, რომლისგანაც ყველას შეეძლო აელო მაგალითი.

2. სკენდერ მასწავლებლის მაღალი პიროვნულ-მოქალაქეობრივი თვისებების გამო, მოსწავლეები მეტად მორიდებული ვიყავით მასთან. როცა გზაში მომავალს შევამჩნევდით შორიდან, პირველი დანახვისთანავე, არ ჰქონდა მნიშვნელობა მანძილს, ქუდს ვისდიდით მის საპატივცემულოდ. ახლოს მოსული მეტყობდა: „კარგი ბიჭი ხარ, მადლობა ამისათვის“ და თან დააყოლებდა, ქუდი მოიხადე, როცა ახლოს მოხვალ. მისგან წამოსული ეს მაღალი ჟესტი ჩვენ, მოსწავლეებს უფრო მეტს გვავალებდა, უფრო მორიდებული ვყოფილყავით არა მარტო მასთან, არამედ საერთოდ მასწავლებლებ-

თან. მასწავლებელი ხომ ჩვენთვის უზენაესი ფიგურა იყო, გონების გამსხნელი, აღმზრდელი და განმანათლებელი. ჩვენც ვცდილობდით კარგად მოგვემზადებინა ყოველდღური გაკვეთილები, რომ სირცხვილი არ გვეჭამა საყვარელ მასწავლებელთან.

3. სამუშაოდ ქობულეთში ჩამოსვლის შემდეგ, ხშირად ვხვდებოდით ერთმანეთს. ჩვენი მოსწავლე-მასწავლებლის ურთიერთობას დაემატა ექიმი-პაციენტის ურთიერთობა და ბოლოს გადაიზარდა მეგობრობაშიც. გამოუვლიდა ყოფილ მოსწავლეებს, მოიკითხავდა თითოეულს, გაიგებდა ყველას მდგომარეობას, კმაყოფილებას გამოთქვამდა. მე, როგორც ექიმი, დავინტერესდებოდი მისი ჯანმრთელობის მდგომარეობით, მით უმეტეს, ის მეორე მსოფლიო ომის მონაწილე, მძიმე წლებგამოვლილი ვეტერანი ბრძანდებოდა და მისი ჯანმრთელობის კონტროლი აუცილებელი იყო. თვითონ იმდენად მორიდებული იყო, რომ გასინჯვაზე თავს შეიკავებდა. მე არ მოვეშვებოდი, მოუუნახავდი ისეთ მოტივს, რომ დავითანხმებდი. ეს მისთვის სასარგებლო იყო, ჩემთვის კი – სასიამოვნო. ის თავის მოსწავლეებთან ძალიან ახლოს იყო, როგორც მასწავლებელი და როგორც მშობელი. იგი მოსწავლე-მასწავლებლის ურთიერთობის ეტალონი იყო. ერთნაირად იზიარებდა ჩვენს სიხარულსაც და მწუხარებასაც.

4. იყო ერთი საინტერესო შემთხვევაც. თბილისში სამედიცინო ინსტიტუტში სწავლის დროს დედაქალაქში ჩამოსულმა სკენდერ მასწავლებელმა მედქალაქში მოგვაკითხა ხისადირის სკოლადამოაგრებულ მედიკოს სტუდენტებს ოთარ იშხნელიძეს, მამია ხალვაშს, მედიკო ჯაიანს, ლილი ხოზრევანიძესა და ამ სტრიქონებს ავტორს. მასწავლებელი ჩვენ გავაცანით მეგობრებს. მათ იფიქრეს, რომ რაღაცა გაუჭირდა, ალბათ, თბილისში და სტუდენტებს მოაკითხა დახმარების სათხოვნელად, მაგრამ, როცა გაიგეს, რომ მასწავლებელს არაფერი გაჭირვება არ ჰქონდა, გამოიარა და



მოიკითხა თავისი მოსწავლეების მდგომარეობა, დაინტერესდა მათი სწავლით, ჩვენი მეგობრები გაოცებულნი დარჩნენ, ასეთი ყურადღებიანი აღმზრდელ-მასწავლებელი იშვიათობააო. ჩანდა, ისინი ასე განებივრებული არ ყოფილან თავიანთი მასწავლებლებისგან. სკოლა დავამთავრეთ, დავემშვიდობეთ და მერე არც კი შეხვედრივართო. ამ შეხვედრის დროს სკენდერ მასწავლებელმა ასეთი ფაქტი გაიხსენა. ხიხაძირში მუშაობის დროს ცხოვრობდა ილიას გაბაიძის სახლში. მას ჰყავდა პატარა ქალიშვილი, რომელიც გაიზარდა, დაოჯახდა, საცხოვრებლად გადავიდა ქობულეთის რაიონის სოფელ გვარაში. ამ გოგონას პლანტაციებში დაუნახავს სკენდერ ბაჯელიძის ძმა, კოლმეურნეობის მაშინ-დელი თავკაცი ვლადიმერ ბაჯელიძე და წამოუძახია: „დედა, სკენდერ მასწავლებელი, ნეტა, აქ რამ შეაწუხა.“ ვლადიმერმა გოგონა მასთან იხმო, გამოკითხა ყველაფერი და მიხვდა, რომ ძმები ერთმანეთში ვერ გაარჩია. ეს ამბავი დიდი აღტაცებით მომიყვა ძმამო, – თქვა სკენდერ მასწავლებელმა და ხაზი გაუსვა მასწავლებლისადმი მოსწავლეთა პატივისცემას.

აჭარის ჯანდაცვის სამინისტროს ბრიგადაში ავადმყოფთა მდგომარეობის შესამოწმებლად ვიყავით ქედის რაიონში. ღონისძიების დასრულების შემდეგ რაიონის ხელმძღვანელობამ მოაწყო ბანკეტი. დაილია არაერთი სადღეგრძელო. პერსონალური სადღეგრძელოების დროს, როცა ჯერი ჩემზე დადგა, ჯანდაცვის მინისტრმა, ბატონმა ლევან ანთაძემ თქვა: ამირან ჯაიანი ცნობილია, როგორც პროფესიონალი კარდიოლოგი, მკურნალი ექიმი და ამ დარგის ხელმძღვანელი აჭარაში. ეს ყველამ ვიცით და კმაყოფილი ვართ მისი მუშაობით. მე მინდა სხვა კუთხით დავახასიათო მისი მალაქაქალაქობრივი თვისებები, რაც დამახასიათებელია, არა მარტო მისთვის, არამედ ამ ხეობის (სხალთა-ხიხანის), კერძოდ, ხიხაძირის საშუალო სკოლის კურსდამთავრებულთათვის, რომლებმაც ქ. ბათუმში, აჭარის განათლებისა და

კულტურის მუზეუმში მაღალორგანიზებულ დონეზე აღნიშნეს ხიხაძირის საშუალო სკოლის ყოფილი სასწავლო ნაწილის გამგის, აჭარის დამსახურებული მასწავლებლის, ომისა და შრომის ვეტერანის, ბატონ სკენდერ ბაჯელიძის დაბადებიდან 75-ე წლისთავი. მასწავლებელს, რომელმაც სხვებთან ერთად, დიდი როლი შეასრულა ახალგაზრდობის სწავლა-აღზრდის საქმეში, ხეობის კულტურულ დაწინაურებაში, ყოფილმა მოსწავლეებმა, კოლეგებმა ძლიერ დაუფასეს გაწეული ამავი და ისიც ისეთ დროს (1996 წ. 6 დეკემბერი), როცა ქვეყანა გაუსაძლის პირობებში იმყოფებოდა. ეს იყო მოსწავლე-მასწავლებლის ურთიერთობაში დიდი საამაყო საქმე, რამაც ქალაქის ინტელიგენციასა და ხელმძღვანელობაში დიდი მოწონება დაიმსახურა.

სკენდერ მასწავლებელი ჩემთვის უკვდავია. დღეს ჩვენს შორის იგი არ არის (დემერტმა ნათელში ამყოფოს მისი სული), მაგრამ ჩვენ არასოდეს დავივიწყებთ მას, სანამ ცოცხლები ვართ.



შოთა გაბაიძე

ეკონომისტი, ყოფილი მოსწავლე

ამაგდარი მასწავლებელი

მასწავლებლის პროფესია ურთულესია ყველა სხვა პროფესიათა შორის, რადგანაც იგი ახალგაზრდობის სულის მაფორმირებელია. ამიტომაც, ვფიქრობ, რომ მასწავლებელი, უპირველესად, კეთილი, განათლებული და ნებისყოფიანი უნდა იყოს. მე ყველა მასწავლებელში ვხედავდი სასიკეთო მუხტს, ამიტომაც ყველა კეთილად მახსენდება, ზოგი მათგანი გამორჩეულადაც კი.

სწორედ ასეთი გამორჩეულთაგანი იყო აწვანსვენებული ბატონი სკენდერ ბაჯელიძე, რომელიც 50-იან წლებში განაწილებით მოვლინებული იყო ხიხაძის საშუალო სკოლაში გეოგრაფიის მასწავლებლად. იგი ქობულეთის რაიონის სოფელ ხუცუბნიდან იყო.

კაცი ომგადანახადი,
ახოვანი და მხარგრძელი;
თავს ისე ვგრძნობდით იმასთან,
როგორც უშბასთან მთამსვლელი!
თხრობა ჰქონდა საოცნებოდ
დახვეწილი ქართულითა;
მიტომ იგი შევიყვარეთ
ყველამ სულით და გულითა.
ბერჯერ კარგი მაგალითით
დაგვამახსოვრა მან თავი;
ბევრჯერ კარგით, მხოლოდ კარგით
მხოლოდ კარგით და არ ავით!

სკენდერ მასწავლებელი რუკაზე ისე შემოხაზავდა ქალაქს თუ ქვეყანას და ისე გვესაუბრებოდა, თითქოს იქაუ-

რობა ფეხით ჰქონდა შემოვლილი. მის გაკვეთილზე იდეალური სიჩუმე სუფევდა, რომ იტყვიან, „ბუხის გაფრენის ხმასაც“ გაიგონებდით. ჩვენს ყურადღებას იგი მისდამი რიდის ძალით იპყრობდა და არა შიშით, როგორც ეს, სამწუხაროდ, ზოგიერთ მასწავლებელს სჩვეოდა. მეც გამოვცადე მასწავლებლის ხვედრი.

დიდი იყო მაშინ ხიხაძის საშუალო სკოლა, ჰქონდა ინტერნატიც, მასწავლებლები იყვნენ: გურიიდან, იმერეთიდან, სამეგრელოდან. ძირითადად კი ბათუმის პედინსტიტუტის კურსდამთავრებულები.

ჩვენი ოჯახი მაშინ 10 სულისაგან შედგებოდა. იმხანად ნ დაძმა მოსწავლე ვიყავით და ნადაბურის უბნიდან სკოლაში იქეთ და აქეთ 4 კმ-ს გავდიოდით. ჭირდა ცხოვრება, რადგან ომი ახალდამთავრებული იყო.

მე სკენდერ მასწავლებლისა და მისთანების წყალობით ინტერნატშიც ჩავირიცხე. იქ სინათლევ მთელი ღამე გვქონდა. ხშირად გვამოწმებდნენ, როგორ ვიყენებდით ამ სიკეთეს და ჩვენც ენერგიას არ ვზოგავდით, ვეწაფებოდით წიგნებს და საუკეთესო შედეგებსაც ვაღწევდით.

დღეს ბევრი ჩვენი მასწავლებელი ცოცხალი არაა. ნათელი ჰქონოდათ იმ ქვეყნად ყველა მათგანს. მეამაყება რომ ვიყავი მათი მოსწავლე და ამხანაგი.



რევაზ სურმანიძე

ვერნების საჯარო სკოლის გეოგრაფიის
მასწავლებელი, სკენდერ მასწავლებლის მოსწავლე

გზის გამკვალავი მასწავლებელი

სკენდერ მასწავლებელი გავიცანი 1954 წლის სექტემბერში, როცა ვერნების 8-წლიანი სკოლის დამთავრების შემდეგ სწავლა განვაგრძე ხიხაძის საშუალო სკოლის IX კლასში, სადაც ის გეოგრაფიას გვასწავლიდა. ის სექტემბერი განსაკუთრებული იყო, არა მარტო ჩემთვის, არამედ მთელი ჩვენი კლასელისათვის, ვინაიდან ყველა სხვადასხვა სკოლდან (ვერნები, სევანა, ბაკო, მთისუბანი, კალოთა, თხილვანა, რაქვთა, ხიხაძირი) ვიყავით მისული და მაშინ გავეცანით ერთმანეთს.

ამავე დღიდან იწყება ჩემი ნაცნობობა ხიხაძირის საშუალო სკოლის მოსწავლეებთან. აქ მოღვაწეობდნენ ისეთი გამორჩეული, სახელოვანი მასწავლებლები, როგორებიც იყვნენ: დიმიტრი ხოზრევანიძე (სკოლის დირექტორი), სკენდერ ბაჯელიძე (სასწავლო ნაწილის გამგე), ხასან (გიორგი) სირაბიძე, ასლან ხახუტაიშვილი, რევაზ ბერაძე, ჟენია კუზმინა, გივი თოდრია, ოთარ ოჩიგავა და სხვა. მათ წარუშლელი კვალი დატოვეს არა მარტო ჩემს ცხოვრებაში, პედაგოგიურ საქმიანობაში, არამედ სხალთა-ხიხანის ხეობის კულტურულ დაწინაურებაში.

ამ პერიოდში ხიხაძირის სკოლაში სწავლობდნენ ისეთი წარჩინებული მოსწავლეები, როგორებიც იყვნენ: გიორგი და ლევან აბაშიძეები, მიხეილ ჯაიანი, თამარ ცეცხლაძე, თამაზ მამულაძე, ნიკოლოზ, სერგო და ეგნატე დუმბაძეები, სოლომონ თურაძე, არჩილ ქამადაძე, აკაკი გაბაიძე, და სხვები, რომლებიც სკოლის დამთავრების წელსვე ჩაირიცხნენ უმაღლეს სასწავლებლებში.

ჩვენ ვამაყობდით ჩვენი მასწავლებლებით, განსაკუთრებით გამოვყოფდი სკენდერ ბაჯელიძეს, გეოგრაფიის მასწავლებელს, რომელიც ჩემი მომავალი სპეციალობის არჩევისას გახდა მთავარი ორიენტირი. იგი იყო ძალიან უპრეტენზიო პიროვნება, ყველაფერს აკეთებდა, რომ ჩვენ კარგად გვესწავლა. ნიშანს არ დაგიკარგავდა, გაკვეთილის მოუმზადებლობას არ გაპატიებდა. მოვიგონებ ასეთ კურიოზს. მეთექვსმეტე კლასში გეოგრაფიაში მიმდინარე შეფასებები მქონდა „ფრიადები“. დაიმედებული იმით, რომ მე ნიშნები მქონდა მიღებული და მასწავლებელი არ გამომიძახებდა, გაკვეთილის („ჩინეთის სოფლის მეურნეობა“) უსწავლელი მივედი სკოლაში. მოულოდნელად გამომიძახა და „ორიანი“ დამიწერა. შემდეგ გაკვეთილზეც გამომიძახა. საგაკვეთილო თემა მოვეყვი კარგად. ეს მომიწონა, მაგრამ დამატებით მკითხა წინა მოუმზადებელი მასალა ჩინეთზე და ისევ „ორიანი“ დამიწერა. სანამ არ მოვამზადე, ისიც არ მომეშვა. იგი ვერ იტანდა მოსწავლის კამპანიურ მუშაობას, ითხოვდა სისტემატურ მეცადინეობას. როცა დარწმუნდა ჩემში, რომ ყველა გაკვეთილს ვსწავლობდი, მეოთხედის ბოლოს საგანში „ფრიადი“ დამიწერა.

სწორედ მან განსაზღვრა ჩემს სპეციალობად გეოგრაფიის მასწავლებლობის არჩევა.

მინდა გავისხენო მისაღები გამოცდა გეოგრაფიაში. გამომცდელი იყო ქალბატონი ქეთევან ალასანი. პირველ და მეორე საკითხზე პასუხები მომიწონა, შეაფასა „ფრიადზე“ ცალ-ცალკე. გადადი მესამე საკითხზე – მითხრა (გამოცდა ტარდებოდა გეოგრაფიის კაბინეტში – სადაც ბევრი რუკა იყო). ამოვიცანი ჩემი თემის („სსრ კავშირის ბუნებრივი ზონები“) რუკა, ავიღე საჩვენებელი ჯოხი და დავიწვე საკითხის გაშუქება რუკაზე ჩვენებით. საკმარისიაო, – შემაჩერა. ამ საკითხშიც „ფრიადი“ დამიწერა და მკითხა: – ვინ გასწავლიდა გეოგრაფიას? – სკენდერ ბაჯელიძე-მეთქი. ჩვე-

ნი სკენდერი? – დიხ-მეთქი, – სწრაფად დაუდასტურე. ამან გაახარა ქალბატონი ქეთევანი. შემდეგ გავიგე, რომ ჩემი საყვარელი მასწავლებელი, მისი გამორჩეული სტუდენტი ყოფილა.

ჩვენ, მოსწავლეები, სკოლაში ვხედავდით მის მართლაც მუხლჩაუხრელ მუშაობას. იგი ცდილობდა, რაც შეიძლება მეტი ცოდნა მიეცა მოსწავლეებისათვის. მისი დიდი დამსახურებაა ისიც, რომ ჩემი კლასის 18 მოსწავლიდან 13 მოსწავლე პირველ წელსვე გახდა სტუდენტი: ოთარ იშხნელიძე, მამია ხალვაში, ალექსანდრე ჯაიანი (ექიმები), გრიგოლ შარაშიძე (ჟურნალისტი), დანაჩენმა ცხრამ გავყვეით ჩვენი საყვარელი მასწავლებლის გზას – პედაგოგობა ავირჩიეთ.

ვესწრებოდი სკენდერ მასწავლებლის დაბადებიდან 75-ე წლისთავის აღსანიშნავ საიუბილეო საღამოს, რომელიც მოამზადეს და ჩაატარეს ხიხაძირის სკოლადმთავრებულმა, მისმა ყოფილმა მოსწავლეებმა და კოლეგებმა. მომეცა საშუალება და მისასალმებელი სიტყვით მოვეფერე და მივულოცე მისი დაბადების ღირსსახსოვარი თარიღი.

სკენდერ მასწავლებელი ჩვენს ოჯახთანაც მეგობრობდა. იცნობდა მამაჩემს, რომელიც მისი ხიხაძირის საშუალო სკოლაში მოღვაწეობის პერიოდში იყო ხიხაძირის სასოფლო საბჭოს მდივანი, ყოველთვის იზიარებდა ოჯახის სიხარულსაც და მწუხარებასაც. გვიყვარდა ის არა მხოლოდ როგორც აღმზრდელი, მასწავლებელი, არამედ აგრეთვე, როგორც მშობელი-მამა.

50 წელია გეოგრაფიას ვასწავლი სკოლაში. ყოველ გაკვეთილზე თვალწინ მიდგას სკენდერ მასწავლებლის სახე.

ღმერთმა ნათელში ამყოფოს მისი სული მუდმივ სასუფეველში.

ასეთი მახსოვს სკენდერ მასწავლებელი

სკენდერ მასწავლებელი გეოგრაფიას გვასწავლიდა ჩაისუბნის (ქობულეთის რაიონი) სკოლა-ინტერნატის VII კლასში. იგი ჩვენთან მოვიდა ხულოს რაიონის ხიხაძირის საშუალო სკოლაში წლების განმავლობაში მუშაობის შემდეგ. თავისი ადამიანური თვისებებით, თავმდაბლობით, უბრალობით, გარეგნული იერ-სახით, სიღარბაისლით, სიღინჯით, თავაზიანობით, ნამდვილად საუკეთესო პედაგოგის ტიპი იყო და, როგორც სპეციალისტი – აღიარებული. მისი მოსვლა გაკვეთილზე მოსწავლეებს გვიხაროდა. გეოგრაფია ისე შეგვაყვარა, რომ არასდროს კლასში გაკვეთილის უსწავლელი არავინ მოდიოდა. გაკვეთილს ისე საინტერესოდ და მიმზიდველად გვიხსნიდა, რომ ძირითადად იქვე ვსწავლობდით. კლასში ამ საგანში „ოროსანი“ მოსწავლე არ გვეყოლია.

ღერეფანში რომ შემოვიდოდა, თავისი ღამაში იუმორით შეგვხვდებოდა, გვეფერებოდა. იგი მოსწავლეების უსაყვარლესი აღმზრდელი, მასწავლებელი და პედაგოგიკტივის აქტიური წევრი, გამოცდილების გამზიარებელი, საუკეთესო კოლეგა და მეგობარი იყო. სკენდერ მასწავლებელს, როგორც კარგ სპეციალისტს, უფროს კოლეგას, ომის მძიმე წლებგამოვილილს, ყველანი მოკრძალებული ვხვდებოდით.

აი, ასეთი შთაბეჭდილებები დამრჩა მე-7 კლასელ მოსწავლეს ცობილ პედაგოგ სკენდერ ბაჯელიძეზე.

იგი მამაჩემის კარგი მეგობარი იყო. სკოლა-ინტერნატის ღირეპქორად მამის მუშაობის დროსაც და ჩვენი სკოლიდან მშობლიურ ხუცუბნის სკოლაში სამუშაოდ გადასვლის შემდეგაც იგი ჩვენი ოჯახის ხშირი სტუმარი იყო.

ზოგიერთი ეპიზოდის გახსენება ჩემი წარსულიდან

მახსენდება მასთან ჩემი ბოლო შეხვედრა. მოკითხვის და მოფერების შემდეგ იუმორით მითხრა: თუ მათემატიკოსი უნდა გამოსულიყავი, გეოგრაფიის სწავლით რაღას იკლავდი თავსო, და კეთილი სურვილებით დამემშვიდობა. ამ შეხვედრის შემდეგ მალე გავიგეთ მისი გარდაცვალების შესახებ. დმერთმა ნათელში ამყოფოს მისი სული.

მარეთის ხეობაში 1950-იან წლებში საშუალო სკოლა, უჩამბის გარდა, არსად არ ფუნქციონირებდა. უჩამბა კი ჩემი სოფლიდან (დარჩიძეებიდან) დიდი მანძილით, 30 კმ-ითაა დაშორებული. ამიტომ საშუალო სკოლაში სწავლის გაგრძელება მომიხდა ხულოს რაიონის ხიხაძირის საშუალო სკოლაში, რომელიც შედარებით ახლოს იყო ჩვენთან. ვცხოვრობდი სასკოლო ინტერნატში.

იმ პერიოდისათვის ხიხაძირის საშუალო სკოლა თავისი ხელმძღვანელებით, კადრებით და მომთხოვნელობით განთქმული იყო მთელს აჭარაში. მოსწავლეებმა კარგად ვიცოდით, რომ სკოლის დირექტორი, აწვანსვენებული დიმიტრი ხოზრევანიძე, ყოველ გაზაფხულზე, როცა უმაღლეს სასწავლებელში სახელმწიფო გამოცდები დამთავრდებოდა, განათლების სამინისტროსთან შეთანხმებით, არჩევდა ცალკეული საგნის ფრიადოსან კურსდამთავრებულებს და სამუშაოდ მასთან ხიხაძირში იწვევდა. ამიტომ ხიხაძირის სკოლა ყოველთვის წარმატებული იყო, შედეგი კი ნაყოფიერი. ამ სკოლის ყველა კურსდამთავრებული წარჩინებით ამთავრებდა სხვადასხვა უმაღლეს სასწავლებელს.

ჩემი საშუალო სკოლაში სამი წლის სწავლის პერიოდში არ მახსოვს რომელიმე მასწავლებლისადმი მქონოდა სიძულვილის გრძნობა: პირიქით, თითოეული მასწავლებლისადმი ყოველი მოსწავლე პატივისცემითა და სიყვარულის გრძნობით ვიყავით გამსჭვალული, ხოლო თვით მასწავლებლები მოსწავლეებს არ გვაკლებდნენ მომთხოვნელობასა და მშობლიურ ზრუნვას.



აი, ისინიც: დიმიტრი ხოზრევანიძე (სკოლის დირექტორი), ალექსანდრე მიქელაძე, ოთარ ოჩიგავა, ხასან სირაბიძე, სკენდერ ბაჯელიძე, დავით ღლონტი, დავით გოგოძე, რეზო ბერაძე, ასლან ხახუტაიშვილი და სხვები.

სისტემატურად მაგონდება ზოგიერთი ეპიზოდი ცალკეულ მასწავლებელზე, რომელიც ჩემს ცხოვრებაში ჭკუასა და მუშაობაში გამოცდილებას მმატებდა.

განსაკუთრებით გამოვყოფდი მასწავლებელ სკენდერ ბაჯელიძის მიერ ჩატარებულ გაკვეთილებს გეოგრაფიაში. როგორც წესი, გაკვეთილები გეოგრაფიის კაბინეტში გვიტარდებოდა. სკენდერ მასწავლებლის გაკვეთილზე მოსწავლეები სმენად ვიყავით გადაქცეულნი. მას ოსტატურად შეეძლო ახალი მასალის ახსნის პერიოდში რუკასთან მდგარიყო ზურგით, ჯოხით მოეხაზა და ეჩვენებინა ჩვენთვის ყველა ის წერტილი და კუთხე-კუნჭული, რაც რუკაზე იყო აღნიშნული და მოსახაზი. ცხადია, ჩვენ, მოსწავლეებსაც, ანალოგიურად შეგვასწავლა ეს ფორმა და შეგვეძლო თითოეულს რუკასთან დგომისა და ცალკეული დეტალის მოხაზვა-ჩვენებით ჩაგვებარებინა მისთვის ყოველი გაკვეთილი.

მოსწავლეთა გამოძახებას გაკვეთილზე იმ პერიოდისათვის თითოეული მასწავლებელი, საკლასო ჟურნალთან ერთად, უბის წიგნაკით ახდენდა.

მეორე მეოთხედი ახალი დაწყებული იყო (ნოემბერი), შაბათ დილას გაკვეთილების შემდეგ წავედი სოფელში, კვირა დღეს საღამოს დაებრუნდი ჩემი სოფლიდან ხისაძირში. მანძილი ჩემი სოფლიდან ხისაძირამდე დაახლოებით 30 კმ-ია. ამ გზის ფეხით გავლა, რა თქმა უნდა, დამღლედი იყო, ამიტომ გაკვეთილების მომზადება ვეღარ მოვასწარი. გეოგრაფიის გაკვეთილი არ მქონდა წაკითხული. მე კი თითქოს დარწმუნებული ვიყავი, რომ გამოძახება არ მიწვედა. თავის გამოჩენის მიზნით გაკვეთილზე ხელის აწევით შევაწუხე სკენდერ მასწავლებელი, რათა გამოვეძახებინე. თურ-

მე მან შემამჩნია, რომ გაკვეთილი არ მქონდა მასწაველი. გაკვეთილის ახსნისათვის ცოტა დრო იყო დარჩენილი, მაგრამ მაინც გამომიძახა და „ორიანი“ დამიწერა.

მეოთხედის დასრულებამდე გეოგრაფიაში ყოველ გაკვეთილს განსაკუთრებულად ვამზადებდი, ვცდილობდი, ორიანი გამოემსწორებინა, მაგრამ არა და არ გამომიძახა. დადგა მეოთხედის დასასრული, ვეხვეწები გამომიძახე, გამომიკითხე მთელი მეოთხედის მასალა-მეთქი, მაგრამ მაინც არ გამომიძახა. როცა მეოთხედური ნიშნები გამოგვიცხადეს, გეოგრაფიაში ნიშანი „ხუთიანი“ მეწერა, მან კი დასძინა – „ხომ გასწავლე ყველა გაკვეთილი ფრიადზეო.“ ასეთი პრინციპული იყო პატივცემული სკენდერი.

საკმაოდ დიდი ხანი იყო გასული, სკენდერ მასწავლებელს რომ აღარ შევხვედრივარ. ერთ დღეს მივდივარ ინსტიტუტისაკენ. როცა პიონერთა პარკის შესასვლელს გავცდი, ჯიბიდან ამოვიღე სიგარეტი – უნდა მოუყიდო და ამ დროს ინსტიტუტიდან ჩემკენ პირდაპირ მომავალი პატივცემული სკენდერ მასწავლებელი შევამჩნიე. მომერიდა მასთან სიგარეტის მოწვევა, დავიწყე მოკიდებული სიგარეტის ჩაქრობა და მისი გადაგდება, მაგრამ იმდენად შემრცხვა, რომ დავიბენი და დროულად ვერ მოვახერხე, ვერ მოვასწარი მისი მალულად გადაგდება. ჩემი ფორიაქი შორიდან კარგად შეამჩნია სკენდერ მასწავლებელმა და დაიწყო ყვირილი – „არ გადააგდო, ბიჭო, არ გადააგდო შოთაო“, მაგრამ მე ჩემი მაინც შევასრულე. ჩემთან მოვიდა, გულთბილად ვისაუბრეთ. ერთხელ კიდევ გავიხსენეთ სკოლის ამბები, ბევრი ვიცინეთ იმ ორიანის შესახებ, რომელზედაც ზემოთ მქონდა საუბარი. გავიხსენეთ პედაგოგიურ სარბიელზე გაწეული მოღვაწეობის ზოგიერთი დეტალი.

დღესაც კარგი აღმზრდელისა და ამაგდარი პედაგოგის, პატივცემული სკენდერ ბაჯელიძის მიერ გადმოცემული ცოდნა და კაცურ-კაცობის თვისებები თან დამყვება ჩემი ცხოვრების გზაზე.



ლევან სურმანიძე

ექიმი-სტომატოლოგი,
ყოფილი მოსწავლე

ჭირის გამზიარებელიც იყო

1956 წელს დავამთავრე ვერნების 7-წლიანი (შემდგომში საშუალო, და ამჟამად საჯარო) სკოლა და სწავლა განვაგრძე ხიხაძირის საშუალო სკოლაში, სადაც სკოლის დირექტორად ბრძანდებოდა ცნობილი პედაგოგი, კარგი სკოლათმცოდნე, დისციპლინის მოყვარული და მომთხოვნი პიროვნება, სულმნათი დიმიტრი ხოზრევანიძე, ხოლო სასწავლო ნაწილის გამგე გახლდათ სკენდერ ბაჯელიძე. აქედან დაიწყო ჩემი და ჩემი დღევანდელი ოჯახის ნაცნობობა აწვანსვენებულ სკენდერ მასწავლებელთან.

მოსაგონარი ბევრი კარგი მაქვს, მაგრამ შევჩერდები ორ მომენტზე. ხიხაძირის კლუბში მოიტანეს კინოფილმი „ბატონი 420“. ორგანიზებული წესით ეს კინო ვნახეთ სკოლის მოსწავლეებმაც და მასწავლებლებმაც. ფილმი, განსაკუთრებით მუსიკა, ძალიან მოგვეწონა. ეს ფილმი შემდეგ წაიღეს სოფელ კალოთაში (თანაკლასელებს ამირან მამულაძის სოფელში). მე და ამირანმა მოვილაპარაკეთ და უნებართვოდ წავვედით კალოთაში ამ ფილმის განმეორებით სანახავად იმ ანგარიშით, რომ სადამოს ამირანთან დავრჩებოდით, დილით ადრე კი, საუზმის დაწყებამდე ჩამოვიდოდით ინტერნატში. გვიან სადამოს და ადრე დილით შემოწმება ხდებოდა აღმზრდელის მიერ, ან დირექტორი მოვიდოდა სისტემატურად და თანაც ისე, რომ ვერ გავიგებდით მის ინტერნატში შემოსვლას. სწორედ იმ დილას დირექტორის მოსვლას დაემთხვა ჩვენი კალოთიდან ჩამოსვლა. შეგვაძმია, „გა-მოგვიჭირა“ და ინტერნატიდან გაგვრიცხა. მე და ამირანი დავდიოდით ვერნებიდან, ამიტომ ძალიან გაგვიჭირდა. ვსწავ-

ლობდით კარგად, მაგრამ სოფლიდან სიარულმა უარყოფითად იმოქმედა ჩვენს ნიშნებზეც.

როგორც მეგობარმა, მამაჩემმა სთხოვა სკენდერ მასწავლებელს შუამდგომლობა დირექტორთან ჩვენი ინტერნატში დაბრუნების თაობაზე. მართლაც, სკენდერ მასწავლებლის შუამდგომლობით დაგვაბრუნეს ინტერნატში, დირექტორმა დანაშაული გვაპატიო სკენდერ მასწავლებლის თანდასწრებით, იქვე გვითხრა, პატარა შეცდომას ან დანაშაულს თუ მიჩქმალავ, აპატიებ მოსწავლეს, მაშინ ის დიდ დანაშაულს ჩაიდენსო. ჩვენ პირობა მივეცით, რომ ასეთ რამეს არ გავიმეორებდით და მართლაც, ანალოგიურ საქციელს ადგილი აღარასდროს ჰქონია.

დირექტორი ძალიან მკაცრი და მომთხოვნი იყო. ახლა ვამბობთ, რომ ის მართალი იყო, როგორც ჩვენი „დამსჯელი“, სკენდერ მასწავლებელი კი ჩვენი მშველელი და გადამრჩენელი. ორივე დიდი პედაგოგი ბრძანდებოდა. ღმერთმა აცხონოს ისინი.

გავისხენებ კიდევ ერთ მომენტს.

1978 წელს გარდამეცვალა მეუღლე - ნათელა ვარდოსანიძე, რომელიც ჩემი თანაკლასელი იყო (მაშინ დაბა ჩაქვში ვიყავით საცხოვრებლად გადასული). ამ ტრაგიკულ დღეს, საიდან გაიგო, ვერ გეტყვით, მოვიდა ჩვენს ოჯახში სკენდერ მასწავლებელი და თანადგომა გამოგვიცხადა, ჩემი მწუხარება გაიზიარა. განა მარტო მან? და მხოლოდ მაშინ? ის შემდეგ დღეებშიც ხშირად გამოვივლიდა ოჯახში, ან სამსახურში, მომიკითხავდა, დამამშვიდებდა, დამარიგებდა და წავიდოდა. რა თქმა უნდა, ძალიან ყურადღებიანი, თბილი და გულისხმიერი მასწავლებლის საუბარი, რჩევა-დარიგება და თანადგომა მაღამოსავით მამშვიდებდა, თუ ამ დროს შეიძლება დამშვიდებაზე საუბარი. ეს იყო მისი მორალური თანადგომა. ტირილი ხალხ-მრავლობით ფასდება, თორემ სიკვდილი ყველას ხვედრია, „ვერ დაიჭირავს სიკვდილსა, გზა ვიწრო, ვერცა კლდოვანი“.

ღმერთმა ნათელში ამყოფოს მისი სული.



მისთვის განყოფილება

ვასრულებთ სკენდერ მასწავლებლის „ანდერძს“

ანდერძი ისეთი თხოვნაა, უნდა შესრულდეს.

მცირე განმარტებისთვის

ანდერძი იურიდიული ტერმინია. ის აღიარებულია როგორც სახელმწიფო სამართალში, ისე რელიგიურ კანონმდებლობაში.

სიტყვა „ანდერძი“ ქართული ენის განმარტებით ლექსიკონში წარმოდგენილია რამდენიმე ასპექტით. ერთ-ერთი ასეთია: „დარიგება, მითითება, რომელსაც უტოვებენ თანამოაზრეებს“. ანდერძი, როგორც წესი, უნდა შესრულდეს მეანდერძის სიკვდილს შემდეგ.

ანდერძის შეუსრულებლობა არ შეიძლება, ზოგიერთი გამონაკლისის გარდა. ანდერძის შესრულებაზე უარის თქმა, ან მისი შეცვლა (თუ ქონებრივ საკუთრებას არ ეხება) დაშვებულია მხოლოდ მაშინ, როცა მისი შესრულებით ზიანდება მეანდერძე. ფუჭდება მისი ავტორიტეტი, იკარგება მისი ღვაწლი, ამაგი და კვალი ნათელი.

რატომ დაგვჭირდა ეს ტერმინი? საიდან გაჩნდა ანდერძი?

რა თქმა უნდა, სკენდერ მასწავლებელს ჩვენთვის, ყოფილ მოსწავლეებისთვის, ოფიციალური ანდერძი არ დაუტოვებია, ან რა ჰქონდა ჩვენთვის საანდერძო?

ერთ-ერთი შეხვედრის დროს სკენდერ მასწავლებელმა იკითხა: თქვენ წიგნებს წერთ (მან ეს იცოდა, ყოველ გამოსვებულ წიგნს ვჩუქნიდით). რა ჰქენით, დაამთავრეთ წერა

თუ აგრძელებთ კიდევ? პასუხის მოსმენის შემდეგ მოვცა რამდენიმეგვერდიანი დაბეჭდილი მასალა სათაურით „ბრძნული შეგონებანი, კეთილი რჩევები“ და გვითხრა, წაიკითხეთ, თქვენც მოგეწონებათ, თუ ახალ წიგნს წერთ, თემატურად თუ უკავშირდება, ეს მასალაც რომ შეიტანოთ წიგნში, კარგი იქნებაო.

რა იყო ეს მასალა?

ბატონი სკენდერი ბევრს კითხულობდა, პენსიაში გასვლის შემდეგ უფრო მეტი დრო ჰქონდა ამისათვის. მას განსაკუთრებით მოსწონდა აღზრდის თემაზე დაწერილი წიგნები. ერთ-ერთი ასეთი იყო სპარსული კლასიკური მწერლობის თვალსაჩინო ძეგლი, ამირ ანსარ ქეი-ქაუსის დიდაქტიკური თხზულება, „ყაბუს-ნამე“ (დარიგებათა წიგნი) – მე-11 საუკუნის სპარსული ლიტერატურის ერთ-ერთი საყურადღებო ნაწარმოები, რომელშიც ავტორი იძლევა ცნობებს ისტორიული საზოგადოებრივი ყოფის ისეთ საკითხებზე, როგორცაა: სტუმარმასპინძლობა, ცოლის შერთვა, შვილების აღზრდა, ღვინის სმა, ცხოვრების წესები, შრომისა და ვაჭრობის ეთიკა და სხვა.

„ყაბუს-ნამე“ შედგება 44 კარისგან. XVII საუკუნეში მეფე-მწიგნობარმა ვახტანგ VI-მ თარგმნა აღნიშნული წიგნის 11 კარი და გამოსცა სათაურით „ამირნასარიანი“, ჯერ პროზად, შემდეგ კი ლექსად, ჩვენ დროში კი (1978 წ.) გამოქვეყნდა მისი სრული თარგმანი.

წიგნის ზნეობრივ-დიდაქტიკური მხარე – ძირითადი შინაარსი კეთილი რჩევა-დარიგებანი იმდენად მნიშვნელოვანია და სასარგებლო ყველა თაობისათვის, რომ მეფე-მწიგნობარმა ამისათვის დრო მონახა და იგი თარგმნა მშობლიურ ენაზე. ეს წიგნი საქართველოს მეცნიერებათა აკადემიის სამეცნიერო-საგამომცემლო საბჭოს დადგენილებით 1978 წელს კვლავ გამოიცა 20 000 ტირაჟით.



ბრძნული შეგონებანი, კეთილი რჩევები

მიუხედავად აღნიშნულისა, წიგნი ბიბლიოგრაფიულ იშვიათობად იქცა. აჭარაში იგი არც ერთ ბიბლიოთეკაში არ არის. ჩვენს მასწავლებელს, პროფესიონალ დიდაქტიკოსს, მოეწონა ავტორის დარიგებანი აღზრდის თემაზე, ამოწერა საკმაოდ ბევრი ადგილი სათაურით „ბრძნული შეგონებანი. კეთილი რჩევები.“ – რაკი „ყაბუს-ნამე“ ბიბლიოგრაფიულ იშვიათობად იქცა, მინდა მკითხველისათვის ხელმისაწვდომი გახდეს სკენდერ მასწავლებლის მიერ გამორჩეული ეს ბრძნული შეგონებანი. „ის დაეხმარება მშობლებს, პედაგოგებს - შვილების, მომავალი თაობის აღზრდაში“, – წერდა სკენდერ მასწავლებელი თანდართულ წერილში.

სკენდერ მასწავლებელი იმეორებს „ყაბუს-ნამეს“ ავტორის სიტყვებს: „იმედი მაქვს, რომ ეს სასარგებლო იქნება და კმაყოფილებას აგრძნობინებს შემქმნელსაც და წამკითხველსაც, გადამწერსაც და მსმენელსაც“ ... „მოიძებნებიან ადამიანები, რომლებიც ელიან ხელსაყრელ შემთხვევას, ეს დარიგებანი მოისმინონ და საქმეში გამოიყენონ“.

ნათქვამია, უფროსის თხოვნა ბრძანებაზე უფრო ძლიერი აო. მასწავლებლის თხოვნა ჩვენთვის დავალებაზე მეტი იყო. სამწუხაროდ, ეს თხოვნა მის სიცოცხლეში ვერ შევასრულეთ. ახლა, მისი გარდაცვალების შემდეგ, მასზე დაწერილი წიგნის ბოლოში წარმოვადგინეთ ეს მასალა „მასწავლებლის „ანდერძის“ სახელწოდებით.

მამა შვილს მიმართავს:

ამ წუთისოფლიდან ჩემი ხვედრი ეს სიგყვებია, ხოლო ჩემთვის ყველაზე ძვირფასი შენ ხარ. მე განვემზადე იმქვეყნად გასამგზავრებლად, შენ კი გამოგიგზავნე ის, რაც წილად მხვდა (დაწერილი წიგნი „ყაბუს-ნამე“).

მამას დიდი სიმდიდრე არ ჰქონდა. მხოლოდ ეს წიგნი, რომელშიც მრავალი დარიგებაა, დაუტოვა შვილს ქონებად, ცხოვრებაში სახელმძღვანელოდ. ეს დარიგებანი ყველა შვილისათვის სასარგებლო რამ არის, მით უფრო თანამედროვე გლობალურ ეპოქაში.

– ჩვენმა შემოქმედმა ისურვა, ქვეყანა რომ აყვავებული ყოფილიყო, შთამომავლობითი უნარი დააწესა და მშობელთა ცხოველური ვნება გახადა საბაბი მემკვიდრის გაჩენისა, – მოძღვრავს მამა შვილს.

– რაკი გაგაჩინა, მშობელს პატივი უნდა სცე.

– მშობელი შუამავალია შენსა და შემოქმედს შორის.

– დედები და მამები წინამძღოლები არიან.

– მშობლის გულის ბრუნვას აბუჩად ნუ აიგდებ, რადგან შემოქმედი მშობლის მხარეს დაიჭერს. მშობლებს რომ წინასწარმეგყველის ხნობამდე ეცხოვრათ, წინასწარმეგყველი ვალდებული იქნებოდა ისინი თავის თავზე მალა დაეყენებინა, მათ წინაშე ქედი მოეხარა და შვილის შესაფერისად მოქცეულიყო, მაშინ ეს სიგყვები უმწეო იქნებოდა: „მე ვარ მეუფე ადამის შვილებისა“. ამიგომ შემოქმედმა წინასწარმეგყველის მშობლების სიკვდილი დააწესა. აქედან გამომდინარე, საერთოდ მშობლის სიკვდილი კანონად იქცა.

– თუ შენ მშობლებს სარწმუნოებრივი თვალსაზრისით არ მიუღებ, შენი ადამიანობით მიუღეფი.

– გამორჩენას ნუ ეძებ და მშობლებს ისე მოეპყარი, როგორც ამას შენ შვილებისაგან მოელი.

– ადამიანი ნაყოფის მსგავსია, მშობლები ხისა. ხეს რაც უფრო კარგად მოუვლი, ნაყოფსაც კარგად გამოიღებს. თუ მშობლებს მეტი რილით და კრძალვით მოეპყრობი, მათი ღოცვა-კურთხევა მალე სასურველ შედეგს გამოიღებს და უზენაესი და უწმინდესი ღვთის წყალობას დაუახლოვდება.

– მემკვიდრეობის გულისათვის მამის სიკვდილი არ ისურვო, მშობლების სიკვდილის გარეშეც მიიღებ შენს წილხვედრს. ყველა იმას მიიღებს, რაც ბედისწერით გეკუთვნის, საკუთარი წილისათვის თავს ძალიან ნუ შეიწუხებ, რადგან ამით წილი არ გაიზრდება. ნათქვამია: „იცხოვრე მოკრძალებით და არა გამოძალავით.“

– თუ გსურს შენი წილხვედრით ღვთის მაღლიერი იყო, დარწმუნებისთვის შეხედე მას, ვისი მდგომარეობაც შენს ყოფაზე უარესია, რათა მუდამ ღვთის მაღლიერი იყო.

– თუ ქონებით ღარიბი იქნები, ეცადე გონებით მდიდარი იყო. გონება ქონებაზე უკეთესია. ჭკუით შეიძლება სიმდიდრე დააგროვო, სიმდიდრით კი ჭკუას ვერ შეიძენ. უჭკუო კაცი მალე დაღარიბდება. ჭკვიანის ქონებას კი ვერც ქურდი მოიგაცებს და ვერც წყალი და ცეცხლი გაანადგურებს. თუ ჭკუა მოგეძევება, განათლდი, რადგან გონება განათლების გარეშე იგივეა, რაც კაცი სამოსის გარეშე, ადამიანი სახის გარეშე და სხეული სულის გარეშე. ნათქვამია: „განათლება გონების სახეაო.“

ცოდნის ფასი

– უსწავლელი კაცი მუდამ უსარგებლოა ხესავით, რომელსაც გოგები აქვს, მაგრამ ჩრდილი არ გააჩნია.

– კაცი ცოდნით ფასდება და არა გვარიშვილობით.

– ეცადე პირადი ღირსებაც გაგაჩნდეს, რადგან პირადი ღირსება შთამომავლობით ღირსებაზე უმჯობესია.

– სიციყვას თუ სიბრძნის სურნელი არ ასდის, ჯობს უთქმელი დარჩეს.

– სიციყვა ღვინოს ჭგავს: მან შეიძლება თავი გატკინოს და თავის ტკივილის წამლადაც გამოიღვას.

– თუ არ გეკითხებიან, ნუ ილაპარაკებ.

– უხამს საუბარს ერიდე და თუ რამეს გეკითხებიან, სწორად უპასუხე.

– ვიდრე არ გთხოვენ, რჩევა-დარიგებას ნურავის მისცემ, მით უმეტეს თემამზე, რომლებმედაც დარიგება არ ჭრის.

– სხვების თანდასწრებით ნურავის დაარიგებ. ნათქვამია, ხალხის თანდასწრებით ვინმესთვის ჭკუის სწავლება ლანძღვას უღრის.

– როგორც კეთილ სიციყვას არ დაიშურებ, ასევე ნუ დაიშურებ შეძლებისდაგვარად საჩუქრის გაკეთებას. ხალხი საჩუქრით უფრო იხიბლება, ვიდრე სიციყვით.

– საეჭვო ადგილებს ერიდე. ავისმზრახველი და უზნეო მეგობრისაგან თავი შორს დაიჭირე და საკუთარი თავის მგერი ნუ იქნები.

– ისეთ ადგილებში იარე, რომ, თუ ძებნას დაგიწყებენ და მოგაგნებენ, არ შეგრცხვეს.

– ხალხის უბედურება ნუ გაგახარებს, რათა ხალხს შენი უბედურება არ გაუხარდეს.

– სამართლიანად მოიქეცი და სამართლიანად მოგექცევიან.

– კარგი თქვი, რათა კარგი მოისმინო.

– მწირ მიწაზე ნურაფერს დასთეს, რადგან ვერაფერს მოიმკი.

– კარგს კარგით მიუზღე და კეთილის მასწავლებელი იყავი.

– როცა ადამიანს სიკეთეს მოუგან, ის სიკეთე შენც იმავე ზომით გარგებს, რამედაც იმ კაცს არგო. თუ ვინმეს მიმართ ბოროტებას ჩაიდენ, შენც ისევე შეწუხდები, როგორც ისინი.

– თუ ვინმეს დაგანჯავ, შენც დაიგანჯები.

– თუ შენ რაიმე არ გსიამოვნებს, იმით სხვას ვერ ასიამოვნებ.

– სიკეთისა და ბოროტების სამბაურს ამქვეყნად მიიღებ, ვიდრე იმქვეყნად წახვიდოდე.

– ვიდრე შეგიძლია, ადამიანისათვის სიკეთეს ნუ დაიშურებ, რადგან სიკეთე ბოლოს ნაყოფს გამოიღებს.

– ენით ერთს ნუ იტყვი და გულით მეორეს ნუ იქმ. ნუ დაემგვანები ისეთ გამყიდველს, რომელიც ხორბლის ნაცვლად ჭვავს შემოგაჩენებს.

– ყოველ საქმეში შენ იყავი შენი თქმის მსაჯული, რადგან ვინც საკუთარ თავს განსჯის, მას მსაჯული არ დასჭირდება.

– შენი ავ-კარგი ისეთ კაცს უთხარ, რომელიც შენს ბედსა და უბედობას გაიზიარებს.

– მწუხარებას და ბედნიერებას ყველას ნუ გაუმხელ.

– ყოველგვარი კარგი თუ ცუდი ამბავი მაშინვე ნუ გაგამხიარულებს და ნუ შეგაწუხებს, რადგან ეს ბავშვური საქციელია.

– მოთმინებიდან ნურასდროს გამოხვალ – ბრძენთ არც სიმართლე აღელვებთ და არც სიცრუე.

– თუ ბედნიერებას მწუხარება მოსდევს, ბედნიერებად ნუ ჩათვლი, ასევე, გაჭირვებას თუ დალხინება მოსდევს, გაჭირვებად ნუ მიიჩნევ.

– უბედობის დროს უფრო მეტი სიმტკიცე გმართებს.

– ვიდრე პირში სული გიდგას, სიმართლის გზას ნუ დააგდებ.

– თუ ვინმე შეგეკამათება, ღუმელით შეაწყვეტინე ლაყბობა.

– იცოდე, ყბელს მხოლოდ მუნჯი დალღის.

– ყველას უფლებას პატივი ეცი, განსაკუთრებით კი ახლობლებისას.

– მოხუცი ოჯახში იგივეა, რაც წინასწარმეტყველი საკრებულოში.

– ძლიერ სასარგებლოა ცოდნის შეთვისება და სიზარმაცის გამო სხეულს დასჯი.

– სიზარმაცე განის ჭიააო.

– საკუთარი სხეული იძულებით უნდა მოთოკო და სურვილისამებრ დაიმორჩილო, რადგან ვინც საკუთარ სხეულს ვერ დაიმორჩილებს, იგი ვერც ცოდნას შეიძენს.

– თუ სხეულს დაიმორჩილებ, სააქაო და საიქიო სასუფეველს დაიმკვიდრებ.

– ყოველგვარი სიკეთის საფუძველი ცოდნა, მორჩილება, ღვთისმოსაობა, თავმდაბლობა, სამართლიანობა და მოკრძალებაა.

– მოკრძალება სარწმუნოების ნავსაყუდელიაო, მაგრამ მოკრძალებას ხშირად ადამიანისთვის ზიანიც მოაქვს.

– ისეთი მოკრძალებული ნუ იქნები, რომ ამით შენს საქმეს ავნო და უკუღმა წაიყვანო.

– ზოგჯერ მოურიდებლადაც უნდა მოიქცე, თუ გსურს, რომ მიზანს მიაღწიო.

– ერიდე მხოლოდ ბილწსიგყვობას, სულმოკლეობას, სიცრუეს, ურწმუნოებას.

– ქველმოქმედებას მოკლებულ განათლებულ ადამიანს განათლებულად ნუ მიიჩნევ.

– ნუ ისაუბრებ უვიცთან, განსაკუთრებით მკვეხარასთან.

– მხოლოდ სახელოვან ხალხთან ისაუბრე, მასთან იქონიე ურთიერთობა. ამით კარგ სახელს მოიხვეჭ.

– თუ ვინმე დახმარებას გთხოვს, ხელს ნუ ჰკრავ, რადგან მას თავისი გაჭირვებაც ეყოფა.

– ქველმოქმედება და კაცთმოყვარეობა საქველმოქმედო მიზნად გაიხადე და ცუდ ჩვევებს მოერიდე.

– ზედმეტად ხელგაშლილი ნუ იქნები, რადგან ამის შედეგად საზრუნავი მოგემაგება – ეს კი დამცირებამდე მიგიყვანს.

– ეცადე მხოლოდ განსწავლული ხალხის ქება დაიმსახურო, რადგან უვიცთა და მდაბითთა შექება სათაკილოა.

– როცა სულელი ან უვიცი გაქებს, მაშინ მისი ჭკუის მოსაწონი სისულელე გაქვს ჩადენილი.

– ფიცხი და მკვახე ნუ იქნები, მომთმენი იყავ, მაგრამ ისეთი ლბილიც ნუ იქნები, სილბოს გამო გადაგყლაპონ. ისეთი უხეშიც ნუ იქნები, ვერასდროს თითი ვერ დაგაკარონ.

– ყველა რჯულის ხალხთან კარგი დამოკიდებულება იქონიე, რადგან კეთილი განწყობით შეგიძლია მიაღწიო საწადელს მგრებთანაც და მოყვრებთანაც.

– ბოროტებას ნურავის ნუ შთააგონებ, რადგან ვინმესთვის ბოროტების შთაგონება იგივეა, რაც ბოროტების ჩადენა.

– თუ ვინმე დაუმსახურებლად შეურაცხყოფას მოგაყენებს, ეცადე, სამაგიერო არ გადაუხადო.

– ადამიანობის საფუძველი მხოლოდ სათნოობაა და თუ კაცი ხარ, სათნო იყავი.

– ადამიანმა სარკეში უნდა ჩაიხედოს: თუ მისი სახე მომხიბლავია, მაშინ მისი საქმეც სახესავით ლამაზი უნდა იყოს. თუ სარკეში ჩაიხედავს და დაინახავს, რომ მახინჯია, კეთილი საქმე უნდა გააორკეცოს, რადგან თუ სიავეს ჩაიდენს, ავს ავი მოემბება და ორივე ერთად უბედურება იქნება.

– რჩევა-დარიგება მხოლოდ გულწრფელი მეგობრებისგან უნდა მიიღო და მრჩეველებს ყოველთვის განმარტოებით ეთათბირე.

– როცა ვინმეს სიგყვებს წაიკითხავ და შეისწავლი, ცოდნა ნუ გაგაამპარგავნებს და ნუ იფიქრებ ყველაფერი შევისწავლეო, თავი მაინც უსწავლელად ჩათვალე. ნასწავლი მხოლოდ მაშინ იქნები, როცა საკუთარი ცოდნის სიმცირეს შეიგნებ.

– რჩევის მიღებას ნუ ითაკილებ, რჩევის მისაღებად გამოცდილ მოხუცებსა და ერთგულ მეგობრებთან ითათბირე.

– იცოდე, ერთი კაცის აზრი ორისას ვერ გაუგოლდება.

– ცალი თვალით შეუძლებელია დაინახო ის, რასაც ორივე თვალით დაინახავ.

– თუ შენს ახლობელს რაიმე შეემთხვევა, მის დასახმარებლად ნურც თავს დამოგავ და ნურც ფულს.

– მგერსაც რომ დაეხმარო და გაჭირვებისგან იხსნა, მოსალოდნელია, რომ მგერი მეგობრად გექცეს.

– განათლებული და მჭევრმეცხველი ადამიანის სალამი დააფასე და მათ პატივისცემით მოეპყარი, რათა ისინი შენს სალამს უფრო ემშურებოდნენ.

– ყველაზე საწყალი ისაა, ვისაც არაფინ ესალმება.

– მჭევრმეცხველ ხალხთან მოლაყბე ნუ იქნები, რადგან ნასწავლ კაცს ლაყბობა არ უხდება.

– საუბრის წესები და მისი ავ-კარგი უნდა შეისწავლო.

საუბრის ავ-კარგისათვის

– სათქმელი ოთხი სახისაა: ერთია სიგყვა, რომელიც არც უნდა იცოდე, არც უნდა თქვა; მეორე – რომელიც უნდა იცოდე და კიდევ უნდა თქვა; მესამე – რომელიც უნდა თქვა და არ უნდა იცოდე; მეოთხე – რომელიც უნდა იცოდე და არ უნდა თქვა.

პირველი – ის არის, რომელიც სარწმუნოებას მოუგანს მიანს.

მეორე – ისაა, რომელთანაც დაკავშირებულია ქვეყნისა და სარწმუნოების სიკეთე და რომელიც ამ ქვეყნადაც გამოგადგება და იმ ქვეყნადაც, მისი თქმა და მოსმენა მთქმელსაც არგებს და გამგონესაც.

მესამე – ისაა, რომელიც შენი ბაგონის (უფროსის) ან მეგობრის ნაკლს გამოხატავს, ან შარიათითაც არ შეიძლება. ასეთი სიგყვა ბაგონის (უფროსის) რისხვას იწვევს, ან მეგობრის სიძულვილის, ან აყალ-მაყალის შიში გექნება.

მეოთხე – ისაა, რომელიც საღვთო წიგნებისა და მოციქულთა ამბებს შეეხება.

ამ ოთხი სიგყვიდან უმჯობესია ის, რომელიც საცოდნელიცაა და სათქმელიც.



– სიგყვა, რომლითაც ხალხს მიმართავ, რაც შეიძლება კარგად გამოთქვი, რათა დამაჯერებელი იყოს და ხალხმა შენი ღირსება შეიცნოს.

– ბრძენთ უთქვამთ: ყოველ სიგყვაში კაცი იმალებაო.

– ზოგიერთი სთქმელს ისე იგყვის, სულს გაგიმწარებს, მაშინ, როცა იგივე შეიძლება ისეთნაირად ითქვას, რომ სული გაგინათღეს.

– სიგყვა ყოველისშემძლეა. იგი ზეცისგან მოვლენილი ძალაა. სიგყვა ყოველთვის ზუსტი მნიშვნელობით იხმარე და ნუ დაამახინჯებ, რათა მეხსიერებას ზიანი არ მიაყენო.

– რასაც ამბობ, ნათლად გამოთქვი და უაზროდ ნუ იკამათებ. ყველა კამათში საბუთი გააზვიადე, ხოლო საკამათო დაამცირე.

– რაც არ იცი, იმაზე თავს ნუ გამოიღებ და ასეთი ცოდნით ლუკმა-პურის შოვნას ნუ აპირებ.

– რაც არ იცი, მით ვერაფერს მოიპოვებ.

– თუ შენ სიგყვას გასავალი არ ექნება, მსმენელს სურვილისამებრ ელაპარაკე, რათა ხათაბალას უვნებლად დაადწიო თავი.

– მჭევრმეტყველიც რომ იყო, შესაძლებლობაზე ნაკლებად გამოავლინე, რათა შუა საუბარში მშრალზე არ ღარჩე.

– მრავლისმცოდნე და მცირედის მოუბარი იყავი და არა მცირედის მცოდნე და მრავლის მოუბარი.

– ნათქვამია, დუმილი სიბრძნეა, ლაყბობა სისულელე.

– ლაზღანდარას, გინდა ჭკუით სავსე იყოს, ხალხი უჭკუოდ ჩათვლის, ხოლო როცა უჭკუო კაცი ჩუმად არის, მის სიჩუმეს დიდი ჭკუის სიმბოლოდ მიიჩნევენ.

– რაც უნდა წმინდა და უმანკო იყო, თავის ქებას ნუ მოყვები, რაც უნდა ბევრი იცოდე, მხოლოდ ის თქვი, რაც საჭიროა, რათა შენმა სიგყვამ განსაცდელში არ ჩაგაგდოს.

– იცხოვრე ისე, როგორც შენს წმინდა გვარს შეეფერება, შენი მოდგმა დიდია და სახელოვანი, მსოფლიოს მპყრობელი

მეფეების მონათესავე ხარ და რაიმე ხელობით ლუკმაპური იშოვე.

ავგორი იყენებს ორ ხერხს, ერთი რომ უშუალოდ შეილს მიმართავს დარიგებით და მეორე – მიმართავს საერთოდ ახალგაზრდობას, ყველას.

მეფე თუ არ იქნები, მაშინ ვაჭრობა აირჩიე, ან მუსიკოსი იყავი, ან მკურნალობას მოჰკიდე ხლი, ან სოფლის მეურნეობა შეისწავლე და სხვა.

ხელობის შესწავლას შეილს ნურავინ დაუშლის. ეს ნურავის ეთაკილება, რადგან ვაჟკაცობა და დიდგვაროვნება ხშირად ფუჭია.

გამა შვილს ასაკის თავისეპურებას აცნობს:

– კაცს ოცდათხუთმეც წლამდე ყოველ ღღეს ემაგება ძალღონე, 35-40 წლამდე, როგორც არის, ისე რჩება. არც იკლებს, არც იმაგებს.

– მზეც ხომ ასეა, ცის შუაგულს მიუახლოვდება თუ არა, სვლას შეანელებს, ვიდრე ჩასვლას არ დაიწყებს.

– 40-დან 50 წლამდე აღამიანი ყოველ წელს სხეულში ისეთ ნაკლს შეამჩნევს, როგორც წინა წელს არ შეუძნევიან.

– 50-დან 60 წლამდე ყოველთვიურად ისეთ ნაოჭს აღმოაჩენს, რომლის მსგავსი წინა თვეში არ უნახავს.

– 60-დან 70 წლამდე ყოველ კვირას ისეთ გკივილს იგრძნობს, როგორც წინა კვირაში არ უგემნია.

– 70-დან 80 წლამდე ყოველდღიურად ისეთი სენი დაეუფლება, როგორც წინა დღით არ განუცდია.

... და თუ 80-ს გადააბიჯა, ყოველ საათში ისეთი გკივილი და ურვა შეიპყრობს, როგორც ერთი საათის წინ არ ჰქონია.

– განა კმაყოფილი იქნება ის აღამიანი, რომელსაც ყოველ საათში ახალი საგკივარი და ურვა მიემძლავრება? ცხოვრების



ლაზათის მღვარი 40 წელია. თუმც კიბე ორმოცსაფეხურიანია, რაკი თავში ახვალ, სხვაგან წასასვლელ გზას ვეღარ იპოვი. რა გზითაც ახველი, იგივე გზით უნდა ჩამოხვიდე.

– შვილო ჩემო, სიბერეზე წუწუნი გავიგრძედე, რადგან ის ძლიერ მაწუხებს. სიბერე ჩემი მგერია და მგერზე თუ სამღურავს ვამბობ, რა გასაკვირია.

– ბეითი (ორსტრიქონიანი ლექსი)

რაგომ ვიკვირს, თუ სიბერის გამო მოვთქვამ,

დარდად მაწევს, დარდს კი კენესა მოუხდება.

– სიბერის სიმწარე მოხუცზე უკეთ არავინ იცის.

შვილო ჩემო!

– ეცადე, სიბერის ქამს ერთ ადგილას დასახლდე, რადგან სიბერეში ხეგიალი ვერაფერი სიბრძნეა, განსაკუთრებით, ღარიბისათვის.

– სიბერე და გაჭირვება – ორივე მგერია და ორი მგრის თანხლებით მოგზაურობას კი ჭკუათმყოფელი კაცი ვერ გაბედავს. თუ მოგზაურობა აუცილებელია და სახლიდან შორს წახვალ, თანაც თუ ამ მოგზაურობაში რაიმე სიკეთეს ნახავ, ეს უმჯობესია, ვიდრე კერასთან ჯდომა. მაშინ სახლისკენ ნუ გამოსწევ და სადაც შესაფერ საქმეს ნახავ, იქ დასახლდი და სამშობლოდაც ის ჩათვალე, სადაც გაგეძლებინება.

– ნათქვამია, სამშობლო მეორე ღედააო. მაგრამ ეს შენ ნუ გაფიქრებინებს, იფიქრე მხოლოდ შენი საქმეების აყვავებაზე, ბედნიერებს თვით ბედნიერება ეძებს, უბედურებს – სამშობლო.

– როცა დაინახავ, რომ შენი საქმეები კარგად მიდის და ხელთ სარფიანი საქმე ჩაიგდე, ეცადე, ეს საქმიანობა კარგად აითვისო. როცა საქმეებში წარმატებას მიაღწევ, გემეგის ძებნას ნუ დაიწყებ, რადგან მეგის გამოდევნებაში შეიძლება სულ ცარიელი დარჩე. კარგად შენახული ნივთის უფრო კარგად შე-

ნახვას ნუ ეცდები, რათა უკეთესი ადგილის ძებნაში ისიც არ დაკარგო. ცხოვრებას ამაოდ ნუ გააგარებ, თავი რიგიანად დაიჭირე!

– სხეული სადგომია, სული კი მდგმური.

– სულს სამი თვისება ახასიათებს: ცხოველმყოფელობა, მოძრაობა და სიმსუბუქე.

– სხეულსაც სამი თვისება აქვს, სიკვდილი, სიმშვიდე და სიმძიმე.

– ქონებას ძუნწის გარდა ნურავის მიაბარებ და ყომარბაზებს და ლოთებს ნუ ენდობი.

– ყველა კაცი ქურდად იგულე, რათა შენი ქონება ქურდისგან დაცული იყოს.

– თუ უფრო მეტი ფული გექნება, მიწა იყიდე, რადგან რასაც მიწას დაახარჯავ, უკანვე მიიღებ და ქონებაც მუდამ ერთ ადგილზე გექნება.

– ყოველგვარი გაჭირვების დროს ვალს ნუ დაიღებ, შენს ნივთებს ნუ დააგირავებ და, რა თქმა უნდა, საგვარეულოში ოქროს ნუ გასცემ.

– ვიდრე შეძლებ, ნურც სიმართლეზე დაიფიცებ და ნურც სიცრუეზე.

– მოგჯერ ერთი ნაკლი ათას ღირსებას ჩრდილავს და ერთი ღირსება ათას ნაკლს ფარავს.

– ადამიანის ცნობა მხოლოდ გამჭრიახობით და დაკვირვებით შეიძლება.

– გამჭრიახობის უნარი მთლიანად წინასწარმეტყველურ უნარს განეკუთნება. მის არსს ვერავინ ჩაწვდება, გარდა მოციქულისა.

– თუ ადამიანს სინჯავ, პირველად სახეს უნდა მიაქციო ყურადღება, რადგან სახე ყოველთვის დაუფარავია, განი კი ხანდახან. შემდეგ თვალ-წარბში შეხედე, მერე ცხვირსა და გუჩკბილებს დააკვირდი, ბოლოს თმა შეუთვალაიერე. ბუნებამ ადამიანის სათნოება თვალ-წარბში მოაქცია, სიკოხტავე – ცხვირში,

სიგებობა – გუბ-კბილში, სინაზე – კანში. თმა კი ყოველივე ამის შესამკობად დააწესა, ვითარცა სამკაული. თუ თვალ-წარბში სათნობა აქვს, გუბ-კბილში სიგებობა, ცხვირი კობგა აქვს, კანი კი ქორფა, ასეთი ადამიანი კაცია. დანარჩენი იდე-ალები ნუ გაგიტაცებს, თუ მთლიანი ისე არ იქნება, კობგა მაინც უნდა იყოს.

– ულაშამო მიმზიდველი სჯობს, სიკობგავეს მოკლებულ ლამაზს.

– სამი რამ არის უდიდესი უბედურება: 1. ცული მემობელი; 2. შეუფრებელი ცოლი; 3. ხელმოკლეობა.

* * *

– თუ ოდესმე ხელმძღვანელი იქნები, ღვთისნიერი იყავი... თვალი და ხელი სხვისი ჰარამხანისკენ ნუ გაგექცევა, უზნეო ნუ იქნები.

– მნებორივი სისპეგაკე სარწმუნეობის სიწმინდეა.

– ყოველ საქმეში შენი გულისთქმა გულისხმას დაუმორ-ჩილე.

– ვიდრე დაყოვნების საშუალება გაქვს, ნუ აჩქარდები.

– ვიდრე საქმეს შეუდგები, დასაწყისში გაარკვიე, როგორ დაასრულო ეს საქმე.

– თუ საქმეს ბოლოს ვერ უნახავ, ნუღარ დაიწყებ.

– ყოველ საქმეში ღმობიერი იყავი და თუ საქმე ღმო-ბიერებით კეთდება, სხვაგვარად ნუ მოიქცევი.

– უსამართლობას ნუ მოითმენ, ყოველი სიგყვა და საქმე სიმართლის თვალთ განჭვრიტე, რათა შეგეძლოს სიმართლის გარჩევა სიცრუისგან.

– მუდამ სიმართლეს ღაღადებდე; ცოგა ილაპარაკე და ცოგა იცინე, რათა ხელქვეითები არ გაგიტამამდნენ.

– ნათქვამია, ხელმძღვანელისათვის ყველაზე უარესი ქვეშევრდომთა თავხედობა და ახლობელთა ურჩობააო.

– ყოველთვის ღიღებული გამომეგყველება. შეინარჩუნე, რათა ქვეშევრდომთა თვალში ფასი არ დაკარგო.

– შენიანების სიცოცხლეს გაუფრთხილდი და სხვის მიმართ მოწყალე იყავი.

– უღმობელთა მიმართ ღმობიერებას ნუ გამოიჩენ და მათ მიმართ სასტიკი იყავი.

– ნუ გაშინაურდები და ყოველ წამს საჩივრისთვის ნუ მიმართავ.

– თუ შენი მოადგილე თუ თანამემწე ვინმეს შესახებ რაიმეს ჩაგაწვეთებს ყურში, ან რაიმეს გირჩევს, მოუსმინე, მაგრამ პასუხს მაშინვე ნუ გასცემ, უთხარი: ჯერ დავაკვირდეთ და შემდეგ როგორც საჭირო იქნება, ისე გადავწყვიტავ-თქო. ვინმეს ამ საქმის გამოძიება უბრძანე, გაიგე, შენთვის ეძებს სიკეთეს, თუ თავისთვის და, როცა ყველაფერს გარკვევ, სათანადო პასუხი გაეცი, რათა მან უსუსურად არ ჩაგთვალოს.

– ახალგაზრდა იქნები თუ მოხუცი, ყოველთვის მოხუცი ვაზირი გყავდეს... ამ თანამდებობას ახალგაზრდას ნუ უბოძებ, რადგან ნათქვამია: მოხუცმა უნდა გაუწიოს ლაშქარს სარდლობა. ჭაბუკი, რაგინდ დაოსგატდეს, ჭაბუკად დარჩება.

– თუ მოხუცი იქნები, უხერხულია, მოხუცს ახალგაზრდამ მისცეს რჩევა, ხოლო თუ შენც ახალგაზრდა იქნები და შენი ვაზირიც, ორივეს ახალგაზრდული ცეცხლი ერთად აიგზნება და ამ შეერთებული ცეცხლით ქვეყანა გადაიწვეება.

– ვაზირი უნდა იყოს სახიერი, დარბაისელი, ახოვანი, წარ-მოსადეგი და გრძელწვერა.

– თუ გსურს რომ არხეინად იყო, საქმე უნარიან კაცს დაა-ვალე.

ღმერთსა ვთხოვ შენთვის ყველა სიკეთეს, შვილო:

– საქმე მას ანდე, ვინც შეგისრულებს, მამა შეილს, მომავალ მეფეს, მიმართავს ღარიბებით:

– თუ ვინმეს მიმართ კეთილად ხარ განწყობილი და მისი პატივისცემა გინდა, თანადგომის გაცემის გარეშეც შეგიძლია ყოველგვარი სიკეთე უწყალობო, თუ შენი უმეცრების დამტკიცება არ გსურს, ნუ მისცემ მას შეუფერებელ თანამდებობას.

– შენი ხელმძღვანელობის დროს ბრძანების ათვალწუნების ნებას ნურავის მისცემ, თორემ შენც აგითვალწუნებენ.

– ხელმძღვანელობის მთელი სიამოვნება მბრძანებლობაა. ეს რომ არ ყოფილიყო, მაშინ ხელმძღვანელი და ქვეშევრდომი ერთი იქნებოდა. ხელმძღვანელი მბრძანებელია, ქვეშევრდომი – აღმასრულებელი.

– ვილაიეთი ისე მართე, რომ შენი ბრძანებები სრულდებოდეს, ანდა მასზე ხელი აიდე, რათა ისეთმა კაცმა მართოს, ვის ბრძანებებსაც შეასრულებენ.

– ქვეყნის წესრიგი დამოკიდებულია ბრძანების შესრულებაზე და თუ ბრძანება არ სრულდება, ქვეყანაში უწესრიგობა იჩენს თავს.

– ბრძანების შესრულება კი მართლმსაჯულების გარეშე შეუძლებელია.

– თუ გსურს, რომ საქმეები წინ წავიდეს, მართლმსაჯულებას ნუ მოადუნებ.

– სარდალმა ლაშქარს ხელქვეითებზე მბრძანებლობის უფლება არ უნდა მისცეს, რადგან ეს ქვეყანას დააქცევს.

– ლაშქარზე რომ ზრუნავ, ხალხზეც ისევე იზრუნე. მეფე ხელმძღვანელი მშის ღარია. არ ეგების, რომ მან ზოგიერთს მოჰყინოს სხივები, ზოგს კი არა.

– ქვეყნის ამშენებელი ხალხია, რადგან იგია შემოსავლის წყარო.

- უკანონობას გულში ნუ გაივლებ.
- მართლმსაჯული მეფის სასახლე დიდხანს იქნება აღმართული, ბოროტი მეფის სიმაღლე კი მალე დაემხოება.
- მართლმსაჯულება აყვავება, უსამართლობა – გავერანება.
- ისე არ გაიცინო, რომ ყველა კბილი გამოგიჩნდეს.
- მრისხანების დროს უშვერი სიტყვით არავის მიმართო.
- ეცადე, მეფობამ, თანამდებობამ, თავბრუ არ დაგახვიოს.
- ექვს თვისებას ნუ უგულებელჰყოფ: სიმტკიცეს (მომთმენელობა, ავტ), მართლმსაჯულებას, გულუხვობას, გამოსარჩლებას, სიღარბაისლეს, სიმართლის თქმას. ამ ექვსიდან რომელიმე თუ დაივიწყებ, მეფობა, თანამდებობა მალე თავბრუს დაგახვევს. თავბრუდახვეული მეფე თუ თანამდებობის პირი, მაშინ გამოფხიზლდება, როცა ხელისუფლებას დაკარგავს.
- მეფობის დროს დაინგერესდი ქვეყნის საქმეებით.
- მეფემ თუ თანამდებობის პირმა არ უნდა დალიოს იმდენი ღვინო, რომ ბანიდან ჩამოსვლა ვერ შეძლოს.
- შენ შენი ქვეყნის შესახებ ყველაფერი უნდა იცოდე. ესეც არ კმარა, სხვა ქვეყნების შესახებაც უნდა იცოდე, რომ ისიც იცოდე, ემეგობრო თუ ემტერო.
- ვინც გამარჯვებას იპარავს, ის მეფე არ არის (ალექსანდრე მაკედონელი).
- გამარჯვება გონებით, ან ბრძოლით უნდა მოიგო საბრძოლო მოედანზე.
- მეფობის ჟამს მიეჩვიე დიდი საქმეების კეთებას.
- სულმადალ მეფეს თუ თანამდებობის პირს დიდება არ ერგება.
- მეფე ყველაზე დიდია და ამიგომ მისი სიტყვა და საქმე ყველაზე დიდებული უნდა იყოს, რათა დიდი სახელი მოიხვეჭოს.
- დიდებას და სახელს დიდი საქმითა და სიტყვით აღწევენ.



მინის მუშაკისათვის

- თუ მიწა გექნება, სასოფლო საქმეების დრო დაისწავლე და იცოდე, საქმეში არ გამოიყენო, დროს ნუ გადააცილებ.
- უმჯობესია ხვნა 10 დღით ადრე დაიწყო, ვიდრე 2 დღით დააგვიანო.
- ერთი უღელი ხარ-კამეჩი ცალკე იყიდე, რადგან თუ ხარებს რამე დაემართება, თესვა შენ არ დაგელოდება და საქმეში ჩამორჩები.
- თუ მიწა თვით არ არის მაძლარი, ვერც შენ გაგაძლებს.
- მულამ მიწის კეთილსინისიერად დამუშავებაზე იფიქრე, რათა ამით კეთილდღეობას მიაღწიო.
- თუ ბაზრის ხელოსანთაგანი იქნები, ხელხვაფერიელი და ხელგამომავლი იყავი, რათა ბევრი დამლოცველი გყავდეს.
- ყველა საქმე თანამოსაქმეებზე უკეთესად გააკეთე და მცირედ მოგებას დასჯერდი, ერთბაშად 10 წილის მიღებას 2 გზის ხუთი წილი გერჩიოს.
- თანამოსაქმეებს ნუ ეჩხუბები და ნუ გაჯიუტლები, რათა ხელოსნობაში წარმატებას მიაღწიო, ხალხმა შეგაქოს და შენთან ივაჭროს.
- თუ რაიმეს ყიდი, „მძაო“, „მეგობარო“ პირზე გეკეროს და თავაზიანობა გამოიჩინე, ვიდრე შეგიძლია, უხეშად და უდიერად ნუ მოიქცევი. შენი თავაზიანობის გამო, მყიდველს წუნიანობა მოერიდება და ამით შენი სურვილი ასრულდება. თუ ასე მოიქცევი, ბევრი მეგობარი გეყოლება, სხვა ხელოსნებს თვალი შენზე ღარჩებათ და შენ ცნობილი და თვალსაჩინო კაცი გახდები.
- ყიდვა-გაყიდვისას სიმართლის თქმა წესად გაიხადე.
- ძუნწი ნუ იქნები და პურ-მარილი გიყვარდეს.
- შენზე ღარიბი დაასაჩუქრე, ხოლო ვინც შენზე მდიდარია, მას ნურაფერს თხოვ.

- ვაჭრობაში ბავშვების, ქალებისა და ნაცნობ-მეგობრებისაგან გამორჩენას ნუ ეძებ.
- ღირსეულთან ღირსეული იყავი და ვაჭართან ვაჭარი.
- სასწორი წესრიგში გქონდეს.
- შენი ოჯახის ორგული ნუ იქნები და შემოსავალს სხვაგან ნუ დახარჯავ.
- თანამოსაქმეებს ნუ შეაფიწროებ და ყალბ ნაწარმს ნუ გააკეთებ.
- მცოდნისა და არმცოდნისათვის ერთნაირად გაისარჯე. ყველაფერში ზომიერი იყავი.
- თავგებულადებული ნუ იქნები.
- თუ მეგობრისათვის სესხი გაქვს მიცემული და იცი, რომ ხელმოკლეა, წამდაუწუმ ნუ მოსთხოვ.
- გულკეთილი იყავი და ხალხი კარგ კაცად გიცნობს.

რაინდობისა და ვაჟკაცობის ყოფაქცევისათვის

- ადამიანს 3 თვისება გააჩნია: 1. გონიერება, 2. სამართლიანობა, 3. კაცობა. ვისაც სამივე გააჩნია, ღვთის რჩეულია. გონებაჩლუნგობა, ვნებათა ღელვა და სიავე ადამიანთა უმრავლესობას ჭეშმარიტების ამ გზას უხშობს.
- ამ ქვეყანაში არსებობს კავშირი მიწიერ და ზეციურ ძალებს შორის, თუმცა თავისი თვისებებით ერთმანეთისაგან განსხვავებულია, მაგრამ თავისი ხასიათით ერთმანეთზეა დამოკიდებული.
- წყალი და ცეცხლი ერთმანეთისაგან თავისი თვისებებით განსხვავებულია. ასევე მიწა და ჰაერი.
- როცა მიწა გახდება შუამავალი წყალსა და ცეცხლს შორის, კავშირიც დამყარდება. მიწა თავისი სიმშრალით წააგავს ცეცხლს, სიცივით – წყალს; წყალი სიცივით წააგავს მიწას,

სიმსუბუქით – ჰაერს. ჰაერი სიმსუბუქით წააგავს წყალს და სიმხურავალით – ცეცხლს. ცეცხლი სიმხურავალით წააგავს ეთერს, ეთერი კი ელვარებით მზეს, რომელიც მეუფეა. მზე თავისი თვისებებით ნივთიერთან დაკავშირებულია, ნივთიერის გარეშე კი ნათება არ ხდება. მზე მესუთე სტიქიას განეკუთვნება. ნივთიერი განგების სულთან არის დაკავშირებული, სული კი გონებასთან.

ბუნების ქმედით და ვნებით ძალებს შორის კავშირია დამყარებული. თუ ქმედითი მოვლენები ვნებით მოვლენებს არ ასაზრდოებს, მათ შორის კავშირი ირღვევა. ბუნებრივი ძალების თაღთან, ცის თაღი – ნივთიერთან, ნივთიერი – სულთან, სული – გონებასთან, ამგვარ კავშირში მიიჩნე.

– ჩვენი სხეული ცხოველმყოფელობით არსებობს, ცხოველმყოფელობა – სულით, გონებით.

– რაინდობასა და ვაჟკაცობისათვის დამახასიათებელია:

1. რასაც იტყვი, შეასრულე;
2. სიტყვასა და საქმეში სიმართლეს მიენდე;
3. საქმეში იყავი მომთხოვნი, გულღია, მამაცი, მომთმენი, გულწრფელი, მნებობრივად სპეცაკი, მორალურად მტკიცე;
4. საკუთარი კეთილდღეობისთვის სხვას ზიანი არ მიაყენო;
5. მეგობრის კეთილდღეობისათვის თავი არ დაზოგო;
6. ხელქვეითზე ხელი არ აღმართო;
7. ჩაგრულის ქომავი იყავი, განუკითხავისთვის – გამკითხავი;
8. გქონდეს რწმენა.

კიდევ ბევრი რამ შეიძლება ითქვას სკენდერ მასწავლებელზე, როგორც პედაგოგსა და პიროვნებაზე.

ჩვენ დავახასიათეთ ბატონ სკენდერ ბაჯელიძის მრავალფეროვანი ცხოვრება და სამაგალითო პედაგოგიური მოღვაწეობა. შევასრულეთ მისი „ანდერძი“. ამით მის მიმართ მოვიხადეთ ზნეობრივი მოვალეობა. რა შეიძლება ითქვას მის პიროვნებაზე აკუმულირებულად, ანოტაციის სახით?

ამაგდარი მასწავლებლის შესახებ ბოლო სიტყვის სათქმელად, მისი პიროვნების შესაფასებლად, გვინდა მოვიტანოთ დიდი ქართველი კლასიკოსი მწერლის, ნოდარ დუმბაძის მოსაზრებანი მასწავლებლის შესახებ. იგი წერს:

„მასწავლებლობა უდიდესი საიდუმლოს გამხელას უნდა ჰგავდეს. მოძღვარი შეგიძისათვის მისანი უნდა იყოს, მისანი, რომელიც მას ბუნების საიდუმლოებას ანდობს.“ ...
„ჭეშმარიტ მასწავლებლად ითვლება ის პედაგოგი, ვისაც შესწევს უნარი, სხვას გადასცეს ცოდნა და ისე შეაყვაროს საგანი, რომ განცვიფრებულმა იფიქროს, ეს რომ არ მცოდნოდა, რა მეშველებოდა, ჩემს ცხოვრებას რა ფასი ექნებოდაო“¹.

ამ ზოგადი ნათქვამიდან გამომდინარე, ჰუმანისტური მწერალი და ერისკაცი იმასაც ამბობს, რომ მასწავლებელი, მრავალ თვისებათა შორის, ოთხ საიდუმლოებას უნდა ფლობდეს.

1. უსაზღვროდ უყვარდეს ბავშვები;
2. უსაზღვროდ უყვარდეს საგანი, რომელსაც ასწავლის;
3. ჰქონდეს უნარი – ეს სიყვარული სხვასაც შეჰყაროს, როგორც სენი უკურნებელი;

¹ ნ. დუმბაძე, შთაბეჭდილებები, წერილები, გამოსვლები, თბ., 1984, გვ. 173.



4. იყოს უადრესად თანამედროვე, ჰქონდეს ცოდვა-მადლის, ანუ სიმართლის გარჩევისა და მოთმინების უნარი.

შხვანაირად ყველა მცდელობა იმისა, რომ იყო მოძღვარი ფუჭია, ყალბი და უშედეგო.¹

ბატონი სკენდერ ბაჯელიძე, როგორც პედაგოგი, ზემოთ დასახელებულ ყველა საიდუმლოს ფლობდა.

– მას უსაზღვროდ უყვარდა ბავშვები, მოსწავლეები; სკოლის დამთავრების შემდეგაც კურსდამთავრებულებთან არ წყვეტდა კავშირს, მათთან მეგობრობდა.

– მას უსაზღვროდ უყვარდა თავისი საგანი – გეოგრაფია, რომელსაც ასწავლიდა ახალგაზრდობას. კარგად ერკვეოდა სხვა მონათესავე დისციპლინებში, საზოგადოებრივ-პოლიტიკურ პროცესებში ჩახედული პედაგოგი ბრძანდებოდა. ეს იყო ქარიზმა, რითაც იზიდავდა მოსწავლეს, მსმენელს.

– მას ჰქონდა უნარი – თავისი სიყვარული ბავშვებისა და საგნისადმი სხვებისთვისაც შეეყვარებინა, გადაედო, როგორც უკურნებელი სენი. შემთხვევითი არ იყო ის ფაქტიც, რომ ბევრი მისი მოწაფე გაჰყვა საყვარელი მასწავლებლის პროფესიას, აირჩია პედაგოგობა, და რაც მთავარია, გეოგრაფიის სპეციალობა. ისინი გახდნენ სახელოვანი პედაგოგები, სკოლის დირექტორები, სასწავლო ნაწილის გამგეები თუ განათლების სხვა დარგის მოწინავე სპეციალისტები.

– დაბოლოს, ის იყო უადრესად თანამედროვე, ნოვატორული აზროვნების მქონე, მხარს უჭერდა სიახლეს, ვერ ეგუებოდა ფორმალიზმს, მოჩვენებითობას, იყო საქმიანი მასწავლებელი, უსამართლობის წინააღმდეგ მებრძოლი, უყვარდა სიმართლე, იყო ტაქტიანი, მომთმენი, ნებისყოფიანი პედაგოგი.

¹ ნ. დუმბაძე, შთაბეჭდილებები, წერილები, გამოსვლები, თბ., 1984, გვ. 173-174.

სკენდერ მასწავლებელი თავისი მისწერილი უნარით, იყო ახალგაზრდობის, მომავალი თაობის გზის გამკვალავი, ჩირაღდანი, ხელში ანთებული ლამპრით, გზას რომ უნათებდა შევირდებს. თავისი ზნეობრივი სიფაქიხით, სულიერი სიწმინდით, პედაგოგიური მოღვაწეობით და საზოგადოებრივი საქმიანობით გახლდათ მისაბაძი მაგალითი, ნიმუში თუ ორიენტირი იმისა, თუ როგორ უნდა იცხოვრო, როგორ უნდა იღვაწო, რა და როგორ უნდა აკეთო მთელი სიცოცხლის მანძილზე საკუთარი კვალის გასაწვლელი საქმე, რომ დაიმკვიდრო შენი ადგილი ამქვეყნად ისე, რომ შენს საფლავთან გამვლელმა ნაცნობებმა ჩაგძახონ: „აქაც კარგი კაცი იყავ, იქ ნათელი დაგადგეს“.

ასეთი იყო ჩვენი საყვარელი და დაუვიწყარი მასწავლებელი, ბატონი სკენდერ ბაჯელიძე.

ღმერთმა ნათელში ამყოფოს მისი სული... მისი საამაყო სახელი, მადლიანი საქმე იქნება ნიმუში, უწინარეს ყოვლისა, პედაგოგებისთვის და, საერთოდ, დღევანდელი და მომავალი თაობებისთვის.

წინამდებარე წიგნი აღიარებული მასწავლებლის, მოქალაქეობრივი თვისებებით შემკული პიროვნების ძეგლია, რომელსაც თაობები, საგვარეულო და სანათესაო წრე, კოლეგა-მეგობრები, მისი აღზრდილები შემოუნახავენ და გადასცემენ მომავალ თაობებს.

„კარგი ჰქენი, ქვაზე დადე, გაიარე, წინ დაგხედება“, – ესაა ცხოვრების სიბრძნე, რაც ყველა ადამიანმა უნდა იცოდეს და გაითვალისწინოს თავის გზასავალზე.



გამოყენებული ლიტერატურე და მასალები

1. ართმელაძე რ., სამშობლოს სახელოვანი შვილები, ბათუმი, 1972 (რუსულ ენაზე);
2. ახუაშვილი ი., ქართული გვარ-სახელები, ხუთტომეული, ტომი IV, თბ., 2001;
3. ბაგრატიონი ვ., აღწერა სამეფოსა საქართველოსი, თბ., 1997;
4. ბერძენიშვილი ნ., საქართველოს ისტორიის ნარკვევები, ტ. VII, თბ., 1997;
5. გიგინეიშვილი კ., ბერძნულ-რომაული საკუთარი სახელების ორთოგრაფიული ლექსიკონი, თბ., 1985;
6. გოგიტიძე ს., ქაშქა-აბეშლა აფხაზურ (აფსუა) ადიღური თუ ქართველური მოდგმა, ბათ., 2010;
7. დუმბაძე ს., აჭარის ავტონომიური რესპუბლიკა მეორე მსოფლიო ომის პერიოდში (1939-1945 წწ), ბათ., 2005; მისხივე სახელოვანი ხიხანელი, თბ., 2008;
8. დუმბაძე ნ., შთაბეჭდილებები, წერილები, გამოსვლები, თბ., 1984;
9. დუმბაძე ნ., დუმბაძე ს., ხიხანელი ხევისბერი, თბ., 2000;
10. თოფჩიშვილი რ., XIX საუკუნის მოსახლეობის აღწერა საქართველოში, თბ., 1997;
11. იოსელიანი ავ., ნარკვევები კოლხეთის ისტორიიდან, თბ., 1979;
12. კახიძე ა., მაილსი რ., ფიჭვნარი (კოლხები და ბერძნები აღმოსავლეთ სავიზღვისპირეთში), ბათ.-თქსფორდი, 2004;
13. მაისურაძე ი., ქართული გვარ-სახელები (სალექსიკონო-ბიბლიოგრაფიული მასალები), თბ., 1981;
14. ორბელიანი სულხან-საბა, სიტყვის კონა, თბ., 1941;
15. სამხრეთ-დასავლეთ საქართველოს ისტორიის ნარკვევები, აჭარა, ოთხტომეული, ტ. I-IV. ბათ., 2007-2012;
16. სილაგაძე ა., თოთაძე ა., გვარ-სახელები საქართველოში, თბ., 1997;
17. სურმანიძე რ., თეთროსანი, ბათ., 2007;
18. სურგულაძე აბ., პირველი ქართული სკოლა ხუცუბანში, ბათ., 1969;

19. ტბეთის სულთა მატეანე (გამოსაცემად მოამზადა გამოკვლევა და საძიებელი დაურთო თ. ენუქიძე), თბ., 1977;
20. უცხო სიტყვათა ლექსიკონი, მეორე გამოცემა, თბ., 1989;
21. ფშაველა ვაჟა, თხზ. თ. V, თბ., 1961;
22. ქართული ენის განმარტებითი ლექსიკონი, ერთტომეული, თბ., 1983;
23. ქართული საბჭოთა ენციკლოპედია, თბ., 1977;
24. ქამადაძე მ., ტოპონიმია, სამხრეთ-დასავლეთ საქართველოს ისტორიის ნარკვევები, აჭარა, I, ბათ., 2007;
25. ქეი-ქაუსი (დარიგებების წიგნი) თბ., 1978;
26. ღლონტი აღ., ქართული ლექსიკონი (ქართული გვარ-სახელები), თბ., 1964;
27. ჩუბინაშვილი ნ., ქართული გვარ-სახელები (აღ. ღლონტის რედაქციითა და გამოკვლევებით), თბ., 1964;
28. ჭუმბურიძე ზ., რა გქვია შენ, თბ., 1982;
29. ხალვაში ი., სკოლა ხიხანის ძირში, თბ., 2006;
30. ხოზრევანიძე დ., სკოლა მთაში, ბათ., 1958;
31. ჯაფარიძე შ., ორდენისანი ხუცუბანი, ბათ., 1969;
32. ჯაფარიძე შ., ხალხის სამსახურში (აღ. თხილაიშვილის ცხოვრება და მოღვაწეობა), ბათ., 2003;
33. ჯორბენაძე ბ., კობახიძე ნ., მესხიძე ნ., ქართული ენის მორფემებისა და მოდალური ელემენტების ლექსიკონი, თბ., 1988;

მასალები

1. საქართველოს პრეზიდენტის არქივი (სპა), ფონდი 14, აღ. 1, 1 A. 1676, ფ. 42;
2. საქართველოს სამოქალაქო რეესტრი, 2011;

პრესა

1. გაზ. „აჭარა“, 3 მაისი, 1989;
2. გაზ. „აჭარა“, 14 იანვარი, 19978;
3. გაზ. „აჭარა“, 1 ივლისი, 2005;
4. გაზ. „აჭარა“, 9 მაისი, 2006;
5. გაზ. „ბათუმელები“, 6-13 ივლისი, 2005;
6. გაზ. „ლენინელი“ (ქობულეთი), 19 სექტემბერი, 1970;
7. გაზ. „ხულო“, (ხულო), 26-27 აგვისტო, 2005.

ნიბნის ავტორები

სერგო ღუმბაძე

დაიბადა 1937 წელს, ხულოს რაიონის სოფ. ბაკოში. 1953-1956 წლებში სწავლა განაგრძო ხიხაძირის საშუალო სკოლაში.

1956-1961 წლებში სწავლობდა ბათუმის შოთა რუსთაველის სახელობის სახელმწიფო პედაგოგიურ ინსტიტუტში (ამჟამად უნივერსიტეტი). იყო ნიკოლოზ ბარათაშვილის სახელობის სტიპენდიანი. წარჩინების დიპლომით 1961 წლის 20 აგვისტოს შრომითი საქმიანობა დაიწყო მშობლიურ რაიონში. იყო სკოლის დირექტორი. 1961 წლის იანვრიდან მშობლიურ ინსტიტუტში (უნივერსიტეტში) მოღვაწეობს. და-



ამთავრა თბილისის სახელმწიფო უნივერსიტეტის ასპირანტურა, დაიცვა საკანდიდატო (1980 წ.) და სადოქტორო (2002 წ.) დისერტაციები. იყო ლაბორანტი, უფროსი მასწავლებელი. 1984 წლიდან დოცენტი, 2004 წლიდან საქართველოს ისტორიის კათედრის პროფესორი, შემდეგ კი სახელმწიფო უნივერსიტეტის ისტორიის, არქეოლოგიისა და ეთნოლოგიის დეპარტამენტის სრული პროფესორი, ამჟამად კი ემერიტუს-პროფესორია.

სასწავლო-პედაგოგიური საქმიანობის პარალელურად, ეწევა სამეცნიერო-კვლევით მოღვაწეობას. იკვლევს საქართველოს ისტორიის ცალკეულ პრობლემებს. 500-მდე წერილის, რეცენზიის, წიგნის ავტორია, მათ შორის, 60 მეცნიერული ნაშრომისა, მათგან 14 მონოგრაფიის. არის „სამხრეთ-დასავლეთ საქართველოს ისტორიის ნარკვევები – აჭარა“, მეოთხე ტომის ერთ-ერთი

ავტორი. მისი არაერთი ნაშრომი მიედგენა ღვაწლმოსილ ადამიანებს, მათ შორის, სახელოვან პედაგოგებს. წინამდებარე ნაშრომი, ნიკოლოზ ღუმბაძის თანაავტორობით, ასახავს მათი ერთ-ერთი საყვარელი პედაგოგის, აჭარის დამსახურებული მასწავლებლის, ომისა და შრომის ვეტერანის - სკენდერ ბაჯყელიძის ცხოვრებასა და პედაგოგიურ მოღვაწეობას.

ეწევა საზოგადოებრივ საქმიანობას. არის „აჭარის ღვაწლმოსილ მუშაკთა პატივმიზეზისა და მადლიერების საზოგადოების“ თავმჯდომარე, დავით მამულაძის სახელობის საზოგადოება „მოამაგის“ ვიცეპრეზიდენტი, რომელთა მეშვეობით, იაკობ გოგებაშვილის სახელობის საქართველოს პედაგოგთა კავშირის აჭარის რესპუბლიკური ორგანიზაციასთან ერთად, ატარებს სასარგებლო და საჭირო ღონისძიებებს, აღნიშნავს ღვაწლმოსილ მოღვაწეთა დამსახურებებს; მისი ინიციატივითა და რეკომენდაციით მიენიჭა დავით მამულაძის სახელი – ქვედა თხილვანის საჯარო სკოლას, სელიმ ხიმშიაშვილის სახელი – ბაკოს საჯარო სკოლას და შერიფ ხიმშიაშვილის სახელი – მთისუბნის საჯარო სკოლას, სერგო ჯაიანის სახელი – ხიხაძირის საჯარო სკოლას.

ბათუმის უნივერსიტეტმა (რექტორი პროფ. ალ. ბაკურიძე), თხილვანის ეთნოგრაფიულმა მუზეუმმა (დირექტორი შ. ბოლქვაძე), და მშობლიურმა თხილვანის საშუალო სკოლამ (დირექტორი ე. ბოლქვაძე), აღნიშნეს სერგო ღუმბაძის დაბადებიდან 75, სამეცნიერო-პედაგოგიური მოღვაწეობის 50 წლისთავი.

სერგო ღუმბაძე დღესაც ახალგაზრული შემართებით განაგრძობს სამეცნიერო-კვლევით და საზოგადოებრივ საქმიანობას.

ნიკოლოზ ღუმბაძე

ნიკოლოზ ღუმბაძე დაიბადა 1937 წლის 20 ნოემბერს, ხულოს რაიონის სოფელ ბაკოში. დაწყებითი განათლება მიიღო მშობლიური სოფლის სკოლაში, შემდეგ თხილვანის რვაწლიან სკოლაში განაგრძო სწავლა. 1956 წელს ოქროს მედალზე დაამთავრა ხიხაძირის საშუალო სკოლა და უგამოცდოდ ჩაირიცხა ბათუმის შოთა რუსთაველის სახელობის სახელმწიფო პედაგო-

გიური ინსტიტუტის ისტორია-ფილოლოგიის ფაკულტეტზე, რომელიც დაამთავრა 1961 წელს რუსული ენა-ლიტერატურისა და გერმანული ენის მასწავლებლის სპეციალობით.

ინსტიტუტის დამთავრების შემდეგ, ნიკოლოზ დუმბაძე თხილვანის საშუალო სკოლის მასწავლებელია, საიდანაც დაწინაურდა და 1962-1973 წლებში ჯერ კომკავშირულ, შემდეგ პარტიულ სამუშაოებზე მოღვაწეობს.

ნიკოლოზ დუმბაძემ თითქმის თხუთმეტი წელი იმუშავა აჭარის მინისტრთა საბჭოს მეცნიერების, კულტურისა და განათლების, აჭარის უმაღლესი საბჭოს საორგანიზაციო-საინსტრუქტორო განყოფილებების გამგედ. მუშაობდა საქართველოს საზღვაო სანაოსნოში, აჭარის მრეწველობის სამინისტროში, ბათუმის მერიაში, საზღვარგარეთ მცხოვრებ თანამემამულეებთან კულტურული ურთიერთობის საქართველოს საზოგადოების აჭარის განყოფილების რეფერენტ-თარჯიმნად.

ნიკოლოზ დუმბაძე იყო ხულოს რაიონული და ბათუმის საქალაქო საბჭოების რამდენიმე მოწვევის დეპუტატი. წლების განმავლობაში ეწევა ჟურნალისტურ და სამწერლო მოღვაწეობას. იყო ხულოს რაიონული გაზეთის „კოლექტიური შრომის“ რედაქტორის მოადგილე, რესპუბლიკური გაზეთის „სოვეტსკაია ადუარიას“ საკუთარი კორესპონდენტი, აქვეყნებდა სტატიებს და ნარკვევებს ადგილობრივ და რესპუბლიკურ ჟურნალ-გაზეთებში.

არის ხუთი წიგნის ავტორი, ორი წიგნის თანაავტორი, ოთხი წიგნის რეცენზენტი, ორი წიგნის რედაქტორი

ნიკოლოზ დუმბაძე დაჯილდოებულია მედლებითა და აჭარის ავტონომიური რესპუბლიკის უმაღლესი საბჭოს პრეზიდიუმის საპატიო სიგელებით, ჰყავს მეუღლე, ორი შვილი და ექვსი შვილიშვილი.

ნიკოლოზ დუმბაძე დღესაც აქტიურად მონაწილეობს ქვეყანაში მიმდინარე საზოგადოებრივ-პოლიტიკურ მოვლენებში.



წინასიტყვაობა	4
პირველი განყოფილება - გეოგრაფიულ-სოციალური გარემო, გვარის გენეალოგია და ეტიმოლოგია	9
§1. მისი სავანე	9
§2. სოფლის ინტელიგენცია	25
§3. ბაჯელიძეთა გვარის წარმომავლობისა და ეტიმოლოგიის შესახებ	52
მეორე განყოფილება – სკენდერ ბაჯელიძის ცხოვრება და მოღვაწეობა	67
§1. მშობლები	67
§2. ბავშვობა	76
§3. სწავლის წლები	79
§4. ცხოვრების მძიმე წლები	82
§5. ცხოვრების კარნახით გზა უმაღლესისკენ	87
§6. მუშაობა აჭარის „უცნობ“ მთიანეთში	90
§7. პედაგოგიური მოღვაწეობის გაგრძელება მშობლიურ რაიონში	110
§8. დამსახურებულ პენსიაზე	118
§9. დვაწლი დაუფასდა	134
§10. უკანასკნელი შეხვედრა ვეტერან მასწავლებელთან	144
§11. ვეტერანი მასწავლებელი ემზადებოდა 85 წლისთავის აღსანიშნავად, მაგრამ...	150
§12. ყველამ გულით დაიტირა იგი	152
სკენდერ ბაჯელიძე	155
მესამე განყოფილება – ხიხაძის რა დამავიწყებს	159
მეოთხე განყოფილება – კრისტალური სიწმინდის და მაღალი ზნეობის განსახიერება იყო...	
სკენდერ ბაჯელიძის 75 წლისთავისადმი მიძღვნილი საიუბილეო საღამოზე (1996 წლის 16 დეკემბერი) წარმართქმული მისაღმებები და მოგონებები	170

მისაღმებები	170
მოგონებები	181
მეხუთე განყოფილება – ვასრულებთ სკენდერ მასწავლებლის „ანდერძს“	207
მცირე განმარტებისთვის	207
ბრძნული შეგონებანი, კეთილი რჩევები	210
ცოდნის ფასი	211
საუბრის ავ-კარგისათვის	216
მამა შვილს ასაკის თავისებურებებს აცნობს:	218
შვილო ჩემო!	219
ღმერთსა ვთხოვ შენთვის ყველა სიკეთეს, შვილო:	223
მიწის მუშაკისათვის	225
რაინდობისა და ვაჟკაცობის ყოფაქცევისათვის	226
ბოლოსიტყვაობა	228
გამოყენებული ლიტერატურე და მასალები	231
წიგნის ავტორები	233

გამომცემლობის დირექტორი – ნანა ხახუტაიშვილი
 გამომცემლობის რედაქტორი – ლალი კონცელიძე
 ტექნიკური რედაქტორი – ელუარდ ანანიძე

ხელმოწერილია დასაბეჭდად 18.01.2016
 ქალაქის ზომა 60X84 1/16
 ფიზიკური თაბახი 14.8
 ტირაჟი 100

დაიბეჭდა უნივერსიტეტის სტამბაში
 ქ. ბათუმი, ნინოშვილის 35